

近代中國史料叢刊第二十七輯

沈雲龍主編

兩壘軒尺牘

吳雲著

文海出版社印行

本

墨

車

月

贖

蔭自少好金石之學平生所與商榷者沈文忠師陸星農師鮑子年丈李竹朋丈陳壽卿丈吳平齋丈數公而已吳丈以姻亞故於吾家爲密蔭弟祖頤丈女聳也十餘年來月必三四通問卽少亦一二往返也金石外無一語他及蔭長秋曹案牘事冗日不暇給始少疎然一年間亦音問四五癸未春蔭奉先君諱南歸而丈於正月十一日下世矣蔭僦居之屋與丈隣翰墨如新人已不可見矣悲夫二十年來沈陸兩師鮑李兩丈先後下世今惟壽卿丈在耳蔭自遭大故疾病侵尋經營窳窳杜門伏處不惟無與言金石者亦無暇及此旣歎逝者行自念也廣龕觀斁刻尺

牘成書之懽然不能已已光緒甲申三月吳縣潘祖蔭拜
識

兩罍軒尺牘目錄

以投贈先後爲次

歸安吳 雲愉庭著

卷一

葉東卿先生

一通

沈朗亭大司農

一通

王雪軒中丞

一通

宋雪帆倉侍

四通

喬鶴儕中丞

四通

王補帆中丞

一通

楊黼香太守

一通

許珊林先生

一通

卷二

錢警石先生

三通

許滇生家宰

一通

馮林一宮允

十三通

家曉帆方伯

一通

丁雨生中丞

二通

金逸亭廉訪

一通

李小湖廷尉

二通

許信臣中丞

三通

王荷汀觀察 一通

何子貞太史 七通

卷三

鮑子年觀察 八通

李竹朋太守 三通

馮竹儒觀察 一通

潘星齋少宰 二通

許仁山閣學 一通

金眉生廉訪 十一通

丁筱農觀察 一通

吳桐雲觀察 二通

家讓之明經 二通

戴禮庭司馬 一通

莫子偲孝廉 一通

沈韻初中翰 一通

朱春舫觀察 三通

卷四

蔡麟洲太守 一通

金香圃觀察 一通

曹愷堂李友琴諸君 一通

沈受恬茂才 一通

魏稼孫巖尹 一通

吳康甫明府 二通

杜筱舫觀察 五通

勒少仲中丞 二十三通

卷五

殷譜經少宰 二通

翁叔平大司空 一通

雷鶴皋先生 八通

潘季玉觀察 三通

程安德三邑稟請減賦公呈

應敏齋廉訪 十二通

宗湘文太守 六通

卷六

周縵雲侍御 九通

與絲業同鄉 一通

陸存齋觀察 七通

鍾六英太僕 六通

張岷堂觀察 二通

徐少青太守 一通

馮申之比部培之中翰二通

薛慰農觀察一通

卷七

薛覲唐中丞一通

李雨亭制軍一通

湘陰相國一通

錢子密吏部二通

俞蔭甫太史十四通

顧子山觀察四通

潘紱庭京卿二通

許星叔少宗伯 五通

彭訥生觀察 一通

潘順之侍讀 三通

徐頌閣少司馬 三通

張子青大司馬 七通

張菊垞觀察 一通

張同蘇司馬 三通

卷八

潘鄭盦大司寇 四十二通

卷九

陳壽卿太史 四十五通

卷十

家清卿奉常 二十一通

李香嚴廉訪 五通

沈仲復廉訪 八通

卷十一

李質堂軍門 一通

方蘭垞太守 三通

彭南屏太守 一通

趙粹甫太守 一通

楊見山太守 一通

吳晉壬太守 一通

趙惠甫刺史 六通

汪柳門侍讀 二通

家子恭明府 一通

吳冠英貳尹 一通

彭芍庭中丞 二通

潘譜琴太史 一通

王廉生農部 一通

江蓉舫觀察 一通

陳季平觀察 一通

沈彥徵觀察 一通

曾劼剛襲侯 一通

彭雪琴宮保 一通

潘偉如中丞 三通

周陶齋明府 一通

許星臺方伯 二通

高篙漁觀察 一通

徐花農太史 一通

魏槃仲郡刺 一通

徐篆香孝廉 一通

卷十二

庚辛拾遺 目次載本卷

吳門毛上珍局刻

兩巖軒尺牘卷一

歸安吳 雲愉庭箸

葉東卿先生

志誥

庚申秋間奉到手諭當肅復簡烽煙瀕洞未知曾否達到
深切馳系辰下敬惟福躬安泰精神強固爲頌

雲

罷職後

仍寓申江杜門養疾頗得從事翰墨合家自老母以下均
托庇平安惟囊無儲蓄食指繁多薪米僕賃之資不免如
韓昌黎之日求於人以度時月客冬承鎮江道府邀修焦
山志書於今春二月到山藉館修所入爲贍家之計從此
得爲太平幸民躬耕奉母於願已足不復再存驚外之心

矣去年將舊臧古銅印千紐印成數部茲乘許信臣姻丈
就養蜀中之便託爲帶呈誨定此書深以無從質正爲憾
吾師閱其序文能賜跋數行書以弁端榮感無旣前諭命
訪宋刊石林奏議聞舊在蘇州汪聞元家亂後莫知蹤蹟
此書關係師門祖典從前潤臣世兄亦曾託及容隨時留
心訪覓以副誣諉再雲所輯吉金款識一書擬爲積古齋
之續現已成稿計分十卷吾師舊臧各器拓本務求檢寄
此外如有劉燕庭吳荷屋各家臧器拓本亦望寄下如有
攷釋一并見示雲處搜輯未廣見聞又隘遺漏必多也雲
常在焦山卽或暫返申江山中亦有人招呼此後惠函可

無遺悞遂啓祺鼎

雲

擬卽載入焦山志內攷釋題咏並載

惟此器當年吾師攜置金山未幾賊至該山寺僧埋藏土

內迨至鎮江收復

雲

守此郡訪求得之而此鼎之獲保全

實金山寺僧之功不可沒也現在金山多兵勇駐宿此鼎無可度藏故移置焦山如師意以入焦山志書爲然祈付一示卽可照辦也

沈朗亭大司農

兆霖

十月杪接奉九月十八日鈞荅蒙指示南北用兵大勢及封疆情形冰鑒高懸無微不至於邸報中欣聞莊誦迴環欽感交至比於邸報中欣聞

朝端清肅政化一新明公晉陟

樞垣翼襄密勿佐

中興之盛治措六寓以乂安抃舞之聲殷於薄海辱在蔭末尤切軒輦南方軍務於前稟畧陳大概總緣兵成痼疾將少良材以致餉竭鎔銖效鮮尺寸此中委曲匪筆能殫至於假撫卹之名寓招徠之意原以羈縻反側解散逆援

藉線索常通悉賊中虛實果能乘其傾巢遠出銳師疾攻
內中響應者殊不乏人迺因備多力分兢兢防禦屢失機
會坐困一隅言之徒增浩歎上海自去年以來海舶商賈
貿易日形衰減而室廬櫛比街市殷闐則數倍於往日蓋
緣江浙被兵後蘇松杭湖數十郡縣之人民避難覓食者
羣萃於是遂至肩摩轂擊析玉炊珠氣象極似豐盈局勢
愈形杌隉天心仁愛或留此以爲克復江南之基乃日久
遷延迄無進步內憂外患均在意中浙垣自紹甯失陷徧
地賊氛杭城十門外賊營聯貫聞有數十萬之衆官兵祇
有鳳山門江頭三營屹然不動張璧田軍門疊次奮擊期

與城中相應迺逆壘重重竟難攻破璧翁血戰陣亡所部
尙未解散現歸況鎮統帶雪軒中丞與瑞將軍督率文武
竭力拒守月前祇餐一粥一飯自十月廿八日後內外信
息水洩不通滬上節次解濟銀米火藥因驚子亶不能進
去分泊黃道關等處昨又由趙守炳麟帶同夷目及滬勇
坐礮船前往期以必達不知能如願否杭城勢已萬急如
有蹉跌則湖郡亦孤立不能獨存賊將并力松滬東南全
局去矣從此餉源絕望恢復更難大府鎮日焦愁殊無善
策昨蘇常紳士偕同委員前赴曾營乞師曾帥允於年內
先發勁旅數千來滬保守餉源正二月間再行大舉合攻

但盼勝兵早到庶可藉以措持耳劉卯生農部係京職人員外省難以差委已爲代籌一館聊資敷衍洪蘇仲令親來晤知許英甫處館地明歲須得另就亦已爲之設法正月間可以到館並以附陳

王雪軒中丞 有齡

九月間奉到鈞答猥蒙垂示軍情竊見我師忠勤憂

國砥柱危疆強寇婁乘輒以少却衆伏戎欲起每消息未
萌惟撫循溥挾纊之恩斯士卒作同仇之氣德威所播遐
邇同欽辱在門牆尤殷鼓舞雲自六月杪始患唇疔繼患
腹瀉精神極爲狼狽適值奉到

廷議遂請假就醫並請交卸郡篆其時逆賊肆擾滬上戒
嚴遂力疾侍奉老母渡江至通州所屬之新河鎮避亂一
家數十口跽伏於菰廬之中地屬海濱不堪卑濕八九月
間白老母以下無人不病雲則前恙甫瘳復患疔疾直至

前月初始漸霍然以致稟函久缺心實歉悚滬上大府函
劄頻催且於克復雲間案內錄及微勞登諸薦牘現又專
弁敦促因將居行稍稍摒擋力疾到滬近日青浦嘉定等
處又添劇賊拒守此非懼我軍之進攻實防彼族之助勦
至可惜者閏三月間該酋鑒去年之敗心震沁邸聲威情
願助順息兵早定和局羣言皆以爲非而我師獨聽此議
時已開府兩浙不能力主其事當時失此機會固已鑄成
大錯迨至根帥到滬四月杪藉弭北釁一疏反覆敷陳利
害灼見柄鑿不行遂致決裂不可收拾此時南局已等于
土崩北事又類乎甌脫雖和議勉循而我心已啓該酋本

祇爲利議者不察釀成奇變追念往事正如唐生慟哭無
休時也現在滬上爲助順之議往復與商百般開譬尙無
眉目然江南兵勇見賊卽潰雖戚南塘復生亦難驟回錮
疾實已萬無可用矣回紇助唐契丹援宋明知後憂叵測
而事至無可如何古人爲救急之方不能不從權處置以
挽此殘局蓋兩害相形則取其輕也雲到滬後暫作逗留
因老母年高擬仍回江北度歲不知能如願否知關慈念
謹肅縷陳所望我師於軍政之餘稍節蓋勞勉加珍攝私
衷企禱神與筆馳

兩車戶用

久

六

宋雪帆倉侍晉

滿地烽煙久疎執訊正深馳想迺荷手翰下頒惶喜交至
浣薇莊誦仰蒙眷念舊雨畧分言情感激愧奮不律難盡
伏審德位兼崇身名俱泰幸甚幸甚雲待罪滬江積憂成
疾自春徂夏日與藥爐茶竈相爲周旋一室蕭然形影自
弔向辱明公知愛謹將兩年來所歷之境與所辦之事畧
陳梗概惟執事察之江南自庚申春大營潰散殿帥陣亡
蘇常本無防禦斯時如天傾地塌雖有智者亦無以善其
後矣不得已有乞援回紇之議希冀支此危局以待援師
議者謂爲非計中格不行迨至毘陵又陷事勢至無可如

何君青中丞特委雲馳赴滬江商借西兵詎申胥甫履秦
庭吳下遽聞楚炬神魂飛越身無可厝覲唐中丞以松滬
正在危急留商防堵事宜逆勢鴟張松郡旋又失陷中丞
特頒令箭劄委統帶水陸兵勇數止及千益以西兵百人
會同美國人華爾前往攻勦奉命於危難之間仰託福庇
兩旬卽報克復時因棲宿篷窗積受暑濕勞傷過甚一時
內外症交作萬分狼狽適老母避亂海門遂北渡就鑿原
擬息影菰廬奉母偕隱乃中丞劄頻催繼以專弁敦促
不能自匿於冬杪重赴滬江正以蘇常陷後商賈不通絲
茶各捐十減七八兵糈異常竭蹶當卽委雲辦理籌捐總

局諳諳以裕餉爲囑不得已督同委員擴充各項貨捐於
去年三月間開局殫五月之心力始得辦有成效綜計終
歲所入爲數已逾百萬淺水長流源源不竭現在滬上軍
餉頗賴此以爲挹注雲以經手銀錢近賦多嫌故開辦之
初卽稟請設立貨捐分局專司捐項出納絲毫不一涉手
兢兢自矢聊以副大府知遇毀譽由人心跡誓諸天日而
已叔裳本係世交親戚知其光景清窘去年開辦貨捐卽
委在塲灰卡當差藉薪水爲過度至冬間又請方伯札委
在會防處聽候差委本年春杪李中丞到滬委叔裳充當
撫院巡捕塲卡一差卽令伊弟候補從九名承管者接辦

叔裳人頗敏幹能作小楷亦能作畱將來加以閱歷可期
遠到勃谿一節早已夫婦如初矣今年三月間小女出閣
叔裳夫人曾到舍間人極端整蕭宅本貿易中人止此一
女嬌養成慣叔裳又少年情性致有雀角經此一鬧之後
彼此知錯近來頗爲和睦雲屬親串故知其詳執事關念
世好真同骨肉令人興感眉生去年之赴江北雲實贊成
其事詎經理甫有就緒而忌者已如麻而起卒至因公罷
官怨家又從而下石宋荔裳詩云君看太行險未足敵人
情爲之浩歎雲處境與眉生畧同惟不涉手銀錢較無後
患耳昨得眉生書知事已得白將來須赴曾相處完結曾

相廓然大公愛才如命眉生到彼當必易了賠款一層亦
只有待事結之後熟商辦理若真欲籌此巨款無論現已
罷官卽在從前眉生亦無此大力量也西人自法酋卜提
督陣亡與髮逆已有不解之怨現聞向彼國徵兵暑退秋
涼欲圖大舉昔郭李成中興之業回紇助之天若悔禍事
固有莫之爲而爲非人力所能主之也縵雲全家到滬曾
相邀辦文案因天熱定於八月間挈眷赴皖岷帆作古蓮
伯陷在郡城已經殉難其心緒亦可知矣風便尙求惠示
數行是所感禱

又

本年二月十一日奉客歲小春廿五日手書並左孟辛世
兄孫敬亭明府兩函謹悉壹是伏諗勛德兼崇台候萬福
屬交兩函當卽分別確致雲罷職後日讀誓墓之文常書
乞米之帖吾安吾拙無所縈心惟家無儲蓄食指繁多薪
米僕賃之資不能不學昌黎公之日求於人以度時月比
到焦山承常鎮道府款留屬修焦山志書藉館修所餘聊
佐家用且可以攬江山之勝白雲怡悅頗足慰情在滬時
屢辱當道念其爲識途老馬思欲棄瑕見錄雲自揣菲薄
旣脫樊籠得爲太平幸民終身奉母此願已足誓心已久
不復再作春夢婆矣眉生負經世之才侘傺更甚於雲言

之可歎雲 日內暫返申江江南北軍情民事想時有報聞
故不瑣贅風便還求時惠數行以紓飢渴

又

清和下澣曾肅覆牋託眉生轉遞未知何日上澈青覽雲
於本月朔日由焦山返滬滬上軍情自福山克復常昭解
圍日有起色比又中外合力連克太倉崑新乘破竹之勢
逆賊畏懼飛砲城中甚爲慌亂天如悔禍蘇常可望廓清
所恐鋌而走險江北完善之區愈形喫重此則可慮也去
歲底當道下訪時政雲 自慙菲薄且立志不入仕途無以
副其來意因舉從前減賦一議爲之剴切敷陳中丞極以

先從松江辦起爲是揆帥更志在必行而任其事者爲郭
筠仙觀察以馮林一宮允留心此事最久遂舉以相屬林
一力爲擔承本擬二月間卽可出奏因林一欲查取近十
年中除去歉緩實徵之數牽勻合算酌十年之通以定徵
數照此爲請是有減之名無減之實期免部駁因亂後檔
冊不全查核稽滯摺稿屢定屢改又有從中力主克復全
省歸於善後舉辦者故汔未繕發愚意以爲此舉必宜早
辦若待全省肅清恐多齟齬且自古壤地相錯賦則宜同
今蘇松之賦三倍於常州四五倍於鎮江較之江北各州
縣至十數倍不等今不敢引鎮江以及江北爲比請查照

常州科則一律定賦恩准之後未盡事宜候奏准辦理似
立言較有依據措詞亦覺得體況未遭兵以前酌十年之
通所徵本止此數今照常州定賦論虛額雖多論實徵仍
少司農掌天下度支茲事體大當必籌之已熟方今東南
陸沈瘡痍未復挽積弊而甦民困正在斯時執事飢溺在
抱現綜八省漕政眷顧珂鄉當亦亟盼此議之卽見於行
事也伏惟俯賜加察遇事扶持爲禱

又

四月杪暨五月初旬兩肅復函均託眉生廉訪轉遞未知
何日得達典籤深以爲念今夏南中酷熱異常敬維攝衛

起居順時諧暢雲施滬後杜門養疴藥爐茶竈與金石圖

書雜陳左右頗亦自安其拙也蘇松減賦一議大府於前
月十一日由驛具奏得蒙

特恩准照常鎮二屬核減定額永以爲例此真非常曠典
凡有血氣者莫不同聲感頌也查敝郡程安德三縣賦則
之重亦首禍於宋景定間賈似道行買公田法沿至元末
張士誠竊踞蘇湖明祖興兵畧地安吉長興武康於丙申
丁酉兩年先降而程安德清與蘇松兩府相距最久明祖
怒民附寇遂取官田租簿飭有司依額定賦故至今湖州
一府之中程安德三縣賦則之重數倍於安吉武康與蘇

松賦則之重數倍常州鎮江又同一律兩省志乘具在可
復按也伏念各直省漕政盡隸於執事今蘇松既沐
特旨起七百年相沿之積困而革除之

殊恩溥沛民已有出水火而登衽席之慶湖郡與蘇松毘
連賦額相等民困亦相同如天之福廓清有期億萬生靈
恐不能不翹首而望樾蔭之遠庇也至嘉興所屬亦在應
減之例從來言浮賦者必舉蘇松嘉湖蓋四郡同爲有明
仇怨地方故賦額並重也雲湖人祇言湖事他非敢及也
不宣

阿毘達磨

卷一

三

喬鶴儕中丞

松年

年餘未修音敬詹念道

欽遲實甚

雲

自去年罷職以後

謝絕酬應鍵戶讀書頗亦自安其拙祗因家無儲蓄食指

繁多薪米僕賃之資半仰給於二三親友韓昌黎日求於

人以度時月

雲

學行萬不敢希古人而窮境竊似之飢來

驅人不得已作惘惘出門之計本年二月間承緣仲小舫

香圃邀修焦山志書藉館資所入以佐家用亦不過慰情

勝無而已近輯續積古齋款識一書粗已成稿遲日當錄

副呈誨外古銅印存一部又近刻落水蘭亭帖一本敬奉

清賞

雲

日內擬暫返申江不及渡江一叩鈞顏深以爲歉

附上林一宮允書一通書中所云減賦一事客冬筠仙觀

察過訪

雲

正杜門不通賓客筠翁先倩潘季玉來寓閒談

旋即排闥而入談次詢及沙洲章程有人條陳謂清丈各

屬沙洲聽民繳價可得軍餉二百萬金中丞委筠翁與季

玉綜司其事擬設局於適中之地擇期舉辦謬以

雲

爲識

途之馬欲引爲指臂

雲

告以昔年曾侍明公左右籌辦此

事實嚴兼濟竭兩年之久僅得銀二十萬金不至釀釁滋

事固已煞費匠心矣今各沙洲非陷在賊中卽與寇氛相

接此時清理益難措手云能得幹員數人再寬以終歲之

期所獲亦無補於鉅款而毀局毆官抗勘聚衆皆在意中

千金之弩似不值爲鼯鼠發機至雲身本多病且老母年
高此後得爲太平幸民於願已足決不再登仕版因見筠
翁有廢然之色遂以昔年所議減賦一事反覆敷陳以副
來意蓋此本糧儲之責也筠翁極以爲然越日屬季玉索
取說帖爲疏其大畧復之原稿錄奉省覽愚見蘇松常壤
地相錯賦則宜同此時檔冊不全欲酌十年之通以定額
數斷不能鉤心鬥角絲絲入扣不如請照常州定額最爲
直捷立說亦覺得體此議當告林一而林一之意恐部中
以減數過多遭駁堅執十年之通爲斷筠翁亦主其說乃
輾轉稽查愈辦愈難遂致不能定稿林一信來亦以十年

之通窒礙雲答以此等大事總以速奏爲是只須聲明未盡事宜容督同司道隨時妥籌奏咨且俟奉到

諭旨再議其後不宜築室道謀因噎廢食刻得林一復書現擬以蘇松太三屬請徵五十萬石爲言核與照常郡定額不甚懸殊惟憑空立言不如有所依據之爲結實可恃也外與林翁一紙比致尊函中較詳附奉台閱仍乞擲還爲荷此事關東省億萬生民大局明公如有卓見何弗便中達之滬上自去冬聞明公有移節來臨之說甚盼鄙公早至登民衽席至雲已祝樊籠不復再受羈勒幸勿齒及賤名是所感禱

又

昨奉手諭深初存注仁審執事爲國宣猷身名俱泰幸甚

幸甚

雲

於月之初五日附緣仲都轉便舟到山山中紅葉

滿林較去時風景又一變矣緣仲赴江北勾當公事雲仍

寓三退樓中坐對江山俯念身世頗思專意靜修勤尋本

相但恐根淺志移致多障礙耳月初或到海陵定當摳謁

鈴轅面求清訓減賦一事前書所陳照常州定額者原以

常鎮科則雖比蘇松少至三分之二而年來辦歉辦荒積

習相沿久同蘇松一律今欲爲蘇松請減勢不得不將常

鎮暫置緩圖而彼都人士未悉用意自不能默默此實早

在意中故請援照常州定額冀以杜絕旁議當時景翁亦
采鄙言而摺內未經直陳今部議常鎮減十之一蘇松減
三之一並明知一百二十萬之數必辦不到特以民散田
荒開示通融法門所議亦尙平允似不如姑從其說留爲
異日盈縮地步而景翁志在廓清積弊欲從此爲一勞永
逸之計擬請覆奏亦不爲無見曾以摺稿見商雲告以卽
欲覆奏亦宜參以活筆蓋蘇松減三之一計存額固尙嫌
多而常鎮減十之一比之未亂以前徵數轉增將來如何
著手此不可不預爲之地也時勢所限積重難返非一人
之力所能獨撐耳鈞意以爲如何茲許信臣中丞從漢口

寄來一信特專差齎上內有盛守備卹典一事可否仰乞
卽賜飭承將咨文繕就擲交來差帶下因盛處有人在此
守取也不備

又

違侍多年跂戀之私時縈夢轂前者秋墅過蘇述及明公
有夏間來南之訂道路多梗正不知何日克踐此約方深
懸盼刻得石梅專函欣悉節麾由皖北起旱於前月廿八
日安抵維揚擬暫駐泰州城內聞信喜慰匪言可喻伏念
中原多故回捻交訌關中夙號形勝尤爲賊所覬覦乃頻
歲凶荒師旅饑饉迭乘紛迫公以一身砥柱其間內籌軍

實外殲強寇奠安輯備屹然爲西北雄鎮回揜之不能聯
爲一氣賴公搃其吭使不得逞耳偉哉厥勲固已遠近震
服中外皆知每於邸報中讀明公奏議知功績雖高積於
勞苦體中時有違和不審近日眠食何似車馬風塵不致
過於況瘁否曷勝馳系雲鍵關守拙匙善可陳本擬卽日
渡江敏謁面申積愆因日內邀董伴仙回家覆看先塋轉
棹時尙須到上海一行准出月下旬恭詣崇階一展戀悃
兼請騶從到蘇作匝月盤桓謹當掃除蓬茅懸榻以待兒
子承潞猥蒙提挈列諸薦剡惟有屬其循分從公加以勤
奮勉副明公期望現在聽鼓蘇垣奉中丞札委提調書局

兼隨辦洋務事宜上游相待尙好太倉一缺可以望補林
一宮允現居木瀆著述之外求田問舍而已足跡不常到
城小舫緣仲精神意氣尙如昔日獨雲齒牙脫落鬚髯皓
然他日公見之當亦訝其衰廢遽至此也知荷垂注用特
縷陳伏希鑒察不宣

又

昨讀付

兒子承澂

諭函猥荷垂注勲拳感幸無量久欲手

肅數行一申契闊因客夏感患臂疾屈伸不良艱於握管
又不欲倩人捉刀以寒暄上溷清聽坐是音敬久稽幸勿
爲過頻年來從邸報中讀公奏議備聞勲績知河政殷繁

綢繆於未雨之先經營於盤錯之際鴻猷丕煥倍極蓋勞
尙望爲國葆躬節宣善衛禱甚禱甚大箸蘿摩亭札記八
卷一由筱舫交到敬謹浣讀仰見考核明確識解過人舉
凡經史子集象緯輿地形聲訓詁金石詞章與夫方言土
俗古諺今謠莫不窮究其原委辨析其疑似而又明白顯
豁不以艱深炫博務使學者易知易解曉然得讀書稽古
之助沾溉藝林嘉惠來學洵非淺鮮敬服敬服便中尙乞
再寄一二部一贈蔭甫太史一付兒子承潞未知林一宮
允處已寄否如未寄恐見之亦必索也雲所患末疾今夏
得一丹徒包姓者以鍼法治之甚效惟蒲柳先凋精力日

益衰邁偃息菰廬之中叢殘書卷常與藥爐並陳日處其
間訓應久廢恆數月不一出門親舊憐其老病來而不往
亦不以禮節相繩尙得自安其拙

兒子承潞

仰蒙埏埴優

矚頻加自任事婁東已閱數載公事尙無隕越年來於屬
境水利尙知講求今夏南中亢旱幸得車戽有賴未至成
災現在冬漕已將蒞事堪以上紓垂注附奉拙箸彝器圖
釋一部敬求訓定做帚之言不足以塵大雅倘蒙明公於
退食之餘賜予披覽視其中或尙有一二可存惠以弁言
俾藉增重榮幸何如秦瓦拓本並呈清賞統希察入不宣

下身車片

一

一

王補帆中丞

時任浙江廉訪

前者伏蒙惠顧垂詢湖郡澗港情形亟欲振興水利如
檇味亦復屈尊降貴不棄葑菲仰見執事飢溺爲心虛懷
若谷蓋有鑒於兵燹之後溝澮湮塞陸岸摧圯設今不治
民無所賴起瘡痍而登之衽席計必以農田爲始夫水利
者農田之本而衣食之原也竊嘗考東南地勢本低湖州
尤爲窪下萬水所湊觸地成川就大要言之合郡之水發
源於天目諸山建瓴而下匯合於碧浪湖出東運塘醴而
爲渠者不可以更僕數要皆分洩各澗港以入太湖東坡
曰三吳之水瀦爲太湖太湖之水溢流吳淞江以入海歸

熙甫稱爲古今不易之論譬之人身各漢咽喉也太湖腹也吳淞等江尾閘也今欲導漢歸湖疏湖達江通江入海使之血脈貫通水無逆防非合兩省之力不爲功昔范文正云今之世有所興作橫議先至在當日已然況今中原多故邊塞未靖時詘舉羸恐成築舍不如先其所急擇要興工辱承明問謹就一得之愚疏於另紙陵谷變遷今昔異勢蹶滂之見必多舛漏懼無以仰裨高深良用慙悚惟高築圩岸一條雲籍隸烏程向經目讒客冬今春又兩次歸家省墓舟楫往來見有同一村莊甲圩被水乙圩有秋相距不一二里而豐歉迥判者詢之里老僉云去年霖雨

稍多一則圩岸高固障水一則單薄遭淹農民非不思培築無人爲之倡則相率因循耳東坡有言浙西水曠乃人事不修之積故胡安定教授湖州特設水利一齋所以爲水患計者至深遠也今者伏遇執事軫恤民艱勤求農政悲亂後之凋殘拯生民於墊溺所望膏澤立沛速賜舉行雲亦部民謹當虔葵瓣香從鄉耆老後爲執事上萬家生佛之頌焉臨穎不勝引領待命之至

一開濬宜先從北面起也各濬屬烏程者三十六合大錢小梅口三十八屬長興者三十六烏程之大錢爲湖城東北入太湖要道約二十里深闊通暢尙無淺滯由大

錢迤東至震澤縣交界之湖漚類多淤淺必須分別開
濬查各漚北通太湖北口乃其下流禹貢治水先治下
流大小一理故必先從北岸築壩耳水分段開濬以次
而南地勢水勢皆順

一開濬淺深須標識水則庶昭平準也張氏吳中水利全
書載宋宣和二年立浙西諸水則碑蓋以驗田之高下
設遇霖潦卽以量水之漲落各漚港淺深不一開濬丈
尺不得不隨地增減無水則以爲之準恐無憑測量難
期一律如式卽無以爲一勞永逸之計但採石立碑旣
需時日又多經費斷難猝辦辦亦遽難周徧今思一簡

便之法請通飭各邑儘境內石橋定於某日某時於石柱上各準平水橫泐一畫以起一則由下而上用工部營造尺每一尺爲一則遞增至七則止必於同日舉行者蓋水有漲落也此法不獨可以測水遇旱潦之年卽據以勘荒官民昭然共見胥吏無從隱匿裨益農政實非淺鮮其碑式繪於另紙備覽

一段估工派委員紳董稽察以杜弊竇也河之開深若干悉視水則無可爭執惟面闊若干可左可右或舊時坍岸爲居民占種桑枝阻礙水道董事徇情當開不開或挾嫌作難損傷房屋墳墓甚或得賄舞弊皆不可不

預爲之計應令總董總司其成分董分核其地而以委員爲之稽察估工既定卽責令承辦各濶土方多少不同分董以在濶歸濶爲宜毘連處或須會同籌議要亦各專責成不必攙越致多枝節

一興工宜待農隙也山鄉牛耕人力較易收穫亦早程安水鄉插秧在夏至後刈稻在立冬後而又有種麥種菜納漕納租之事須至十二月方可築壩戽水正月方可挑土而二月中又須趕緊完工一值清明則桑條將茁蠶事將興無暇工作矣

一用開河泥土培築圩岸也東南如蘇湖等處圩岸本來

單薄平時去水高不過二三尺廣不過尺許人單行猶側足間有隙漏婦豎持本杵探污泥以補綴之一遇淫潦溪水漲溢農民倉皇無計搬取門牕板壁以爲之障舟楫避路恐櫓搖水蕩岸坍塌也風勢稍緊農民呼天籲地哭聲振野眼見岸傾田沒而莫之救今以挑濬瀆港之泥卽爲培築圩岸之用前人成法岸高六尺基闊八尺面濶四尺以平水爲準務使一律杵槌堅固其距挑泥之所路途較遠則於田內取土其取土之田仍令箭泥填實按照全圩田數派錢給價宜豐毋嗇明人張鐸有言岸塍譬諸城郭也城郭堅則外寇不能入可謂

善喻兵亂以後各處圩岸更多坍塌必須趕緊培築一
圩固則一圩之農田先受其益去年霖雨實不過多而
水災何以甚重應請飭查某圩因何淹沒某圩因何獲
全便知圩岸之關係農田至爲喫緊不必侈談遠畧實
可收得寸則寸得尺則尺之功農民自顧身家剴切曉
諭斷無不樂於從事者

一各漚有橫港一二道均宜疏通也漚港直幹南北三四
里不等其間圩田圍繞又多橫港卽古溝橫洫縱澮橫
川縱遺意橫港不通灌溉不利且水漲時幹流峻急易
於潰岸道光九年疏濬漚港時亦未能一律疏通大約

有人煙處皆樂於開浚以便汲爨而空曠處不復注意
今開漚港亟宜一并疏通

一築閘口以謹啟閉資蓄洩也閘制起於北宋有豐登稔
熟康甯安樂瑞慶福懋和裕阜通惠澤吉利泰興富足
固益濟二十七名而皆冠以常字今湯家港之常登橋
許漚之常禧橋義舉之常裕橋陳漚之常通橋伍浦之
常樂橋猶存舊名道光九年重建閘板亂後俱燬閘夫
每漚四名向有公項存典生息由府發歸大錢司給予
口糧今成案已失須另籌款閘板之設所以備曠潦蓄
洩舊制必宜復也

一 菱蘆須剷除淨盡也小民貪小利不顧大害往往向地旁私放菱蘆日積月累充塞河道此惟澳之南口橫港爲尤甚亟宜剷除以通水道

一 澳口入湖宜一律改向東北也太湖三萬六千頃西北無山而風挾水湧能使倒灌者以西北風爲最猛泥水隨風而上卽爲淤滯之由惟口向東北則能避風舊制如是乾隆間誤將口門改直甚或改向西北以致淤墊日甚道光九年雖有仍改東北者尙未能一律如式今宜正之工不費事亦易集

一 傾圮橋梁亟宜修建也自經寇亂橋梁每被燬拆石落

河中礙舟阻水或改小橋門減去橋洞皆水利所關一
遇霖潦必至湧溢今當開濬之時宜飭董事各就地方
橋梁查明有傾圮者報官委驗分別修建疏水道兼以
便行旅 以上各條就烏程澗港言之昔吳越錢氏於
太湖旁設有撩淺軍專治田事而以都水使主之何等
鄭重故高國百年水災僅長興一次今不必輕言古制
然歲修之法實不可闕我

朝各府縣設有水利同通縣丞等官今則視爲具文積
習相沿無足責也誠能於疏濬之後嚴飭專管水利官
員各就所轄境內將河道已挑後能否無壅塞圩岸加

築後能否無坍損芟蘆剷除後能否無補放或按月或按季分晰詳報以憑查核再按春秋二季遴委幹員會同地方官覆查如有違越者傳集圩甲地保畧示懲勸督同整理果能實力奉行如此三年吳興水利農田似亦漸可望治矣至欲合蘇常沿湖各港瀆上自天目而溯源下至海口而竟委量高度深一律浚治尤爲萬世利賴此惟恃大力者爲之不敢輕議也


附水則碑式

碑立垂虹亭北之左右長各七尺有奇左碑橫爲七道道爲一則下一則爲平水之衡水在一則高低田

俱無恙過二則極低田澆過三則稍低田澆過四則
下中田澆過五則上中田澆過六則稍高田澆過七
則極高田澆如某年水至某則爲災卽於其則刻之
曰某年水至此值各鄉報災官司雖未及踏勘而某
等之田被災已預知於水則之中爲民牧者驗則以
得其實而虛冒無所容矣右碑分上下二橫橫六直
凡十二直直當一月每月三直直當一旬凡三十六
旬每旬驗水之漲落法如前

載東南水利略

橫道水則碑



直道水則碑



按吳中水利全書宋徽宗宣和二年立浙西諸水則碑凡湖陂涇浜河渠自來蓄水溉田通舟官爲按覈打量丈尺并地名四至均鑄之石偶遇水災官司驗碑早悉其實自水則失蘇湖數郡遇水災胥吏借勘

下臺車月片
卷一
三二
災而百弊叢生矣沈江村曰吳江二碑石刻甚明正
德五年猶及見之其橫六道中刻宋淳熙三年水到
此七道中刻元至元二十四年水到此正德五年大
水城中街路皆不通往來稽其碑水到六則與宋淳
熙同則元之水猶過也今石尙存而宋元字跡與橫
刻之道盡鑿棄矣止有減水則例四字亦非其舊今
又數百年誰復問有水則哉苟能修復水則以驗田
之上下旣杜勘災不實之弊卽以興水利也

楊黼香太守 榮緒

前月杪接奉手書莊誦再過實切欽佩蒙諭程屬各濶旋
開旋淤止有歲修一法庶可補救否則雖開濬迭興亦難
免淤塞等因仰見明公軫念民艱欲籌歷久不弊之規以
收一勞永逸之利虛懷旁采下及芻蕘如雲檇昧懼無以
上副垂問捧諭傍徨莫名惶悚查湖郡山水滙湊向稱澤
國自吳越錢氏興修水利有都水使者統率掠淺軍專治
其事竭力經營故有國百年水災罕見由趙宋以至有明
言水利者各有專書單邾諸賢最爲較著張氏吳中水利
全書尤稱詳備近日同鄉凌少茗著東南水利畧於吾湖

水道原委俱經目驗頗能切實講求今不必遠徵前事第就乾嘉百餘年來言之蘇浙兩省之於水利疏濬已不下數十次乃未幾而淤塞如故從未聞有議及歲修之法以善其後者今何幸得從明公發之此殆天祚吾湖篤生碩彥爲斯民永甦墊溺之困雲亦部民能無感幸謹就管見所及分列八條疏於另紙以備采擇此第言其大畧而條分縷晰因地制宜雲離鄉已久未能周知尙望明公就近賜商纒雲侍御及存齋觀察鈕徐兩孝廉總蘄臻於盡善可以持久以仰副大君子澤民盛意比因病臂握管殊艱力疾肅復臨穎皇恐皇恐

再目前經費支絀條議中請籌四萬串殊非容易然農田水利實爲地方第一急務鄙意在絲捐之外別無可籌明公愛民如子爲士商所悅服倘蒙諭知絲業董事屬令熟商辦理必能仰體仁心襄成善舉欸項得以擴充則於北塘河工程亦大有補裨統望裁奪不宣

一專責成現在各府縣有水利同通丞簿等官本專爲治河而設今則視爲具文試叩以水道情形茫然莫知所對積習相沿無足深責今於疏濬之後責成該管水利官員會同總董按照水則將各漚港淺深濶狹按季詳報定春秋二季委員履勘以昭核實

一立水則張氏吳中水利全書載宋宣和二年立浙西諸水則碑蓋以驗田之高下設遇霖潦卽以驗水之漲落如能仿照古制採石立碑固爲盡善否則請通飭各邑儘境內石橋定於某日某時各準平水於石柱上橫泐一畫以起一則由下而上用工部營造尺每一尺爲一則遞增至七則爲止必於同時舉行者蓋水有漲落也此法不獨可以測水遇旱潦卽可據以勘荒裨益農政處甚鉅

一慎啟閉各漕向有閘壩所以脩旱潦資蓄洩其閘夫經費亦有定額歸大錢司領發日久弊生無可追問今籌

善後必須將每濃閘夫酌定認真經理查各濃情形迥不相同有船舶進出極多者有終月而絕無進出者倘比而同之一律額設閘夫幾名則啟閉不時勞逸懸絕人心不服斷難持久必得按照各濃情形由總董會同該管官悉心區畫以昭平允

一酌津貼從來辦事無經費必不能責其認真出力應請將該管官員常年夫馬錢酌貼若干總司支放司事薪水若干閘夫工食若干一律釐定總以格外撙節爲主

一示懲勸此次各濃港開濬之後其閘座插板必須一律修整菱蘆有礙水道者必須督令剷除淨盡圩岸坍塌

者必須勸諭培築堅固此該管官之責也固能認真經理著有成效應請酌予獎叙以示鼓勵其查有漫不經心廢弛不治者亦應酌量示懲

一定歲修此次壬申年各澳港開浚之後果能於閘座門慎司啟閉以防西北風泥水倒灌當不致甫開卽淤應請酌定年分限幾年一大修其常年則仿撩淺之法飭令該管官會同紳董每至冬令水涸之時遇有淺塞處雇夫疏淘或卽督令該閘夫承辦惟須在常年工食外酌貼飯食錢庶能踴躍趨事夫役之多寡臨時酌定一籌經費計常年各項經費每歲約需以二千串爲率請

籌錢四萬串發典以每月一分生息一年得四千八百串以六年計得錢二萬八千八百串或卽定爲六年一大修查本屆開浚已比各上屆認真然總爲經費所限實未能一律如式深通再得六年一興工重浚必能加濶加深從此永無淤塞之患此爲善後第一要著

一嚴稽察事必慎始而後可圖終關涉銀錢之事一經胥吏之手恐不免百弊叢生不能不責成總董司事現當發軔之始經辦者皆屬公正謹慎之人固無他慮而日後接替者賢愚勤惰均難預必所有支放經費或按季或按月必須榜示通衢由總董知照該管官報明查考

至年終刊刻徵信錄一通永絕浮議

又

再吳興水利本爲農田命脉所關執事痾瘳在抱懃懃下
計此東南蒼生之福不獨桑梓蒙澤已也竊聞此時議濬
碧浪湖及各漚港此誠當務之急第念經費支絀恐籌辦
諸多掣肘善舉亦因而中隳此不可不先爲之計也愚昧
之見與其省費而急求了事不如籌定款目然後舉行以
期一勞永逸查烏程所屬三十餘漚大約西路如大錢等
處皆尙深通再加疏濬洩水便暢迤東自蔣漚至胡漚冬
令水涸之時竟有湮成平陸港底可以行路者必得大加

挑濬方能有濟管見以挑河之泥培築圩岸務使高厚堅固此爲近裏著己之法並望飭議舉行側聞執事擬仿海忠介之屏去僭從輕舟巡諭羣黎歡慶舉將藝香尸祝頂戴無窮

舍姪承泠

閱歷尙淺如有驅策尙乞愷教爲懇再

各漚自遭兵亂土著殷實者皆屬燼餘集資之難合邑共知今欲興辦工程非寬籌經費不可大約只有從湖絲一項想法而絲捐稠疊亦未易措手然舍此恐別無可籌率爲數尙不過鉅得六萬串當可集事查湖絲散出於各漚及他鄉鎮而買賣交易則以南潯爲綜滙大宗該處紳董如龐公照蔣堂邵棠陸長春劉鏞諸人向來辦事平正諭

令於湖絲市內公同熟籌將來如可發款興辦卽由該董
等會同濃上紳董妥商辦理務使事歸實際費不虛糜開
工之後必飭將支放用數榜示通衢俾曉然於滴滴歸公
毫無侵蝕浪費庶出而籌捐者亦樂於從事鄉民亦可踴
躍赴工如春間趕辦不及改於秋冬興辦此數世之利惟
執事是賴臨穎禱切

許珊林先生 楹

前月奉到手諭敬審杖履沖和精神彌勝蒙惠法書屏對各件益徵腕力道健奄有兩京風格張諸座右奉爲楷模感幸無已承示弄臧圖籍盡付劫灰現在帶至寓次尙有十六厨另有寄存西莊錢宅者十厨兩箱大率金石小學兩門居多字畫止卷冊數件吉金惟商周二鐘劫後所贖如是而已聞之稍釋懷系蓋所失雖多得此亦慰情勝無也姪所必注者惟大箸說文彙箋一書今得全稿無恙此中殆有鬼神呵護當日姪與筱漚力請先繕清稿以次授梓並願相助爲理而長者以千秋盛業不肯遽出示人致

有蹉跎今則江湖滿地彌望烽烟學問一道未暇遽議及此言之一歎承索拙著金石記此書當年爲家讓之

熙載

所錄刻者柏姓專鐫讓之手寫詩文推爲妙手故能轉折毫芒一絲不走至紙印裝釘之法汪嵐坡皆秉承長者指授頗稱精緻癖亦敝帚自珍不輕以投贈乃庚申變起家藏書籍碑版與拙著各稿竟蕩焉泯焉無隻字獲存亂後寓滬凡蘇杭嘉湖流傳書畫金石都集於此懸金訪購舊臧既有收回新得又復不少金石記止收得二部又從姚子貞親家處索回一部共有三部今長者所需不敢自匿敬奉呈一部伏乞鑒收齊侯罍釋文多有同異罍釋爲虺

器定爲鉞長者所釋與何子貞兄意見相同而直指爲齊
景公之器則惟長者發之他日擬刻專書謹當備錄也雙
鉤華山廟碑工竣知必見賜竊願先覩爲快也

兩疊軒尺牘卷二

歸安吳 雲愉庭箸

錢警石先生 泰吉

違侍以來時殷馳仰一昨金明府交到本月初六日手諭發函莊誦伏審杖履沖和著述益富欣慰無量蒙示半閒堂玉枕蘭亭舊爲先文端公所臧當時寶愛不輕椎拓後來原石遺失或謂已入

內府並引林吉人趙晉齋及文端公各跋見示屬攷其流傳原委 雲 謝劣不足辱長者垂問且家藏契帖二百餘種十年來兩遭兵燹所存僅十之一二內如縮本蘭亭積至

三十餘種無一獲存書籍又復散失無從援證謹就平日

所知約能記憶者為長者陳之乙巳年謁選入都陳壽卿

太史贈雲玉枕蘭亭一本前有右軍坐執書卷小象云為

錢塘戴醕士侍郎所貽原石在杭城故家逾年需次蘇垣

同官諸子良別駕嘉果亦以拓本見贈云原石在杭城伊

親戚一老婦人處約記汪姓為欲售值為養老資索五百

金時以價昂置之前說皆在二十年以內是玉枕蘭亭原

石未亂以前之在杭城彰彰可據或謂已入

內府當是玉版十三行之誤玉版十三行葛嶺出土歸翁

入內府嘗攷王虛舟吏部題跋載玉枕蘭亭石高五寸闊九

寸厚三分色青黑遠望如墨叩之琅琅有聲傍角有微闕
內會羣流帶右五字剝損蓋當時用定武五字損本上石
者背有右軍象明末在陳盤生家康熙壬子秋爲閩中蕭
長源給諫所得時耿逆方鎮閩欲取之蕭斬固不與後耿
反蕭遂遇害其子靜君金壇倪氏壻也攜此石來奔性命
守之今尙在也余以宣德紙窮日之力精拓一本以爲枕
秘而書其原委得失之詳又引太平清話載賈秋壑得定
武蘭亭使廖瑩中以燈影縮成小字令工王用和以靈壁
石刻之經年乃就訓以武爵雲按吏部金壇人原石又稱
親見所言必確林吉人趙晉齋各跋或卽本此亦未可定

至第十五行押縫爲曾爲僧雲舊時臧本翻刻者記有五

種海寧蔣生沐上海徐紫珊兩本最易亂真二君皆雲故

交蔣本屬胡衣谷刻衣谷父子常往來寒家凡有刻本無

不攜贈當時不甚愛惜隨得卽度高閣不復記憶今衣谷

之子號心農者在滬云石尙在伊家將來可拓也徐本屬

吳中詹紫雲刻紫珊故後石流轉至蘇雲購得之命木工

製座如小石屏風式與鍾紹京書維摩經殘石同爲几案

陳設石爲阮文達所臧曾用陷在蘇城并墨拓亦不可得

矣前日紫珊之子賓之茂才適以其先人所刻春暉堂各

種法帖丐求題跋尙留在案頭玉枕本亦在其內因爲詳

審押縫字作曾上下有鋼釘紋四第一行會字闕二行蘭
亭二字三行羣字地字五行帶右流三字九行盛字十行
遊字均有小泐痕十七行感慨字斜泐至十八行陳字而
係字無損前有右軍執卷坐象標題晉王羲之象五字後
有賈如道印四字小方印上下有釘紋三紫珊自題云玉
枕蘭亭現在杭州爲閨閣所藏求拓本不易得因屬詹君
肖樵於石題在道光乙巳三月亦可爲玉枕蘭亭在杭之
一證又按張亦未題王大令十三行詩云玉枕卷留太傅
題自注玉枕蘭亭錢文端公家
藏余得一拓本有公手題生沐卽從此本翻刻也原
石現無鞞蹟亂後恐歸浩劫矣長者近於皖城購得拓本

未識字文損泐處與徐本同否所惜山河修阻不能面聆
教言臨穎實深依系風便還求時惠數行俾資發矇禱甚
幸甚

又

前月初奉八月廿二日手諭蒙示王虛舟竹雲題跋舊有
坊本未見論玉枕蘭亭一條或所臧坊本遺漏不全抑或
見之他處跋語中損書下詢時爲九小兒就親泰州正欲
啓行匆匆未及裁答歉悚無已玉枕蘭亭前人箸錄中不
多見獨王吏部辨析最精虛舟竹雲兩題跋皆有攷證特
照錄奉鑒此書始梓於錢壽泉司馬後經溫氏一齋重刻

司馬始梓之本姪處舊有者已付浩劫現在二跋從溫氏
本錄出也李筱石聞已到皖帶呈信件諒蒙垂覽完白山
人字跡姪處尙有存者無煩另購也

又

比奉十月望日手諭敬審杖履康健道味加腴惟聞秋涼
以後嗽疾小發刻下想已霍然實切馳念姪秋間小住焦
山閱三月返滬明春二月間仍須前往以焦山志一書尙
未卒業也昔人謂山中佳勝在杏花紅葉之時姪廿載風
塵尤悔之來總由自取此後山居歲月但期多讀有用之
書不做疚心之事或可收之桑榆稍蓋末路之愆蒙詢王

翦林跋蘭亭年月前書詳覆並將翦林原跋鈔呈此書由
縵雲侍御轉交計前月初必可達覽衣谷於九月間避難
到滬暫寓姪處昨渠得家信知家中房屋爲賊焚燒光景
累極幸穗生道況尙好勉可支持生沐處英光原帖已付
劫火刻石尙在將來當可拓奉也玉枕拓本一紙係從衣
谷索得者卽徐紫珊覆刻右軍象已失去其石本在寒齋
後陷蘇城現託人在蘇購覓能否珠還未可必也

許慎生冢宰 乃普

蒙賜宋拓張猛龍碑歡欣實愛感何可言姪向愛收臧六朝碑版兵亂散失過半張猛龍碑舊有臧本頗自秘惜亦同歸浩劫茲蒙遠貽古拓精本重以椽筆題識並有退谷諸家跋語較之舊臧更勝姪嘗謂北魏書律見之墨拓者筆力之勁健結體之峻整無過鄭幼麟張猛龍兩碑惟字多杜造卽如張碑神囙囙字已屬通借江鄭堂跋云詳玩碑文作囙囙淵字也名猛龍所以字神崩姪攷字書並無囙字其訓淵不知何據王蘭泉金石萃編云細驗搨本只字之上有口形疑是囙字之別體古淵字也其意以爲南

北朝每多世俗創造之字或囙字作囙字寫耳此王氏臆說似難援以爲證且此碑極有章法只字已居口字之中若只字上再加口形未免疏密失勢與通碑字體不類況明是泐痕墨本具在不難一覆按也退谷云囙呼骨切日出氣也與龍字亦有關合應從之鄭堂所云囙崩字也豈卽主王氏說耶抑別有所據謹抒管見呈質大宗工訓定

馮林一宮允 桂芬

前日奉手畢尙未裁答昨承枉顧又失倒屣罪甚罪甚辱示大箸已披讀十數篇洵爲經世大文掾時良藥恐亭林先生亦當讓席餘子無論矣韓子曰用功深者收名也遠可爲大箸決之惟間有語涉太激過觸忌諱處俟讀竣再申鄙說以盡一得之愚內繪地圖一篇蒙一決其可行與否弟反覆讀之再三紬繹復又參讀均賦稅議雖畧識端倪終以未諳算法莫窺竅奧然減賦之議成則履畝清丈實關緊要管見或請大府先將圖說行下府縣飭令依法試行果得通曉其義則推而行之爲用甚大無窮利益也

至照常州起科一節鄙意請兩存其說者蓋因十年比較之數乃未遭兵亂之數今地方初復田荒丁少元氣大傷農部准減之後責令照數起徵目前尙有詞可措三五年後不能如額恐仍不免開冒歉捏災之弊不可不慎之於始蘇松常鎮壤地相錯今不敢引鎮江爲例而請照常州起科卽以兄前日面議云云爲詞縱不能邀准亦似不致因此轉遭駁斥且雙請聽農部定議亦屬得體或以此二層會商筠翁請兩大府酌定仍候裁奪所諭荒田或有二三成一說弟略記舊荒三畝作一畝併入額征數內若欲將坍荒請豁須得另案辦理未便羈混大約照十年比較

之數大譜總在五成所少亦殊有限錢糧細數外省與部
中向有參差得其大略即可據以入摺也先此布復不宣

又

連日伏讀大箸綜貫經史旁采百家文止四十篇而天文
地理官制田賦水利河渠鹽漕軍旅以及柔遠之方自強
之術凡關民生國命者莫不溯本窮源詳攷得失而又志
在匡時心蘄實用憂天閔人之意忠君愛國之忱溢然流
露於字裏行間此通儒之學抑亦王佐之才也苟能上達
朝廷見之行事舉當世之秕政斟酌而變通之拯溺扶衰
洵非小補況如汰冗員免迴避許自陳復鄉職變捐例利

淮鹽收貧民復宗法重儒官廣取士製洋器善馭夷諸篇皆按時勢以立言慮周識遠意美法良非迂闊難行者比撥亂世而反之正是在當局者之善采其說也云 禱昧不學烏足以定兄文廼辱知愛過深忘其固陋屬爲商權不敢自外謹將尊箸篇目重繕別紙間有瞥見附注於篇目之下涓水纖塵斷無補於海岱仍請釐正幸甚幸甚抑再有陳者從來忠憤鬱結於中矢詞每多切直賈生之當漢文時尚不免痛哭流涕處今日而慨論時事言之過激固有不及自檢者閒嘗瀏觀載籍昌黎眉山千古大儒皆以文字召謗禍幾不測黃魯直承天寺塔記初無幸災諷刺

之詞乃爲陳舉所訐羈管宜州方今

朝政清明賢輔在位求言正切原無忌諱唯兄學行文章
士林宗仰韓子曰名之所存謗之所歸似宜遠鑒前賢引
以自慎況此經世鴻文有志匡濟者必來取法或觸時忌
恐致格於上陳轉負作者苦心此一得之愚不能已於言
者也是否有當伏候裁答臨書皇恐

又

奉手書欣悉一帆風利別之次日卽安抵珂鄉慰甚承示
減賦一節爵相之意惟常鎮減十之一不能移易此外聽
議現派陳觀察來會商自當相機行事云云仰見懃懃爲

民之意終始不懈敬佩敬佩伏思酌科則之重輕定減賦之多寡用意非不善惟查蘇松因重賦而有歉緩數十年於茲矣向之歉緩固統輕重科則一律普辦並非科重者有歉緩輕者無歉緩也今減賦之後三數年間民氣稍復當道必議辦清漕在科則之重者減三之一再以輕則之所餘挹注之畝不過一斗左右卽完清漕亦有減無增力所綽綽若輕則之田不蒙普減而欲責之同完清漕則較從前歉緩之年陡令增賦一倍不特怨讟煩興追咎不已竊恐向隅過甚事與勢均屬窒礙難行似不可不慎於始也太屬之嘉寶向係民拆官辦科則亦輕往時辦理歉緩

本有區別今不妨稍示變通此外各屬尙望詳訪輿情悉心斟酌弟杜門守拙本不應妄言時事惟此議與兄同志而兄又適在幕府奏稿出兄手一時機緣湊合得以上邀恩准舉五百餘年之積弊而更張之兄之有造於東南匪淺矣豈特桑梓蒙澤已哉愚見倘其事者志同道合原應卒襄善舉如其舒展不由乎已不如卷而懷之善後中義舉甚多留此精神再辦別事爲蒼生造福如何兄蘇人家有負郭田事修而謗興德高而毀來此心固不能掬示人也弟辱至愛又蒙示及前事用敢盡其一得之愚伏望垂察昔人謂馬伏波規人則智而不能自免於讒隙弟無伏

波規人之智而讒隙則躬自蹈之今已懺悔無及矣聊引
古人博兄一笑餘惟爲道珍重不宣

又

比日春和想清恙定已霍然眠食何似伏維珍重蒙示丁
雨生都轉上曾相書稿其所論鹽務情形內如掣簽勸讓
兩條可謂洞若觀火貴整忌散數語所見尤爲宏遠至開
綱楚西皖同時並舉只開本季不可使虛引叢積此皆探
本之論詳繹再過頗深心折查淮南自經曾相整頓銷數
頗旺成效甚著所惜政出多門十羊九牧恐難持久耳從
前陸立夫制軍改章之時兄在邗纂修鹽志弟則總辦局

務皆身親其事然其設立總局所委皆知府以下之官雖
暗移運司之權而仍受鈐制上下互爲糾繩用意實爲深
遠今則勢均位埒且各局之官親幕友丁役人等聞頗不
少旣無衙門關防焉能禁其不與商人來往積日旣久相
與習熟營私舞弊莫可究詰都轉書中云云不過十得三
四耳鹽政遠在數百里外縱有知人之明各局員豈盡有
燭奸之識德優者每患少才才優者又苦無德是昔日所
慮只求一運司得人而事辦今則非合一運司四局員盡
慶得人不可不亦難乎況處脂膏而不潤古今有幾孔奮
哉淮鹽爲

國家歲入大宗寇亂以後 厘捐較舊課三倍之故額銷雖
減於前而正課轉增於昔誠能不務見小握要以圖去其
荆棘使商人共履康莊不必過事更張而久大之規模可
定聞去冬楚局開秋綱將商人春綱已請之引按數派捐
並欲追溯歷綱已運之引勸使量捐商人懼貽異日之累
已有聞風引退者此其亂法之尤言之可爲太息承下詢
略疏梗概餘容晤罄不宣

又

十一日專人至志局探詢從者已於卽辰登舟旋得手翰
謹悉安亭一節已屬賈木匠至韻珊處索地圖一看約今

明必送來並未敘譚容晤再說眉老節略已交到是此老
看家拳頭但不知所謂只要得安山張秋一帶黃河足矣
此說靠得住否原藁奉上錄出後將來交至弟處可耳不
急也大箸已交筱舫摘錄特繳還第一次收復松江弟與
應敏齋俞乃舟在豆腐浜礮船上者市月克復之時僅有
洋人四十餘名餘皆礮船上水手與新募勇丁數百名耳
時賊傾巢而出暗襲上海城中止留老弱數百名城門不
閉附近居民到弟舟次通信於是弟與乃舟諸君商定派
令洋人居前水陸勇丁居後潛入其城各門城堞上俱派
洋人數名協同水陸勇丁把守鎗礮之聲不絕賊聞松江

已失又聞有洋人幫助恐歸路截斷遂急折回踉蹌遁去是役也若非松江從無意中收復則上海卽不失守其附城一帶亦必蹂躪無孑遺矣此其中殆有天也鄙人奉劄持令督隊開復原官應敏齋之超擢直刺皆見之章奏貪天之功以爲已有殊屬可愧而當日之實在情形如此大箸謂華爾率中西勇各數百攻松江克之其時華爾爲英法所制不欲出面所帶西人僅八十名耳常往來松滬之間克復時正在上海得信趕回幫華爾約束西人者人皆呼爲黃鬚子事猶歷歷在目記事貴簡原不能詳敘惟此事弟身在行間知之最悉華爾亦同一倖獲并未有西兵數百之多也偶讀大藁縱筆及之姑備它日爲佚

事張本可也統惟爲道加護珍重不具

又

久不握晤側聞清恙已愈未知眠食已如常否念念弟鍵
戶讀書兩月來取舊臧金石文字詳加攷訂頗有心得昨
爲友人題宋拓虞恭公碑檢讀唐書溫彥博傳彥博字大
明兄大雅字彥宏弟大有字彥將兄弟義當一體而名大
者字彥名彥者字大殊難釋然宋時歐趙二家亦均以此
致疑因復檢讀唐書宰相世系表則云彥將字大有而彥
博大雅則與傳同於此益難釋然王述菴金石萃編援引
趙氏金石錄所載亦未攷及此外顧亭林王虛舟錢竹汀

諸公亦俱無攷寒齋書籍亂後散失新得無多因思鄴架
卷帙較富前賢或有辨證敢乞指示至唐書於列傳則名
大有字彥將於世系表則名彥將字大有一人而名與字
互異至此其譌舛無足言矣又題嵩山太室石闕詔檢讀
中州金石記謂嵩高作崇見漢時尚無嵩字地理志有崑
高縣云古文以崑高爲方外山也國語夏之興也融降於
崇山韋昭注崇崇高山也據此知經典有作嵩或作崑皆
後人所改雲按趙氏金石錄後漢靈帝紀熹平五年復崇
高山名爲嵩高山章懷太子注引前漢書武帝紀中嶽改
嵩高爲崇高東觀紀曰使中郎將堂谿典請雨因上言改

之復爲嵩高據此則不得謂漢時無嵩字且查漢永壽二年韓勅碑從事魯張嵩眇高熹平二年魯峻碑陰尉氏胡嵩永高此嵩字之見於漢碑者畢氏謂漢時無嵩字豈另有所解統乞明以教我外呈上嵩山闕詔題名各石刻彙裝一冊附有拙見攷證祈直筆指謬並賜題數行爲此冊增重幸甚感甚餘惟珍重不宣

又

前奉手答蒙示唐人以字行者甚多嵩崧皆崇之俗史記封禪書漢書武帝本紀郊祀志皆作崇惟地理志作崧知武帝時尙不改作嵩後人始作嵩也謹已誦悉弟之致疑

於溫氏兄弟之名非因其以字行也以一則名彥博而字大明一則名大雅而字彥宏名大有而字彥將兄弟三人名彥者字大名大者字彥一時無從索解前賢博識如歐趙二家均曾論及而亦不得其故昨偶閱容齋隨筆內有辨證溫大雅兄弟名字一條引大唐創業起居注大雅所撰中云煬帝遣使夜至太原溫彥將宿於城西門樓上首先見之報兄彥宏馳以啟帝帝方臥聞而驚起執彥宏手云云據此則溫氏兄弟之名皆從彥而創業注首題乃云大雅奉勅撰不應敢自稱字已而詳攷高宗太子宏爲武后所酖追尊孝敬皇帝廟曰義宗列於太廟故諱其名如

宏文館改爲昭文宏農縣改爲恒農大雅之名後人追改之也所論極確數月蓄疑一旦豁然而解甚快事也嵩字史記封禪書武帝本紀皆屢見並未皆作崇郊祀志中嶽嵩高太室嵩高亦屢見又加增太室祠禁無伐山木以山下三百戶封密高封禪書武帝本紀皆作崇爲之奉邑師古注曰密古崇字以崇奉嵩高之山故謂之崇高奉邑據師古之注則嵩高嵩字謂爲後人所改豈爲定論爾雅山大而高曰嵩俗作崧从山从高正合六書會意之旨似不得因許氏說文未收遂謂漢時無嵩字至弟前書所引韓勅魯峻二碑嵩字以一則名嵩字眇高一則名嵩字永高古人字由名生

援此以證嵩字之从山从高亦非漫引也晨起精神頗爽
重讀手劄謹書此以代面談兄博極羣書如有所訓仍祈
明示前奉去太室諸石刻彙裝冊如已賜跋付下爲感

又

前月廿三日奉別解纜廿四日申刻泊無錫西門外一片
瓦礫寂無人煙入城里許始有店鋪約百家食物皆有弟
於市肆中以四十錢買一漢人私印尙欲他往物色詢途
人知止此街面遂歸舟廿五日酉初刻泊常州西門甫登
岸於荆榛瓦礫中見一甫斃屍掩鼻疾趨而過靠城有店
鋪數十家皆係茅屋入城街道房屋尙完好卻無居人行

里許始見店鋪與無錫相似廿六日申刻泊丹陽西門城外與無錫常州略同城中則居然熙熙攘攘生意成市與未亂以前不甚懸殊難得難得廿七日傍晚到焦山山中殘桂賸馥霜葉漸紅日來坐枕江閣對此秋色晶瑩江山明潔覺凡慮皆空悠然有出世之想詳味六祖所謂隨所住處恆安樂一語若有所得倘能從此勘破塵障不爲境縛則煩惱消除一切放下無往而非清涼世界矣所患者志願不專靜處生動動處生妄一生愛惡貪癡顛倒夢想疊起而與爲緣則又墮落火宅中前憊後過懺悔無及興言至此未嘗不嗒然自失也老兄夙具慧業道根至深尙

望有以指示我也盼禱盼禱弟接漢口友人書初十外擬
前往一行約月杪初歸來貧賤也衣食於奔走此行非爲
遊觀擴眼界也曾中堂聞初一日啟節有初十日進督署
之信吾兄何日前往如到焦山卽弟不在山中亦有人招
呼弟已切託之矣適有便羽草此以當晤對統惟爲道爲
時保重不具

又

比者秋氣漸深不識起居何似所患想已霍然行坐能否
如常甚念甚念前承假全唐文繳上乞檢收某君以舊拓
茅山華陽觀王先生碑來索題此碑世少傳本前人箸錄

僅見於趙明誠金石錄及寶刻類編顧亭林金石文字記而全文則未之見也今取全唐文中所編者詳校內有不符之字如全唐文中第二行遐希蠹冊希碑作晞三行化洽無遺遺碑作爲又仁含有截含碑作涵十七行常馭坐忘之寓迺秀行念之允忘碑作亾念碑亦作亾十九行泯之而爲一泯碑作泯二十一行正墮背飛之淚墮碑作落二十二行萍流不定萍碑作萍二十七行迺分燈於暗室分碑作傳三十行想朱公而思聖公公碑作宮三十九行應彼弓旌旌碑作招四十行豐厨享饗享碑作厚四十一行亦鋪霞而藉錦亦碑作乃四十四行及精通道法之徒

道碑作兵四十六行蠡蜚肆躉蜚碑作飛六十四行北振

岱宗振碑作拒六十六行兩廡廡碑作厦六十七行黯然

雲布黯碑作黹

按潘岳賦翠幕黹以雲布碑似本此

六十九行何景福之難

酬酬碑作儔七十行內殿碑作殿內又光跌八尺碑作丈

八七十七行鍾魏之楷模魏碑作衛八十二行兼知校領

省官碑作兼知領校省官九十三行王元熠熠碑作睦又

十有餘人十碑作千九十九行爽節川停停碑作渟此碑

與全唐文所異之字其文異而義同者可仍而不改而其

中必應从碑釐正者正復不少於此益嘆古拓之可貴也

因作王先生碑跋草錄呈攷訂

又

奉手答謹悉並知下鄉修墓喉患又發聞之實深馳念前
弟進楚輟箸述之議辱軀本亦多病此說從體驗中得來
非妄發也費晉卿醫道總算有本領弟往年至冬間服温
補之劑去冬覺不對症請渠診視專以養陰爲主謂温補
萬不可服刻下所服膏滋以天王補心丹爲君此外則龜
鹿二仙膠東西洋參加以流利消痰之品係鄙人自擬之
方服之甚對賴渠切不可服温補
一言故改弦易轍明春二三月間天氣晴
和兄往訪晉卿順便看看惠山景致亦好此行不可省也
抑弟願兄有此行者更不僅爲利己事尙有利人一事欲

由兄發之弟嘗往來揚鎮兩郡所過各處見橋梁爲賊拆
毀未修建者甚多小民病涉心頗惻然今秋過毘陵泊舟
無錫所屬之洛社鎮見兩岸行人待渡者如蟻船主係無
錫人云自洛社大橋被賊毀壞後十數里內皆恃此渡船
去冬某月因人多舟小覆溺數十人至有滅頂者聞之心
益惻然因思自丹徒迤南各水道不必論窮鄉僻壤卽以
官塘運河言之其未修建者不知凡幾兄入山深足迹不
越數百里外倘使目擊情形定亦同此惻然中丞重兄品
學他日從毘陵歸據所親見之一二處爲之隍引請中丞
通飭各屬各將境內所轄橋梁爲賊毀而未修建者其有

若干起開摺稟呈一面遴選公正紳董勸捐興辦其捐數
及工料經費榜示通衢倘實有無可集捐之處請善後局
酌量撥款接濟登高一呼衆山皆響是在中丞一號令耳
而千萬人之利濟胥賴此矣弟久欲向中丞一言因思身
爲寓公非官非紳雖屬善舉究係地方公事不便越俎惟
與敏齋筱舫輩時言之耳茲承詢商行止用特附布梗概
計亦兄所樂聞而必爲剴陳者也

又

前日辱惠顧有失倒屣越日正欲走謁適奉留函知因天
氣驟熱未帶夏衣匆匆轉棹比屆黃梅暑溼司令不審眠

食何似伏維珍重

弟

體中時有不適惟看書雖終日把卷

不覺辛苦寫字至六七百以上便覺勞倦欲輟筆矣若詩

文只須稍一構思便心搖頭疼一時把捉不定自去年夏

秋至今常常如此年已六十恐無復強健之時平生未完

之筆墨正不知何時能竟言之可慨書局借刻左傳以十

償一此借書翻刻之成例也倘雇工寫樣其工費恐再加

十倍亦辦不到此事係

弟

經手償十之說亦

弟

所言非出

自兄口也昨已屬

潞兒

與局員說定卽當照送無誤柳生

一節若長洲修志舉辦則柳生必應住局

弟

處可從緩議

緣

弟

欲求一可與談金石文字之友聞柳生年力正壯人

亦樸實好學焦山志已成之書請其校對不過借此爲名
實則另有筆墨相煩第不知渠於攷據一門性相近否故
必得下榻寒齋朝夕相處方知其蘊不能兼顧兩事也秋
試在卽如其破壁飛去則前言皆是廢話不如且作緩議
俟至秋後再說想尊意亦以爲然也子山五月初四日來
信云軍機進單大費周章選司堅不肯行幸胡彭兩少宰
皆是舊識力持公論遂於初三日移交樞垣候
簡渠得家信知中丞出奏遲回兄曾經移書相託各層極
爲感激屬先道意原信送與敏老閱看尙未取回他日奉

覽

又

數月不見想念時縈夢寐前辱惠顧暢談稍解勞結越日
風雪嚴寒不審回山後眠食何似實切馳仰牛乳誠補氣
血爲高年所宜然不可多飲多則痰疑中滿胃納遂因之
有減鄙人現服人乳止能大半茶杯若至一滿杯便胸次
作嘔不適飲牛乳亦然此年來體會得之兄其留意茲懇
者拙著彝器圖釋十二卷雖已刻竣尙多舛譌待改因亟
欲奉求大序特先印一部呈正弟獲交左右逾二十年自
顧生平頗不爲當代賢豪所棄交游正不乏人然知我之
深無逾於執事王元美遇書畫金石不惜解衣質買謂非

惟寬身且用自污弟所者與元美同卻無所用其自污惟垂老之年曾無短長之效以見於世沾沾以鉛槧冀博身後之名其志亦可悲已兄視此書爲可存敬求賜序一篇弁首感且不朽尊書字形之大小不計惟版口須如此書之式當精選手民奏刀必不致如書局之草率從事也

又

日前奉手翰敬悉箸述如意惟舊恙時愈時作又因霍亂而神暈體冷脈伏汗不止服薑桂大劑而平此所謂急則治其標也越旬日而痰紅又小發想卽旋止不識日來眠食何似伏惟珍重承示力辭善堂一節沙田向以互許爭

訟爲能事甚至糾黨械鬥每有官法所不能禁三善堂之
因訟呈牒曩在江陰總辦沙田升科時常見之兄以此事
最爲煩心決計冬間覓替卸去甚善甚善前日敏老來亦
曾言及當可如指辦理至閱經古而旁有檢書之人雖費
心思却是樂事可不必辭弟有因查一二字至於心火上
升頭目俱暈推已及人故作前語弟與兄耆好同而有小
異兄舍書卷外別無所耆弟則花木也禽魚也字畫金石
也玩好在耳目之前無不可藉以爲樂大約清晝六時三
之二在筆墨三之一在游息今年交夏後身子較好不識
交秋何如時刻防病一年四季健與不健毫無把握莫健

於賈芸老次則曉帆緣仲今皆謝世矣然則世之所謂健
者轉不如我輩病夫也兄以爲如何金氏之捐款本定二
萬串係弟力勸而成嗣因嘉興人聞之謂捐蘇州而不捐
本籍鄉黨不平惟弟當日勸捐二萬串原許其入奏查奏
案須得萬兩始能專奏今擬以一萬兩捐與蘇州以三千
串爲本籍捐已與杜筱舫弟議定由伊轉達倪載軒輩俱
各允協惟有此一折金氏之具呈欲由紳士加呈代遞且
欲求兄爲領袖好在出此巨欸並不邀敘其呈詞不過目
擊兵燹以後艱苦情狀云云並無窒礙爲難處也此萬兩
中以五千發典生息爲冬間粥廠之用緣自十年分以來

三首縣粥廠停止每至冬寒施粥總以經費不敷由弟幫
同募捐接濟前年七百千去年六百千皆各相好處湊集
弟亦解囊前年七百千之中敏老與舫老各有一百千今
得此息銀則一勞永逸矣此弟之心願也尙有五千兩息
銀擬爲尊處所辦安節洗心二局經費及順之季玉諸君
緊要善舉之用以期周妥此說尙未與順之季玉言如兄
以爲可行卽當舉辦否則只好中止勸令金宅隨時量做
好事而已恐未必真有實際也是此萬金巨欸之善舉繫
於兄之一言專函奉商伏候進止

家曉帆方伯煦

昨面議亦西齋書坊之設原爲兵燹後各處經書版籍毀
失無存坊間所售四書五經紙印既劣譌字又多誤人子
弟不淺現擬先刻十三經讀本已屬管事胡魯山購版興
工橋孫之意謂昭明文選亦學堂中不可少之書現欲覓
一汲古閣文字清楚者不獨價值貴兼無覓處胡刻更無
論矣橋孫有汲古閣本字尙清楚不能翻刻蓋翻刻非初
印本不可也現欲寫樣需古刻校讎知弟處臧有善本欲
借去校對今特檢上二部其一高麗紙大字本粉紅絹面
此從郁泰峰借來泰峰臧書至富宋元刊本文選不下十

餘部知弟見愛遂舉以爲贈又一部係蘇州汪閩元所藏
磁青紙面稱爲宋刊惟湊配甚多然在今日實亦不可多
觀矣統望轉交橋孫爲荷

丁雨生中丞 日昌

昨者伏蒙賜顧懃懃以地方利弊爲問而又思周慮密慎始圖終將舉古人已行之政教因時通變次第施行雲雖
禱昧不學竊不敢不盡其愚以備采擇閱嘗考周文襄之
治吳其良法固多而置濟農倉一事尤足以爲後世法史
稱吳中終文襄之任數十年民不知有凶荒由於儲積之
豐也湯文正重文愛士而義倉之設亦必居於社學之先
禮義生於富足盜賊迫於饑寒二公之德澤在人非無故
矣雲伏觀本年五月間久暵不雨民心已萬分荒張賴明
公暨各大府設壇虔禱天心仁愛渥沛甘霖遂得轉荒爲

熟側聞蘇松嘉湖除未墾各區外其餘高低田畝一律種
徧秋收可望豐稔將來新穀登場僉謂米價石不過二千
文左右執事誠能及此時會分飭所屬各州縣量地方之
肥瘠酌缺分之苑枯仿前賢遺法設倉積穀或於漕務中
酌提羨餘或於業戶中廣勸捐助自數千石以至數萬石
合四府一州計之初年得穀已復不少數年之後定必倉
箱充溢利濟無窮應如何冬收春貸推陳出新必明定畫
一章程以垂久遠果能合官紳之力奉行盡善有此積儲
卽遇水旱偏災亦足有恃無恐兵亂之後恐有凶年似亦
當務之急也惟執事圖之

又

前者辱惠書猥荷垂注慙拳並承惠頒老樹橘紅謹卽拜
登東坡晚年在海南時好儲方藥以應不時之求兼備攝
生之用猥蒙遠寄感幸無量辰下伏維頤養沖飶貴體定
已彊飭近日醫生固不易得惟明公以優游林下之餘塵
勞屏掃琴書自娛則六時消息未必不勝於一劑清涼比
聞陳請養病已邀

俞允賀知章鑑湖乞賜歐陽公穎上退居一時

君臣契合輝映古今遭際之隆後先同轍然在明公以臯
夔之身尋莘渭之樂卷經世之大略抒緒餘之鴻文高尚

之風世誠罕覩而不知江南人士去思之切有不啻如渴
思飲如飢思食者福躬康健務望早日出山爲霖爲雨蒼
生望謝公亟矣公忍恻然無意於斯民乎鉅製詩篇業已
浣誦百過健筆扛鼎詞源倒海氣韻足與玉局抗席非胸
有萬卷書而識力又足以副之安能臻斯境界牛耳之盟
舍公誰屬承命勉和園居雜詠十一首之四小國邾滕不
過爲明公負弩執鞭奉盤匱以聽驅策而已不足云詩也
幸直筆訓削之 兒子承潞得侍左右者有年凡居官治事
悉秉當日箴誨不敢稍有違渝故數載以來尙無隕越去
歲今春籌浚屬境七浦各支港水道以資農田灌溉今夏

吳中亢旱而婁東車戽有資幸未成災此則堪以仰慰垂

七

卷之十一

七

七

金逸亭廉訪 國琛

1
204

日前台從莅蘇屢辱惠顧暢聆教言稍慰勞結別後未知
何日安抵金陵深以爲念承諭捐局會銜一節猥荷諄勸
至再且以_弟之辭差尊處未接明文現在具報開局及一
切文移均以爵帥劄子裝首尤不便將賤名抹去致乖公
牘體裁此執事慎重公事之意佩甚佩甚惟_弟去年十一
月間奉到左爵帥劄子當於臘月間具稟瀝陳病狀請另
委接辦詞頗剴切詳盡必可邀准此稟託上海轉運局代
遞路途遙遠不知何日始達_弟非膏肓泉石之人且與執
事同差尤所深願況蒙左爵帥袁星使激揚廢滯采及虛

聲苟可勉任馳驅亦欲仰首伸眉稍圖建樹一吐胸中鬱
勃之氣無如十年伏處藥鑪茶竈未嘗離側倘不自揣分
量輕出嘗試顛覆召愆後悔何及此所以再四思維不得
不具稟力辭冀全晚節昔人誓墓弟則誓之於心匪伊朝
夕矣執事摯愛亮亦曲鑒此衷也小午星使向未謀面未
敢通書乞於遞中代達鄙意梅小巖方伯前亦望婉致區
區是所至懇不宣

李小湖廷尉 聯琇

1
704

烽烟瀕洞執訊久稀每念霽光輒深馳溯辰下敬維道履
冲和順時諧暢千秋盛業富有日新幸甚幸甚 雲待罪滬
江積憂成疾自春徂夏日與藥鑪茶竈相爲周旋一室蕭
然讀書自遣杜門不出者三月餘矣韓昌黎云居閒食不
足從仕力難任古人於出處之際不能自決如此 雲今者
但慕居閒之樂永絕從仕之心縱使食或不足亦當減衣
縮餐勉支歲月還我酸醜面目矢諸天日誓於江神此生
再不作傀儡中人矣暑退秋涼 賤軀得稍頑健擬拏舟北
渡省視老母必當專誠奉訪藉罄別緒先以此書達意聞

大集已經刻竣何日惠讀甚盼念也楞翁常通信否餘惟
爲道保重不盡

又

件來奉手書並蒙惠頒詩文初集謹已領悉執事宏通博
雅名滿寰區久爲士林皈仰而猶虛懷若谷如雲譎劣亦
復不棄其愚屬爲直筆釐訂此真以能問於不能也聞之
益增皇恐鄉居無俚連日焚香靜對展讀再過駢文雄渾
峻雅 盛世元音散體議論警闢及侯朝宗燕太子丹論
一篇謂博浪之免正非秦幸咸陽之免不爲燕惜卓哉斯
言洵爲千古獨創之論此外箴言雜議皆有功來學所謂

經世鴻文也古今體詩尤見醞釀之深古人於家國之間
憂患嬰心觸物生感激而爲酸楚悲涼之調以寫其窮苦
挹鬱之思小雅離騷以後至於杜少陵論詩者每謂窮而
後工執事門傳通德家有楹書紆青拖紫席豐履厚苟幼
時愛育稍偏喫煦過甚又安見砥礪自奮驟成國器人情
喜逸惡勞觀於讀書欲臥自爪其面此固有迫而致之者
不必待蘇季子窮困歸來而簡練以爲揣摩者久熟矣一
出而遽掇巍科聲隆朝野年未四十位列上卿是當日之
操心慮患無非玉汝於成也讀祭嫂一篇所謂欲揚先抑
欲亨先屯者實由中之言非矯情之語也集中載賜鄙人

二書五古一首附青雲而傳後世榮幸何如所至可感者
雲 遭庚申之亂平生覆瓿之作與度藏書籍同罹浩劫竟
無隻字獲存今讀大稿謂拙題吳承泌墓志駁蘭泉之跋
辨證僖昭年號今此碑旣佚文亦久不置懷而旣爲大賢
所賞或則尙有可存因之追憶前題歎爲紀錄尙得十之
六七已存諸稿矣此外未梓者悉付煙雲無從追問益歎
執事初集之刻謂恐一旦拋失使精神遐漂爲可惜真甘
苦之言也至於吳守棲黃橋李生宿青郊引前人之詩以
寫兩人離索之感迴首前塵淒然欲絕一俟孱軀稍健准
當專誠詣訪作竟日之談一紓蘊結

許信臣中丞 乃鈞

月之中浣奉九月杪手簡欣審道履沖和娛情翰墨承屬
覓米老法帖今先寄上向太后輓詞一種米老小楷頗不
易得英光堂帖一刻於徐紫珊一刻於蔣生沐與徐刻姪不同

處均有尙有重刻羣玉堂帖比之英光尤佳出月有便人
到海陵當屬帶呈驛遞不便也至來諭謂嘉興張氏有重
刻英光堂一卷是米老臨智永魯公瘞鶴銘諸帖姪未見

過當時叔未丈所刻金石各種姪盡知之未聞有此帖也
容另訪之蒙詢敝臧稷帖言之可慨姪積三十年心力搜
羅至二百餘種其中不少希有之品一燬甲寅年家遭鬱

同書車月凡
三
三
攸再燬於庚申之變現在所贖僅十之二三而已開皇十三年本已付劫十八年本尙在均經重刻石亦無存昨於友人處得一重刻十八年本附寄清賞所至可惜者舊藏馮承素摹稊帖一卷係唐人雙鉤廓填爲魏文節杞家藏賜本自南宋厯元明

國朝均有題記其最著者如趙松雪俞紫芝倪雲林諸公流傳有緒爲敝齋中瓊寶乃己未年秋間爲石門李笙漁太守借刻旋攜至杭州去年陷於城內此卷旣免蘇州之劫而不能免杭州之劫豈存毀亦先後有時耶姪遭遇患難萬念俱灰比來鍵戶讀書頗亦自安其拙所輯吉金款

識一書猶有就緒日握鉛槧篝鐙不輟竊計明春可以成
稿再當就正惟家無儲蓄食指繁多薪米僕賃之資頗似
昌黎公日求於人以度時月明春膺鎮江趙金兩觀察之
招杏花初放必鼓金山之棹斯時當便赴海陵掘侍左右
與長者作數日敘敝臧遭劫者固多新得亦頗不少必攜
數種以資評賞也江南講金石之學者自韓履丈翁叔均
故後我道益孤海陵有可談之人否姪所知者有吳讓之
茂才年老家貧好學不倦其篆隸師鄧石如實有出藍之
譽非時史可及鐵筆尤妙惜目昏已不能多刻其於漢魏
六朝碑版攷鑿最精長者暇時試進見之當知姪言非謬

惟此君頗抱道自高非先在駕恐不輕至也

又

日前肅復一函附有重刻開皇禊帖暨米書石刻由鎮江轉遞未知何日達鑒一昨又奉手諭並致觀堂星使壽幛等件一一領悉遵卽代辦專送取有回帖繳呈伏祈察收辰下敬維福躬安泰道味加腴蒙示溫習四書兼涉二氏三教會通互相發明此中無實無虛正吾儒誕登立腳處況長者久以廣大心得清淨覺今復勤參宗旨體悟真詮以葆此堅剛不滅之性此大智慧懸崖撒手本領姪根行淺薄不能信受奉行一意潛修今已神疲志耗甚悔三

十餘年心血非勞形於案牘卽消磨於故紙堆中噬臍無
及奈何奈何明春准赴海陵侍聆棒喝冀可啓牖愚蒙也
家讓之本長者所器重姪前書雖屬失晨之鳴知長者必
許其論薦之不謬也茲寄上蘭伯親家竹報三通又鹿茸
一架統乞檢收蒙諭春和擬作蜀川之游板輿之樂固屬
人生難得然間關萬里又值中原多故道路難行似非高
年所宜進止尙望酌之英光堂米帖兩本羣玉堂米帖一
本附呈清賞餘容續寄不備

又

日前奉到續示並鈔錄米卷詩句命爲攷定按米書刻於

清芬閣集帖中特將原帖寄上中間如第一首縷字下點
去一字及膳字誤瞻帖中皆無錯而卷中所譌竟爲巨眼
抉出益徵長者聰強善記斷非後學輩所能幾及若姓之
曹學早衰更無論矣慙愧慙愧

王荷汀觀察芳

吟蕉竟於本日卯刻驟患時疫棄世弟力疾往弔頃歸寓
餘痛猶未已也想兄聞之定亦同深一哭吟蕉交卸常鎮
道篆到滬後承辦各事倍極棘手昕宵從公幾於忘寢廢
食近復觸暑往來不遑喘息竟以時疾隕命伏念中丞平
日器重吟蕉聞此信必爲惻然吾兄晉謁時能相機婉言
得援軍營辦事積勞身故例入奏則不特爲飾終之榮而
身後官累亦可例豁趙氏子孫世世感戴矣吟蕉係委辦
理京米人員現在京米辦竣本有勞績可錄措詞亦有依
據統祈裁示酷暑伏維善加攝衛不宣

何子貞太史 紹基

去年秋冬曾兩肅蕪牋本年初夏又由漢口友人專遞一信迄今未得覆書均不知一一達到否弟不肖不能從俗浮沈與時俯仰卒爲含沙所射然竊自念古今來多少英賢豪傑橫被口語蹈不測之禍者難更僕數涉此亂世末流猶得骨肉完聚苟全身命且劫火之餘尙有圖書金石可供觀摩不可謂非蒼蒼者厚於我也比來杜門謝客編輯鐘鼎彝器欵識一書甫經草創俟有就緒卽當另繕清本寄請正定刻因潤州紳士以金焦兩山志書均毀於火邀弟纂脩年內或出門一行亦未可定藉山居清靜更可

卒未竟之業也後有惠函寄上海洋涇浜會防局轉交必可無誤

又

前寄家子儁帶呈一信子儁未行適荷汀從湘南來攜到手書發函伸紙宛挹笑言並知今春有九疑桂林之遊想見杖履佳勝腰腳輕健致足羨也承惠楹聯及張遷隸碑如獲異寶法書詣力已到至精極熟之候無論欹側端莊各有妙處未易一二爲俗人言也弟於漢人隸書中頗以未得張遷碑善本爲憾今觀吾兄所臨間架略倣張遷而根柢岐陽石鼓復參以婁壽筆意遂覺雄渾古厚伊墨卿

一生學張遷碑但求形似惜未見尊書也當今不乏書家而平生心折者實止老兄一人得失寸心知此言非可強致也弟近日亦頗致力於隸書自知功欠沈著天假我年或者有所造就此不僅八法已也所需黃小松摺扇已爲龍蛇攫去近得邊葦間所畫蘆雁摺扇一柄尙可拂暑茲特交子儁帶上弟與翰墨頗有奇緣兵燹之後所得岳麓雲麾二碑皆係宋拓致佳此外碑帖及名賢卷冊亦頗可觀恨無萬回飛往之術攜以就賞也筱漚殉難以後其子穀甫世講於本年五月間挈眷入都七月津門大疫竟客死異鄉真可慟哭韓履卿許珊林兩丈暨汪鑑齋翁未均

皆已作古惟吳熙載歸然獨存現寓泰州譚金石之學者如廣陵散矣馮林一潘玉泉顧子山均在上海弟不出戶庭此數君者常來晤敘也荷汀已過譚數次囑令趙君碑尙未見也

又

承詢雁塔題名憶己未年在蘇時有賈人持以求售索值百金後爲李笙漁購贈王雪軒中丞兵亂雪翁將此件連同各字畫寄回家去現當在福建或未遭劫也弟處所藏漢碑劫火之餘僅存二十餘種內曹全乙瑛孔宙皆有重出本然不過熙雍乾嘉間所拓天發神讖尙是明拓原石

已燬頗不易得兄如需此示知寄上兄近日畫蘭否奉贈
籀石翁墨蘭一軸兄喜離奇而此實爲正宗似出板橋輩
之上也外宣城舊紙八幀尙宜筆聊供兄臨池之用齊侯
鬻釋文終未愜意從前兄來信云子苾印林定庵均有釋
文弟徧訪不得兄處如有稿務求寄下尊釋必有稿本並
乞一并寄下

又

去年夏秋間曾寄二書附有黃小松畫卷楹聯集帖等件
迄今未奉還答究不知前書曾否達到深爲馳念比來眠
食何如伏維萬福弟 自山居以來愛右軍誓墓之文陋鮑

焦憤世之語一編在手聊復逍遙頗能自安其拙也去冬
杪由山旋滬省視老母幸寒家長幼均得託庇安健昔人
謂山中勝境在杏花紅葉之時日內卽擬重鼓焦山之棹
此樂甚不易得也比檢庚申後所得名賢尺牘一百數十
家彙爲一編付梓傳世前寄去魏鶴山文向帖真跡卷無
論已否賜題懇卽付來人帶還擬以此割爲諸賢領袖也
懇切懇切

又

邗上歸來得讀七月念二日手示欣審間月望日安抵珂
里沿途暑熱異常而眠食無恙精神康健實慰馳念弟夏

間自江北回家。未曾出門。九月下旬。與季玉聯舟至京口。
季玉赴江甯。弟則渡江上揚州。耽閣月餘。梅花書院本有
兩席。其一已屬晏公。其一當道。以爲脯修。止名世之數。恐
褻高賢。遲疑未決。弟屬緣仲轉告。丁雨翁貞兄向視禮意
之誠否。爲進退。而不以幣帛之厚薄。爲得失。外信二件。附
上閱之。卽知。弟於此事。固無日不爲之籌。也不識。兄何日
南來當道。亦企望之。至此席本在。可有可無。間不必以此
定遊踪。潞兒到家後。一病三月。昨始出門。銷假渠之。就原
班。亦爲境所迫。惟殿試甲第在前。而覆試朝考。又俱列一
等。舍翰苑清華。而爲風塵俗吏。未免有辜師門。期望然能

替老人分輕家累細思之亦未始非計也現以知府直隸
州到省蒙念附及性泉聞患恙弟兩次去信迄未得覆未
知竹報常到否

又

去冬肅復寸牋由族姪念椿轉遞計必塵覽流光如駛忽
又暑去秋來未識大集已刻竣否竊願先覩爲快弟杜門

息影無善可陳幸自老母以次均托庇平安溥兒蒙兄垂

愛諄諄以勤學爲勉去春以來命渠習八比文弟親自督

課並時時引兄瀕行策勵之詞警其惰頑本年五月間科
試倖以第四名入泮現赴秋闈倘能認真用功下科或可

望雋此時姑令觀場而已。潞兒已奉調入簾一切尙稱順當性泉免議一節四月間季玉從金陵歸來云渠尙未奉行知昨得沈午橋原信交與季老帶去矣吳冠英現寓蘇州西圃雅集圖屬渠另畫一幅添入汪秉齋吳冠英二人茲特寄上或當尊意也同人皆欲請兄爲記並以行書寫就寄來格式比畫卷略低寸許擬卽搨出付刻分裝於卷後又可作橫幅張掛也附呈白金三十兩聊佐尊酒之需南中友人求兄法書者甚衆皆以道遠難達爲慮一說潤筆便十分鄭重總之不外乎坤道吝嗇一笑

又

一昨辱惠顧晤言頗暢兩月來彼此體中小有不適相見甚希得此清談稍解勞結論及夜夢阮文達公見過議論甚久所論何事已記不清惟文達臨行云吾尙欲到吳平齋處此語却甚清楚比醒以爲顛倒夢想常常有之未始以爲異也可異者晨起適阮世兄由邗來見以埋幽之文見屬會逢其適此則大爲可異因笑屬弟留心繁防文達公有筆墨事相煩可預爲之計云云弟以爲從古無不死之人果能死後在文宿官中與先輩相周旋豈非得所惟兄在弟何敢死請兄將此一段夢緣效東坡作紀夢一篇留爲他日徵驗如何當日東坡夢中亦止記得蟋蟀悲秋

菊一旬也謹專人將擘經堂全集四套送上乞督納不宣

兩鬘軒尺牘卷三

歸安吳 雲愉庭箸

鮑子年觀察 康

神交久矣南北睽隔徒殷嚮往昨從鄭盒司農交到尊刻
三冊謹讀至再大箸攷證詳明鑒別精審題金硯雲孝廉
古泉攷而推許及於鄙人未免感慚交井然於此益見文
字之交形骸雖隔心性自孚非道里所能間阻也幸甚幸
甚茲寄上古瓦當文七紙中有壽卿一百九十四種所未
備者又古泉拓本八紙亦有出古泉匯之外者特未知有
魚目之混否乞爲審定唐龜魚符四種爲燕庭先生舊物

龜符字精而難搨特各拓一分附奉清賞不宣

又

二月初曾有復函交小壻朱孝廉鏡清帶呈附有拙輯焦山志一部齊侯壘拓本二分計已達覽尊刻續泉匯四冊已由鄭盒侍郎寄到繙讀再過具見蒐羅愈廣鑒別愈精此正續二書一出世傳前賢各種泉志泉譜皆廢矣洵必傳之作也中間蒙采及敝臧數種附垂不朽幸甚幸甚竹朋兄曾接其去年夏秋兩書據云用按摩之功所患稍稍見效大抵老年氣血皆虧見症如此弟亦常常抱病交春以來雖無不適而精神總不能振作大約同輩中惟簠齋

可稱健者去年一索得男再索得女尤爲難得也尊刻各種刊印皆精續泉匯尙欲奉求二分或仍託鄭盦侍郎轉寄或交小婿朱平華均可平華寓吳興會館現在正赴禮闈也附去晉太元古甄拓本又唐咸通湯府君墓志皆本年正月廿二日蘇州吳縣橫山新出土墓志字已漫漶文字亦不精而書於正面者却頗罕見聊奉鑒賞

又

前月中旬奉上巳日手教敬悉道履清勝承示抱孫之喜聞之抃躍我輩林居晚境萬事皆屬身外惟此天倫性分之樂至不易得造物亦至靳尊府廿餘年不添丁今連舉

兩孫想見積善有慶將來充大門閭可以預卜令姪與朱
壻爲丁卯同年渠來信亦述及轉詢春榜揭曉再添譜誼
尤爲喜幸弟以孱軀多病性又疎懶年來謝絕酬應恆終
月不一出門膝前有五孫一曾孫含飴分果日與調笑取
樂亦暮年自怡之境也屬荷摯愛用特附陳承賜大著各
種暫存平華寓次俟便妥寄必無遺誤續泉匯鄭盒交汪
柳門司業轉寄業已領到敬謝敬謝壽老久無音書渠有
同鄉韓君服賈於蘇年年冬去春來故此二三月之中偶
斷音問尙不爲異乃尊處與鄭盒亦俱有三月不得隻字
眞令人疑慮不置竹朋兄此病頗不易見效海內金石之

交正如天上晨星落落可數能無互爲愛重其係歲寒茲
因鄭盦令弟濟之中翰入都之便手肅布復附奉墨拓三
冊敬乞鑒定

又

月初交舍親潘濟之中翰帶呈寸牋附有墨拓三冊計必
澈覽一昨由平華寄到三月廿二日手翰並蒙續惠古泉
匯畢公墓志等件謹領謝謝辰下伏維道履清勝箸述如
意弟跼伏菰廬筆墨之外日惟澆花種竹爲消遣計親友
中頗有喜治園亭講求書畫者獨金石攷證之學鄭盦與
清卿遠睽數千里此間頗少可談之人清卿久無信到昨

寄來先後所得金器目錄分列已刻未刻竟至八十餘種之多人竭畢生心力所未能至者渠於數年間得之此固金石有緣然非持節秦涼亦不能有此奇遇關中自燕庭方伯蒐羅之後清卿可謂嗣響矣難得難得茲乘願舍親入都之便手此布臆附去唐石經校文三冊說文聲類一冊雙鉤東海廟碑温虞公碑化度寺碑各一冊統乞鑒納

又

頃奉閏午月手書欣審道履安勝爲慰清恙乃老年常有之病只須勤加頤養調攝得宜自會霍然竹朋兄所患病根已深難期奏效海內金石同志止此數人非老卽病獨

蘊齋精力彌健者古彌篤鄭盒廣搜博采所獲既多且精
年力富強名位隆盛學識又足以副之清卿繼起用力尤
銳心思精到將來所造皆未可量清卿所得之鼎極爲愜
意詔中第一字只清卿以文有帝考二字釋作后字定爲
微子之器旁引曲證極稱辨博書來屬爲考訂弟以作器
者之名無義可釋姑从其說於心未安也薛氏南宮鼎中
有只字篆形與此頗似薛氏釋爲括字並無依據不過因
古人有此名特以括字實之不足爲證尙不如清卿之釋
后字較有意義也尊意以爲如何

又

前奉手書並承惠寄海東金石苑謹已領悉謝謝比來秋氣漸涼不審眠食何似伏維珍重竹朋兄相識在三十年前遭時多故音書久絕近數年始得頻通尺素不意渠病竟不起遽作古人幸生平著述已及身刊播後起又復有人文人結局至此福壽俱已無憾惟海內金石舊交落落止此數人今又弱一个我輩望七之年傷逝自念能無於邑讀寄示輓詞情誼肫摯可泣可歌益令人愴感無已也簠齋殤去幼子心緒已大不佳又以東省災荒濰邑捐賑至盈萬之鉅且爲眾望所歸旣輸鉅款復欲出爲經理身心俱悴其情況亦可以想見矣孫春山駕部所需兩畧拓

本此疊因有微損不敢捶搨篋衍尙贖全分不復自留謹以爲贈又古小布拓本二紙似不多見弟得之石門蔡氏者篆文明顯乞爲攷定孫世兄想益聰俊弱齡多病凡爲長輩鍾愛者類多如是施愚山學士幼時病不離身後享大年名位山斗前輩如此者不一而足無足慮也

又

月之中旬奉前月廿七日手翰展誦之餘欣審道履安和動與吉會爲慰無量前寄空首小幣其文有紹以二字尊釋鄭氏致爲精確胡石查所釋亦同承示都中繼幼雲臧空首幣有二百餘之多燕翁舊臧亦歸之難得難得所需

帑拓謹再寄二分以視繼君所臧此真成遼東豕矣一笑
簞齋頗有書來云心緒焦勞有人所不能堪之語今年東
省亢旱濰縣尤甚現在撫恤粗完人心已定當可釋此仔
肩重理故業矣兄舌本稍有微恙近日定已霍然舌乃心
之苗筆墨一道原是我輩樂事然不能不用心只好隨時
自節弟坐是得病年來頗自知之敢以爲獻餘維爲道係
重不盡

又

久疎脩候時殷馳仰前者得潘紱庭親家書云兄舌本之
患未瘳近日頗似韓公子口吃不能道說而善箸書親友

知好來晤多藉筆談聞之益切懷念海內金石舊交正如
天上晨星落落可數自子貞兄作古竹朋兄相繼云亡弟
與兄又抱同病相憐之感惟簠齋老而彌健近爲賑卹哀
鴻破財勞力兩月來不得渠信心緒可知矣鄭盦位高學
贍收臧又富自是傳人恆軒假滿還

朝此次視學關中拔幽振滯之外搜羅金石不遺餘力所
得古器旣富且精執事相見定可暢觀昔後漢建初七年
幸槐里岐山獲銅器形似罇詔爲異寶獻之於朝記載所
傳凡得一器莫不以景慶視之至我

朝乾嘉以來古器出土日多今日益盛大抵前人制作精

神所聚斯文未喪抑久必發理固如此然此止可爲知者
道未易一二爲流俗人言也茲因恆軒入都手此布肌用
當促膝之談餘維爲道加意保衛爲祝

李竹朋太守 佐賢

別久思深常切馳仰每於貴親家簠齋太史書中備問尊
况兼讀鴻著想見道德文章日益增勝幸甚幸甚往者曾
以拙輯彝器圖釋及吉金拓本各種托簠齋轉達聊申嚮
往之忱未足解其勞結客臘由舍親鄭盦司農寄到手翰
並蒙惠頒全集九種洎古器諸拓本郇雲一朵忽從天際
飛來展誦之餘慰與抃會大箸詩古文詞不覲覲於摹古
而氣蒼格老仍復法度井然此由識解既超又深之以閱
歷故講學不近於腐論事必衷之理語在彀中音流弦外
當今作者非公其誰古泉匯早經卒讀網羅宏富攷證精

審合古今來泉志泉譜所未有而獨創巨觀此必傳之書
可以預決書畫鑑影評隲允當闡發繪事之蘊尤非深於
六法者不辦足與襄陽書史華亭畫禪並重藝苑弟束髮
受書卽癖者書畫四十年來收臧宋元已來名賢遺跡愜
心者現在篋衍尙有數十百種祇以書畫一門非彝器可
比彝器有款識拓本可以傳觀審其詔篆可得十之七八
其劣者則一望卽知僞船惟書畫竟非目擊不可故不敢
以所臧諸蹟妄陳左右現將朱子易繫辭草稿六十行及
魏文靖文向帖兩件先撫入石夏間必可寄鑒比來尊體
想早康復不審眠食何似伏維珍重弟去冬常患咳嗽交

春愈甚近日天氣暖和精神稍振嗽亦漸已然藥鑪終不能一日離也茲因敝世好蔡又臣觀察入都之便寄上金石拓本及墨刻各種詳開月紙統望訖收鑒正來書不署月日不知何日所發以後書尾乞署月日執事就養郎署極家庭之樂羨羨記識荆之初在蘇州顧湘舟辟疆園中今湘舟與黃秋士諸君皆歸道山亦無後起之人迴首前塵已閱卅載恍如隔世海內金石舊交簠齋外絕少其人尙望不遺在遠時惠德音以慰饑渴鮑子年兄想常敘晤乞道念忱孟鼎已到京師否此八囍齋中第一瑋寶也

又

前奉四月廿日手翰發函申紙語重情長浣薇三復感幸
交至此來清恙想早就痊步履如何手指已屈申如意否
至以爲念弟交夏以後孱軀尙無不適惟精神終不振作
終歲杜門除三四親戚至友外概不接見人事久廢已成
習慣簠齋老而愈健去夏得女今春得男半載之中適符
一索再索之占此福壽之徵也可喜可羨承索兩罍拓本
茲特精搨一分奉寄此器詔在腹中絕不易拓故友朋見
索未能徧應非吝也外又寄上近刻魏鶴山手劄全分與
前月奉寄之朱子易繫辭注稿可作延津之配均乞鑒收
簠齋收臧之富貧絕今古賞鑒亦高出一時惜刻書過求

精緻未免蹈因噫廢食之弊弟移書規之並願相助爲理
蓋其欲彙三代彝器款識精刻一書此已操必傳之券嘉
道以來地不愛寶所出先秦古器獨簠齋搜羅墨拓爲至
多倘得及時付梓略仿薛阮二書之例刪煩就簡疑者闕
之不加穿鑿此書一出與薛阮二家鼎峙不朽乃因體例
未定又復高閣殊可惜也吳中舊雨無一存者湘舟去世
尙在庚申以前其後嗣零落目前止有一姪而已三十年
故交誠如來諭簠齋外惟我二人而又年老多病遠隔數
千里此生未必有相見之期只有憑管城君互通尺素以
當晤覲近日輪船有專遞書信局都中往還不過十三四

日必達以後寄書統由枚卿世講轉呈惠函逕寄蘇城金太史場吳公館無有不到也

又

去年夏秋兩次惠寄手書俱於十一月二十三同日領到流光如駛轉瞬歲律已更將交杏花時節遙想林泉頤養動定攸宜幸甚幸甚弟跼伏蝸廬無善可述今年元旦後南中奇冷爲近十年所未有瑟縮擁鑪筆墨皆廢甚念吾老友交春以來眠食何似舊恙能否霍然藥石培補老年必不可少然以血肉之品爲宜按摩固好恐未能遽有效驗弟曾行之不久卽輟蓋不能耐煩也茲因小壻朱平華

孝廉名鏡計偕之便帶上拙輯焦山志一部八冊伏求鑒
定尊刻吾廬筆談及續泉匯均以先覩爲快

馮竹儒觀察 煥光

前者辱損書重荷獎飾實切慙悚敬審德位兼崇身名俱泰頌聲洋溢中外交孚幸甚幸甚 弟 衰病杜門日惟於故紙堆中消遣懷抱而耄荒寡學老而無能乃執事不棄其愚勤勤以箸述見商並以人才下詢在執事虛懷若谷不擇細流而蹶泔之水何足仰裨高深祇益愧疚耳伏念執事宏通淵雅學識超羣年力正富精神又足以發之今於政務之暇欲綜

本朝開國以來

聖德神功仿紀事編年之例排比成書此不獨挖揚

光烈而

列聖之厚澤深仁所以邁越漢唐蔚成萬年有道之基俾
讀史者因文見義考究其得失曉然於積累之深其來有
自誠一代承明著作之林也惟茲事體大來論謂非得廣
蒐羣籍詳稽博采難期成書尤服卓見舍親沈味畚耜廉
仰託宇下其於詩古文詞俱有根柢聞幕府英賢薈萃有
阮相國畢尙書之風他日鴻製告蕝必能信今傳後備
國史之采甚願先覩爲快也附呈拙箸焦山志一部乞鑒
定不宣

前函正欲拜發又奉手畢承惠朱提五十金諭作刻書之

助仰見摯誼勤拳溢於儀物之外感幸曷已惟拙著已刻者業已蕝事續有所刻一時未卽開雕用將原券謹璧心領之忱辭受實無二致交託文字之末決不敢以形迹自外尙望鑒原勿以矯情爲疑致辜盛意禱切禱切

潘星齋少宰 曾瑩

八月間 兒子承潞

出都接奉手函並承遠貽墨妙一花一

葉胎息南田仰見簪毫畫日之餘濡染之工進而益上歡

欣傾倒如何可言

弟

於九月杪偕季玉親家聯舟至鎮江

小住一日季老赴甯

弟

則渡江上揚州留連一月有餘月

之既望回蘇偃蹇菰蘆日惟從事研削夏秋以來爲親友

所迫間事丹青蒙惠法繪早經潢池懸之齋壁覺生香活

色真有秀絕人寰之妙竊不自揆輒對臨一幅題語行款

印章位置亦俱照原本不稍移易此真優孟衣冠也附寄

法家得毋捧腹南中名賢字畫自去年以來頗不易覲 弟

頻年略有新得惜相睽過遠未能就鑿也

又

舊冬新春兩奉手教深荷存注

弟

自去夏忽患臂疾屈申

不良作字逾五六百便欲輟筆生平無他耆好除却故紙
堆中別無生活所箸彝器圖釋十二卷業已授梓葺工俟
便當寄請是正子青制軍劇喜作畫偶見拙筆遂折節下
交兩年以來討論六法弟固藉獲進境而青翁得縱觀東
南收臧名跡擴充眼界筆下益增蒼潤之氣間遇心閒意
得幾可與戴文節相埒承詢能否作畫弟久欲以近作奉
教乃脫手卽爲友人攫去俟天氣暖和當作小幀奉寄竊

欲拋博引玉老親家其許之乎承示往年奉贈新羅小立
軸爲松筠庵詩僧所得此畫被柳門遺失意謂必入僮夫
之手今得臧之名山仍稱得所矣南中自兵燹以後好事
者頗多書畫碑版稍可入目者價便騰貴吉金類多贗鼎
其著名之器價必以千計人肯以重金市馬骨則千里馬
至矣驚利者固不踉而走也然非好之而又有有力者安能
與之豪奪哉壽卿屢次來書欲託在吳中購覓金石蓋不
知近時情形也知好中惟子山蔗境最甘甬上不乏收藏
之家好事者少故渠新得獨多現仿庚子消夏之例編輯
書畫目錄致足羨也林一常在木瀆正月間來城一晤身

子與鄙人相同無月不病子貞病在牀褥每見必執手嗚咽前月十八日在臥牀相會病頗危殆近日略好今已七十五歲矣此海內靈光也救閒親家精神意興均好寒家亦託庇安適長孫馥綬於去年初夏完姻卽子山孫女今已懷孕矣瑣瑣附陳聊當情話三兄親家處亦久疎音候祇以至好通書雖隨手拉雜亦必有真意存雅不欲以寒暄套語倩人捉刀轉致疎闊職此之由此書卽呈省覽不另護謹

許仁山閣學 彭壽

夏間仲發親家來蘇奉手書並承惠寄張猛龍碑一冊擅
蠟精工古香四溢重以老姻伯跋尾尤足尊貴謹當什襲
珍藏永志雅贖比因來往大江南北又迫於賤事致稽裁
報幸勿爲過弟於九月間復偕季玉聯舟至鎮江季玉赴
金陵弟則渡江上揚州留連月餘於月之旣望返蘇蕉林
親家與仲發皆在邗上暢晤刻知爲漕運事蕉林赴淮見
漕帥因農部欲辦河運漕帥主此議而河運無船故李宮
係力主海運前摺想已閱見蕉林之赴淮欲與漕帥面述
情形也今年蘇屬漕事頗形竭蹶至今各縣米數未定幸

劫後民情較馴屆時或可敷衍完篇比來冬寒殊甚不審
尊體若何舊患想漸霍然金石圖書有無新得竊願一聞
之也前攜去江南十畫家合作樹林小卷有董思翁陳眉
公題語此卷乃姚子真親家所贈如已臨有副本務乞將
此卷寄還因故人遺物不忍舍去之也千萬千萬

金眉生廉訪 安清

日昨專布一信限初六日投覽計可如期達到刻奉手書
並撫藩各件當卽一分致吾弟一片公忠在江北創立
餉局以贍水陸各軍原恐飢軍譁潰裏下湖一塊乾淨土
設竟陸沈則東南大局從此無轉圜之日此爲匡濟時艱
起見並非逐逐於名利也議者不察遂起歧心百計阻撓
多方牽掣更不免播散雌黃務欲使坍塌而後已此其居
心尙何可問客有從江北來者詳詢尊處情形譬如單鎗
匹馬鏖戰於百萬軍中雖子龍渾身是膽而從旁窺之實
代悚然所望執事處之以鎮靜濟之以縝密小心擘畫大

度包容俾含沙射人者無所施其伎倆然後效劉穆之之
五官並用或可期展布裕如攸往咸宜否則閤下苦累已
極而動不應手不亦辜此勞勩耶意有所觸拉雜書此以
當抵足明者見事於未形定心心相印也

朝政煥新中興有兆而東南賊勢尙熾殆劫數未盈耶兄
與楊憩棠定初七八動身渡江一切面議大約乘坐輪船
以期快速曾帥書如未發幸將每引十兩之說參以活筆
緣鹽務尙有浮費今欲一掃空之盡歸於官斷做不到此
事上游看得十分鄭重蓋恐難以交卷也兄此行爲四路
辦偏不能自由餘詳曉翁書中不盡

又

前者台從瀕行曾草復數行計邀鑒入日來秋熱殊甚不
審尊履如何眠食無恙否念不能置吾弟本是傳修期辛
稼軒一流人物世亂賢才不得登用故一小試輒爲忌者
尼之記得東坡在惠州佛印與之書云人生一世如白駒
之過隙三二十年功名富貴轉盼成空何不一筆勾斷尋
取自家本來面目萬劫常住永無墮落又云子瞻胸中有
萬卷書筆下無一點塵到這地位不知性命所在要這一
生聰明做甚麼兒學行不敢望古人亦嘗三復斯言頗有
領悟雖不能舉頭天外作透網之鱗然視身外之功名富

西華車戶別
貴實有不動於中者五年於茲矣二氏之學稍稍涉獵惟
患經旨艱深讀之費心故不卒讀平生最服范景仁服其
晚年清淨無欲一物不芥蒂於心不學佛却是真學佛可
爲我輩師法同儕中如劉松巖金香圃輩宦途可謂得意
矣曾不能享一日清福遽爾化去甚至不得善終我輩雖
貧一身健在尙不致便作餓鬼且圖書滿架爾室嘯歌名
山之業自有千秋亦何必勞精疲神消耗於鏡花水月之
中耶前見老弟精神意氣索寞已甚迨兄將用世一層喝
破吾弟低首降伏不似從前以辯言巧抵故兄不憚煩言
重爲此書以進於左右至於家食之累自古聖賢豪傑逸

客清流皆不免求人度日此則自當徐籌善法近裏著已
凡屬知交斷無漠視天下滔滔功名之際如今之衮衮者
亦可謂雄矣欲求如我輩之一日清閒得乎吾弟不寐之
時以此譬之其棄取當自有在也千萬珍重

又

前日得采香書知吾弟曾到吳門越日卽赴滬上正深馳
念適奉手翰猥以兄六十賤誕復承寵錫佳章詞意殷肫
情侔骨肉惟獎許過當蹄涔堂坳受江瀆之水不免盈溢
是懼首篇著書各有千秋想下筆能供一世求則又吾弟
兄所當交相策勉以期追蹤古人不虛生此世三篇

殊恩要自仁言發積困難教俗論知功果可成甯已出名
能不朽亦心期用意尤深有頌不忘規之義紬繹再三敢
不永佩箴言益勵晚節兄到婁東小住日與孫兒女輩調
笑取歡亦聊以自慰也因采香書來謂菊花盛開促即歸
去台從來蘇正可暢敘惟兄今年交秋後精力益衰崦嵫
已迫頗以撰述無成懼與草木同腐前承索觀鍾六英學
士所呈拙議恐與原稿或有竄改故未抄奉昨由浙撫抄
咨到蘇已得閱見特寄清覽仍乞擲還因林一亦索觀也
蘇松嘉湖水道同源其貫爲農田命脈所關已巳年奉
旨開濬僅擇數直港畧加挑挖深不過尺許費不盈萬串

其實在淤淺處概未開濬若因限於經費原可逐年分辦作得寸則寸之舉乃承辦之人見不出跬步不明利害妄思褒獎遽報一律疏通開竣當道不察亦遂據以入告愚以爲不報開竣尙有重開之望今已報開竣矣覆奏矣非閱數十年斷不能遽議重開其爲農田之害甚鉅語云食某處粟卽視某處爲一家况兄籍隸烏程家居漣上旣已身親目擊安能如秦人之視吳越人肥瘠漠不相關此義所不敢出亦情所不忍不言者不意六英遽以上達也使由是得以重加大治俾農田水旱有資永免墊溺則雖受多言之咎亦何所恤前日湘文來書謂議合碧浪湖及各

濶港大加興辦未知果能踐言否今之從政者苟能實心
爲地方興利著有成效民未有不口碑載道馨香尸祝者
湯文正民不能忘至今綽楔巍然豈異人任哉此事關係
水道不獨湖州一郡沾其利而已吾弟如致書湘文尙望
有以規益之幸甚幸甚

又

忝來辱賜書具悉比日歲律將更伏惟道履冲勝承示明
正將家事交與中饋主持先至吳會以次出遊飽觀東南
好山水不復再預塵事庶不虛生於世等語甚善甚善吾
弟天分旣超而又博極羣書宜其發爲詩文足以凌跨一

世特爲牽於名場如良驥之伏櫪聞鼓鼙之聲常有昂首嘶鳴之意遂不免憧憧擾擾把捉不定未能專務本業從今以後果能將無益之心思志慮一掃而空更借山川雄奇蒼秀之氣以擴其詩境自然夔邈高迥有一種不可磨滅優入作者之域信乎必傳而無疑者豈徒以月露風雲雕繪景物襲韻語皮貌爲哉此則僕所望於吾弟竊願與之共勉者也人還待覆甚促拉雜布肌統俟明正晤罄所需紹酒特揀四年陳者兩壘以佐春譙希哂納

又

銷英道人足下一昨接手書尾注初四二字殆筆誤耶承

論外間物論全是私心不足擾我胸次不過如天明之蚊
陣太陽一出卽寂然無聲甚是甚是道人袖納乾坤氣吞
湖海一點陽光孕於道人胸次所望早早放出普照大千
世界魑魅罔兩使之無所遁形豈特蚊聲寂然已哉然則
蚊聲之寂與不寂在太陽之出與不出而太陽之出與不
出其權固操自道人也前者道人自定榜名曰癡今又加
一瘋字真瘋耶抑傳奇中之尉遲恭耶一笑昨與香巖采
香菴閒約三月間必鼓棹詣訪作三日暢談亟盼道人大
施法力將文章光焰斂入胸次鍊成一點真陽直從頂門
上放出變成祥雲瑞靄使新居花木都有欣欣向榮之氣

豈不善哉豈不善哉不宣

又

銷英道人足下前昨兩日疊接滬上所發第二第三兩函
一一領悉承諭禾中謠詠月前已知之即使不經而走到
北方亦必在六七月之交又恐鄙人之憂念也曲爲慰藉
抑何待我之厚而自待之薄耶從來明於知人而自知稍
疏者史臣於馬伏波嘗論之矣以伏波之忠謹尙不免茲
米之謗今道人所發爲措施者人人皆以爲非卽二三至
好以及家庭骨肉亦莫不代爲憂慮乃道人明知故犯甘
以一身爲叢怨之府現在蘇浙兩省貴人側目富室吞聲

而道人毅然行之百折不回揣道人之意以爲直隸哀鴻
非我莫拔故不惜此身以拯此百萬垂斃之命此固道人
一片熱腸也然而誤矣我

國家深仁厚澤二百餘年凡遇水旱偏災一經奏請無不
立沛恩施如今司農雖支絀數十百萬之賑何難咄嗟立
辦李中堂雄才大畧八面玲瓏豈真見不及此倘屆時賑
項不繼只須附奏數行

朝廷視畿輔至重斷無不朝請夕發者道人旣無官守又
無言責何苦獨撻厥怒乎僕非不知數則斯疏聖有明訓
然與道人二十年文字之交猥忝一日之長知而不言是

僕貧道人言而不納區區之心盡矣竊恐道人必有自悔
之一日此書不妨留爲異時之證券也可不宣

又

前月讀大箬詠菊八章詞旨工雅意義深遠愈讀愈雋永
有味不覺爲之心折佩極佩極吾弟蘊負宏富不得已託
諸箸述駸駸乎已造必傳之詣昔賢論詩古文於才學識
三者之外必繼以養之一字誠以涵養深則才學識皆從
醞釀出之由是胸懷灑落意氣和平發爲文章得中正溫
厚之旨此鄙人欲得而未得之境知交零落無可問津惟
吾弟或有以啟牖我耶比交冬令氣候寒暖不常不識起

居何似伏維珍重前台從有來蘇之訂專盼行旌故未裁
報茲聞先作滬遊未知何日惠然良深馳企賤恙總未脫
體末疾時發右臂較平時短一寸左臂短至六寸以向高
處取物伸縮爲準故知其長短如此奈何

又

昨奉手書謹悉種切承示近箸已詳讀數過平生未登泰
山致爲憾事今閱謁岱一篇從遙參亭至造化殿不獨全
山勝景宛然在目中間壑象之莊嚴畫壁之飛動溫涼玉
得之耳聞不料實有此珍至帝出乎震人生於寅一聯署
歛姓名與兄同豈兄孩提時所書評云語巧而書不稱洵

爲正法眼臧一笑惟論秦碑謂宋人劉敬記尙存二百二十四字至

本朝已僅存二十九字云云此碑原父兄弟均有箸錄而劉敬所記實未閱及尙乞詳示以廣聞見尊體亦時有不適望六之年有不期然而然者祇有放寬心思加意調攝一法不宣

又

前日台從枉顧力疾陪談起坐畧久便不能支殊以積懷未罄爲悵兄此次病後已有五旬而精神總未復元昨從香巖處交到手翰展誦之餘深荷愛注之殷無殊骨肉至

謂著述最耗心血並引

國朝諸老其傳世之等身著作當日不過綜其大綱至於
援古證今鈎心鬥角類多出門弟子與幕府諸名士之手
故能長享遐齡身名俱泰懃懃之意惟恐見於筆墨一門
過費精力有違頤養以致久病未瘳循讀箴言實切銘感
我弟兄處境約畧相同當年壯氣盛之時皆欲有所樹立
以功名遂顯揚之志乃辰逢箕斗運值角張佗傑半生屢
起屢蹶於是翩然戢影長與世辭而又名心未滅思欲以
文采表見冀不與草木同腐遂致自縛自纏幾如春蠶吐
絲非死不盡此誠自討煩惱不自知其勞精敝神陷入魔

障也今蒙良友規勸謹當暫輟研削未葺之作悉俟春暖
身健再理以副雅懷黃花時節吾弟能不爲飢驅出門否

又

月之十三日奉寄寸牋附酥糖八十包未知何日澈覽一
昨奉到手諭並冬居雜詠四篇額誦至再愛不忍釋中間
如座上盆梅花簇簇牀頭春釀醉悠悠此邵康節安樂窩
中佳句也遠道哀鴻饑正苦窮交涸轍計難全則又與杜
少陵憂在天下同意四詩陶寫性靈不事雕飾而自然名
貴允推合作必傳無疑佩甚佩甚歲云暮矣昔人所謂風
景淒然者我輩轉以陶然泰然處之隨境取樂屢空晏如

守拙安貧其保晚節世有鄭子貞陶淵明其人或許把臂
入林引爲同調耶

又

昨者台旆臨蘇暢談三日情足千秋聯語真是雅謔使遇
退菴中丞必將采入楹聯叢話矣別後接到手劄並詩文
近箸讀悉一一二十日超山探梅之約想不後期惟是日
風狂如虎氣候欠和鄙人瑟縮擁鑪尙覺畏冷於此益羨
諸君子游興之豪真不可及也敏老新居聞有水木清華
之趣篋翁近體如何均深記念大作市小疎鉅迷廢埃夜
寒微火失漁汀不愧警句可傳今雨猶憐舊雨無句似嫌

湊韻近率因來書卽欲料理授梓一得之愚輒貢左右敬
禮陳思互資攻錯古人所以重朋友也平捨弁文有爲而
言與世之澆忍獻諛者不同自是佳構佩服佩服

丁筱農觀察 彥臣

同鄉親故宦各一方久聞博雅好古心竊嚮往比得手翰
並承遠寄北魏各種摩厓碑及漢張遷魯峻河平各碑一
一領到感謝感謝漢碑絕少精拓宋元明書家不專習分
隸間有傳世者於兩京風格相去似遠想當時捶搨者少
故世間不易多覲偶得一二舊拓已不啻景星鳳凰矣張
遷魯峻二碑尚是五六十年前所拓可貴河平新近出土
去年潘伯寅少司農亦曾見寄一本或疑其偽造究竟如
何敝臧漢魏六朝唐宋已來碑碣不下三千餘種屢欲彙
一碑目至今未就雲峯大基各摩厓均有獨少鄭文公上

碑今承惠我得未會有欣悅無已辱示新得泰山二十九字原石本此碑近來絕不易得弟臧一本尚係嘉靖以前所拓舊臧彭尺木先生家爲吳中著名之品曾屬儀徵吳讓之茂才撫刻入石形神畢肖特寄奉一幅外又寄去程孟陽稷帖一種汪容甫稷帖一種米臨稷帖一種趙文敏小楷赤壁賦一種文待詔小楷千字文一種齊侯罍拓本兩幅周盤漢碑合裝二冊虞恭公碑雙鈎二冊統乞檢收訂正所需吉金拓本容後續寄倘有新得尙望示知惜道遠不能各出所臧以資欣賞臨書翹勤不已

吳桐雲觀察 大廷

一昨辱損書伏審道履清嘉榮問休暢前蒙惠攷大箸嗣
又從眉生方伯處交到續集謹已浣讀再過中間兵農禮
樂道德文章中外事機邊防形勢莫不斟酌古今按時立
論無苟同之見無炫異之心言必冀其能行事必期於有
濟和平質實粹然一歸於正此經世之鴻文不朽之盛業
也若僅以氣格蒼老詞旨簡貴謂可並軌方姚論文則似
矣恐尚未足以窺大賢之用心也敬服敬服 弟 鍵戶養疴
藥鑪茶竈與叢殘書卷雜陳左右日處其中人事久廢恆
終月不一出門親舊見諒亦不以禮節相繩時或伏案拈

毫聊以消磨歲月閒居拙況如此不足爲執事告也鮑子
年觀察博雅好古夙所欽慕前由家清卿太史寄來觀古
閣泉說叢著各一冊讀之益增嚮往茲承遠索拙著彝器
圖釋本當卽寄因此書雖已授梓尚多舛譌待改故未刷
印夏間老友陳壽卿太史暨伯寅司農索觀稿本遂先印
數部寄之餘則盡爲友人取去現在校訂粗完卽擬重印
一俟蕙事必當首先馳正兼寄子翁大約季冬總可報命
賞音在前藉可求教亦不敢自匿其醜也恐勞屢注先肅
布復

又

久疎修候實殷懷想前月底有東洋人竹添君名光鴻字
漸卿號井井者來訪云與閣下爲文字之交人頗風雅言
語不通彼此皆以筆談文理亦甚明順挈眷遨游訪求名
勝出示游草一卷楚楚可誦惜弟病體不能多談臨去以
素紙索作書畫當許以寄由閣下轉交茲特塗就敬乞卽
日確致我輩與外邦人交縱未能忠信篤敬而有約在先
不可不踐也瑣事瀆陳臨書皇恐

二ノ目

三ノ目

家讓之明經 熙載

接到惠書各件現已裝池成幅懸之齋壁如對故人內如
臨西嶽華山郎邪石刻天發神識各種篆隸筆力蒼渾古
勁不特凌跨流輩實足駕鄧石如桂未谷而上之將來一
代傳人可爲兄預決珍重珍重弟現在編輯吉金款識凡
積古齋已載者不重錄其無關攷證而跡涉贗鼎者概行
汰去大約鐘鼎簠簋敦彝尊甗之屬可得六百餘種類次
十六卷竊願爲積古之續或卽署續積古齋鐘鼎彝器款
識此外有積古齋所載而於原器詔文實有譌舛如邢叔
鐘之漏刻數字者擬另編一卷爲積古齋鐘鼎彝器款識

訂但論字文不及攷釋以免喜謗前輩之誚所慨兵亂以後故交零落同好凋亡兄又一江遠隔質疑問難頗少其人現埃草稿粗定明春安硯焦山奉迓枉顧就正有道再行付梓至釋文仿嘯堂集古例疑者闕之以省剗剔之費柏刻匠現在何處如無事做可屬其趁便船來滬給予舟資四金可向洪石梅取付由弟寄還此事石梅亦必欣然也倘栢匠現有生活則明春隨吾兄到焦山亦可緣仲舍親處屢次切託爲吾兄籌一館地杜小舫弟處亦已屢次信去未知有無眉目世兄差事能否蟬聯均切系念焦山掌故有應補入志書者乞爲留意不宣

又

此來傷逝思舊無可以言與兄相晤兩次亦迥非昔時意
興兄今年政七十耶人生自墮地以至百年莫不要從原
路上去弟薄有留贈交存季谷處並有說話屬王吟軒轉
達喬中丞與小雲秋墅處均已面託亦各有所贈此數項
統望留作正經用不必歸入開門七件事中晤詢吟軒自
悉鄙意倚裝留此代白惟保重爲屬

戴禮庭司馬 丙榮

奉手示具悉子偲信已面交渠尙有耽閣所云官書一節
弟與同志友早經議及當道皆以迂濶目之今得李宮保
提倡必可以就然昨日子偲來適首府汪黼卿在座云曾
與三首縣商及此事都以無處存儲爲慮 弟暗中以言歆
動之恐非西平勢力此等事未必卽能成也子偲論書極
以緩老爲野狐禪平心言之緩老學博而見廣在今日應
推獨步惟年望俱高不免有英雄欺人之處此訾議所由
起也緩老嘗謂子偲曰自書契以來從未有尊書這一派
當面調侃不免惡作劇令人難受子偲亦今之學者也原

不必以書律重書雖小道然非有數十年苦功加以讀書
養氣又多見古人名迹未足與語也韓子曰用功深者收
名也遠六書亦一端也弟爲境所迫未能專精於問學古
人鶉衣脫粟悠然有自得之色自恨又不能耐苦物來輒
爲所誘卽如終日敝精於故紙堆中思欲以文采表見此
佛家所謂魔障亦吾儒所謂雜念不知何時始能克治淨
盡不爲外撓昔宋祁行年六十知五十九年之非弟今年
五十六歲久過遽大夫知非之年矣來日苦無多恐至子
京六十之年仍懵然也奈之何哉奈之何哉

莫子偲孝廉 友芝

客臘奉手畢承示聽松石巋然獨存 弟 亦訪確誠如尊論

弟 前歲親到惠山兵亂以後舊遊之地風景全非亟欲覓

聽松蹤跡詢訪無有知者後問茶肆中人得此兵燬昇遷

兩說所謂道路之言也嗣晤王補帆廉訪俞蔭甫太史僉

云此石實在本擬重作一跋今讀大箸敘說甚善謹當並

梓以志匡益惟原版冊尾空處止餘今尺二寸五分高六

寸五六分能將尊跋縮寫數行則移寬就窄不必另添版

刻更爲合式幸卽書成寄下爲盼李伯明碑兄撫本旣爲

鼠碎自須重摹倘台從春間不能到蘇 弟 必將此碑拓本

寄上決不失諾舊臧泰山廿九字實爲南宋精拓本去年
與讓之鉤摹入石擬置焦山特將墨拓寄呈法鑒唐寫說
文殘字春間必可裝池完好緣劉匠病已漸愈春暖卽趕
緊動手大約暮春之初可以奉繳足下聞之必稱快事也
懷甯鄧完白卒年包慎伯稱其六十三歲見包氏安吳四
種鄧山人傳而方彥聞屢錄著完白山人墓表見萬善
花室稿則
云卒年六十七歲近人平湖錢海藩作補疑年錄亦云六
十七歲慎伯與山人交甚密服膺推重又甚至不應爲山
人傳將其生年舛誤按方氏墓表云卒年六十有七有子
曰尙璽能世其學似又確鑿無疑究竟孰是孰非索解不

得兄如知之望卽示悉如亦未詳望轉詢山人嗣君守之
文學緣弟臧有山人篆書弟子職全篇書於暨陽書院時
在嘉慶九年逾年歸道山此生平傑筆裝成十六幅友人
借刻索作跋尾應爲糾正也

沈韻初中翰 樹鏞

酷暑正熾未識眠食何似伏維珍重弟杜門養疴久已不出戶庭矣月餘來兩得陳壽卿太史書攷論金石之學甚爲辨博此二十年前舊交久不通音問不意其健在勤學如此難得難得漢韓勅禮器碑曝書亭集載前碑紀造禮器後碑以志修廟謁墓翁覃溪云韓勅後碑今竟不見其石屬桂未谷訪覓亦不得昔年金陵鄭汝器猶手拓其本以遺朱竹垞何至數十年間便湮沒不見云云昨蟻叟忽欲借閱此碑弟處止有前碑及碑側碑陰未知尊臧有此後碑否如有望借一觀必不轉借與人兩三日便繳也

朱春舫觀察履恆

前者到山知兄在將軍幕府襄籌軍政本擬約蘭垞奉訪
適讓之來述老伯母西逝之耗不勝驚疑旋得訃音爲之
惋愕者累日伏思兄純孝性成遭此大故辟踊哀毀自不
待言第念老伯母懿行淑德節比松筠昔年讀柏舟風雪
之詩久生敬仰祇以山川迢隔未獲升堂謁拜一識慈顏
今者壽考登仙兄已勳名昭著克副顯榮綽楔輝煌絲綸
稠疊固當九原含笑遺憾毫無還望順變節哀援古人滅
性之戒珍重自愛以妥先靈是所至禱弟本擬渡江叩奠
因前日讓之在山白首相逢恣意談讌未免飲食不節日

來小有腹疾未能遠出特備輓聯香楮專丁代躬稍申芻
敬伏希告存臨書歉悚

又

蘭垞書來云兄月初卽欲歸葬未知從何路行走江湖滿
地深以未得一晤爲念弟患難餘生近益自廢昔褚伯玉
五十四歲卜隱剡之瀑布山絕跡世交人稱其隱操弟今
年正同此甲子矣自恨入山不深用志未一於古人所謂
道德文章汔毫無窺見每一念及輒增悚怍真不足以仰
對知己兄歸棹時能過山作一二日留否倘此約得果務
望先期示知以便預約蘭垞共罄積悃虞山公得近信否

弟於長安故人年來概不敢輕投尺一而於虞山蹤跡則尤未知之也頗深系念

又

前月奉手書伏審道體安和勲望日懋此番兩使相會於金陵想見冠裳鏘躋旌旆飛揚更聞節署演戲三天尤令人有復睹漢官威儀之感季玉來書亦頗興高采烈也銷英爲謁李相到甯想必握晤渠本鄭當時辛稼軒一流人物乃懷才不遇未免有老驥伏櫪之悲近爲浙鹺事益復左支右絀鄙人曾一再規之人情於銳意欲行之事不至推車撞壁固不肯歇也馬制軍稍平中正想必相見恨晚

眉生有奉託之事望關拂及之風便惠示近況慰我飢渴

兩壘軒尺牘卷四

歸安吳 雲愉庭著

蔡麟洲太守 振武

夏間雲藍閣陳君攜到手書早經領悉陳君本係舊識當與接談獲知底蘊允爲邪許並將尊函交冠雲閱看亦願助力嗣陳君因賃屋未就遲未舉辦弟亦附緣仲便舟到山以致報書久缺幸勿爲過比者秋涼伏維起居清勝側聞貴治兵燹之後凋殘殊甚得執事勞來綏集可期漸復舊觀盤錯所以別利器虞升卿神明之頌不得專美於前矣可勝健羨弟到山後因蕉林主人赴江北勾當公事仍

得借寓三退樓中樓爲蕉林拓寬丈許三面臨江比舊時
更爲軒廠實全山第一勝地蕉林題枕江閣三字屬鄙人
書額昨已懸諸閣中案頭有右軍誓墓魯公乞米諸帖興
到輒臨數過坐對江山悠然有出塵之想時或倚闌憑弔
唱大江東去一闕慨念髯蘇當日抱文章忠義而遷謫轉
徙幾蹈不測之禍則又未嘗不倦懷前賢感傷身世弟此
來爲了向平之願大約冬月間始能返滬把晤尙遙風便
乞惠數行以慰飢渴餘惟爲政自愛不宣

金香圃觀察 以誠

月初接前月十七日惠答昨又接本月十一日手書均已
領悉吟蕉於廿四五日治喪屬代送幛對當卽辦就送去
承示 潯兒 不宜遽改外官或仍以京職應試可望館選此

吾弟骨肉之愛所以期望之者至深且厚心感心感 兄之
萌此意者實迫於境耳韓子曰中世士大夫以官爲家罷
則無所以歸自念宦途二十餘年圖書金石之外一身僅
在兩袖清風此弟所素知者今以一家數十日事畜之資
常效昌黎公之日求於人以度時月安能持久復念犬馬
之年已五十有三精神意氣日益頹唐倘以家計艱難膜

顏再登傀儡之場不特人所齒冷抑且鬼爲擲掄兄又斷

不出此不得已欲爲兒輩作求祿養家之計此固無聊之

極思本非心中所願也今蒙明諭容俟八月間到山挈同

瀦兒

渥聆清誨再定進止前書所云館修一節面詢某某

據稱欲蕉林一言方能定局此事蕉林致書於前子和小

舫介言於後吾弟復又面託豈衆人之諂諂不及蕉林一

語耶未免市僧故態矣或卽置之亦無不可昔都南濠窮

老箸書常仰屋笑曰天壤間當不令都生餓死竊引此言

博第莞爾

曹愷堂李友琴諸君

自香圃故後卽聞嗣君福保以髫齡之年病日甚劇心竊
憂之後得漸瘥真天幸也今春承香圃三位夫人攜福保
過舍談及家常弟卽告以香圃遺蓄頗豐目前只要安分
和睦便可喫著不盡至要在廣積陰功爲培植福保地步
語頗諳切當時三位夫人似以鄙言爲然昨在汪觀瀾封
翁座中談及香圃大夫人肝厥幾殆諸君子皆以爲憂鄙
人又援積善降祥之說請諸君轉達諸君撫掌稱善均謂
此實勝於服藥未知曾否達及韓子曰殃慶各以其類至
金氏之爲殃爲慶與鄙人何預哉徒以與香圃當日曾共

患難又見諸夫人及福保身弱多病故不憚再三之煩獻此愚悃此後凡夏施醫藥冬施衣粥以及修橋補路種種善舉凡有正經人來募勸者務必樂施或有大工程實可遺數世利益者雖爲數較鉅亦不可惜語云修德必獲報又云和氣致祥乖氣召戾此皆古今來明效大驗無絲毫或爽者世有積貲數十萬尙孳孳爲利維日不足不轉瞬而蕩爲邱墟他人入室者指不勝屈此無他是猶築垣墉而基不培固上益加高鮮有不傾覆者矣自今以後應屬三位夫人普存爲善之心勿存營利之見或有以將來難過日子等話頭來討好誘說此其人要剝喪金氏元氣是

與福保爲仇者不得留心審察以金氏現有家業計之
只要無意外之釁卽每年作善多用萬金數千金量入爲
出仍有贏餘倘外侮迭乘內訌又起雖一錢不用日進斗
金恐亦無濟於事也諸君不以鄙言爲謬請卽切致三位
夫人或摘其中聽者分錄一通留備省觀從此雍雍睦睦
時刻以積陰德遺子孫爲念天道好還會見福保聰明日
進三位夫人亦必康強逢吉此皆可預決者欸欸之忱無
非爲亡友起見香圃靈爽有知當亦含笑點頭也

平學車ノ月

卷四

四

沈受恬茂才 秉恒

寶墨齋顧雲峯善於裝裱亦能鑒別碑版特屬走謁如有
裝潢之件付與經理無誤清恙新瘡首以調養爲主近日
時醫多有不明脈理者服其藥間致受害不可不慎也大
約調養之方飲食外以靜坐數息爲第一東坡所謂無事
此靜坐一日抵兩日是也他如臨模古帖間觀書畫亦足
怡情悅性特不可過於認真務求刻畫前見足下臨鄭道
昭書非不酷似所恐大費腕力轉妨頤養耳書律雖小道
却自有循序漸進之功鄙人幼喜臨池乃今頭白學書垂
五十年矣得失寸心知其能擺脫古人繩墨不爲所束而

自能心手相應有揮灑自得之趣惟近數年始稍窺此境好之不如樂之固未易一二爲外人言也足下書學雅有根柢又能心思靜細專志用功梓鄉名賢吾黨俊材斷無有逾於足下者因自忘老醜檢今夏雜臨十七帖坐位帖吳郡書譜聖母帖鄭文公上下碑西嶽華山碑共六本又蘭亭小卷一匣奉塵鑒賞小憲多明賜以平閱書雖不工而臨古不泥於古或亦有愚者一得之長質之法眼能不見哂否卽乞轉交四兄借少蘭同閱各題數語或書一觀欸均足增重此數冊皆係兒輩裝池爲家塾所臧定於重九日走領敝帚自珍未免可笑手此代面畧陳區區藉爲

調攝之助諸惟保護不盡

魏稼孫嗟尹 錫曾

別後時殷懷想昨從儀顧堂寄到手翰讀悉種切就審與
居安善學與日進欣慰无量弟崦嵫日迫衰病侵尋終歲
杜門一切衣冠酬應概行謝絕偃息菰廬馴成老廢不足
爲左右述也承示覓得叔未丈文稿擬爲授梓甚盛舉也
清儀閣詩集已有刊本文集未見弟與未翁爲忘年之交
其長孫敬仲明府曾來受業有通家世誼故新篁弄臧大
半歸與敝篋未翁手蹟如金石書畫題跋攷證積累至夥
無從摘錄尊處所臧清儀稿本或先寄下互爲校閱無者
增入有者芟去倘能得一通曉文墨之人將稿攜來輒在

寒齋繕錄不過十日即可葺事至剗剔之費第當力助其成無憂不繼也

吳康甫明府 廷康

蘇州吳縣所屬橫山於本年正月二十日忽陷露古墓道鄉人掘得古甌有太元九年五年及作者朱稚等字後因紛紛開掘當道聞而禁閉太元有三一爲吳大帝一爲前涼一爲晉孝武按吳太元未及五年涼在西北此太元定爲東晉特拓數紙奉寄其文字在正面者少見此數字大有古趣晉甌出吳興甚多蘇州頗爲罕聞足下臧古甌至富其正面有字者有否乞示一二以廣聞見吳中近多好事爭購此甌市中骨董店因而徧搜居奇甚至每甌售至五六金亦屬異事此墓爲何人所葬未見埋幽之文尙無

確考

又

日昨奉到手翰發函申紙洋洋灑灑千數百言反復紬繹具見耆學之勤愛古之篤洵可謂足吾所好樂此不疲此福壽之徵也健羨無已承惠彝器拓本三十餘種展閱之餘但覺琳琅滿目古香四溢亟付裝池永以爲寶敬謝敬謝弟偃蹇菰廬方以行不加修學無所就時深兢惕乃蒙獎飾過情益增顏汗所需敝處臧器全圖拓本茲檢點篋中拓就者五種先奉法鑒卽以爲贈不足云報也餘埃續寄不敢失諾

杜筱舫觀察 文瀾

昨覆數行計已鑒入承詢水利一節洵爲農田急務往年王補帆方伯出京我鄉戚友官於京者諳諳以此事爲言補翁過蘇特來見訪屬開大畧其時補翁新授浙江廉訪事權不屬不便作高遠之論轉致因難而廢僅就湖州一郡應濬要工先行函覆然大要亦卽在其中矣用特錄呈省覽吳江令建議開通垂虹橋同爲水利要務亦同此得寸則寸之見若欲窮源竟委成數世之利垂久遠之謨非合兩省之力擇要疏濬不爲功今吾弟以浙人而開藩三吳有志振興實地方生民之福也抑有陳者從來成盛功

者必資人力吾弟欲辦此事必須官紳中先求主持之人
官場兄不敢妄參末議亦無人可舉紳士中兄敢舉二人
浙則縵雲侍御蘇則清卿太史二君向爲同志皆究心水
學者縵老昨日書來云李中丞邀辦善後已漸理歸裝清
卿定八月間出都此二君肯出而任事將來用人卽由二
君保舉可期周妥得力茲事體大今得吾弟主持於上又
得二君爲之襄助此千載一時之會也兄雖棄廢跽伏不
預外務苟有一得之愚亦必隨時上貢共成善舉但不能
出面辦事耳今昔殊形此等事亦非身親目驗不能取效
條分縷晰開辦次第只有臨時定議非空言所能賅也緣

奉垂詢謹就管見所及先行肅復惟加察不具

又

昨示書畫卷冊數種內吳文正金書小字麻姑仙壇記爲
吾弟心愛屬將文正籍貫事實一查按文正名澄字幼清
撫州崇仁人幼稟異質校定羣經闡明理學爲有元一代
大儒與許魯齋齊名學者稱爲草廬先生又攷至治間嘗
有旨集善書者粉黃金爲泥寫浮屠藏經是金書爲當日
所尙故此卷閱五百年而金色燦然所謂真金不變也其
爲文正真跡無疑吾弟正法眼藏洵不可及佩佩

又

昨示具悉瓊玖之貽誼不容璧敬謝敬謝吾弟歸去正可料理名山事業圖書萬卷恣意嘯歌俯仰皆寬起居自適比之逐逐風塵仰人鼻息相去何如耶兄罷職以來幾及廿載粗有撰箸浪負虛名苟非投閒置散世與我遣則雖欲以詭癡覆瓿供人談笑亦不可得然則人之厄我正所以玉成我也而又何瞢焉我弟兄務當各勵晚節蘄成不朽之名此則臨別贈言所當互守勿失者也漢碑精本絕少兄臧漢碑中以乙瑛碑爲甲觀弟所賞愛茲特移贈吾弟怡情翰墨時取臨撫見物如見故人知必欣然勿却也病後腕弱勉作此書用代贈別

又

前承示十七帖乃有明王氏據唐摹廓填本刻入類帖者
帖名鬱岡齋亦振振有聲兄臧有館本與此勘校絲毫無

異夏愚存金石目戲鴻堂鬱岡齋二帖鈎填者爲王鴻臚

鳳巖

宏憲

其烜赫有名可知特怪其羸入王右軍書鍾太

傅千文數十行詞旣舛譌難讀字亦劣弱可憎尙未能夢
見右軍脚汗氣不知何以誤寶燕石至此彼見閣帖中有
漢章帝書千字文遂謂千字文不始於梁不知此種僞迹
乃村學究所造以爲書家之鍾王猶儒家之周孔也故以
鍾撰王書爲合璧愈可取重於世亦有受其所給者他日

吾弟見此帖當不以兄言爲謬萬歲通天乃武周年號某君強作解事題跋必應褫去跋中謂董思翁無此壽尤爲可笑晨起清涼知吾弟近日已親筆硯特將前帖寄還並附此書以當晤對諸維加意珍重

又

頃奉手書具悉承示戴文節畫卷此僞作也歛署鹿賓鹿賓爲朱筱漚太常妹婿兄之同譜至交石門人蔡姓工於書畫爲沈竹賓高足或有此卷爲作僞對摹亦未可定論此字畫尙不及錢伯聲世講於戴文節相去甚遠切不可買眉生所買吳九太爺字畫約千洋並無碑帖嘉興陳太

守善書未知有著作及勒石之件否極願聞之兄處太清

樓二册標日前列歷代名臣法帖第七第八皆書晉右將軍

王羲之書八字後署大觀三年正月一日奉聖旨摹勒上

石此二册盡是羲之所書錢梅溪題簽宋搨太清樓二王

書帖後有長跋此二册在

國初臧於海甯楊氏不知施九韶明府與鹿笙太守所見

標題是否相同乞詢示知二百金博易之說姑作緩議附

去曹素功藝粟堂墨此趙惠甫之兄弱侯太守所遺弱侯

卒於徽省屯溪差次臧墨甚多此種爲第一眉老嘆賞不

置重僅二三錢五分價至紋銀五錢亦不爲菲矣請試用之

尙可續寄也承示前後漢書校本乃吾弟費四五年工夫始得錄竣兄曾嘆吾弟小楷工雅用心專一爲不可及今爲友人假閱未歸聞之代爲悶損容爲留心訪之

承示欲將近日親友中壽輓各聯擇其雋雅者類爲一編或付梓人以公同好並云兄所撰各聯有錄者有失記未錄者詢及當日輓媛叟一聯特遵諭錄於另紙奉正不宣

附錄輓子貞先生聯句

四十年師友兼資我慙涪老

八百載後先濟美君是坡公

勒少仲中丞 方錡

初九日託李資堂軍門帶去太倉風雞三雙嗣聞渠沂邗江而上迎謁曾相且與香嚴偕行不知何日始到金陵恐此雞已成失時之鳴矣前接到十月杪手書昨又奉本月初六日倪載兄帶來台諭又附新刊三國志一部一一領悉三國志紙印俱妙 弟處史漢正是此種恰合也謝謝小湖先生處墨寶不能暫借出門若得眼明心細之人前往雙鈞則慨然許借茲特請張玉斧兄到甯鈞取了道護啟法寺碑歐陽誦化度寺碑虞世南夫子廟堂碑褚遂良孟法師碑玉斧年壯心細目力極好鐫刻之工一時無兩諸

碑中惟廟堂碑有宋時舊摹本

筆畫板滯殊失秘書妙腕

尚爲習見惟

此本評者爲唐搨故欲借摹耳

第

昔年在揚州鍾小亭中

翰處見過翻本約記與彥超重刻筆畫頗有同異事隔二

十年已省記不清亟欲得雙鉤一觀也啟法寺碑僅於宋

賢碑目中見之元明以來絕少箸錄此本爲吳中故物係

義門何氏舊藏

第

久欲一見不可得孟法師碑與化度寺

碑

第

處俱有翻本化度尙係舊翻孟法師碑則坊版耳閱

之生厭今屬玉斧不遠六七百里之程親攜紙筆鉤此四

碑不可不謂之好事矣一笑另備一書致小湖廷尉聞廷

尉住書院中距尊寓有三里之遙左近又無客店冬令日

短此事頗費躊躇最好得書院一席之地暫爲借榻玉斧心
靈手快計算四碑不鉤題跋至遲二十日可了如書院中
本有肄業之人則伙食可包與厨人更爲便當否則或就
近找一地或卽在舫老所說之金宅耽閣統乞兄代爲酌
定是託附去龍井茶葉兩瓶近刻兩冊兩疊拓本兩幀新
近託健甫製墨兩丸又季玉屬致雷君潤筆六洋統望鑒
收不具

又

伴來奉前月十九日手書承示差寓偏仄添葺新居數椽
爲公餘讀書習靜地步乃素心人遠俗客頻來辜負明牕

徒供訓酢似悔多此一番經營執事清曠絕俗邁往凌雲
舉目悠悠未免有不堪晤對之感昔東坡居士喜人談鬼
聽之忘倦來書所謂潛聲候至者當無可遣拒之時則聆
其浮談卽作爲鬼話此中亦別有鬼趣耳一笑弟交春後
亦常多疾病頗思閉門養疴而友朋相勸酒食徵逐不能
不稍稍追隨殊乏興致此亦關乎精力也舫老近與同居
晨夕相見渠名心頓冷終日伏案能作蠅頭細楷目力遠
勝鄙人敏老亦常見光景不甚高興良有以也蔭兄昨從
閩中歸有奉致一書附去香巖亦不常出門承潞公事尙
無隕越知承塵念瑣瑣布陳外紙二幅乞書近箸得早見

寄幸甚幸甚賜商人

覲行止兄景況非香嚴采香比鄙意旣不能舍此一官則以早日進京引

見是爲正辨望勿遲疑爲禱人還草草布覆諸惟爲時自愛不宣

又

昨從射雕山館交到手翰知吾兄袁浦之行正值孫淮五聚衆滋事留滯多日想亦無興出游於翰墨書畫金石各物未必有所見有所得也此爲憾事吾兄無他耆好所好止精墨佳茶迥非弟之幾於無所不好者比卽以茶論弟

每日祇飲三盞不但茶非眞明前龍井不可而水尤必親自檢點家儲天水缸三十餘隻每隻必有蓋水之陳也必有輕塵浮於缸面取水時須將此一層輕塵撇去然後入砂罐煮火候要適中茶取其綠水取其白舉杯凝視覺一種清光明豔恐虢國夫人亦有珠玉在前之歎坡老佳茗似佳人之喻不可謂無眞見然鄙人尙欲爲其下一轉語改爲佳人似佳茗耳一笑吾兄愛茶以佳茗難得欲以稍粗者間之此可不必明年可帆采香篋軒均必有佳茗奉報弟則取諸宮中雖不能多以四人供給必够兄一年之需不必精粗相間也近從子青尙書處分得康熙五十三

年耕織圖墨頗精尙當分餉左右也

又

一昨奉五月初二日手翰欣審道履清勝動與吉會爲慰
前聞真除觀察之信知兄亦料我必歡躍不已也兄自奉
儉約此缺想尙可敷衍世講天資甚高淵源家學讀書定
益精進秋闈伊邇不識肯降心從事舉業否念念弟交夏
以後身子尙無不適惟精神總不能振作耳四月初間曾
到上海就西人醫齒因有親戚龐君治之有效謂動搖蟲
蛀者可修補脫落者可重裝一經醫治向之遇食物堅硬
不能入口者可登時能咀嚼其驗如神云云於是決意前

往詎連訪三醫訖無一效據稱若要得力必得拔去數齒
另爲裝配怕疼請飲麻藥水飲之如死一般然後聽彼所
爲方有大效聞之不寒而慄遂託詞而出白花去番餅數
十枚而已兄聞之得毋捧腹是行與采香同往歸舟又添
一香嚴尙不寂寞只算遨游洋涇聊可解嘲也薛世香兄
因何事赴杭他年兄開藩兩浙卽可爲西湖主人此願總
有時償也請姑待近刻朱文公易繫辭注稿兩分一贈鑒
定一乞轉交密兄此用棉料紙所拓一經裝裱更覺神明
煥然望卽付裱免致散失爲要朱子道德文章夔絕千古
卽以書法論之南渡後亦推首出法眼以爲如何

又

數日不見如三秋之隔懷想不已龍井芽茶采自清明之前去年底付價定買經買之人居龍井山下敏老所謂無一葉假者此物此志也因使人帶來故今始到特奉去二包須用準塊石灰儲於缸內勿使有一絲透風執事今之蔡陸也試取各友所贈者品平之先驗一旂一槍之粗細勻雜再辨色香味引杯細嘗靜參自得惟解人斯能領取耳佳茗必得好水惠山泉日供兩擔取不傷廉用一百青銅錢買白砂罐一個入惠泉水烹龍井茶公冗之暇偶飲一杯亦足滌塵慮祛煩襟況惠山相距至近水清且冽

多取之不爲虐彼或以李衛公例視之慎矣

又

頃奉手翰敬審道履安勝聞披閱各處文報每至夜深未
輟想見用人理財必更勞擘畫其操心處當尤甚於勞形
案牘也尙望節宣善衛爲

國保躬是所至祝

弟

體弱畏寒近益瑟縮窩居不復窺戶

外一步偶讀人靜費鑪煙句頗堪自況思欲作尺幅寫意
又苦天冷指僵未能下筆大約除看書之外直無一事可
爲祇自笑冬烘頭腦也承示貴友欲覓名人字畫屬爲物
色此事頗未易交卷世少真識彼此是非妍媸雜投真贗

莫決棄取之間恐難脗合然其人既爲悟兄至好不可以
常例待之當爲物色數種議定價目先寄閱看合則留之
否則還之如此辦法較爲妥愜亮尊意定必爲然此間已
得祥雲盆梅亦有一二朶舒花者想節署封篆後公務當
可清簡還祈時惠數行以紓飢渴

又

客臘寄復一函想早澈覽獻歲以來天氣清明風日清美
梅花已放想見香凝燕寢民物胥恬政事之暇定多樂趣
姜白石詞云花長好願公更健敬爲執事誦之孱體交春
後嗽疾愈劇改歲至今已閱兩旬止有探張太夫人之喪

出門一次此外酬應概行謝絕老病景態可以想見幸飲食如常往後天暖精神或可稍振清卿三載秦涼輶車所至採風問俗之外徧搜金石所獲至富且精實爲難得鹿茸已爲執事帶到一架與此間所售者迥不相同或留俟面奉或先寄上統候示遵

又

昨日之敘雖草草盤殮而暢談頗樂惟良朋遠別誠知爲日無多此心終不免戀戀耳紈扇一握乃敝帚之享旣爲宗工見賞謹以奉贈秦詔唐符攷證詳載拙箸彝器圖釋並呈一部以備蓬窗省覽卽乞鑒正石谷山水立軸係敝

篋舊臧雲山杳靄樹石蒼寒乃此老晚年精詣實爲開門
見山之作以配新得南田小幀可稱憚王合璧檢奉雅賞
此等物事兩壘軒中頗稱富有幸勿視爲鄭重麾卻之也

又

前者得建節三吳之信直欲距躍三百繼知公位益高而
心益下必有以任重爲兢兢者休戚相關之誼不敢作虛
文諛辭爲公頌賀亦恃公知我有素耳頃間奉到手翰並
蒙惠賜果子狸半具仰見垂念菰廬渥加存問感謝感謝
日來勃戾彌空簷溜如瀉亟盼朗霽庶免水災黃魯直云
蹙眉終日爲百草憂春雨耳然今日之憂豈特爲花事哉

尚如天之福暢晴多日園中花枝招展香風溢座敬治果子狸以候八駟之臨是爲至幸第不知能如願否

又

日前辱承惠顧雖草草盤飧不免輜褻然公以八座之尊下與二三故舊追尋林泉逸事縱談無諱形迹胥忘想當政務叢集之時聊藉清游稍被煩抱似一月一敘之訂或亦公所樂此而不忍舍者耶狂言一笑屬書紈扇涂就謹繳書甚劣而所書秦七題語讀之如登華子岡使輞川全景歷歷在目可抵一幅臥遊圖也幸賜晒正大箸橫幅詞稿奉上乞連同求書摺扇一并擲下勿急急也

又

昨聞開府八閩之信爲之額手

朝廷念海疆任重現當華洋交涉事會艱鉅非文富重望
不足以資控馭正虞升卿所云盤根錯節足以別利器也
惟鄙人自念無似乃蒙垂愛殷肫存問周浹暑去形迹曲
恕疏慵每當促膝或遇讌談無非道義切磋直諒無隱此
固十數年如一日也行將遠別情何以堪素知明公喜用
趙人愛此舊疆兼及故友或亦同此眷眷耶所望福星東
耀郭侯重臨不特竹馬兒童歡呼塞道卽菰廬中皤然一
老亦當扶杖而起爲公負弩也何日得暇擬作真率續會

伏候示定

又

客冬榮戟過蘇檐帷暫駐誼追溫蜀異姓忘形草草盤殮
悉循真率敘今論古文讌方酣忽聽驪歌黯然執別祇以
疆寄重任未敢攀留判袂以來倏又改歲比者春融景淑
遙想福星所至遐邇歡騰式詹新猷定臻休暢閩俗夙稱
獷悍現當中外未靖時事紛糾苟或措置稍涉矜張撫馭
畧有違忤貽彼口實肇啟釁端皆意中事也惟公本經術
以爲治功而又富貴浮雲平視通塞

國家事重功名念輕從容擘畫自然戾氣潛消蔚爲和平

之福斟元調運砥柱橫流卿雲在霄羣生託命不獨林下
舊雨飲食必祝已也雲終歲杜門尙能安拙惟崦嵫已迫
學業無成辱公錯愛引置文字交契之末自維謏劣無以
仰副期望言之媿悚惟近於西隣汪氏廢園中得太湖石
數百塊爲過雲樓遺珠費六十緡購獲之又費百餘緡就
聽楓山館之前疊石爲阜中建小亭顏曰因樹又撰短聯
云樹高根要固亭小蔭偏多由石級盤旋而上可直登墨
香閣因思頻年來常作眞率之會蒙諸公憐雲多病大抵
設席於聽楓山館爲多每逢讌集公獨小憩楓陰謂此樹
大逾合抱難得枝茂葉盛狀如華蓋低徊嘆賞若有不忍

舍去者鄙人以樹爲大賢所愛故亦加意培護今復因樹
爲亭可供小坐預備他日公移節三江敷政之暇效文潞
公留守西京舉洛社故事過臨茅舍重續墜歡謹當集同
會諸老就亭中煮茗清談昌黎述李愿所謂坐茂樹以終
日酌清泉而自絜以古方今未易多讓此中真味知公樂
聞瑣瑣上陳聊博莞爾昔黃魯直知張武筆爲東坡所喜
每聞坡至必預設硯席多備佳紙俟之可見古人相聚必
互留翰墨以助琢磨鄙人非魯直比公則今之東坡先生
也因樹亭中不可無公椽筆適汪柳門學使去冬寄來宣
城舊紙奉去小對聯一副乞政暇一揮無論陳言新製均

足增光此紙雖非澄清似尙可用惜張武筆不可得也一笑近刻漢建安弩攷一册附呈鑒定專肅布臆謹代晤對伏維爲

國節宣金玉自葆臨穎依切不盡

又於因樹亭之北就兩囂軒舊有迴廊小加改築向東建一亭題曰適然後繫小跋揭明命題之意蔭甫撰一聯云以東坡居士快哉亭意讀南華真經逍遙游篇謹將亭額刻樣拓本呈閱兩亭俱新闢倘蒙各賜一聯固屬意外之喜否則得其一亦增光寵異日八騶重臨靚碧紗籠護或亦可喜也眞率會圖象早已畫竣因青帥書來云卽欲入

都往後通信至使得將拍照寄來便可增入故尙未補景也同人意興均尙如舊惟蔭甫輟琴之後至今神傷未釋頗形侘傺也知念附及

再前函盡是林下閒談肅就尙未緘發適奉本月初四日賜書並范志真麪酸棗貢糕未及啟封先已喜心翻倒亟澆手莊誦語重情長恍同覲晤吳中諸老每於談次皆以未得尊翰爲念今承不遺在遠寵寄土誼立即連同丹柬一一分致莫不歡欣鼓舞屬先道謝謹將諸老回條奉上亦畧見此間各友近狀也初二日耦園有真率之集再將台函攜示會中人同讀

又

前月復謝寸牋附有真率會中諸老條字各件嗣又續寄一書附有訥生信均由輪船帶呈計必早登籤室蘇浙新茶收於清明穀雨之間者其芽最細寄上吳興本山兩瓶武林龍井兩瓶又順老託寄鄧尉本山四瓶洞庭碧螺四瓶共十二瓶此四種爲蘇浙絕品中間鄧尉似次陽羨爲坡公所賞亦不過與鄧尉等亂後所產甚少因茶樹被伐改種桑枝故也_弟喜飲龍井重其色香味獨全年來不能多飲頗以爲憾昔蔡君謨好茶老病不能飲則烹而玩之與呂行甫之不善書而磨墨小啜同見雅人風致鄙人每

每黃茗一杯必注玩移時而後入口竊欲自附君謨門下
署爲茶經私淑弟子公或引爲同志耶一噓

又

月之初二日奉前月八日雨窻手書並蒙惠賜福元貢膏
四瓶新刻延平答問一部一一祇領法書楹聯一副腕力
日益適上觀其使轉從心旋折如意不必遠論魏晉而於
唐初四家門庭實已入其室而躋其闕至集句之工切款
跋之雋雅尤爲獨出冠時當世無兩卽日命工製成屏式
拓於木版懸諸亭內初九日有眞率之會座中添柳門譜
琴與諸老同聲贊歎莫不傾倒心服因恐亭柱有風雨之

侵特以玻璃罩之期可耐久他日明公移節來吳見之或
喜其鄭重愛護勝於碧紗籠也承諭福州屢遭水厄元氣
未復今又夏雨連綿延數百里溪流奔注四五日間漲
高三丈西南東三門內外俱被淹浸現雖得報消平須得
從此開霽庶望補袪想覓數月以來焦心急慮經營撫輯
正不知若何勞勩尙望節宣善衛爲

國葆躬是所至祝

雲

交夏後孱軀尙稱頑健終歲杜門惟

與諸老友輪作眞率會月集一二次藉爲消遣之計每至
杯酒談心輒以明公遠隔常興座無車公之感青帥亦久
不得音問聞同蘇夫人懷孕約三月杪分娩青帥欲待抱

孫之後始擬進京迄已多月絕無消息究不知行止如何也順老近日小有不適蔭老服吳子備附桂乾薑重劑居然病愈面亦腴潤屬送順老福元膏並請老延平答問一照單分致均屬先爲道謝靜逸病雖愈而精神步履俱未復元屢有到蘇之約竟不能踐南中小暑以後轉嫌雨水過多急望開霽否則棉稻皆恐有損浙省查荒之役大拂輿情履勘固屬爲難而辦法自有竅要安有不問情由不查底裏硬以荒田欠額灑派於熟田之內無怪人心不服激成事端言之可歎

又

數日前曾寄寸牋附有印石四方又陶柳門一書未識何
日達到一昨奉到手諭並承惠賜密蘭二瓶佳茗兩盒又
李監巨篆王審知巨碣李篆篋有舊本王碑得未曾有欣
謝欣謝此碑筆意在顏柳之間兼有北朝人風骨難得文
字完好一若新發於硯與丹陽鎮張從申書延陵季子廟
碑相同江南張從申有二碑一茅山元靖先生碑久佚一
卽延陵碑好事者得一元靖碑不啻球璧之珍而延陵碑
絕無人知前年因於張同蘇公子處獲見墨本始悉碑尙
歸然獨存當卽僱工往拓其字體絕似王審知碑曾以搨
本奉贈試取二碑比較真一時瑜亮也李唐以書取士故

當時善書者多然非遇真鑒家勤求物色發其幽光則沈
霾不顯者正多吁豈獨一碑已哉弟因潞兒專舟來迓卽
與老妻挈同孫子官保赴署今年木棉頗慶豐收聊以遣
懷隙光泡影豈竟昧然七十之年尙欲自纏自縛墜入魔
障不亦慎乎知兄念我至切故詳及之藉以紓愛注也曲
園書附去

又

月初從蘇寓寄到重陽次日手諭發函莊誦伏蒙慰喻勲
拳詞意肫摯謹當詔切於心不敢套言鳴謝外承遠惠食
物多種羅列滿筵盡是閩中佳味諸孫環視拍手騰歡索

果分甘爭先恐後抃舞之情可以想見老饕饒吻猶得暗
匿大半留爲自享中間橙橘二種與酸棗乾荔皆可醒脾
每當茶熟香溫之際讀書靜坐隨意細嚼真覺別有風味
不僅如數點梅花芬留齒頰已也巖茶爲武彝山寺珍秘
之品卽本籍人亦不能必得爇索過甚寺僧没法每每以
僞者應之價重兼金非止一日矣承分惠小瓶適 潞兒有
粵人舊贈茶具不但壺杯樣小卽沙罐泥爐亦各有專造
其烹茶之法與尊論正合閩粵人所謂喫工夫茶是也昨
特於瓶內取出二錢集闔署親友淺斟細啜以次徧嘗莫
不嘖嘖歎賞雖未必人人真知或間有隨附然一縷茶香

沁人心肺則固雅俗共賞者也欣謝欣謝所需重摹天發
神讖碑當屬友人向張氏店肆購買止有一分特先寄上
另有一分竝取到續寄冬寒食物不壞尙有絕好辣醬與
婁東風雞出月當交輪局齋呈天發碑卽可附達也靜逸
前日由禾中到此精神眠食已俱照常盤桓五日恐往後
天寒旋即歸去約於明春到蘇暢留數旬此至喜之事用
特附告尊體亮必清健閩地卑溼尙望加意調護至禱至
禱

又

前月中澣在婁東署中肅復寸牋附有孫吳天發神讖碑

全分不識何日塵鑒茲於月之初三日旋蘇初十日奉到
手翰蒙惠賜福州蓮桂等件謹領之餘感幸交至惟此書
尙是十月初十所發遲至匝月始到大約爲附物重滯之
故敬繹函詞知節麾有巡臺之行忠信波濤自有吉神擁
護惟骨肉至愛得此航海之信不能不神馳意往還乞於
安抵後將風物土宜一一詳示此非欲廣異聞實欲知起
居之安適無恙以解勞結也天發碑尙有一分未寄今特
補上另有辣醬風雞恐附帶轉致此信羈遲故另屬滬友
代寄冀可速達想省旃與九夢必有一人在署也

又

客冬兩奉台諭並蒙先後惠賜各種食物當經肅箋申謝
附寄天發神識碑暨俞陶二兄信嘉平之朔又肅一函並
呈婁東土物二種均交輪船局遞送福州節轅由省旃九
夢兩世兄轉呈未知能否達到深切馳念日月如流倏又
改歲遙想福星所莅威德並昭化叢棘爲康莊息鯨波於
滄海畏神服教中外咸孚翹跂卿輝彌殷頂祝雲菰廬跽
伏衰態日增本年自新正至今已將兩月出門止有三次
花朝前後雨雪連綿比雖晴霽而春寒殊甚芸生恐礙長
發不獨如山谷老人憂在花草而已迴意去冬輶車將發
貽我尺素謂臺郡目前雖無事而

朝廷軫念巖疆不能不循例前往一盡職分所當爲歸期當在杏花時節今忽忽三春過半矣屈計旌麾當已安旋節署必有手劄數行遠慰飢渴盼切盼切此間真率會中舊侶俱尙無恙靜逸訂三月間到蘇蔭甫今年精神頗旺貌亦加腴現在已赴武陵有信一畝外附鍼線一包大約酬謝月下老人又右台仙館筆記一部統乞管收

又

前月肅奉寸牋附有俞陶二兄兩函由輪局齎遞未知何日塵鑒月之初二日奉二月廿六日手諭並惠橙餅閩薑等物祇領之餘感慰交至恭審星輶遄返寢饋攸宜此次

巡閱臺疆南北約及千里海口不可勝數而輪船能進泊者惟一基隆此外盡是礁石板沙不能近岸此天生險隘也二月初六乘輪內渡適遇狂飈行旌避過暴風始涉大海初十日安抵節轅此真忠信感召到處有吉神擁護聞之可勝額慶雲息影蓬廬衰慵益甚偶一出門必遲回卻顧彷彿千里遠行若不勝其煩勞跋涉者幸真率會中諸老見諒每有聚會席設聽楓山館爲多月之十七日許星臺廉訪送來琿春熊掌與去年吾兄所贈者相等膈之旬日宰夫告熟遂約星翁與諸老作熊蹯續會並將所惠之橙餅闔薑登槃佐飲出示尊函互爲傳讀感念舊之殷勤

飽異鄉之風味跡雖睽於千里情若聯於一堂遙望卿輝
三肅起謝所來巨竹聞臺郡有至大可作浴盆者此四段
已不爲小惜竹青削去不但不能奏刀并不能著墨凡竹
刻之可供文玩者全在刻畫之後加以摩挲久之光熟精
彩四溢自然名貴好事者每每不惜重值購作書案陳設
今竹青旣去譬諸虎豹無毛羆與犬羊無異商之工師皆
以廢物例之鄙人念物自遠來又曾爲大賢顧盼必思有
以處置度材審勢運以匠心思得一法尙於文房相近擬
取其高者二段置案旁爲積儲字紙低者插雞毛拂塵俟
馬厨歸時交其帶還二段留二段作所擬之用如公別有

妙用之方可以點鐵爲金卽望示我遵行前年所繪眞率
會圖補景早已竣事諸老均已裝成茲特寄呈一卷幸管
收臺疆風土物產以及山川卉木務乞公暇詳示其概俾
得廣此確見確聞實所欣盼蘇浙芽茶已購就統埃馬厨
帶呈去年承惠寄各種武夷茶用砂罐煮飲覺比綠茶別
有風味平生愛茶而所飲絕少便乞再寄數兩只求穰將
軍所稱廢中之中駟若去年所寄之每兩價至三千六百
文者此古德所謂阿耨多羅之品未免逾分罪過不願再
飲也

又

月之初三日奉前月廿七日手諭並眞率會圖一卷又蒙
惠寄武夷奇種茶四瓶兩合一領悉感謝雲終歲
杜門無非摩挲書案藉以自娛年逾七十正如摯伯陵所
言但欲俯仰從容以游餘齒晚節趣尙如是而已不足爲
公述也吳中得

天姥東傾之耗比閩中早至旬日向來典禮多詳於
宮寢而畧於直省故

哀詔未到之先每每參差不齊如甯蘇一省也而甯則素
服摘纓蘇則素服不摘纓若浙省則不待

詔至已先自哭臨成服前次因兩番哭臨大駭耳目今又

踵故轍不知將來

詔到之後如何舉行若仍穿二十七日孝服是合前後所穿幾有四五十日矣此非

特旨命穿不可似難逾制擅服若遵以二十七日爲準則詔到之後孝服數日卽除義有未安情亦不忍會典繁重安得有簡明畫一條目俾直省於

哀詔未到以前一體遵行免得參差紊亂爲外邦所議今部文有竅

詔到素服摘纓跪迎開讀一條或謂如已摘纓何用重言及之故蘇主素服不摘纓也或云所謂摘纓素服者蓋四

字連類而言非謂摘纓必跟縞素也故甯主素服摘纓也
不審閩省何從執事富於學嫻於律更事又多敷歷中外
數十年卓然爲禮法之宗必能參詳典制斟酌協中推暨
隣疆可垂定則者乞詳示之至懇至懇寄上龍井眞芽茶
一瓶吳興本山芽茶一瓶皆隔年付值採自清明時節者
雲愛茶近則所飲無多一日四小盃猶以所寄之武夷茶
間之居嘗笑蔡君謨老年病不能飲則烹而玩之不意五
六年來飲稍過量便覺胸懷不適而又愛不能置故每煮
茗必先挹其色香然後詳辨其味昔之所笑者今且師之
矣不亦可大噱哉吾公向有同耆聞近亦不能多飲若欲

烹而玩之則非以在山之泉煮極細之芽不足以發色香味三者之全也閩中有好水否武夷味勝而色香則遜於龍井順老亦有茶託寄此產自洞庭光福諸山者連信一并奉上又蔭老一書統乞訖收真率會圖引首寄上二紙乞書吳郡真率會圖六字或不加吳郡二字竟書真率會圖四字希酌定尙有一紙謹當各書其一互爲收臧可也外又附上杏葉笋一瓶此物亂後所產愈少味澹而鮮煮湯最妙幸晒納

又

前月廿五日專肅寸牋附呈曹氏菽粟齋陳墨五挺拜發

後五日欣奉十二日手諭並荔乾棗脯桂圓膏印泥印油各件謹領之餘感幸交至

朝廷念閩土卑溼臺郡尤多瘴癘於尊體似不相宜且明公曾有辭煩就簡願厠京曹之請此次移節黔疆

恩命之頒或有深意況黔中全境肅清勞徠綏集亦必得富鄭公張忠定其人前往鎮撫庶幾利弊興革動協機宜吏治民生馴臻上理想彼都人士早已興歌來暮盼望福星矣蒙示道出西江擬乞假兩旬倘能逕附輪舟或可向矢門一轉聞之倍增嚮往鄙意此行長途六七千里雖倚畀正隆量移當在指顧然遲速之間未能預測旣請給

假何不多請一二十天將家務從容部署吳門之約亦可踐言黔中烽煙早靖戍鼓無驚非霍將軍匈奴未滅何以家爲時也尊意以爲如何其真率會圖卷卽刻裱就并交舍甥張學周帶呈引首吳郡二字用白香山詩集朱長文圖經似此蘇臺吳門稍爲蘊藉請揮就付下以便裝池能得賜題數語於後尤爲至幸印泥等物尙在局船須明後日始到俟試用後再行報謝

又

前日張敬甫歸帶到手諭並大甲溪番席方竹海樹各件一一祇領海樹方竹得未曾有與海石俱設聽楓山館蒼

松翠柏之外別有雅趣番席舊有親友饋贈價甚昂貴二十年來每交夏令常常用此不但能祛風溼且於老年尤宜蓋不比蘇席之易於著涼也舊有已損恰承新賜正所謂心得所好口常欲笑者食物止供一時此席可以耐久拜公遠賜真有寢饋不忘者矣聞岑中丞將次可到日來正屆伏暑炎威甚熾長途跋涉未免勞頓閩滬洋面平穩輪舟旣得便捷且比陸路適意遠甚吾公何日啟節旣有乘輪之意幸卽定見勿再游移聽楓山館花木禽魚聞公將至皆有欣欣之態謹早掃除靜室爲公下榻之所良朋會合本難預期況在暮年又逢遠別興言及此能無黯然

用特專函奉訂倘不嫌簡褻惠然肯來當約真率會中諸老陪公盡平原十日之歡此平生願也望切盼切敬甫辱公推愛歸述晉謁情形甚爲感奮此間雨暘應時諸稱平靜敏齋太夫人於月之廿二日西逝同日又逝去張氏如夫人聞太夫人自十六日後死而復甦者數次直至伺候有人然後撒手真無愧福壽全歸矣曲園近體頗健西圃爲其子秋谷大令頸間遽生一瘤形狀與鄙人所患絕相似而未及一年大已過之且轉側不便正可望補缺患此重症不得已力求交卸日內可以到家西圃因此急煞此二君吾公至關切者故附及之

又

昨者騶從賁臨屈居蓬華始則尊恙初痊談讌未暢旋幸
日就康復意興漸增林居舊雨相率來會移尊設席迭爲
主賓野服清談絕無形迹聚首雖未盈月良會實足千秋
送別以後想一帆風順日內即可安抵里門行裝甫卸戚
友紛來定有一番酬接不知總角舊侶尙有幾人指幼年
釣游之地感王事鞅掌之勞四十年中外暴歷萬餘里水
陸奔馳離合悲歡都爲陳跡迴首生平靜念身世毋亦有
感慨係之者乎人生行藏得失皆有前定非人力所能轉
移有識者自不以此措意無足深慮惟性分之地關係天

倫一有拂逆縱能達觀每每塞抑難解惟有退步引喻借人自況如公之援蔣心香以勸慰順老者斯爲得之矣曲園長嗣年正強仕甫以服滿到省詎數日之病遽歸道山曲園現在武林因不得直隸家信至減眠食前日專足到杭及門諸君秘不與聞渠女婿許孝廉與及門徐花農庶常擬伴送來蘇家中已設靈驟聞此耗正不知如何悲慟真欲代喚奈何公與曲園至交聞之當亦同此浩歎也開缺之請得蒙

恩准此由公誠正勿欺

朝廷知病出實情必非虛飾故

特允所請指日病痊晉京見公強固耐勞其精細縝密有三四十歲壯年人所不逮者然後知皮相者所說之誣內而嘉謨嘉猷納忠陳善外而兼圻連帥霖雨蒼生以公之精力卜之其年位必可與文富二公相頡頏也禱祀祈之桂觀察一書係從許星翁處送來特附上希管入

下皇車下苑

卷四

三

兩巖軒尺牘卷五

歸安吳 雲愉庭箸

殷譜經少宰 兆鏞

春間騁從過蘇辱承枉顧適抱采薪之患未及迎謁實切
歉悚嗣晤林一宮允述執事於高郵道中致宮允書拳拳
於下走仰見念舊殷肫迴異恆格望風傾仰不勝馳情每
於邸鈔中伏讀執事奏議凡所敷陳悉中近弊此真救時
藥石經世宏文昔蘇子瞻謂陸宣公才本王佐學爲帝師
論深切於事情言不離乎道德如執事立朝正色遇事直
言洵足繼美前賢追蹤往哲輔中興之盛業立不世之休

名雲向辱知愛能無忤慶

兒子承潞

禮闈倖雋比得家稟

知以薄植得託大匠之門聞之實深榮幸今科浙江進士

覆試朝考俱列一等者惟汪君柳門及

潞兒

兩人論甲第

必得館選乃榜後疊次來稟謂長安居大不易頻年來食

指愈繁家計日絀本係分發江蘇直牧若就原官到省則

班次甚快希冀得補一缺爲求祿養親計

雲

以內用外用

自有定數亦不以其說爲非茲得點用消息知以先期呈

明竟歸原班聞閏月例不引

見

雲

已屬渠常詣函丈恭承師訓他日得獲寸進飲水思

源當不忘所自也

又

昨從景亭宮允交到手諭發函仲紙仰荷垂念患難慰誨
勤肫雒誦回環慙感交集雲罷職後菰蘆跼伏藥爐茶竈
而外日惟於故紙堆中聊遣愁抱足不出戶庭者半載餘
矣自愧窳闇昧於進退獲咎總由自取惟不克仰副執事
期望之殷至爲愧疚然竊幸身處脂膏絲毫不敢近膩卷
案具在得免後累此可附慰愛注者雲本孱弱多病不復
作伏櫪之鳴惟滬上米薪珠桂大不易居讀昌黎居閒食
不足之詩不免廢書興歎耳伏念執事名言讜論中外共
欽方今

朝政清明賢藩當軸撥亂世而反之正中興偉業指顧可
期所望妖氛速靖早奏昇平雲家尙有薄田二頃得返里
門躬耕度日是則飲食所必祝者也

翁叔平大司空 同龢

四月間兩辱枉顧其時正齒患大發寢饋俱廢之際是以不獲侍晤一盡飢渴之忱至今歉悚辰下敬維舟車無恙早抵都門德位兼崇身名俱泰幸甚幸甚 雲 衰病杜門無善可告前者旭人方伯述執事謬采虛聲垂問肫摯索及拙箸彝器圖釋大雅當前正思就教遂不敢自匿其醜今旭人赴江北未歸適有賈筱芸世兄入都之便託其帶呈一部敬求鑒定另一部乞轉交玉甫中丞同賜教削久聞尊臧宋刊精本甚富惜未得一讀以擴聞見 雲 處所臧有新定續志十卷惟景定間方逢辰序文殘損餘俱完好無

闕又有元豐間朱長文吳郡圖經續記三卷紙印甚精卷
中鈔補均出錢磬室手筆又中興館閣錄及續錄各十卷
中間雖有損闕而曝書亭及竹汀老人所藏皆是鈔本此
卻的真宋刊三書可爲東南文獻之徵世少傳本黃蕘圃
當日珍藏甚秘惜未出就法家訂證殊爲憾事耳

雷鶴皋先生 以誠

前在上海寓次奉到手諭展函莊誦如挹笑言恭審福履
綏和精神彌健游泳佛海味道而腴引詹函丈慰與抃會
雲於前月中旬自上海動身道出吳門逗留數日卽至焦
山山中殘桂賸馥林葉漸紅秋色晶瑩雲物清潔居停主
人赴江北勾當公事日來獨坐枕江閣對北固諸山遙望
蕪城煙雨慨念當日在老夫子戎幕駐軍萬福橋募黑衣
郎穴地攻揚州城每至刁斗無聲寒月照地輒繞城相度
進兵之路礮子從頂上過霍霍有聲追思前事如在目前
今者蒼蒼悔禍東南廓清昇平重覩可以優游歲月矣老

夫子主教鄂垣身心性命之功從游問道者想日益眾
雲棲身巖谷日與翰墨爲緣尙能自安其拙莊生有言曰得
者時也失者順也安時而處順哀樂不能入也此數語
雲常粘之座右反心內勘亦頗有怡然自得之趣前日本擬
偕許蔭庭六弟到漢口一遊謁拜高齋面伸戀悃並求指
教正欲附輪船開行適居停有事屬從緩啟程此行遂中
止大約俟至明春矣周易函書一部計二套特呈上又近
刻溫虞公碑一冊楹聯集帖一冊墨拓數種統祈鑒納書
隱樓叢書尙未覓到俟購得再寄振新集要一冊所論清
修功夫極爲明暢粘出一覺字卽姚江之良知也附呈省

覽

又

二月間奉手書書尾不署月日詳繹詞意當是去歲杪所發江漢人文薈萃書院關係士習尤爲風氣所轉移誠非道德文章爲鄉黨敬服者不足以當此席今官爵相請吾師掌教正與范文正公薦胡安定爲太學師同意將來楚湘南北理學名臣蔚然而起不獨中興武功炳耀史冊已也雲屬在門牆與有榮幸揜逆聞已遠颺近日武漢想必安謐晴川閣比前更爲雄峻黃鶴樓亦已興工修葺聞之實深嚮往雲本擬作湘漢之遊躬詣函丈侍談數日藉罄

戀忱因去冬從邗上回蘇爲修理先人墳墓還鄉照料春
來又迫於賤事復赴吳興日內仍擬渡江到邗往來僕僕
不得習靜讀書楚行更須俟秋間再定矣樹欲靜而風不
停爲境所迫殊可歎也幸自老母以次均託福平安兒子

承潞

蒙李宮保留甯當差知荷愛念謹特纒陳族姪

念椿

係湖北候補知縣初歷仕途諸未諳練茲屬渠晉謁尙望

吾師頌以治譜俾有遵循

念椿

自樸安族兄殉難後尙能

耐苦曉事還乞吾師於諸當道前噓拂而提挈之爲懇附

呈拙書杜君墓志石刻墨本伏求誨正此後賜書交

念椿

轉遞甚便統維垂鑒不盡

又

一昨晉謁知杖履已往木瀆作天平靈巖之遊兵亂以後
各處廟宇遭毀現所存者不過百十分之一二耳破壁
頽垣都未修葺地方之凋敝亦可畧見一斑矣吾師憑眺
之餘得毋有舉目山河之感西湖賸水殘山亦非復昔時
佳麗吾師到六橋三竺之間訪韓蘄王騎驢故迹父老尙
能指而言者其高風爲何如也吾師此次出游往來數省
傾倒公卿接席縱談尙望效蘄王之逍遙風月口不言兵
人多輕薄鬼喜揶揄雲之狂瞽亦有爲而發實非無病之
呻不識吾師以爲雍之言然否雲寄跡吳門鍵關守拙謝

下書車片
卷五
二
絕訓應未敢一履公庭自念廢棄之人本不必高論時務
討人憎厭此皆向日備聞師訓守已持身之道多蒙啟發
不敢不兢兢也吾師行將別去白頭師弟臨歧頗難爲懷
亦知吾師必以雲爲念用敢謹布區區以釋垂注附呈贐
敬並微物各種登於另紙箋表意伏乞鑒存不宣

又

一昨奉到本月初九日手諭莊誦之餘敬諭道履沖和精
神彌健並知元旦獲麟充閭增慶孫世兄赴京朝考轉盼
報捷一堂四世喜溢門楣凡此家庭之樂益徵蔗境之甘
此人生所不可得者而尤有萬萬不可得之一事則以我

師年登大耋精力之康強步履之輕健直與三四十歲壯
年人無異此天之特厚於我師福祿熾昌正未有艾也雲
今年六十四歲蒲柳先零竟無有十日不病者大約一月
之中得半月之安便算佳境今春二月初間偶爾失足傾
跌便病至二十多天向愈未及二旬忽患齒痛已有二十
餘年不發痛至呼天籲地手足無厝至今飯非極爛者不
能下咽餘物可知已本月以來精神稍好總覺不能振作
故從未一出戶庭親友存問亦來而不往幸皆憐其衰病
不以禮節相繩去今兩年連得曾孫二人現在共有四孫
兩曾孫終日在家與孩提調笑以娛目前而已拙箸彝器

圖釋四冊甫經刷印葺事敬呈訓定

又

久疏音敬亦未奉訓示正深馳念適接月之十三日手翰
發函申紙洋洋千言恍侍几席備聞清誨幸甚幸甚我師
以大耄之年三年之內竟叶一索再索之占蘭芽雙茁競
秀庭階此固熙朝人瑞抑亦千秋佳話雲雖曹學無似當
撰長句爲賀以誌德門之慶雲今年尙無甚病惟精力日
衰終歲杜門訓應久廢婁東連歲木棉歉收辦公頗形竭
蹙刻下雨暘無愆但望往後調順可望豐收近有邪教剪
辮及魘人等事如常州所屬及蘇州省城竟至徹夜鑼聲

羣起守夜鬧至旬日妖風漸息而又蔓延至於嘉禾一帶可稱咄咄怪事妖青之出自古有之雖以唐貞觀之盛亦有梟梟殺人之謠至於弓刀自衛彌月始息原可以鎮靜處之惟目前邪教之人詭附天主教以冀避罪而該教堂又一味袒護釀成民教水火激生事端是則可憂也吾師雙眼井新宅落成想起居定必適意禪悅愈深世情愈淡焚香讀易頤養天和一切煩惱愛憎悉置度外以自安其坦坦蕩蕩之天是則白頭門生所飲食切祝者

又

前月二十日接是月初二日手答發函莊誦如親色笑蒙

示紀述重赴鹿鳴長律八章氣蒼格老慨當以慷中間歷
敘行藏通塞身世危疑而惓惓君國之忱迸溢於字裏行
間循環額誦能無忭舞雲久不作詩應酬贈答早經謝絕
惟念重宴

盛典非耆年碩望不容輕預其選竊不自揆謹依元均成
詩八篇錄於另紙伏乞誨定律雖未工卻不敢撫拾浮詞
貢諛取媚良以白髮師生其交契自有在世俗酸醜之外
者亮師亦必鑒及此也雲交夏後尚無不適深恐秋風將
至嗽疾復發時切惴惴耳

又

元旦吉辰欣奉手翰發函莊誦猥以雲七十犬馬之年新
詩寵錫藻飾紛披闔室傳觀其相慶幸伏念吾夫子壽臻
大耋重赴鹿鳴

盛典躬膺

恩綸稠疊

詞林佳話已屬科第中不可多得之遭逢此人情之所榮
猶未足爲吾夫子頌也所至難得者耳目聰明精神強固
與會所至雖壯盛少年亦所不逮良由久耽禪悅曉暢宗
風四相三心早經勘破用能萬緣解脫實證菩提不必咽
芝餌丹自然堅剛不壞克享長生海內靈光熙朝人瑞固

非佛地位中人不足以當之也。雲德薄能鮮，情道昧學，秉資鈍滯，欲從末由，兼以蒲柳早衰，病不離體，終歲杜門，一切訓應禮節，久經謝絕，不過在故紙堆中，消磨歲月，崦嵫已迫，學術無成，詹望師門，徒呼負負。去冬舊恙小發，卽愈方以爲幸，不意右臂忽作痛楚，飲食需人扶持，不能握管者，兼旬有餘。今雖云痊，而屈伸尙有未順。此書屢輟始成，以視吾夫子信筆揮灑，精神滿紙，真不可同日語也。來劄已附裝在詩冊之後，傳示子孫，永志師誼，謹呈白金三十餅，聊以侑函，拙畫一冊，臨張遷碑一冊，臨素師聖母帖一冊，縮臨北魏鄭文公上下二碑，石刻一冊，漢建安弩機攷

一册統乞賜納鑒定

又

端節後二日接奉四月廿八日手諭備悉種切敬審杖履
安和精神彌健欣慰無量去年浮沈之書雲意恐係送書
交局之人貪此二百文號金遂將此書毀棄路隔二千里
明知無可對證也吾師連遭祛篋竟出於左右伺應之人
良由宅心仁厚待人以誠以不億不逆之坦衷加之若輩
又見其小忠小信貌似樸實於是銀錢出入一以委之此
輩豺狼成性昧良者多雖赤心爲主者不乏其人然究良
者寡而莠者眾也往事可置勿論以後稍加審察爲宜明

歲重宴

瓊林此非常之慶吾

國家二百數十年預此

恩榮者僂指不越十人昨於邸報中見秦州王子勤觀察
已由督撫入奏由二品銜蒙

賞頭品頂戴吾師爵位較崇或更邀

異數似不待至冬間即可援王子勤之例具呈請奏彭芎
庭中丞和平中正通達事理必能爲吾師欣然入告也如
準擬卽日舉行雲與芎翁通書再當切實託之以期快速
所需扣帶印泥書畫各件遵卽寄呈開於另紙望查照晒

納雲

不能畫巨幅已另託世好林海如寫五色牡丹一軸
取富貴壽考秋間寄上卽爲吾師大慶之壽戟門兄惠詩
不及答和特錄近作二首書成小橫幅聊以將意乞轉交

覆潘季玉觀察

曾璋

論減賦宜從速詳辦書兼簡郭

筠仙觀察

同治二年二月初一日余罷職寓滬杜門不預戶外事
今侍郎糧儲道郭公筠仙介潘季玉觀察過訪知余謝
客排闥而入不得已出見叩兩公來意筠公云大兵正
集大帥以缺餉爲憂有候補某上說帖謂沿江海洲田
不下數百萬頃若准予繳價升科按畝核計可得銀二
百萬兩大帥意不能無動擬委兩公設局會辦兩公未
能深信謬以余爲識途之馬特來見訪行止決余一言
余與季玉雅故而與筠公從未謀面感其下問之誠不

敢安於緘默因力陳以爲必不可辦

語詳與季玉書中

筠公深

躋余言而問有無別法余曰公負海內重望現在正筦糧儲欲與民更始籌興利除害之方當務其大者遠者顧名思義應從糧字上著想江南第一秕政最爲民患莫如浮糧重賦余於咸豐六年在江陰差次爲震澤閘漕上書制府謂蘇松漕務江湖日下已成不可收拾之勢若不據實上陳早籌變計其隱禍有不忍言者不顧時忌反復數千言制府頗采其說而爲議者所沮格未能行現在松江甫復誠能及此時會詳請奏辦培元氣而甦民困洵千載一時之機不可失也筠公欣然顧季

玉曰余從安慶來與會相論東南利弊亦曾議及蘇松賦重民累賊平之後思有以拯之今若舉辦必合會相意保無異詞越日季玉書來述觀察之意詳詢沙洲升科之不可辦并索觀減賦稟稿因復書如左

敬復者頃奉手諭以前日所論減賦筠仙觀察屬擬節略並索觀從前稟制府一稿查拙稟約二千餘言庚申之變與庠藏書籍同付浩劫冗長不復記憶略記當時立說大致以蘇松糧賦過重紳衿大戶除應加火耗外必不能聽官吏之浮勒州縣一經開倉費如蝟集其衙署各項用度漕務運腳諸費種種開銷皆藉冬漕爲補苴大戶既不聽

浮勒勢不能不取給於小戶於是米價石糶二千錢折價有八千十千至十數千錢不等胥吏又從而朘削小民馴懦者始則賣妻鬻子繼而人逃戶絕其黠者則以本糧隱附大戶名下以避重就輕於是大戶日益增小戶之困日益甚此外劣衿之包納頑民之聚抗每至開倉輒興大獄此其故皆由賦重所致也因溯蘇松嘉湖賦重所由致其害實始於宋景定間賈似道行買公田賦法雜亂元初沿宋之舊至延祐中復增定賦額明祖定天下田稅賦則本輕而於蘇松嘉湖各府則以張士誠久抗不下怒民附寇遂將籍沒豪族田地取其私簿飭有司依租額定賦列入

官田故賦則獨重建文卽位特予減免照各處起科畝不得過一斗未幾而永樂盡革建文之政蘇松嘉湖之民重罹其厄宣德正統間民困重賦逋逃日甚巡撫周公忱知府况公鍾累疏請減蘇松兩府得減秋糧百萬石有奇嘉靖間蘇州知府王儀嘉興知府趙流請行均田法以官田重賦攤絜於民從此永爲定制

國朝平定江南田賦照萬厯間則例爲準時已無官田名目康熙年間韓公世琦吳公正治慕公天顏湯公斌因蘇松糧額過重先後請減反覆披陳卒格部議未行雍正三年

特恩蠲免蘇州額征銀三十萬兩松江額征銀十五萬兩
乾隆二年又

詔減蘇松額征銀二十萬兩終以舊額過重相沿至今釀
成江湖日下之勢若不據實瀝陳早籌變計其隱患有不
忍言者此當時拙橐中大略也顧今昔情形有不同難易
亦迴判蓋在當時內則格於部議外則刁生劣監巨室土
豪藉漕漁利之徒造謠阻擾官吏狃於目前必以誤漕爲
藉口大府心知稅政莫挽旣倒之狂瀾亦積重難返也今
則蘇太嘉湖尙爲賊據獨松江一府已報肅清誠能於辦
理善後案內籌請減賦約計行之便者有四利者亦有四

請略言之查松府各州縣雖已收復民間單契與擋案冊籍必多散失趁清糧給單之時舉辦減賦便一戶多流亡田失耕種瘡痍未復勢難遽責催科且蘇太等處尙爲賊陷此時陳請部臣不能以有損正供議駁便二無誤漕之藉口無巨室土豪之沮撓便三滄桑之後田地界址不清科則混淆豪強兼并加之胥吏舞弊害專在於良民一辦減賦每邑延請公正紳士出爲襄理官紳合力可期弊絕風清便四籌辦善後首重勞來小民散處四方者間有減賦之令從此田無後累且可取贏勢必爭先歸來不招自集利一民爲邦本向以逋逃鞭扑迫生怨咨今陷在賊中

正進退傍徨之際忽聞此非常之曠典從此力耕得食莫不興故土之思尤收拾人心之助利二蘇松糧額既重小民完不足數每每畏法潛逃田無受主以致荒蕪不治課額虛懸減賦之後田可得價輸徵必能踴躍官無挪新掩舊漕可年清年欸利三溯自道光初年以來蘇松各屬無歲不歉驗之冊籍額征固多稽之實收民欠殆半一經請減

國家去重賦之虛名民間沾輕糧之實惠一切災歉隱射豕可革除利四凡此四便四利不過粗舉其概言之實則有書之不勝書者某待罪杜門本不敢妄論時事迺執事

與筠公不棄其愚勸下問復自念家居湖州同隸重賦之地遂自忘狂瞽謹疏其略如右倘得大府主持於上執事與筠公左提右挈輔成其事堅持定識志在必行起七百載之沉痾拯億萬姓之陷溺此實不朽之盛事後世必有馨香尸祝者也或謂此議宜俟江蘇全省肅清再行舉辦愚以爲京倉待米正殷東南財賦久爲賊占一旦全省肅清計臣必先以整頓錢漕爲急斯時陳請恐仍格於部議當其可之謂時竊謂減賦一議不辦則已辦則必當以今日之松江爲始他時收復蘇太嘉湖其辦法一如松例此事林一兄留心已久盍先與言之伏惟加察不宣

此書達後明日馮林一兄來云筠仙觀察攜至幕府互
爲傳觀大帥適至取閱至當其可之謂時訖辦法一如
松例數行用手指密圈連稱聰明聰明是極是極因顧
觀察云可卽上詳又顧林一云老前輩卽擬奏稿若刻
不待緩者觀察恐方伯或涉遲疑不復與藩司會印單
銜通詳亦創格也余於是月中旬應常鎮道許緣仲親
家之招赴焦山逗留兩月五月初旋滬季玉來晤詢減
賦一摺已否奉到

批旨季玉云好事多磨自子行後羣議紛起僉謂必俟
蘇城克復全省肅清歸於善後案內奏辦方爲文從字

順言者甚衆方伯爭之尤力大帥因之遲疑林一以口
衆吾寡亦復隨俗浮沈余性急苦於不能挽回遂亦不
復置喙余曰大帥見事明決前此極贊鄙議先從松江
辦起爲是君所共聞也鄙議此事之必不可從緩者誠
以目前奏辦則蘇城尙爲賊踞地非吾有部中必不便
議駁若全省肅清則司農職掌度支綜籌出入亦不能
不恪遵成憲准駁實無把握卽使上邀

恩准亦必不能大減特減如所請之數君巨紳素肯任
事且清辨滔滔議論簡括與林一吶吶者不同宜於大
帥前透澈上陳必於此時入奏事方有濟季玉曰誠然

是吾責也立即肩輿進營與大帥反復論之議遂決於五月十一日由驛具奏

又論洲田繳價升科窒礙不可辦書

奉手書述筠公意以昨論沙洲繳價升科所以必不可辦之故請畢其說以便轉告大府云云具見筠公不棄葑菲虛懷若谷敬佩敬佩查沿江沿海各屬新漲沙洲大抵以崇明通海江陰常熟數屬爲最多僻在海隅民多强悍數十年來爭奪纏訟甚至聚眾械鬪無歲無之地方官審辦不得其平往往激生事端釀成大獄咸豐六年督撫兩院會奏委雲督同印委各員分投履勘設局江陰城中准予

分等繳價按畝給單其時髮逆困守金陵勢已窮感江常等處俱稱完善上有兩院主持呼應較靈下則應委洲董皆得選擇而使寬猛相濟勸懲互用尙且竭年半之力僅得銀二十萬兩嗣因各局經費浩繁恐滋民累遂卽稟請撤局所有尾欸及未結各案統歸地方官督同公正洲董清理此當日鄙人承辦之情形也今者江常淪沒其餘各沙洲非陷在賊中卽與寇氛相接洲民之溫飽者早已挈眷避賊散處四方其留滯者類多至貧極苦之人方體恤之不暇安能責以繳價卽或有一二完善之區亦多時慮賊至一日數驚凡此艱苦情狀雖非目擊實出確聞尙惑

不經之言謂可驟得鉅款輕以試辦小者抗價阻勘毀局
毆差大者激生事變皆在意中必致大損威重得不償失
伏念執事肝膽照人筠公又負海內重望兩賢合力正可
於籌辦善後之際爲地方樹數世之利立久大之謨千鈞
之弩何值爲鼯鼠發機耶狂直之言幸維裁察不宣

沙地升科民田減賦事適相反當時丞務籌餉而先生
獨能以損上益下之說進卒使吳民世世受惠是何等
力量乃至今官場無一知者此真所謂陰德矣

寶時於

同治八年頗阻豐順中丞之辦沙洲而不可得後亦未
能取效似於長者所議有窺見一斑處至科則零繁滋

弊其時不附入正案具奏裁併實爲可惜馮林一先生
曾出代合肥相國擬疏見眎寶時權藩時因賦役全書
經八年之久尙未告竣欲申前說聞者譁然其故莫解
殆未深考全書耶抑不知民間實在完納情形耶至以
前各縣清糧大半草草塞責以意爲之時閱十稔尙有
未經舉行縣分災歉隱匿甚多所謂坍塌廢亦率多不實
迂拙之見以爲荒熟宜極分明科則卻不妨多減庶事
得其平利不歸於中飽然地大物博非真有識力者提
挈而經畫之未易塞先生之厚望也書以志慨光緒元
年秋永康應寶時謹識

又

前辱惠顧面述左相覆書訂期前往詢商地方事宜大抵以兵亂之後閱時已久尙是人煙寥落滿目榛蕪善後應行興革之事亟宜趕緊籌辦培養元氣庶幾瘡痍可復富庶可期洵不易逢之機會也尊諭謂仍守三緘之誠甘類寒蟬不特無以副當道垂問之意抑且無以對君父此惟執事有此胸襟氣局亦非執事不配發此議也屬將應辦事宜有關民生利益者開具所知以備採擇轉陳云云

兄

年來杜門不出實少見聞且地方平靖將及二十年善後應辦之事亦已次第舉行謹就管窺所及平易可施者畧

述數條疏於另紙一切高掌遠蹠之論不敢輕發吾弟姑存夾袋酌爲去取可也

保甲本是古法現在何嘗不辦乃有名無實一味敷衍成文遂致宵小縱橫賊盜肆竊甚至深夜放火乘機劫斂省垣重地商民夜不貼席尙屬成何事體推原其故皆由官紳不能聯爲一氣使良法美意盡成具文應請專派熟悉地方利弊大員公同商定劃一章程實力奉行此察暴詰奸第一要着府學之匾實在妖異之列不僅咄咄稱怪已也思之寒心嚴保甲以清伏莽實爲當務之急萬勿以老生常談河漢視之地方幸甚萬民幸甚

甚

各屬倉廩尙有未建業戶止能完折不能完米應請飭查具報一律與建衙署爲州縣治民理事之所亦有未建者並應趕緊建造不獨爲肅觀瞻已也

水利爲農田之本各州縣所轄支河汶港卽古之溝洫也是否一律疏通橋梁之傾圯者是否一律修建應請飭屬開報並籌議逐年歲修之法

城內外瓦礫廢地聞江甯現欲以罰款捐項收買分別造屋召租此爲善後勞來起見然江甯城大亂前尙多曠土今欲肩摩轂擊克臻富庶雖有盛心未必做得到

蘇州較勝於甯惟商賈爲上海所占亦未必能如亂前
繁盛應請飭屬查明限定時日如無的主承認由官召
一變或起造房屋或栽種桑枝或砌築圍墻務將瓦礫一
律清理以復太平景象倘有的主承認照此辦理並嚴
察頂冒至於捐之一字蘇城必不能行萬不得已只有
將蘇滬兩釐局漏捐罰款提作此用亦是一法然總不
如召變之直捷無弊也

蠶桑利益甚溥婁東夾單頗詳附呈一閱仍望擲還前
云開墾擬用機器鄙意不如由本地人自辦只須查照
舊章格外予以利益民生在勤此中可以養活多少無

業窮民惟承平已久恐所餘類多瘠土然果實力奉行
合各屬統計亦必有裨正供也

程安德三邑稟請減賦公呈

竊職等春間公呈湖郡善後芻言仰奉鈞批深以劫後遺

黎曲荷軫念合郡傳誦感激涕零祇因窮寇負隅久稽顯戮明公發蹤指示克復堅城全省廓清昇平重覩人各有良宜如何馨香頂戴仰報生成伏念湖郡自咸豐十年二月髮逆竄擾元年五月淪陷至今年七月收復閱時五載之久多一日攻戰卽多一日焚殺環城數百里無一處不居民離散廬屋成灰白骨青燐慘難言狀不料東南浩劫併注於湖爲日獨久而被禍之至於斯也譬諸人身疽發潰爛幾無完膚得盧扁治之使之歸結一處收痂出毒患

雖平而筋絡血脈傷殘實多調復元氣非大施峻補不爲功竊以爲目前地方新復首以招集流亡爲要顧欲集一方之流亡必先重一方之恆產欲重一方之恆產必先除一方之積累伏查湖州古號菰城向稱澤國禹貢揚州之域厥土塗泥厥田下下由漢唐以迄趙宋載籍可考者賦額皆輕迨至宋末賈似道枋國行公田法重斂病民民始大困明太祖定天下略地至湖州安吉長興武康先降賦額仍舊獨烏程歸安德清與蘇松兩府相距至久明祖仇怨地方遂將籍沒各官田飭有司依租定賦而民愈困建文卽位特予減免照各處起科畝不得過一斗未幾而永

樂盡革建文之政蘇松嘉湖四府之民重罹其厄宣德時
念民逋欠逃亡稍爲甦減嘉靖間復以官田額重攤入民
田并爲一則從此民田之糧亦遂並重矣

國朝定鼎田賦以萬厯時科則爲準今以烏程一縣論每
畝徵米一斗八升零歸安德清略同賦額之重已與蘇松
相埒此指秋糧言也若夫條銀之重則比蘇松爲尤甚請
略陳之查截銀一項各省皆無獨杭嘉湖三府有之三府
中又惟烏程歸安德清爲最重其害起於萬厯中年以糧
米浥爛每正耗百石外有免其晒乾篩颺及平斛加尖各
名目共加米九石八斗是謂私貼崇禎十四年因水災米

貴郡守陸自巖平價每石酌定一兩八錢以折九石八斗之色名曰截貼以其爲運軍私勒浮加之米截出另算謂之截費前此所未有亦他省之所無所以不載全書不入奏銷

本朝順治八年題定截米九石八斗改徵銀一十七兩六錢四分又加津盤運銀一十八兩綱司銀二兩給軍兌運每漕一百石徵銀三十七兩六錢四分從按院杜公所請也康熙初范忠貞公撫浙與督院劉公會題截米九石八斗每石減銀三錢共徵銀三十四兩七錢復經科道以截銀爲浙幫之陋規非直省之通例交章請減卒格部議未

行乾隆四年併入地丁統徵從此私貼與正課混而爲一
每畝計徵銀一錢八分零較之蘇松二府每畝徵銀一錢
二分左右者爲尤重兩省志書具在可復按也今者
天爲社稷篤生偉人運轉東南恭逢碩輔自明公之督師
莅浙也正值全省胥陷寇勢方張兵餉兩窮戰守俱棘雖
以孫吳處此亦恐無從措手而明公從容決策其甘苦於
三軍置腹心於羣帥人思効命士盡矢忠兩年之間肅清
全浙又念浩劫雖平瘡痍未復毀槍船以清伏莽禁科歛
以恤民艱如各處捐局釐卡古所謂間架陌錢一切不得
已救急之稅政均蒙次第蠲除先後裁并今茲減賦一事

欽奉

諭旨飭議

職

等知明公痾瘵在抱饑溺爲心必爲之剴切

上陳力求

恩減原可無庸瀆請祇緣湖郡各邑向以絲穀並重此次被兵最久受禍至深在荒田得一二年開墾卽可成熟蠶桑非五六載培養不得有成是湖郡賦旣重於蘇松災尤甚於他省矣夫人身患沈疴非不知父母之愛子必爲之醫藥調治而當疾痛顛連未有不呼父母者今三邑之民哀籲明公亦猶是也查同郡安吉武康孝豐糧額素輕職等不敢請以爲比可否仰乞俯鑒輿情援順治十一年江

西袁瑞二府照鄰邑新喻縣減賦成案請將程安德三邑地丁漕糧一律照毘連之長興縣賦則起科查長興每畝額徵銀一錢四釐零米八升六合零準此量定雖比諸三邑舊額已經大減而比之他省外府尙多二三倍至十數倍不等卽比之鄰省之常鎮各屬尙多一倍以外此七百年無窮之積累不得不環叩鈴轅號求拯救倘蒙奏奉恩准得甦重困從此不煩敲扑易於輸將再造之恩合郡同戴職等不勝悚惶待命之至

應敏齋廉訪

寶時

廿六日別後登舟一帆風利今日已抵丹陽計程初一可到邗江瀕行蒙眎補帆大公祖書備悉浙省水利次第興辦已有告蒞者聞之欣慶無已前聞補翁親駐工次督役遠近共傳時有神燈出現默佑成功誠能格物感應之理不爽也惟以鄙人之無狀迺辱補翁不遺在遠屢及葑菲無以仰答盛意實切慙悚開濬漕港一節烏程所屬三十餘漕西路如大錢等處皆尙寬深再加疏導洩水益暢迤東自蔣漕至震澤交界之胡漕止最爲淤淺甚有數處堙成平陸港底可以行路者必得大加挑濬聞因經費不敷

實未動工此一查即可明也現在蠶事方興斷難舉辦前次補翁下問見疏陳管見大要以得寸則寸得尺則尺爲言蓋江浙水利大半在蘇境也今蘇省得丁雨翁主其事倘合兩省之力預簡賢員會同地方官巡行阡陌上自天目下至海口明其來厯之源導以歸宿之路疏通溝澮培築圩岸何處有利可興何處爲害當去經營籌度待至秋冬之交兩省一律舉辦浙有補翁蘇有雨翁左提右挈協力同心此千載一時之會也東南財賦仰給於農田農田所出必資乎水利現當減賦之後培養元氣較易爲力語云蘇湖熟天下足此自然之利源非可與手實陌錢同日

語也補翁處不另專函乞以此覆之禱甚禱甚

又

杭州書局章程刻已寄到特奉省覽杭局現在先刻御纂七經金陵局接續雲書云已刻成者四書六經小學公羊古今詩選共十餘種現刻史漢刻工每百字計工錢一百六十文序目加倍如果黎版在內則工價比杭局較爲便宜當再函詢鄙見亂後典籍散佚方伯書局之設專爲嘉惠後學起見甚盛舉也似必得與杭甯兩局通力合作各將必不可少之書先爲刻起不必重出爲宜執事如以爲然望轉致之

又

再前日尊諭擬設書局邀蔭翁與兄共襄其事曾與方伯
談過極荷許可云云當時並無一言辭謝以書局之成否
莫必原可無庸置喙也今已垂成愚衷竊不敢不白况頻
年跼伏衰病侵尋踈懶已成習慣且現治吉金圖釋一書
明年夏秋始能卒業斷不能旁及他事平生硜硜之性設
既承乏其間而不盡心所事義之所不敢出也然使勉強
承命如昌黎之寅入辰退申入酉退亦力有所不逮與其
濫竽貽誚不如據實直陳萬一方伯謬采虛名或有誣諉
務懇代爲婉達此由中之言萬不敢稍有虛飾同於世之

矯僞一流幸亮之本俟走談因恐遽有成議特先草此奉
託餘俟面罄不一

又

前者台從莅省得敘談三日爲快所論去年積水未消一
經霪霖恐有墊溺之厄頗以劉河議濬工已估而汜未舉
辦爲憂意欲屏去廉從仿海忠介之輕舫芒屨周巡目驗
靄然仁者之言可勝欽佩執事饑溺爲心抱負宏遠客冬
辱損書咨訪思所以正人心而勵風俗懃懃之意溢於楮
墨久欲稍竭區區爲左右萬一之助恐蹄涔之見無裨高
深是以遲遲未報今復以濟河一役采及芻蕘雲雖嬋陋

自念生長吳興與蘇松接境地勢最居窪下平日於水利原委稍窺厓略不敢自棄謹先將劉河之不可不亟加疏治爲執事陳之按三江之名肇於禹貢自漢唐以來諸儒考究辨論互有異同今姑就吳中所稱爲三江者言之則婁江實居其一也蘇松嘉湖之水來源皆發於天目諸山而瀦於太湖分流東趨以入海其自澉山泖湖從華亭之南折而東北入海者爲黃浦卽昔所稱東江者是也其自吳江長橋歷長洲崑山青浦嘉定界至上海合黃浦以入海者爲吳淞江其上承鮎魚口北入運河經郡城婁門抵崑山至和塘東合新洋江諸水由太倉歸劉家港入海者

爲婁江卽今之劉河是也宋以前通塞不可考自崇甯四年
年歷元明代有疏治之績載在志乘

國初以至嘉道年間大濬之工亦志不絕書周文英謂劉
河爲三吳東北洩水之尾間關係綦重今日淤淺日甚將
成平陸水無歸宿勢必橫溢汎濫昔賢如單鍔郝亶父子
論之甚詳可覆按也執事誠能窮源竟委循故道而濬治
之此外瀕海各要口量擇疏泄譬之人身使之血脈流通
經絡舒暢自然無病近年水患頻仍去歲霖雨稍多農田
已被淹不少蘇松常鎮太杭嘉湖七郡一州錢漕居天下
之半水政修而後農田利農田利而後

國賦充方今司農仰屋紛紛從事於間架陌錢手實諸稅
政轉舍此自然之利源而不講頻年蠲緩正供愈虧可太
息也昔年郭筠仙中丞下顧菰廬諮雲時政雲上減賦之
議時中丞正任糧道遂單銜詳奏得

旨准行使七百年之積困一旦甦豁今執事觀察蘇松三
江盡在統轄之內有志振興責無旁貸所望不避嫌怨速
圖成功大業運以小心至計無煩多慮雲亦部民竊願爇
香頂祝相從諸耆老爲執事上東南福星之頌焉臨書不
勝引領之至

又

昨奉初六日手書具悉種切卽審敷政攸宜順時諧暢聞
 從者卽欲來省已諏吉有期否殊深殷盼蓮邨廣文赴滬
 道出吳門晤談兩日所談善舉皆屬應辦而鄙意莫急於
 收養幼丐一事其法擬將境內數歲至十數歲亂後無家
 可歸流而爲丐者賃屋安置或搭廠雇工匠教手藝如泥木
 作及販履織席之類量其材質使學習之遲則期年快或
 數月卽可自食其力此中容或有故家子弟察其天資稍
 優或送入義學或延師教讀各幼孩羣聚雜處如何收束
 其身心防閑其出入稽察其勤惰必須立定章程或卽責
 成蓮翁專司其事此第一實政不比託之空言經費尙不

甚鉅萬望吾弟亟爲之創省中當商之林一季玉清卿諸君必卽踵行他日得陶成若干人傳宗接代當必使父兄子弟馨香互告有狄使君活汝之感卽執事之椒蕃世澤亦於此舉爲之券也禮庭兄當必相助爲理應定章程望爲速定如何

又

昨奉手教欣審攝衛攸宜順時諧暢濬河之役本不能剋期誠能預爲部署至秋冬水涸當可舉辦比得家鄉親族來書云蔣薌泉方伯邀集官紳籌議開濬湖屬各漚港亦以轉胸蠶忙爲時迫促爲慮兩省水利本同條共貫將來

通力合作使來源去委一律疏治甚盛事也余蓮村廣文已到定初六日起身奉謁此君爲學專祖新安法脈甚正而其勸人爲善則又宗漢儒之實事求是不徒託之空言與之久處自悉也方今盜賊未平中原多故功名之士大抵皆曳裾挾策以取重當世否則敝衣垢面以辭讓爲終南之徑獨執事孜孜焉興書院聘山長使諸生務崇正學以立根基而有迹涉僞託者必能洞燭其隱微昔范文正授孫明復以春秋張橫渠薦胡安定爲太學師一時理學名臣彪炳史冊執事障海迴瀾旁搜遠紹持之以力貞之以恆行將與文正公後先輝映屬在契末榮幸何如

又

昨聆教言索觀與補翁方伯書稿知執事有修舉廢墜振興頹俗之志仰見蘊負宏遠度越時輩佩甚幸甚浙西與吳郡水利爲農田命脈所關失治者久矣若不及早圖維一旦勃戾爲患補救莫及是亦仁者之憂也誠能合兩省之力循故道而修濬之此數世之利亦莫大之功執事出而力任之甚盛事也盼禱盼禱前致補帆方伯書稿並章程十條爲家鄉親友索去日內卽可寄出所論專爲烏程澠港不足以備采擇且蹄涔之見亦無裨於左右也茲先將太湖備攷送上乞鑒

又

頃奉手書謹悉昨送去太湖備考此書於水利本非專家
不過瀏覽掌故而已浙吳水利爲農田命脈所關自吳越
錢氏以來講求水學諸書卷帙過繁且有今昔不同之處
恐公冗未能徧閱有敝同鄉凌君著有東南水利略六冊
於浙西蘇松水道頗能洞澈原委特專人送上以備采覽

又

頃奉手教並太湖漕港工程卷宗謹悉卷案俟閱後另繳
承示三難洵屬扼要鄙意經費少只有分年興辦之一法
魚鱉菱蘆俟委員履勘後分別最要次要擇其大有礙於

水道者剷除永禁緣此中倚以活命者不少斷不能概去之也三難之外尤以得人爲難此則古今所同慨也方今杭湖蘇松六府州之人皆引領於執事此由平日物望之歸有不期然而然者迎與距皆無所施也至震澤所屬練聚橋港黑橋港昔爲來水今爲去水此二處南受太湖之水東行迤邐入運河自薛埠至葑溪爲上流入湖之口練聚橋至吳港爲下流出湖之口謹以附陳

又

前日草復數行計登籤室一昨接湖州宗太守書特奉省覽敝郡之人爲水利事仰望於執事者甚勤所願春風廣

被宏此遠謨兄亦託在帡幪同沾庇蔭此事本已報竣經辦之人正在具名請獎忽奉

寄諭緩辦而獎案遂輟羣歸咎於豐干饒舌鄙人於家鄉公事從未過問特因其關係農田者至重若一奏結請獎則將來必要自相迴護非三四年斷難望有重濬之日家居漵上事經目擊實有不能已於言者湘翁書中所云初無嫌怨蓋爲代剖也當日覆王補翁條議數則於敝處漵港事較前議稍加詳盡檢奉采擇蘇境水利扼要昨潘令有呈覆節略尙屬明晰惟必須親往履勘另繪細圖註明來原去委甯瑣無略聞吳令恆建議先開泖澱愚以爲

杭湖諸水似未直注溷澱然其既立此論亦必有所見乞將草稿抄示一閱

又

昨奉手答並示摘錄

國制各條參酌禮經考稽

國典其無明文可按則又詳查例案仰見精審周密巨細靡遺循繹至再實深欽服惟內有尙未盡悉者如直省官員不嫁娶不作樂如在京官員例一條查會典

憲廟喪儀王公以下文武官員一年不作樂百日不嫁娶在京軍民人等一月不嫁娶百日不作樂後據禮部奏准

在京王公百官二十七月不作樂不宴會一年內不嫁娶
外省官員及軍民人等仍照從前定例行蓋從前定例京
外一體至此始定區分也揆度外省當日所以不改者良
由禮緣義起亦順人情以天下十八省之遙嫁娶作樂若
均限以二十七月閱時過久格礙正多中間必有條議會
典不載故無可考耳今摘本所列想跟前一條在京官員
分別三品以上四品以下而言惟外省并無分別明文此
條應否節刪以歸畫一又摘本列官員軍民人等二十七
月內均不准演戲打唱此條未知有所本否打唱想卽吳
俗所稱清音是也竊思外省期年以外旣准作樂則清音

似不應在禁例蓋作樂二字所包甚廣

睿廟時都中有以打十番串把戲者執送刑部後成奏案奉

旨釋而不問四海傳播

皇仁至今茅簷蔀屋尙頌揚勿替查清音一業他省不必論以江浙兩省計奚止萬人期年失業餬口無資困苦已難言狀卽使例有禁案尙欲恩施格外思所以矜全拯揀之方否則三年之後此輩皆在枯魚之肆矣天下事有載籍所未詳者或訪諸更事較深之人容有補裨今年元旦滿城官紳中獨有張青帥一人綴纓雲知之因無明文可

據未敢率從後讀邸鈔始知元旦一日綴纓實有所本也
數日前曾與青帥晤談詢及期年後服制據云遠不必徵
猶記同治元年某月初到河南正在

顯廟大喪甫過期年之時司道以下來見均穿補褂此外
亦無不照常今摘本二十七月內不准打唱與官員二十
七月內仍用青褂藍袍兩條可否俟訪查詳確後再行統
望裁奪本屆

國制浙省兩次哭臨

哀詔到後僅十日卽脫縞素甯蘇兩院紅藍印亦有參差
國有大事禮制未一不免爲外邦所議似不能不格外詳

慎蘇省公事每遇疑難徵文考獻莫不奉執事爲春水區
區愚忱亦以知愛有素不敢不盡幸賜加答皇恐皇恐

又

兩奉手書並重刻北宋石鼓文十分感幸無已新秋氣爽
風日晴和遙想枕蓆之餘動與吉會孱體春夏以來尙勉
能支持現將庚申後小有撰箸稍稍清理留爲後人覆瓿
松生兄向來傾慕所需拙刻謹先寄去彝器圖釋一部近
刻漢建安弩機攷一冊號季子白盤攷一冊漢東海廟碑
殘字一冊化度寺碑一冊乞爲轉交就正此外石刻及臧
版書籍如有所需示知再報不敢吝也蒙諭吳山福地爲

韓園舊址如有碑記務乞見寄一分今建阮文達祠屬撰聯句文達爲平生嚮往之人舊有一事可作談助昔年媛叟夢文達見訪談次以文字相屬匆匆而起問老師何往云尙欲到平齋處越日阮七兄過蘇以墓銘丐媛叟撰書親來借取擘經室文集並述其事云夢不足異異在阮七兄之恰到也又云夢中有少可談之人等語笑囑小心勿要有甚筆墨邀我們去襄助相與鼓掌附及博公一噓其年月伯源世兄應尙記得將來可寄梁敬叔兄入箸錄也聯句必有以報已撰各聯能鈔示數分尤感

宗湘文太守

源瀚

月前奉手教承示鍾學士以鄙議漵港事入奏奉

旨飭辦現在中丞已委史太守來勘即可舉行屬將議中
第二條內所稱道光九年漵港土方刊本訪取寄上以備
參攷仰見大君子軫念民瘼修廢舉墜而又虛懷若谷實
事求是雲亦部民能無感幸查吳興本稱澤國徹鄉盡是
水田兵燹以後各水道湮塞愈甚一遇淫潦便成漫溢昔
年蔣薌泉中丞有志振興詢商鍾六英學士六英轉詢於
雲曾疏大略覆之後來王補帆中丞由京南旋道出吳門
特來見訪諳諳屬開條議復就見聞所及以答補公約記

在乙丑丙寅間也頻年來中外皆以江浙水利爲言兩省大府尤拳拳注意一再委員勘辦奈爲經費所限未能大舉執事謂漣港與諸閘須大治而碧浪湖尤宜並治此於吳興永利大要實已賅括洵爲不刊之論惟碧浪湖距城較近易於日諛漣港則近城者爲小梅爲大錢二處最寬闊深通此外三十六漣在大錢西者九東者二十七大約自楊謝漣迤東至胡漣止港益淤離城亦愈遠此十數漣之南如諸墓漾勝堂橋婚對橋百廿畝橋萬壽橋邵漾茅岸頭張官橋賣鹽港蔣家壩下往橋油車渠等處或淤泥填塞或茭草叢生每交冬季幾至不通舟楫古人治水必

先治下流此等淤阻處皆在程境之極東北與各漕相爲
聯貫水望東趨若不挑濬疏通水不能北入太湖勢必橫
溢爲患是又宜與碧浪湖並治者也往年但就距城較東
通舟楫處查勘其迤東各要害恐經歷未必周徧人情每
溺於便安聞去冬有數漕曾加挑濬限於經費實未大辦
而各漕董事已報一律疏通雲籍隸吳興家居漕上目擊
河道淤塞本不忍漠視又辱補公不棄葑菲枉顧下詢遂
妄陳狂瞽冀垂挽救亦不過就各漕言之而於通郡水利
尙闕而未及不圖六英遽爲上達也六英講求經濟其於
水學一門素所究心非鄙人所及來諭謂奉發拙議六條

不知六英曾否竄改尙求錄示爲懇至丈尺土方各濶異形似宜測量水勢總以一律深通若干尺爲準其土方之多少視濶港之淺深爲盈縮敝鄉凌少茗水利略卷四於各濶皆有量準丈尺頗爲詳備可資查攷此外間有民間私記不足援以爲證也程安兩邑收割比他處較遲交冬農事始畢今年天氣久晴冬間又有閏月正易興工適逢福曜賁臨數世之利將惟執事是賴此殆千載一時之機也伏望俯加詳察速賜舉行曷勝盼禱

再承示擬修府志此闔郡文獻所繫實爲當務之急縵雲侍御品學粹正敝郡之鄉祭酒也倘執事延請總持志局

必能相與有成士民亦必悅服亂後各鄉童蒙類多廢讀
執事擬設義學甚善甚善未知有成議否尤爲盼切又行

又

前月廿二日肅復數行附有緩老所書長對一聯交信局
賚遞未知何日澈覽深爲懸系前求錄示之件因楊中丞
已抄咨蘇省大府得以閱見內所云云與原稿無甚歧異
惟輾轉謄寫字多舛譌耳漚港一役爲徹鄉農田命脈所
關已已開濬限於經費時又侷促僅就數直港開深尺許
並尙有未開者而橫河乾涸處概未勘辦茭蘆叢塞處俱
未剷除閘板亦未修建倘因經費未充不能同時並舉原

可逐年分辦爲得寸則寸之計乃承辦之人不明利害妄
思褒獎遽報一律疏通開竣大府相距甚遠遂據情覆奏
愚以爲若不報開竣尙希冀有重開之日今已報開竣矣
覆奏矣則非閱數十年不能遽議重開事關桑梓又經目
擊實有不忍不言者非好爲議論也不意鍾學士據以入
告然使因此而得加重濬實事求是有益農田則雲雖抱
多言之咎亦所不辭公十年舊雨今辱降臨敝郡敝郡之
人咸託宇下倘能擇淤淺各要道詳加履勘合碧浪湖及
漚之橫河直港大加濬治其亂後各圩岸坍損甚多卽將
挑河之泥督令填築修固並籌歲修之法立久遠之規俾

農田水旱有資永免墊溺公之造福於敝鄉者無窮敝鄉之頂戴於公者又豈有盡哉行見輝煌綽楔民不能忘雲亦當躬執馨香從鄉耆老後爲公上福星生佛之頌惟公加之意焉縵雲侍御已由杭歸來否志局事何時可以開辦雲精力年不如年比於月之初四日到婁東小住此間民風尙醞秋收亦較往屆豐稔惟故家收臧都作雲烟散去並無解談此道者手肅布肫不宣

又

再府志爲闔郡文獻所繫亂後闡微發隱表揚忠節尤爲鄭重執事志在必辦聞之喜而不寐謝城博極羣書復優

於記誦此做鄉第一樸學之士執事延攬及之足徵真鑒
佩甚佩甚弟有世好徐小豁孝廉有珂於書亦無所不窺
人極敦品爲縵老書院肄業弟子與謝城亦至交倘處以
襄校之席必有裨益以其平日留心時事兵燹之後頗有
紀錄可資采訪執事其置之夾袋中如何墨妙亭湮沒久
矣其墨拓之存於世者亦不多見將來復刊數碑略存前
賢遺跡亦藝林俊事所望大君子久於其位則我湖之福
耳沈菁士兄以彼此作宦在外雖屬同邑約記僅識數面
而已鈕壬林兄向有姻世誼亦不過相見數面並未熟習
然二君之品學端方潔廉自矢則知之甚審大略居心行

事與黼香公祖同一老成持重結實可靠執事與之共事當亦知其蘊也漵港距城較遠二君未能身親目擊不能不憑漵上人之言是聽猶之弟於碧浪湖情形雖知爲水道要害並未目諗亦不過人云亦云而已事關桑梓利病旣確有所見亦何肯引嫌自匿甘類寒蟬况事已覆奏若再於覆奏之後敘勞請獎則非閱數十年斷難望重濬矣此真間不容髮也當仁不讓竊自以爲言之者無罪不暇計嫌怨也所需裝褙匠顧子山處舊人年已七十矣現在蘇開店不能遠出此外竟無好手義塾章程周密之至乞再寄十分爲荷

正在封函間適應敏齋廉訪偕杜舫老同來卽將此書交閱並出尊函同眎敏老云於執事相識並極佩大倚聲刻下蘇省委徐蓉亭吳仲英兩司馬往勘督辦尙未定人舫老肯任其事則大妙矣此事能江浙合力大舉更難得執事與應杜二君主持其間洵千載一時之會也

又

前月辱惠書敬審道履安勝爲慰承寄米書近刻石墨領到謝謝宋四家遺墨當日人爭寶重南渡後幾於尺幅兼金米書流傳較多僞迹亦至夥清芬閣帖集至數十百冊而僞者居大半生平見米書真迹以向太后輓詞小楷爲

第一係齊梅麓舊臧今在長沙黃荷汀家墨刻亮必見過
有新舊二刻新則徐紫珊屬胡衣谷刻也尊臧西嶽華山
碑久已烜赫照世何不精摹重刻爲墨林增一劇迹卽爲
分書樹一元鑑俾學者藉以取法有功藝苑匪淺也

又

契闊經年雖魚牋互通未足解其勞結一昨奉到手書展
誦之餘伏審公餘箸述與日俱新幸甚幸甚弟體弱畏寒
近屆隆冬擁鑪瑟縮不復窺戶外一步所幸牕前花木室
內圖書座繞清香壁多古迹靜觀自樂聊代臥遊此亦竊
取公家少文先生意也惟精力日衰學益荒落崦嵫景迫

車月
成就毫無每一念及輒興老大之傷耳清卿昨日抵家執
事但見其奏議有體有要不知其三載秦涼輶車所至於
振拔單寒之外搜羅金石既富且精直欲突過燕翁尤爲
難得可喜也拙箸已梓印者三十餘卷因乏便尙未寄正
燕翁後人不能繼家學漸成衰替尊臧祕碣渴欲一見明
春有專使之便能密寄一觀決不轉示一人卽交來友帶
轉如何

又

前奉還示謹悉蒙假華山碑留觀五日愛玩不忍暫離正
與古人三宿碑下同意杜門息慮臨摹一過惜腕弱不能

脫此凡骨爲愧耳謹藉薌艇返湖之便託其帶繳承命作
跋已附書數語未免有污名蹟皇恐皇恐阮文達公援正
翁氏摹本王文蓀文字作大之譌各家題識均未論及特
爲拈出備他日泐石取證亦論世知人之一助也統希是
正昔年曾據張芑堂雙鈞本鈐版得尊本詳校雖神韻未
具而間架結構尙不離譜附奉鑒賞不盡之言疏於另紙

神皇正統記

卷三

三

兩罍軒尺牘卷六

歸安吳 雲愉庭著

周縵雲侍御

學濬

昨由文報局交到九月十二日手書展誦之餘知九月初
間託李筱石二尹帶去寸牋附有楹聯集帖兩本拙書條
幅四幀均未達到不識近日已徹覽否念念弟到山逾月
因蕉林赴江北勾當公事得仍寓三退樓中江山風月一
任婆娑誦杜少陵眼前無俗物多病也身輕之句未嘗不
悠然自得也惟浩劫未消家山淪陷每一念及又不免如
王粲登樓有思鄉隕涕之感我二人雖睽千里相印一心

身世飄蓬當亦同此慨喟猶憶兄當年按試粵西途次有
句云時清邊塞無烽火細雨重陽緩度關郵書屬弟寫崑
崙攬轡圖當日盛平景象曾幾何時而滄海桑田一變至
此迴首前塵渺如隔世陶公不云乎寓形宇內復幾時曷
不委心任去留三復斯言真可萬慮皆空一切放下又何
必昧去本來面目自尋魔障哉近作數首錄呈省覽詩雖
不工聊以見志幸教之不宣

又

新正兩奉手書欣審道履康勝小雲世講於客臘廿三日
安抵皖江想見一堂團聚伯母含飴之樂可知也羨慰無

量揆帥密保時賢老兄高預其選聞之歡躍此日薦舉一途比比皆是無足爲兄喜而所以喜不自己者以出自揆帥之門耳揆帥任天下之重功益高而心益下不特時帥中無可比論卽求之古大臣亦罕其匹鄧君章有言天生俊士以爲民也如兄之早掇巍科才兼體用正當出其抱負匡濟時艱此固揆帥之知人亦由兄之蘊於中者有以結揆帥之知也顏淵雖篤學得夫子而名益彰能不爲兄額慶耶蒙示揆帥屢次齒及鄙人昨見拙作謂從前於郭雨三先生處卽知賤名三復來函不勝慙悚夫人稍讀詩書粗具知識未有不好名者名爲大賢所知古人且聞而

自喜況禱昧如弟而又在廢棄時哉至承教以出處之際

不必固執致蹈褊衷此兄摯愛意在揚不然之灰耳而弟

自知賦命至薄平生謹守繩尺乃謗毀之來每出於匪夷

所思昔歐陽公至於白首而詘不已卒無所污弟何人斯

敢援以自解間常平心自勘總由性直忤時遭讒獲咎皆

歸自取唯有痛自懺悔或可收之桑榆比自庚申以後患

難風波憂畏成疾至今日正如田光先生所云其精已銷

亡矣只合一編在手了此餘年前書所陳蓋不敢昧於己

量也並非矯飾韓子曰賢不肖存乎己禍福貴賤存乎天

名聲之善惡存乎人存乎己者吾將勉之弟今者亦唯以

存平己者刻勵自勉以副兄之望至於披艱掃穢平滌九
區佐中興之盛業立不朽之奇功則弟之望於兄者亦蒸
香虔祝者也行藏雖殊各宜自愛伏維鑒察不宣

又

前奉手教附來丁中丞錢子密二信已一一妥寄曾有數
行奉報未知達覽否小雲姪過蘇云兄有滬上之遊不識
盤桓幾日洋味比之淮水如何一笑小雲有投筆之志蓋
急欲捧檄博堂上歡不爲無見在此祇留一日云先到邗
上見何廉舫後卽赴節署其意欲廉舫與弟二人爲之倡
并爲糾合作集腋計弟已許其力助且待其見廉舫後信

來如何此等事亦不可使之視爲容易也敬齋信附去渠頗有振興水利之意屢承過訪弟告以浙西與蘇松同原其委必得通力合作尤在任用得人勿存敷衍塞責心方有實際現委吳大令恆赴浙省詢商辦法不知吾鄉當道意見如何刻下蠶事將興向停工役昨聞錢溲等處方欲挑濬以數里路河道經費聞不過給發一二十串實做敷衍塞責四字奈何奈何兄晤楊太守及沈菁士兄能勸俟至秋冬之交通籌全局寬備經費然後動工爲一勞永逸之計此吾鄉農田命脉所關尙望兄於各當道處剴論之至禱至禱金陵書局想常通信張嘯兒處史漢已印成否

其精印者固望之甚切卽尋常披讀者亦須惠我一部弟
已備胡刻通鑑爲報兄聞之定亦欣然也

又

去冬曾有復書由信局遞呈嗣得臘月十九日手教未蒙
齒及未識前函達到否深以爲念小雲世講於何日抵家
悼亡之感情不能禁尙能仰體重闡之意不致過於悲傷
否尤切愴系書局通鑑已經告成特爲吾兄刷印一部配
以漢小銅鼓爲兄補壽記得兄昔年按試粵西書來云歸
裝攜有小銅鼓二一自留一備贈弟者差旋泊舟漢口鹽
艘失火舟亦被殃兩鼓均爲六丁取去此二十年前事也

今弟購有重出者不可不分贈兄也俟有便舟寄上或留待面交至書局價目弟不甚悉須問辰田諸君也局中經費艱難之說由於當道不善處置之故江蘇局面果能擘畫得宜務持大體區區書局之資固太倉一粟也弟去冬忽奉左季帥劄子委辦甘肅捐務局設金陵會同江藩司辦理等因廢棄之材見收匠氏不無知己之感惟弟伏處十年跣懶已慣不必誓告先墓而出處之計固已久決於心當卽繳劄力辭措詞極爲委婉陶齋恐我掉頭不顧開罪鉅公此禰正平劉孔和之所爲非所擬於鄙人況左公賢者亦非黃高輩比也承示春間作林屋石洞之遊此誠

勝地大約三月間最爲相宜由洞庭至光福山登鄧尉更有妙境莫妙於司徒廟清奇古怪四柏樹真不可不看去
年弟興緣仲諸君冒雨往訪曾書一對以應寺僧之請句
云清奇古怪畫難狀風火雷霆劫不磨中有一樹曾遭雷
劈而劈處枝榦更蔥茂真是奇絕兄聞之當亦神往子密
信當日卽爲遞去舫老於十八交卸十五有引疾之稟兩
院均繳還原稟慰留甚摯現在尙未銷假當此名場極順
之時忽思急流湧退洵有真智慧也敏老今日赴甯香巖
興會尙好頗思出遊聞菱湖正月十三日起十八日止有
勝會甚熱鬧確否

又

聞台從赴杭不知何日言旋念念前得宗湘文公祖書知
吾郡漕港現議重開並云鍾六英學士將弟所議六條入
告聞當道以

廷寄有草率了事四字頗怪弟多言查己巳年所開止擇
數直港中工程之至少而至易辦者畧加挑挖深不過尺
許費不過萬串其淤塞處均未履勘若因經費未充不能
同時並舉原不妨逐年分辦作得寸則寸之計乃承辦之
人不顧大局不明利害妄思褒獎遽報一律開竣當道不
察遂亦以開竣覆奏弟以為不報開竣尙有重開之望今

既奏明一律開竣且請獎敘則非閱數十年斷不能遽議
重開弟因關桑梓休戚目擊情形實有不忍漠視者不圖
六英遽以弟言入告也聞當道奉

旨後於此事極爲鄭重湘翁書來云與吾兄及同鄉諸公
會商擬合碧浪湖橫湖直港大治之果爾則弟雖受多言
之咎亦何所恤惟望吾兄力贊成之漚港淤淺大抵都在
郡城東北距城益遠淤淺益甚恐履勘未必能徧必得周
知水道者相助爲理庶於事有濟而各漚董事見不出跬
步又惡勞喜逸絕少結實可靠之人城董可靠又未必肯
常駐鄉間此事恐實費當道躊躇貴及門徐小豁孝廉喬

梓頗精水學家居漉上熟諳情形又好行善事倘當道見訪吾兄可舉薦之惟小豁讀書不預外事恐亦只能備顧問未必肯出任奔走之事也聞沈協軒在家其人年壯能耐勞苦且新經磨折倘節取其長似亦在可用之列昔年江浙減賦之舉發端於鄙人其時馮林一宮允在李相幕府力贊成之舉七百年之積困一旦甦豁水利爲農田之本今當道既有意大治吾兄又爲當道所敬服惟望效林一之贊成減賦爲梓鄉造無窮之利禱甚禱甚

又

一昨辱手答知讀禮之餘不以鄙言爲河漢強抑哀思聞

之稍釋念忱承詢喪服各條大抵先王制禮必準情酌理
而出之不使太過亦不使不及後世禮節繁重每遇喪禮
大事多致紛紛聚訟雖名臣大儒文章蓋世之才亦各偏
執一見卒無一定之規昭垂來世吾輩居家舉動爲鄉里
矜式自不能不格外慎重儀禮禮記諸經家家都讀而
本朝禮制詳載會典及通禮二書會典卷繁不及寄特檢
通禮一冊寄上以備緝查擇要摘出遇便寄還此外垂問
家常服用各層謹條對另紙伏祈酌用茲乘存齋世好旋
湖之便謹呈祭幃輓聯各一奠敬一函敬代芻束伏乞告
存爲幸

又

弟近服自製丸方大便尙無艱苦終月杜門惟以筆墨爲消遣現撰周無專鼎釋文一篇頗有發前人所未發攷無之爲姓有舜時無擇見莊子讓王篇張未未以魯無駭爲證似無駭卒後賜姓展氏此無駭疑是雙名又正字通無字註云無姓漢有無且明無能此二人弟未知之漢書浩繁無從檢查因記岷帆弟當日曾著有漢書人名攷不知此書存否向兄言及今已忘卻不識有此人否乞爲查示此外有無無姓之人見於經史者並懇示及

又

前奉手翰謹悉所諭家鄉士子寒素居多孝廉計偕每有告貸無門遂至裹足秋試亦有以無資廢然者現與同人籌議在吾郡絲捐善後二成一欸餘存省局項內請撥二萬元發典生息以一萬息錢爲會試公車費人給五十洋以一萬息錢作爲鄉試賓興人給十洋云云此真盛舉姑無論本有存欸可撥卽無存項亦當設法勸辦以期必成往年婁東紳士以賓興無資寒素無力應試每至廢讀呈請籌欸三兒以婁東地方苦瘠絕少殷富無從集捐不得已議定案漕提欸以十二年爲度悉由官捐不派地方分文今已行之五年上兩屆孝廉計偕及秋試之費卽在此

中提取合計息錢春闈人給五十千文秋試人給十千文
通稟立石定案去年他屬有稟請援案辦理者今吾鄉以
地方所捐之款辦地方義舉當道倘有異議我數人惟有
堅持定力志在必成存齋已經旋里現在仲復回家省墓
想必晤談定議也承示脾泄之患服藕粉代點米仁代茶
而癒聞之大慰近日鑿生甚庸服其藥每每受苦弟咳嗽
自去冬至今尙未霍然不敢輕易服藥恐爲庸鑿所誤也

又

一昨奉到還章發函頌頌不覺淚之盈睫也昔王夷甫謂
陶公曰賢子越騎云沒天下盡爲公痛況在慈父可見古

人遇此等事悲思鬱結無論聖賢豪傑亦有不能驟解者
爲今計必得於無可排遣之中勉強排遣之法無已其惟
俟詠華弟迎柩歸來經紀猶完早日買棹出遊乎歲月易
邁混過數月哀痛漸減久之自會消釋否則家庭悶坐終
日咄咄試問七十之年尙有幾多老淚爲死者灑耶魏舒
所謂無益自損者不可不引以爲戒也吳門舊雨咸盼兄
來幸早命駕禱切禱切承詢商爲小雲世講分訃領帖應
否舉行考禮經有爲長子稽顙之文所以重正體也今世
講服官有年娶妻生子領帖一日斷在必行無可猶豫者
春寒尙甚千萬調護自愛臨書依切不盡

同車尸苑

卷二

一

與絲業同鄉

吾湖每逢開科合郡應試士子幾有千人之多內中以館
爲生者殆居其半省城兵亂以後貢院左右房屋甚少間
有可賃者租價極貴寒士考費無出有因之輟考者情殊
可憫聞嘉興府屬現在集資萬金在省城貢院附近購地
造屋爲嘉屬士子考廡其辦法另有說帖特附寄省覽吾
湖宜亟仿行惟兩府情形有不同嘉興集資分七邑公攤
吾湖如安武孝各縣萬不能派不如就南潯菱湖雙林數
鄉鎮絲業中酌提較爲簡捷可靠謹特專函奉商此爲接
濟同鄉無力應試者起見在絲業所出甚微而寒士受惠

匪淺諸君向有好善之心成此義舉將來子弟應試定必
綿綿科第食報無窮如果意見相同望卽示復當亟達黼
香郡尊及總辦吾鄉釐捐之宗湘文太守暨縵雲諸君妥
議規條以垂久遠倘諸位能親至省城一行則經營擘畫
得有提綱挈領之人尤爲大妙至買地等事或須省中巨
紳招呼屆時弟當專函致託可耳不宣

再此等善舉倘出自當道勸辦則合郡爲之減色矣同鄉
諸親友處不能徧及均此致意又行

陸存齋觀察心源

往者辱賜書錄錄稽於裁報幸勿爲過家鄉水利待治久矣前月纓老過蘇亦曾論及此我鄉農田命脈所關足下蘊負宏遠定亦注意於此士大夫居鄉凡有地方善舉盡一分心則造一分福前得敝族中來書謂春間疏濬溲港其深通處可從緩挑者現在築壩加挑淺處必不可不挑者轉置不辦其所以專辦較深處者取經費省耳草率至此安望實惠及民雲 僦寓吳門衰病侵尋老矣無能爲也足下年力正富識畧超卓尙望於當道前剴陳利弊尙能任用得人實事求是成久遠之功貽數世之利豈不美哉

豈不美哉縵老吾省之鄉祭酒也盍與商之吾湖善後局
中綜其事者沈菁翁鈕壬翁之外尙有何人想無不以桑
梓疾苦爲慮鄙人盲瞽之見亮諸君亦早計及此也姚少
垣世兄人頗樸誠茲挾名書畫多種到城法家鑒之當亦
心目爲快

又

別後久未通書遙祝籌勳楸箸動與吉會幸甚幸甚弟衰
病杜門伏案之外惟養花飼鶴爲消遣之計夏初得一曾
孫長成可喜交秋後則不如意事常八九又生煩惱曾作
婁東之游讀東坡水調詞頭一闕離合悲歡固應勘破也

閩中山川雄壯足下公務之餘有無新箸便中望示悉爲
盼拙箸彝器圖釋雖已付梓尙須修訂因老友陳壽卿索
觀校本遂先刷印數部曾記足下譚及現修郡志金石一
門應有採錄自文駕赴閩之後此道少可與談者夏間曾
以一部交小豁帶去聞志局中專校金石一門者爲丁君
弟未識其人丁氏向多樸學之士是否小雅先生後人吾
郡本多墨妙遺跡屢經兵火幾於蕩焉泯焉此時存於世
者亟宜勤加博訪期免遺珠之憾拙箸乃敝帚自享本不
敢與古人抗衡然海內著名之品其文字有裨經史之學
者頗亦不乏合揚州阮氏嘉興張氏山東劉氏各家精華

蒼萃其中似亦藝林中一偉觀也茲特奉寄一部伏乞直
筆削正此書尙非定本也聞中有文字之交否有鹽大使
魏稼生其人耆古入骨髓曾晤及否

又

前月奉手翰具悉就審道履清勝侍庭納福

國恩家慶萃於一門羨賀羨賀 弟鍵關養拙垂暮光陰盡

消磨於故紙堆中所惜崦嵫已迫無所成就時切疚心耳

承示斗檢封篆文作古錢為職四字愚意竊以為未安案

錢說文銚也古田器从金菱聲詩周頌序乃錢鑄毛傳亦

訓銚疏引世本云垂作銚宋仲子註云銚刈也然則銚為

田中刈器錢實同之借錢爲泉雖古載籍及漢碑中間有之而泉文則仍從古如新莽之大泉貨泉各品及三國六朝至於唐宋載在志譜彰彰可攷者皆作泉不作錢也元明以來字多從俗不足深論已且鼓鑄二字連文爲義今去鑄字而曰鼓錢爲職於文理亦殊欠順敝處所收斗檢封不止一器其作鼓錢爲職篆文明顯與復古編所錄同出陝人譌舛也學問之道惟推勘乃能發明亦惟辨析始見真諦足下淹通羣籍學識兼超如有所見尙望直筆見示幸甚幸甚椽孫蒙識拔得以署篆聞之喜甚

又

昨承惠借宋刊夷堅志此夢想數十年今始得見大慰平生晨起草草繙讀知榮旋在即不敢久留謹專人繳上希卽察收此書雖涉語怪然中間隱寓勸懲足垂警誡況出名賢手筆爲自來小說中第一烜赫有名之作足下廣搜祕籍遠紹舊聞亟宜授之梓人以公同好坊間所傳之本舛譌錯亂得此書一出正之豈非墨林大快事哉鄙人老矣亟願觀其成也再坊本流傳似亦別有所據卽如甲志卷一黑風大王一篇中有紹興間陷虜坊本改陷虜爲歸北此諱忌之筆必出後人竄改然則此書在南渡時卽有翻刻無疑矣於此益見原刊之可貴也物聚所好如是他

日刊成務乞先寄應書封面望示式樣謹繕以報

又

前日奉十月廿八日手書並近刻金仁山先生尙書注六冊海藏老人陰證畧例一冊一一領悉敬謝敬謝承示擬刊十萬卷樓叢書一百本現在剞劂葺工已有四十本先行刷印俟十萬樓叢書全竣後再刊而宋樓叢書一百本先將草目寄閱屬譔十萬卷樓叢書弁言一篇循誦至再頓使垂暮之年精神爲之一壯名山祕籍決爲必傳得挂賤名附垂不朽敢不力圖振奮剋日攄豪一俟譔就卽當寄請是正我湖自康熙以來代有傳人遠不具論近數十

年中論聞見之博著述之富自應首推嚴氏鐵橋此外諸老或經學詞章或訓詁箋釋或算法輿地亦能各務專精潛心樸學然寒儒伏處蓬門空山偃蹇身不出里街足不履朝市既無名山巨川以發其胸中鬱勃之氣又無奇才豪俠之士相與上下其議論所見未廣而又囿於境地雖同列文苑視鐵老瞠乎後矣獨執事蚤歲蜚聲公卿側席監司久任遭際正隆小有怫忤翩然初服鍵戶著書絕意不出兵燹以後凡故家遺集宋元精刊遠紹旁搜不遺餘力故大半歸於鄴架而又不吝重資廣爲刊布遂使海內綴學之士莫不知有吳興十萬卷樓方之范氏天一毛氏

汲古真堪鼎峙吾鄉故多學者而就目前言之決其必傳者亦止執事與蔭老爲可信耳所論現編吳興金石存屬將敝處勒石各種墨本開送並云吳興向多古甄亦應編入惟金器流轉無定故不采錄尊意蓋恐魚目相混贗鼎貽譏耳愚見書名金石又係專刻似金器祇須慎選不必擯去但必擇其流傳有緒確可徵信如仲復處虢未大林鐘得於張氏清儀閣縵老處周敦得於蔡友石家尊處新得之卣爲曹氏懷米山房故物至敝臧各彝器內爲阮文達所臧者已編入

皇清經解其爲張未未臧者亦屢入名人箸錄今編某府

縣金石而遺漏不載恐海內金石家見之未免生訝惟增此一門成書又須延時日蓋摹刻鼎鐘文字不能草草所望尙須裁定耳

又

前奉七月十四日手書並校定三續疑年錄二部早經領悉敬謝敬謝其時正爲二豎所困未及裁答承示安邑志書將成舊有董斯張吳興備志儲臧徵一門擬宗其意將吾兩家所臧金石碑帖書畫宋元刊本古博收入列爲二卷彝器與古博兼載其文書畫但列其目甚善甚善鄙意做臧之吉金與尊臧之博文一則萃彝器之大觀一則備

吳興之掌故宋元秘籍凡經重刻亦必列入以裨來學至於書畫碑帖吾二家收臧甚夥恐太煩冗應將前賢法書分別已否勒石已勒石者錄未勒石者不錄古碑帖亦如之書版注明臧某處碑石同如此仍可歸入金石藝文兩門至古畫或有關掌故者間錄之此外雖宋元精品亦不便入以合志書體裁先以奉商如尊意謂然卽祈示遵以便將所臧各種繕單呈鑒也

又

月前辱承損書并惠示大箸千篋亭塲錄亟取披讀心服傾倒匪言可喻古塲舊抄箸錄詩小雅斯干傳瓦紡塲也

說文瓦土器已燒之總名段注土器未燒爲之坏已燒爲之瓦紡塼瓦之一也古未聞有文字晉陳緝之東陽記載獨公山臨溪古冢其塼有筮言吉十二字見御覽冢墓門其書不傳趙宋以後間有見諸著錄者類皆拾殘綴闕不得謂專書

國朝昌明正學名儒輩出嘉道間阮文達公以當代龍門爲文章司命敷歷中外五十餘年巡撫我浙建詒經精舍當日知名之士咸萃於幕下經術之外及於金石文字天右斯文地不愛寶鼎鐘彝器豐碑古碣所產於郡國山川者日出不窮學者據其遺文詮注攷釋以發明經義糾正

史事論者謂金石之學至是斯稱大備文達嘗得漢五鳳諸磚謂以年紀器石勒工名其字可觀隸分之變其詔可補志乘之遺因以八磚分題課士於是耆古之士益知貴重競起搜訪互相矜尙然當日收藏家號稱至富者積數亦未聞有滿百去年就養婁東太倉陸星農殿撰以所臧百磚硯數巨冊屬爲弁言觀其收臧之夥抉擇之精歎爲突過前人得未曾有其時聞吾郡繞郭諸山出古磚甚多好事者爭相購致從者親往物色搜羅特夥今讀大箸千甃亭磚錄不意所得於兩年中者竟五倍於星翁又於數月之間整齊排比編輯成書紀其緣起詳其出處攷釋其

文字語無鑿空事必徵實此人竭數十年心力皓首而未成者足下以旦夕間成之良由學識素裕精力又足以副之未及服官政之年而著述之梓行於世者已高可隱身積以歲月將與毛西河諸老並駕藝林豈僅壓倒嚴鐵老已哉屈指鄉黨傳人道咸以來足下當推首出屬在世好語出由中決不敢以泛詞貢諛也抑有商者埶甄二字段氏以許書未收遂指爲俗字愚意土器已燒謂之瓦紡埶瓦之一也从土从瓦合於六書形聲會意之旨

國初陳見桃作毛詩稽古編惠定宇至爲推重阮文達謂其體正以說文志在復古蒙嘗讀之其於埶壹之埶皆作

博而於紡博之博則從瓦可知从土从瓦合於古義玉篇
廣韻諸書所以並收不得與从石之磚同以俗字抹之曩
曾以此質諸星翁不識尊意以爲如何承示現擬仿張月
霄臧書志例成臧書志一百二十卷來春即可授梓聞之
令人神王蒙年逾七十老至耄及萬事胥忘所未能恣然
者唯此翰墨結習耳指日剗劂告歲務必先行賜讀至禱
至禱

同 暑 車 月 片

一 夕 二

一 夕

鍾六英太僕 佩賢

昨談蔣薌泉方伯有疏濬湖屬各澗港之議此於農出水
利大有關係誠善後事內第一急務也按湖州百川叢錯
要以苕霅二溪爲綜貫其源發於天目山其支流分注各
澗港以入太湖每遇北風波濤洶湧湖水挾沙倒灌水退
沙停易於淤塞舊制各澗港皆有斗門門有暉板視水勢
之大小以時啟閉旱潦俱有所宣蓄法至善也兵亂以後
全行毀廢兄去冬回家掃墓由南潯經陸家漾顧家蕩以
至錢澗迤東至邱家堡所過之處凡有支河汊港無不淤
淺兼之菱葦彌望雖港面有十數丈之寬而中間僅可容

下集車月片
二
三

勿若不趕緊剷除循故道而疏濬之轉瞬春水將生一遇霖雨山水灌注水無宣洩之路必致汎濫橫溢其爲農田之害不可勝言薊泉方伯德澤之在吾浙者甚大今旣欲興此盛舉還望吾弟寓書贊成早辦一年生民早受一年之福想吾弟同關梓誼定必切寔轉陳臨穎翹切不盡再前書繕就未發不盡之言重爲吾弟陳之去年霖雨未及兼旬農田已被淹不少向交冬令水勢必涸而刻下瀕河圩岍水不沒者僅尺許甚則已有淹在水中者底水不消寔由洩水不暢也設遇勃戾肆虐不但秋收失望必致家室田廬盡成澤國此水利之不可不講至亟亟也查湖

郡諸水固以太湖爲瀦蓄而太湖之水則以入海爲尾閭
杭嘉湖蘇松繡壤綺錯經聯絡貫必得合江浙兩省上下
流一律疏治而後水患可平昨蘇松太道應敏齋觀察來
晤與之細談敏齋亦講求經濟留心民瘼者慨然任之擬
歸去卽行詳辦倘得交相爲功則有裨於農田水利者洵
非淺鮮並望吾弟采擇而轉告之

又

疊奉六七兩月內三次所發手書知前肅數函均澈清聽
比者秋氣漸深寒燠不時未審眠食何似伏維萬福
伏如恒勉善可述幸自老母以次均多平順堪慰厘注
九

兒現赴秋闈頭場題目甚爲結實初出觀場工夫尙淺場作雖無大疵離中字恐尙遠今年副主考張香濤先生閱通淵雅時望所歸二三場必講究將來闈墨必可觀也三見考簾題爲有教無類兩章中堂喜其熟於史事大爲激賞不可謂非文字緣也捻蹤颺忽勦辦迄未得手轉受挫衄雖曰劫運未終恐人事亦有所未盡也昔東漢羌寇益州龐參等屢戰不利虞詡謂任尙曰使君屯兵踰二十萬兵法弱不攻強走不逐飛自然之勢也今賊皆騎日行數百里來如風雨去若絕弦以步追之勢不相及所以曠日無功莫若汰其冗弱廣購馬匹舍甲冑馳輕兵尾追掩截

其道自窮尚用其計克奏大捷宋李綱謂金人以鐵騎勝中國非車戰之法不足以勝之其說有第三步兵不足以當其馳突用車則馳突可禦一也中國騎兵馬不如敵用車則騎兵在後度便出戰二也士卒多怯見敵輒潰雖有長伎不得而施用車則人有依可施其力部伍有束不得而逃三也其時獻車製者甚衆大抵昔尚弓弩今仗砲火造車之法不必泥古宜虚心博訪令久列戎行而胸有韜畧之人各抒所見講求盡善務使轉圜進退應變無窮行則鱗次以爲陣止則鈎聯以爲營不必開溝築壘到處有屹然之勢兵法先爲不可勝以待敵之可勝捻逆起事多年

擾及數省曾不能割據險要分守城邑狼奔豕突徒事劫掠其無能爲已可概見然其中豈無一二黠者且多百戰劇賊東竄西擾去來飄忽安知不用吳人疲楚之計使我應接不暇似不可不急籌變計也今賊飽掠三府輜重纍纍正犯兵家所忌此次麇集登萊賊數多寡衆所共知動云數十萬乃吶喝之詞耳我軍數倍於賊果能將士用命盡力兜截正可收掃蕩之功無如錮疾已深仍恐見賊先奔耳比因軍務傳聞令人憤懣三杯耳熱忽發狂言吾弟抱負宏遠蒿目時艱當亦時深扼腕都中得雨後麥子聞可補種梟匪已撲滅否南中惟浙東歉收此外秋成可望

中稔米價日賤而元氣難望驟復者釐捐困之也此事目前亦没法想奈何

又

前接五月廿三日手教讀悉種種時有邗上之行致稽裁報幸弗爲過詳繹來諭知讀書有得不爲堅白同異之辨獨參知白守黑之旨來書有宦途分紅黑二字此由識解本超而又濟之以學養深之以閱歷故能浩浩落落富貴浮雲吾儒有自得之一境固非居常咄咄輩所能共喻也然豐城之劍其光芒終不能久掩

聖主賢臣之頌遭際自有遲速耳謹拭目俟之西捻蕩平

普天同慶此後漕運舊制其他善後各事想當局必次第
籌辦吾弟奏議皆經世宏文其密疏定必焚草不敢請觀
其發邸抄者間有讀過未能牢記欲求彙錄一分見寄人
生不必論出處之窮通但得身滅而名不滅斯爲不負此
生方今中原甫靖回逆未平應言之事正多吾弟何寂寂
也茲乘汪小樵封翁入都之便草草布復諸維珍愛不盡

又

芎庭太僕來奉手書並蒙以去夏先母大故厚賻遠頌謹
領告登感繼以泣每於邸報中得讀吾弟奏議經世宏謨
可大可久敬服無已往年與吾弟論蘇松嘉湖水利後王

補帆方伯過蘇殷殷下問曾疏大畧覆之補翁調粵遂不
得勁江浙官紳於此事非不思辦所以因循未行者一由
於經費之難籌一由於情形之未熟七八兩年湖州開濬
漕港一味敷衍草率實不成事茲友人有重濬漕港條議
其中頗有可采寄呈省營此但指三十六漕而言若欲上
從天目溯源下至海口竟委循其故道蕩滌滯淤必使血
脉貫通水無逆防此數世之利非合兩省之力不爲功昔
吳越錢氏設撩淺軍專治田事以都水使主之至爲鄭重
故享國百年水災罕見今縱不能復古而歲修之法實不
可闕我

朝各府縣設有水利同通縣丞主簿等官久已視爲具文
試詢以地方水利轉詫爲怪異積習相沿無足深責誠能
於疏濬之後嚴飭專管水利官員各就所轄境內將河道
通塞情形按月稟報再由大吏於春秋二季委員覆查示
以懲勸此水利之善後只須申明舊制實亦久遠之圖也
吾弟其留意及之茲因摺弁之便草此鳴謝藉布區區統
維心印不宣

條議已欽奉

頒發載入志乘不錄

又

久不通書正切懷想一昨接到本月十四日手翰發函申
紙如獲面談就審道履綏和鄉間小住尤多逸興二世講
天資馴謹此第一可喜之事蓋世家子弟質地稍優每每
習於奢侈流入澆薄其長厚馴謹者縱不能顯揚發達體
用兼賅亦不失爲保家之子故聞二世講質地馴良實爲
吾弟喜慶至讀書之進益自有步驟不必十分求速也吾
弟自知卞急往往有忿怒過當云云此卽吾弟學養有得
處人誰無過特患過而不自知耳兄今年六十五歲矣於
奴僕輩常因拂意甚至出口痛詈詈尙未畢心已大悔轉
欲想法敷衍他每又自怨有話何不緩言曉諭必欲如此

生氣痛自刻責終不盡改兄正苦變化氣質之難吾弟下
問及此適觸隱疾方切愧悚其何以裨吾弟耶惟有勉自
策勵各靳保此晚節而已兄自七月中旬小患感冒並不
甚重乃咳嗽多痰胃納減少精神至今尙未復元蒲柳早
凋一經風露便不能支紱翁之謂兄精力健者因鄭盦月
必有書劄往還無非爲金石攷證間亦有索及書畫者郵
筒裁報必出親書從無假手於人彼見兄字蹟澤潤終不
信病體至於此也

又

前接容冬所發台諭知紹京兩處信件均已如期送到一

昨又奉續示欣審崇勳赫績與日俱新雲素體惡寒開春
至今鍵關養拙無以遣懷竊不自揆欲以尺寸之縷妄思
汲古而心儀往哲欲從末由歲月不居忽忽已逾七十之
年矣方以老至耄及學業荒蕪未能仰副吾弟期望正滋
悚惕來諭欲將雲先後奉致之書擇其中不談時政者裝
潢成帙傳之子姓使知吾二人交誼之深聞之且幸且愧
古人於文章道義之交聲氣應求之侶或並世而未能覲
面或異代而雅有同心每每繪成圖畫以當晤言達之書
辭聊申縉纒惟雲謏陋非可比倫而吾弟深情實與古合
轍也往年伯寅尙書來書云將鄙人惡劄裝成兩巨冊使

琉璃廠多一有名遺跡語甚涉趣惜雲不稱耳愛人者及其屋上之烏兩君子之謂歟今春幸舊疾不發現將庚申至今二十年中覆瓿之作次第清理中間金石攷證書畫題跋較多尺牘有關政事文學者間亦留稿與吾弟四十年異姓兄弟之交往來簡尺奚止數百千通今檢舊篋殘稿所存不及十之一二也書中所論類多亂後政治而於農田水利似尙詳盡開濬漕港一役賴吾弟據實上陳至今歲修不廢獲益匪淺他日排比成書再寄鑒定承示俄事已經就緒此中殆有默佑之者雲謂雖由天意實關人事劫侯爲曾文正之子平日庭訓所貽立身修德不外文

學政事二端劼侯縱能仰承先志克紹箕裘亦不過與范
純仁韓忠彥後先濟美而乃於家學之外別擅專門此所
謂豪傑之士也當其身入詐虞之國奉命危難之間事已
鑄成大錯變且在於須臾而劼侯張弛從心剛柔互用徐
化杆格就我範圍惟洞明彼己之情故卒收轉圜之效錯
節盤根斯別利器恐虞升卿處此亦拜下風遑論餘子
國家深仁厚澤涵濡二百餘年當此時事艱難必有英偉
奇特之才起而爲中流砥柱黼黻

皇猷方今後起人材雲伏處山林見聞狹隘就所知者首
推劼侯而家清卿實爲一時瑜亮二君年力正壯其設施

已如此將來所造當於古人中求之並世恐少倫比也吾
第博極羣書精於衡鑒所識年少俊材或有可與二君頡
頰者幸示及之

張岷堂觀察

富年

前奉手翰具悉卽審攝衛攸宜順時諧暢承示都中巨公
書來索取梁天監并闌石刻詢弟有無重出拓本敝處藏
有兩本一許贈魏稼孫一自留今將兩本全行寄上一由
尊處寄鄭盒一乞轉寄稼孫惟令兄韻仲處無可分贈殊
爲抱歉幸并闌原石尙在句容城北城守學署後望屬容
令先爲物色再雇人備紙墨往搨倘能刷洗乾淨捶搨講
究則字文比此二本當可清楚此事甚易辦也幸卽爲之
又

伴來奉手翰並附食物多種對使全登感與抃會卽晨伏

維允升吉座榮戟增輝舊部重臨新猷式煥幸甚幸甚江南大政不外漕鹽河三端閣下敷歷三十年民之情僞與時之利病久已燭照數計洞見癥結駕輕車而就熟路此次轉運北上他人竭其才猶恐叢脞者閣下精心所運出其餘伎已恢恢乎遊刃有餘矣昔賢稱鮮于子駿爲一路福星竊願於閣下見之僕年逾七十眼前有八孫二曾孫推之人理得此已爲厚幸惟崦嵫日迫蒲柳凋零病魔纏身驅之不去自七月初二在耦園傾跌之後迄今已及半年未曾出大門一步頽唐之狀可想而知幸諸親友憐其其老病眞率屆會每每移尊敞齋賴以不廢太素公在八

月間就鑿來蘇下榻聽楓山館初到面目枯悴五日後漸能轉腴旬日後精神充溢接見屬僚應酬朋友自朝至於日昃毫無倦容太素本真率會舊侶諸老挈榼提壺絡繹來會幽賞清言評詩讀畫流連匝月備極文讌之歡瀕行執別頗依依不忍舍也開缺一摺適得其時蓴菜秋風同此先幾之見亦由宦情本淡始能安之若素也陶齋於侘際槁項之時忽遂欣欣向榮之願人生得一知己可以無憾陶齋於閣下之謂矣不得以瑣瑣姻婭論之也已促其早日啟程據云一俟腳上凍瘡稍愈得良於行即可買棹必不過遲也

一
二
三
四
五
六
七
八
九
十

十一
十二
十三
十四
十五
十六
十七
十八
十九
二十

二十一
二十二
二十三
二十四
二十五
二十六
二十七
二十八
二十九
三十

徐少青太守 震耀

別來兩月馳念實甚在滬時辱以先中丞公事蹟節畧命
撰次爲文以備史臣採擇雲學識淺劣烏足以承誦諉迺
固辭不獲時正有焦山之行謹臧行篋到山數日又爲兒
子婚娶事赴泰州逗留半月前月杪始得回山山中江風
凜冽寒沍特甚筆凍指僵非就日光不能作字爰殫數日
力成二千餘言其體例畧仿傳式不敢遽以爲傳故標題
曰傳畧伏念中丞公敷歷中外三十餘年經濟學術卓著
於時而大節昭垂尤足爭光日月震舊忝屬僚備蒙知遇
大懼於中丞公生平事蹟闡揚未盡負疚實甚至所示節

畧中如按察使任內令承審官反覆究問親提研鞫鹽運使任內清釐積引戒禁苛索糜費巡撫任內買米海運以及趕造軍械火器等類皆係分所應辦之事不必備書故從刪節長沙守城厥功最偉故篇中三見曾張二軍門有功於吾浙雖皆沒於王事將來國史未必有傳故叙其戰績稍詳仍歸功於發蹤指示之人俾後之論世者有所攷鏡焉史家每有不立專傳附見於他人傳中者詳此畧彼似於謀篇之旨尚無悖也方今老成凋謝可以文字就正者頗少其人馮林一宮允雲所兄事而與中丞公雅有交誼者也恐篇中去取或有未當執事盍持原來節畧與雲

所撰者請宮允再加釐正如何

兩 驛 車 斤 履

卷 二

三

與馮申之比部

芳緝

培之中翰

芳植

前承惠顧齋先公遺集屬爲弁言自維謏劣何敢序先公
之文顧窺足下之意以鄙人托交三十餘年於先公生平
學行經濟有比他人知之較稔者故誣諉及之此其意不
專在文字間也僕雖嘗學其何敢辭謹當撰就報命集稿
粗已緝讀曾記數年前先公與僕書云現在整理文稿約
七百篇絕少愜心之作今繹遺文所存未及其半兩鬯軒
彝器圖釋序此必存之文集中亦未見未知現在所輯是
否先公手定之本所恐刪削過多不免遺珠之憾望賢昆
玉留意爲禱中間明紀一序先公當日見示初稿與錄本

合後改易數字手書授梓今照刻本代爲改定序拙著古
官印考內有數字與錄本異亦照刻本改定古印稱紐見
漢書此刻本所未改者今並改之凡此皆與文義無甚關
系出入者也惟江蘇減賦記有出一赫蹏云云必應刪去
緣此舉先公當日早與僕言之此本題中應有之義實非
爲赫蹏所迫始議及也經世之文貴在信今傳後一言不
慎卽貽口實不可不加之意也

又

屬撰顯志堂文集序謹擬稿奉正言雖不文而於先公平
生節概有他人所不能道序中頗能達之者以共事之久

相知之獨深也抗議四十篇膾炙人口今集中刪節不全錄恐滋人議故爲叙明妙在先公將拙書留存不加拉雜當時必有深意序中語語從實無一飾詞也像贊遵卽譏就一并奉上恰補序文所未及均請釐定之後再行付梓

因暑車片

...

...

辭慰農觀察 時雨

違侍以來時殷馳仰比維勛業宏敷政通人協寒家雖隸
吳興距省垣不過百數十里兵燹之後民俱無以爲生賴
執事勞來綏恤起瘡痍而衽席之東南福星之頌洵足與
鮮于氏後先媲美雲亦部民能無額手惟聞劫後遺黎因
流亡過多荒田無人開墾嘉湖以蠶桑爲業桑樹尙存十
之三四而蠶具被賊所燬小民無資購辦欲養蠶而束手
無計此二者爲善後中至急之務倘得各邑父母官督飭
紳董各就地方情形畧用前人發本取息法勸諭殷富者
出資挹注俟絲穀出售還繳本息似亦拯濟之一策此時

十室九空所謂富者亦不過彼善於此且欲避殷富之名
措手匪易是在任事者之設法經理而已狂瞽之言恃摯
愛有素用敢附陳以備採擇杭嘉湖減賦之舉已有成議
否三屬地丁至重湖州則比蘇松爲尤甚其害在截貼一
項想已早邀擘畫矣雲日內卽擬前赴焦山茲有寄許仁
山舍親一信懇求飭送瑣事冒瀆皇恐皇恐不宣

兩巖軒尺牘卷七

歸安吳 雲愉庭著

辭覲唐中丞煥

違侍以來裘葛屢更祇以山河遙隔末由一通音敬馳慕
實深昨者許蘭伯過蘇敬詢起居伏審頤養之餘以著述
自娛足不履城市當道罕識其面而一時想望丰采者皆
視爲文富諸賢之在林下也聞之益殷嚮往雲跽伏菰廬
讀書奉母尙能自安其拙甲子乙丑之間常寓焦山僧寺
所輯焦山志一書蚤經卒業現在編輯兩巖軒吉金圖釋
已陸續付梓秋冬可以竣事惜道遠未能就正吳中兵燹

以後頻年豐稔斗米值二百錢蠶絲亦好窮黎困苦漸甦
惟貿易鮮利闐闐蕭條總緣釐捐過重元氣難期驟復至
地方雖稱安謐而遣撤各勇流落無歸散處城鄉終貽隱
患古人創行保甲實足弭禍未萌蘇省現議舉行倘能實
力興辦誠正本清源之良法也 雲 結習未忘比於商周彝
器及前賢書畫頗有新得蜀中山川文物秀甲寰區故家
所遺定多瑋寶明公文章勳德遠媲歐陽集古所錄不知
又添多少巨跡竊願一聞之也奉上近刻四冊墨拓四種
自知荒劣不足以呈宗匠之前惟明公眷愛素深見之或
許其腕力精神尙不至十分衰朽也

李雨亭制軍 宗羲

一昨辱手教浣薇莊誦伏審德位並崇身名俱泰受天降
祉羣類蒙休幸甚幸甚 雲 頻年偃蹇虛擲光陰讀書未能
專精爲學一無成就竄情自廢深懼爲大賢所棄輒增愧
悚迺明公不鄙其愚損書獎飾懃懃引古人相勗此明公
之過愛迨如韓子所云誘之使至於是耶 雲 雖駑下敢不
勉守桑榆靳副箴訓昔荀慈明得御李君誇耀於人以爲
榮幸倘明年天假之緣孱軀得稍頑健終當鼓棹白門晉
斂鈴閣一償此願也

西學事月

卷一

二

湘陰相國

辭繳委辦甘捐劄子

敬稟者竊於仲冬之望接奉宮太保爵憲鈞劄飭辦甘捐
分局卽赴江寧會同江寧梅藩司前輩秦階金道認真辦
理等因奉此伏念雲浙右物材江東舊吏以奉職無狀名
注廢籍鄉土喪亂致愆歸期幸值

天相國家篤生良弼明公秉中興節鉞雲合電掃鼓行而
東桑梓殘黎始能出水火而登衽席卽今湖山光復耕鑿
晏然兩浙旄倪孰不頂戴生成馨香膜拜矧雲耳熱名德
心儀龍門高山興仰止之思滄海切歸往之慕徒以身遭
屏黜齒偏衰頽並世大賢竟未獲一見顏色方恨緣慳福

內學車月
薄願與心違不圖明公采及虛聲肫肫延攬驟邀逾分之
知俾襄一面之任聞命驚疑惶感交集夫捐輸濟度支之
不足爲軍實所攸關況合各局以通籌尤非等夷所能任
必其人有綜覈之才具潔清之操旣深信於平日斯委任
而不疑雲自揣生平無寸長表見於左右一旦以廢棄之
材辱收哲匠此正柳子厚所云欲使膏肓沈沒復起爲人
宜如何鼓舞歡欣奮勵思報惟是雲憂患餘生夙嬰末疾
十年伏處藥不離身重以釁結災迺上天降割今歲六月
復遭先母大故痛深罔極神益瞶迷雖感激私忱實願廁
執鞭之末而支離病骨勢難任案牘之勞捧檄傍徨罔知

所厝不得已瀝披丹悵上瀆清聽伏望明公俯垂鑒督曲
予矜全另委幹員襄辦斯役倘異時得托福蔭疾或有瘳
定當勉竭駑駘躬效驅策卽或朽質難回終身槁項亦當
永矢銜結誓戴知恩方今雲龍際會景運重新明公抱牖
民覺世之才展曜日熙天之畧功無憑藉任實艱難推腹
心以待人惟堅忍而有濟一柱作砥羣帥受成指日西陲
氛清威德駕范韓而上雲臺紀績勳名邁耿鄧之先所願
明公於軍書旁午之時當發蹤指示之會爲國節宣用副
衆望臨稟曷勝惶恐瞻依之至

内學車片

二

2

錢子密吏部

應溥

六月間曾肅覆函由驛遞呈不知能否達覽比者暑退秋涼未審起居何似伏維萬福昔蘇子瞻論徐州形勢謂南北之襟要河北京東安危之所寄今揆侯駐節於此攬全局於掌握布諸軍於要害發蹤指示舉羣盜出沒之地盡入羅罩中此所謂居高屋而建瓴也所至捻逆已望風竄遁賊之伎倆已可畧見此輩初起原不過聚衆剽掠本無大志積漸而釀成巨患至於今日揆侯老成持重謀定後戰行見簡五省精銳同時並舉蕩滌兇氛廓清賊穴直如操左手券耳惟此中迫饑寒而爲盜者頗衆慈惠之師知

必有剿撫並用者未知現在逆踪竄往何處還望執事借
箸之餘示知其畧弟前月下旬到蘇鍵戶讀書頗能自安

其拙

兒子承潞

自京來稟云七月杪出都覆試朝考俱忝

列一等甲第亦尙在前乃謂長安不易居仍就原班此亦
爲境所迫未便深非之耳到後當命晉謁揆侯並領長者
訓誨蘭垞才華豐艷因張振翁相招遂赴徐州附托帶呈
紈扇一握要使良友千里外對之如見故人不以書畫工
拙論也聞從者有八九月間暫回省墓之說確否

又

前月杪奉到手書欣喜展讀敬悉道履安勝闔寓集慶樞

垣重到兩領班皆同鄉至好想見水乳交融吉無不利以
執事識學之超閱歷之久經綸所裕謀斷兼長同人安得
不奉爲師法真除指顧不久超遷均意中之事不足爲公
頌也唯望斧柯早假宏此遠謨霖雨之施草野同漑是則
林下舊雨所飲食必祝者也弟今秋舊疾發而不甚在家
尙勉可支持惟精力日衰酬應禮節概從廢棄終歲杜門
伏案之外日唯以金石書畫怡情遣興香嚴仲復月必數
見所往來者惟此真率會中數友而已來諭已與同讀一
切心印悟老閩日內可到同人預約在敝齋作真率之會
重續墜歡渠亦無多耽閣也尊函當爲面致無誤

兩車車月月

三

八

俞蔭甫太史懋

承惠大著羣經平議適小極未及卽時裁謝罪甚今日體
中小佳亟取繙讀數葉其釋夕惕若厲謂當以夕惕二字
自爲句言君子終日乾乾終夕惕惕也語有繁簡耳若厲
二字爲句猶若濡若號也此四字先儒論說頗多未有如
尊箸之簡括明暢足破千古之惑又ㄩ卽川字非古坤字
順從川聲ㄩ乃順之旣說卦傳乾健也坤順也天行健卽
天行乾也乾卦謂之健故坤卦謂之順尤爲精塙不磨雖
尙未窺全豹卽此畧見一斑已決爲不朽之盛業矣所需
志書弟處善本有宋版新定續志四冊影宋鈔臨安志不

全本數冊然止能作古法帖書畫賞鑒而已近時郡縣志
嘉湖蘇松均有成書體例亦俱完備如欲備閱可飭紀綱
來取

又

羣經平議前已讀過諸子平議尙未卒讀甫讀管子數則
已不勝傾倒此必傳之書也賤名得附卷端何幸如之執
事清曠絕俗抱負宏遠使得竟其所蘊則本經術以飾吏
治其措施必有大過人者豈僅以文章表見已哉可勝慨
喟卞中丞屬鈔補聚珍版闕葉弟處間有數種如元和郡
縣志第三十卷至十四葉便止無二十七葉帝範止四卷

此等書皆外省翻刻與聚珍京版不符因邀侯駝子來屬
其訪覓渠云有數種俟送到再呈完白山人篆書弟子職
八幀附奉清賞又另刻四幀馮林一謂筆意散漫不及弟
子職結構謹嚴而鄧守之見之則垂涕泣而求以墨本不
得收臧爲大憾法眼觀之究如何也

又

頃奉還書承示𠄎字从目从人似可合爲見字見字从目
从儿儿卽人也又作二或是𠄎字說文觀从見萑聲而萑
字从萑卽聲萑省作𠄎釋爲觀字意義甚新愚按觀國名
又縣名見地里志又楚語有觀射父今釋爲觀未義亦與

孰未邢未同惟𠄎形與觀字稍遠似亦嫌牽合然可備一說也字彙補有昷字亦作覓同喚與篆文正合惜此字說文所無又不見經傳難以援引耳○工或卽日官與鄙意合而援證更確曰字橫讀之釋爲四字妙妙中五父敦𠄎字鄙人釋爲网後見前人釋文謂豎讀卽又字此與橫讀卽四字同義執事博極羣書而又天分超卓故一搖筆卽妙緒紛來傾倒之至賤體總不舒暢昨承顧又不得迂談深以爲歉銅尉斗乃沈西離丈齋名蓋臧有魏太和銅尉斗也少渠謂霽丈所箸殊誤

又

頃奉示並近刻袖中書一冊謹悉容詳讀再報前承惠大
箸春在堂隨筆及雜文尺牘各一冊病起披讀仰見學業
益進根柢深厚油然有經術之光中間如煙雲過眼圖記
布局遣詞則又別標新穎令人愈讀之而旨趣愈永佩甚
佩甚去年蟻叟云亡今又林一繼逝此皆海內靈光先後
傾圮藝苑牛耳之盟惟君主之矣補帆中丞近體如何前
承詢程公祠舊址來歷因同人請爲撰記故欲查其緣起
云云按此園在咸豐元二年間爲桂船尙書之子號小船
者售與倪蓮舫方伯曾記韓履卿世丈卽桂船尙書之弟云此園
本名洽隱園

國初韓貞文先生隱居其中貞文詩文集所以名洽隱園也弟之所知如此惟查郡志及長洲縣志皆不載元和縣志案頭未備如鄴架有此書望再一查以告補翁是懇弟病已向瘳而精神總不復元辱承惠顧屢失倒屣罪甚罪甚數日內得稍振作當圖走晤

又

奉手書承示戴子高兄所著論語註見在醴資刊刻欲鄙人小助其力子高學問淵雅經術湛深爲吾鄉第一樸學之士弟傾心已久自應量爲攸助樂觀厥成惟當今崇尚紫陽論語一書尤爲取士之則苟於朱註稍戾卽不能入

痒登科元明以來攻者不乏其人訖屹然不爲所動今於七百餘年之後忽有人焉欲將家絃戶誦之書自天子以至庶人莫不奉爲金科玉律者一旦抹去特以一家之言大書特書曰論語戴氏註得毋動人疑駭乎弟學淺性又善忘前日子高兄出示已刊爲政一篇約畧瀏覽實未窺其妙蘊而心中竊有所未安欲面貢狂瞽又知此書子高十年心血所成不忍以直言逆其意又陰念子高下榻尊齋執事必有忠告之進故遂默而不言今奉來論謂此乃子高一家之言然筆致古茂有漢人註經光景然則執事亦止賞其筆致古茂耳而於闡發聖言之旨則未之許也

人情於專意欲爲之事旁觀者雖進規諫之詞未必遽有轉圜每每徒取其憎於事無益鄙意不如勸其緩出不必急急付梓子高天分超妙將來讀書養氣加以閱歷或當自悔其少作之非卽欲付梓亦應少變其例弟因子高力學心折其爲人爲同鄉中所僅見故不憚醜縷質之高明如以爲然還望婉言規之此書慎毋遽出示人也至於欣助之資子高箸述必多將來有另刻者弟必當竭力量助不敢食言此書旣中心不以爲然而又助其剗刷是欲息焮而添之薪也烏乎可

又

今年五月八日爲家母朱太夫人八秩生辰慈命以時事艱難戒勿受賀雲不敢違惟念雲六歲遭先妣康太夫人之變至十歲先府君棄養蒙太夫人守節撫育至于成立太夫人無所出待子女恩義周至御婢僕務從寬厚賜卹宗親始終無倦色六十歲以前紡織不離手今雖年登大耄衣服仍安布素子孫以輕暖進輒藏之篋笥曰惜物力所以養福也雲薄植竄廢無以副太夫人教養之恩每生媿懼屆期除率子弟循常例稱觴外恪遵慈命不敢受賀惟敬乞至好中有文行者序文數篇冀附箸述垂示方來伏念執事今之韓歐也畜道德而能文章且以雲之無似

又常辱摯愛引爲交契之末用敢瀝書大概九頓首門下
伏求譔賜壽序一篇藉椽筆闡揚以增光寵世世感激

又

刻奉手答謹悉承惠東郡懷古詩石刻得未曾有謝謝其
年月署太和某年與雁塔題名所署之大和四年同在一
時翁覃溪謂唐文宗年號大和乃大小之大非太字斥諸
版書籍之誤當據石刻爲斷云云今審此刻則又明明作
太和可見考古之難也蕭勝墓志載世系而不書子姓或
當日實無子姓可書志詔貴簡遂不之及況李靖段志元
諸碑亦書世系不書子姓則唐人於碑志無一定之例可

不必深論勝爲蕭巖第十三子列銜大尉東平王周柱國
按周書巖傳附於蕭督史稱其性仁厚善於撫接歷侍中
荊州刺史尙書令太尉太傅入陳授平東將軍東揚州刺
史未聞封安平王此可補史傳之闕又按唐書永徽元年
褚遂良出爲同州刺史三年召還志書於永徽二年八月
正遂良爲同州刺史之時墓在萬年縣寧安鄉攷萬年在
今陝西西安府當日或爲同州所屬以本州刺史書銜不
復繫以某州止書刺史二字亦未可定碑志中有無此例
實未詳攷亦同出臆說也仍以質之大雅是正他日當精
拓一分奉贈志石四邊尙有細刻花紋亦當並拓也

又

頃奉手簡蒙惠大箸曲園記並詩讀之神往承諭近日吳
下諸君欲踵洛陽故事大治園林皆以博大雄麗爲勝獨
吾二人分取精微二字謬謂弟得精字公得微字而已人
謂公謙詞也而弟則謂精字非鄙拙敢承至尊園止此三
四畝之地而泉石之雅潔亭榭之幽靜廻環繚曲令人玩
賞無窮苟非胸具邱壑結構經營必不能如此之位置妥
帖此後春秋佳日鳥鳴花放太夫人版輿之樂均於此園
中得之矣此微字乃精微奧妙之微非式微式微之微也
一笑

又

昨奉還答謂鄙釋市作鞞較諸家爲近而尙有未盡尊意當讀爲黻黻形作弅弅象兩弓相背古卽以爲弗字通拂亦通弼弼所以輔正弓弩者也此器云建安廿二年四月十三日所市市讀爲黻實卽拂字之段音其義爲弼弼之言弼正也凡弓弩初成必弼而正之殆當時工匠之恆言後世古語日亡故不能通曉耳具見博雅宏通辨證精確鄙說因之益有依據佩甚佩甚謹將尊劄擬屬手民摹刊於後他山攻錯永志同心亦藉光玄晏先生之意也不盡

又

不肖不幸生六歲先妣康太夫人見背先府君榮祿公保
抱提攜以嚴父而兼慈母者四年至十歲府君又棄養不
肖懵無知識稍長補弟子員又困於場屋時家業中落不
得已援例入官雖疊膺煩劇屢典名郡而行能無表見不
克有所樹立以遂顯揚之願今歲庚辰距府君棄養之年
已甲子一周馬齒亦政七十矣默念生平交游尙不爲當
世仁人君子所擯棄而中心膺服師友兼資者子貞林一
而外惟執事鼎峙而三耳今子貞林一已歸道山獨執事
靈光巋然世之推爲蓄道德而能文章者亦惟執事是歸
不肖譎劣無狀辱執事納諸交契之末雅有昆弟之誼若

不及今九頓於大賢之門哀籲於左右使府君之厚德林
行得藉椽筆以信今而傳後則不肖之罪益無可追謹呈
先府君事迹一篇泣求俯賜省覽或傳或詔俾得挂名大
集附垂不朽不肖世子孫銜恩佩德豈有涯涘事迹不
足言文若以爲可施繩墨并乞直筆郢削尤爲感幸

又

多日不晤伏想動定納福箸述如意西湖之遊行期已諏
定否聞杭州書局刻

皇朝三通今年可蕺工此說果確奉求代購一部以先得
爲快此去俞樓小住蒞宜放開懷抱尋山水之樂沈香親

刻管夫人樓中或有此位亦宜勘破四相存沒齊觀碧海
黃塵少解鬱結因讀近箸哀思幽咽無非變徵之聲中年
以後憂樂易傷用特不憚煩言一再奉勸弟兩年以來家
庭亦多怫逆初甚煩惱回頭作退一步想便覺凝滯胥融
觸處皆清涼世界近於兩囂軒後落建一小亭題適然二
字後系小跋云清河張夢得謫居齊安築一亭蘇子瞻名
曰快哉頴濱爲之記曰士生於世使其中不自得將何往
而非病使其中坦然不以物傷性將何適而非快然則人
欲求快當先觀所適如何耳此亭適成兒輩請名爰題適
然二字昔李愿居於盤谷惟適之安此高隱之適也司馬

公讀書勤禮自以爲適此名賢之適也吾皆慕之而未敢
援以自況也今之以適名吾亭亦以適吾性而已必執古
人以求之則所謂適人之適不自求其適者膠柱未融方
爲漆叟齒冷安在其能無適非快哉錄呈以博一笑亦見
鄙人七十之年病不離體而勉能支持或於潁濱所云不
以物傷性者畧有所得也伏願留意採納爲道葆躬幸甚
禱甚附上聯紙二小葉望攜置行篋遇湖上風日晴明山
水清麗心手雙暢之時乘興一揮爲適然亭增色跋中贖
義乞推勘足之當日快哉亭得二蘇詩文至今勿替弟之
奉求猶是此意也兄得母哂其名心至老未已乎一笑

又

一昨接奉手諭並賜聯句語妙天下固不待言而分書之
適健古懿亦足凌跨一時當世無兩因欵跋尙有餘紙復
繫短章尤爲楹帖中創格同鄉姻家沈仲復方伯以重值
購得覃溪閣學摘書張瘦同詩句楹對一聯下有餘紙瘦
同先錄自作又邀覃老及蔣心餘程魚門吳穀人諸公同
作均書於聯紙下方覃老摘瘦同句云有情今古殘書在
無事乾坤小屋寬仲復愛護此對等於頭目與夫人少藍
君同成和作至四疊其韻又屬真率會中諸老同和鄙人
寬字韻云舟雖欲退流偏急人到無名境始寬仲復頗擊

節蓋正觸其意也吾兄此對寫作均突過前人韻語尤超
 妙紙雖無餘而四邊界絲之外尙堪容墨擬邀同會諸老
 如瘦同例各成和章如式書之弟當先貢其醜以爲隍引
 覃老一聯仲復爲親串某因貧求售特豐其值以八十番
 銀得之此對更勝於彼傳之後世豈止一字一絹哉武林
 之行幸望早旋湖上風景雖佳而時近初冬寒氣日厲諸
 望加意自愛至祝至祝吾兄謂望弟如神仙中人大約因
 弟前書有現已一切放下仍向翰墨中尋樂故自歎爲不
 如遠甚耶不知弟之作此語者所謂強顏耳豈一時驟臻
 此境哉然雖不能驟臻此境亦不欲爲愛根所縛鬱結不

神醫車尸片
解自促其命甚願吾兄以弟自解之意引以自喻此卽前
論所謂一老一耆互相勸勉各保餘齡之義書不盡言諸
希心印

又

昨奉手翰並宮牋十番得未曾有欣謝欣謝此牋古雅可
愛擬俟新春和暖雜臨古帖數種或錄大作數篇稍成冊
子留爲敝帚之珍兼志良朋雅惠孫世兄嘉禮早成此老
翁向平之願也宜其有詩志喜承示長律兩首第一首嘉
期好在嘉平月十六良辰月正圓久不見兄有此與會之
句讀之大慰神爲之旺惟第二首又微有徵音何也言爲

心聲尙望將愁城力破尋取自在之境如何拙聯方抱珠
玉在前之愧乃兄賞其寫作俱有仙骨此夫子自道也或
亦愛忘其醜耶聯中徐胡二老雖年高學邃然視兄之宏
通博雅恐二老並世亦當遜席乃謂不敢擬其學此謙詞
也不必論至謂不欲得其壽此吉語也敢爲兄賀從來富
貴窮通科名得失每每欲之而不得不欲而轉得之不必
遠論往古卽觀今之世如此者指不勝數然則兄之所謂
不欲得其壽者正必得其壽之徵也謂余不信請將此書
交存孫世兄俟兄七十八九十以至百歲每遇酌兕開
筵出此書張之座右謂爲嘏詞可謂爲左券亦可抑更有

進者兄不欲聞壽字而弟偏刺刺不休此又不欲而必得之又一徵也兄聞之或當開顏大笑

附錄太史聯句詩跋

合千古之壽壽公永保用永保高左鼎右彝坐兩壘軒居然三代上

以十年之長長我六十耆七十老望衡對宇隔一條巷有此二閒人

愉庭老人篤好金石所著有兩壘軒彝器圖識余曾爲序之今年爲其七生日而余亦行年六十矣同寓吳中其所居曰金太史場余所居馬醫科巷前後相望蘇

人所謂隔一條巷者也。因書此聯壽之。書此未竟。適承寄惠百合一筐。因作小詩。卽寫於後。其詩云：一紙書來自七鴉。嚶城風景最清嘉。遙知畏壘亭邊路。百歲人看百合花。詩雖不工。亦微寓壽意。時老人就養于郎君廣菴。觀警署中。故在嚶城。觀者勿疑。詩意與聯意不符也。光緒六年歲在庚辰秋九月。又錄壽太史聯句並跋。

俞樓風月曲園圖書蕭灑似魏晉間人往來越水吳山願春常在

方虎高文朏明碩學淵源溯順康之際陶養羣經諸子

以壽其身

蔭甫太史抱曠代清才撰著逾二百卷平議羣經諸子
二書尤爲學者所宗我鄉先哲文鉅學邃而又年享大
耄名炳史乘在順康朝當推徐胡兩家君與同邑足以
後先濟美照耀藝林今歲庚辰嘉平吉日爲君六旬攬
揆之辰謹援以爲壽春在堂俞樓曲園皆君居行著書
之所故並及之

呵手晴牕學畫鴉寒香詩味劇清嘉閒人也有閒中樂
萬卷圖書四季花 今歲小春月余七十生辰辱君贈
聯有望衡對字隔一條巷有此二閒人之句末系短跋

跋後有餘紙又附七絕一首名聯隽什一時傳誦余此
聯既慚形穢後亦適有餘紙復不自揆謹用原均口占
二十八字書以補空實做效顰二字君能畧其詞而取
其意蹶然爲我晉一卮乎嘉平朔大寒抱罍閒人呵凍
又識

又

時已小暑涼若深秋不審道履如何眠食能否增勝賤體
每交夏令轉得稍健今屆濕熱薰蒸頗以爲苦種種老態
有日增無日減也比有姻家朱稼甫培仁以明經就職州
判來蘇需次其人沈靜寡交遊辛酉壬戌間曾在寒家教

讀今處以賓榻將庚申後二十餘年未梓拙稿代爲清理
兩月以來頗費周章緣賤性鈍滯每有所作輒塗抹竄改
幾於模糊不能句讀幸稼甫學優心細又能耐勞始得排
比整輯漸有眉目昨有查校數字向鄴架借取大刻袖中
書一冊此書舊有臧本爲潞兒攜去今於稼甫案頭見之
因取繙讀見曾文正書中有一鐙深坐孤秀自誓八字愛
其雋峭欲於時賢簡尺中尋取八字作耦集成楹帖將袖
中書二卷讀徧未得卻爲挾出譌字數處一卷第九頁劉
笏堂書前由郭中丞由字誤田第十九葉馮聽濤書旗幟
幟字誤識二卷第八葉曾文正書避暑暑字誤著第十八

葉宗湘文文字誤又望改正尚有雪琴宮保書中天來飛
校書例有傭值弟不敢望但望爲我撰八字爲文正公二
語作耦卽書一楹帖見貽以當國門之賞如何一笑

顧子山觀察 文彬

兩奉手書並蒙惠賜大箸橫幅謹已領悉伏讀尊作風格
蒼老嗣響唐音而一種清雋之氣求之古人惟高青邱可
與抗席餘子不足數也佩服佩服 弟 頻年以來專事金石
攷訂之學此調不彈久矣卽或見獵心喜偶一爲之亦無
愜心可以存者自揣必不能與時賢爭勝遑論古人故決
意輟筆不復作也承示學書進功之難謬以 弟 爲識途之
馬詢商筆法此所謂以能問於不能也雖然愚者干慮或
有一得竊意晉唐以來各書家凡得盛名者未有不精熟
行草書蓋篆分真楷皆有間架依傍在中人之資力學有

年便可得其髣髴獨行草書寓規矩於變化之中運神明於章法之內分行布白意在筆先然後一氣呵成心手斯暢此古人所以有匆匆不及作草書之說也尊書於楷則專精久矣愚意請將案頭歐褚諸楷帖暫束高閣公餘另取魯公論坐帖林藻深慰帖每日各臨一通與到雜取二王草書永師千文等帖隨意瀏覽再取兩京碑碣隨大小日臨數十字擷其古趣助我腕力尊書學力本深再加博取之功只須一二年豈但凌跨儕輩定可獨步江東矣倘執唐賢諸楷帖株守不變即使積久功深詣臻極至亦不過在院體中高膺冠軍之號而已非書臺之能事也猥辱

垂問謹獻芻蕘蹄涔之見不知有裨萬一否皇恐皇恐不
宣

又

客歲底奉到手翰備悉種切比日履茲新春伏維台候與
時增福餘事及於翰墨所得愈多古歡益懋欣慰無量巨
師萬壑圖卷昔年在許信臣姻丈舟次匆匆一見未及細
審至今嚮往此李寄雲故物後爲信丈所得實一瑋寶庚
申兵亂失去信丈常常念之且亦知在某大令處去年樂
泉說起弟曾屬其於家書中詳述今爲老親家所得聞之
快極他日有妥便望寄來重讀弟當作一長跋以定米書

之聚訟弟年來鍵關伏案讀書頗有所得攷據鑒賞之學似亦與年俱進昨於元巨試筆題秦長生無極全瓦拓本又題宋拓張猛龍碑唐人書律藏經冊頁各數百言中間駁正江鄭堂所釋囟字王惕甫謂唐人未有以干字文記數二條頗非逞凡妄發他日當錄以就正兵燹以後東南巨跡我二人所得不少尊處愈多惟中間尙有致疑可商之件將來似必歸弟審確而後入錄務使此書一出有識者擊節稱賞歎爲一代必傳之書駕消夏錄書畫舫而上之方爲墨林快事抑鄙人更有進於左右者前人金石書畫之書每多記其所見未必盡出家藏今我二人專記篋

衍中珍弄之品他家之物概不孱入故選擇尤不可不精
且慎也永師于字文李竹朋著書畫鑑影已經載錄弟將
尊處新刻拓本寄去竹朋與陳壽卿爲兒女親家亦好古
博聞之士也弟自交春後身體稍健自十月初至十一月
杪五十餘日足不越戶外一步酬應久廢幸親舊亦不以
禮節相繩故得自安其拙家屬俱各平安曾孫松寶漸解
語笑此則晚年樂境我二人皆有此歡不可謂非蒼蒼者
之福佑至深也

又

屬題褚臨蘭亭卷謹已加墨推重米老一題謂裝於真本

兩學車戶月
名一
三
之後則贊美在於言外此兵家避實擊虛之法緣此卷刻於三希堂帖筆畫小有未合著筆頗不易易米老題句與三希堂同而宋人箚錄亦有異不必深論後此三跋其鄧襄所題亦從宋人箚錄中鈔出尚有九十餘字未錄此必後人刪節仍署鄧襄款實非原蹟也書畫彙考大觀錄所載同是後人鈔本後有兩印一堯封一自得今卷中止有自得一印想又是一本耳餘二跋亦係後人重錄惟郭雍一題字法劇佳老親家擬將三跋另裝足徵真鑒樂泉屬題洛神十三行亦題就乞爲轉交此有目共賞之品令人愛玩不能釋手

又

昨奉示並仇實甫二卷一仿貫休羅漢一洛神皆係的真
之迹而洛神尤爲書畫雙絕可寶可寶瑤臺清舞在過雲
樓中亞於蓬萊仙奕而居於諸仇迹之上特爲加跋題字
用已退羊穎書尙有六朝人遺意法眼許之否卷中先後
題詠盡是勝國名流推雅宜山人書爲第一王弇州論有
明書家首推祝允明次則謂文衡山與雅宜山人可以並
駕齊驅則當日山人之聲價品次亦可知矣此觀舞賦尤
爲清逸古秀令人拜倒三卷均繳上洛神一卷明春尙欲
借摹也

岡鼻車片

卷一

三

潘紱庭京卿

曾綬

月朔從西圃處交到手誨讀之如挹言笑承以養生妙論見勗可謂對症發藥正中弟病欣感欣感弟交冬後身子尙無甚病惟精力日衰稍稍勞動便覺夜寐不甯畏風如虎此其故由於素性好動雖鍵戶家居除耳目玩好外終日伏案手揮心運勞精疲神坐是大耗心血季玉常規勸謂人生於此等事過於粘滯則成魔障其言實有至理自今以後擬痛戒之否則一字未安魂夢俱爲之不適眞是何苦乃爾壽卿精力奇健每一信來動至數百千言無一字譌脫憶乙巳年弟下榻沈文忠公寓齋壽卿與老親

家同日過訪是爲三人訂交之始今皆白髮飄蕭六十以外老翁矣博身後之虛名不如尋眼前之樂境爲實惠也星兄親家近體亮必增勝畫興如何弟則交冬便輟筆不畫也所需信封書牋茲託柳門帶上南中親友近狀均由柳門詳述星兄處不另專函卽以此書奉覽凡此省筆卽善體來書所云大笑亦要傷氣之意也不宣

又

四月初十日手諭因柳門託便人帶來故甫經收到所需籐杖弟因此物老年人藉以扶持爲必不可少之品自杖鄉之年留心訪覓所得不少往年爲同譜縵雲侍御索去

二枝現在尙有餘存大抵此物以天台山中產者爲最良俗稱高過於頂者爲杖齊於胸者爲拐拐亦訓老人杖也二者不可偏廢迴憶我二人訂交之始流光如駛忽忽四十載矣老親家今年政七十大慶弟亦六十有九惜不得萬回師縮地之術親詣華堂晉爵稱觴藉作平原十日之敘北望燕雲惟有祝老親家益譽增榮多福多壽看膝前調和鼎鼐整頓乾坤偉業豐功焜耀典策他日宰相世系表中推爲古今第一福人是則一瓣心香竊自謂善頌善禱者也茲因兒子承潞入都引見賚呈拙作書畫等件謹以將意伏乞哂納

許星叔少宗伯 庚身

前由家清卿處遞到手書猥荷親家關愛逾恆銘感無既
雲不肖不能從俗浮沈與時俯仰卽應挂冠匿影跼伏蓬
茅乃見不出此躊躇躑躅於嶮巖之場妄欲以寸莛之力
冀補時局竊自笑同河濱之民捧土以塞孟津多見其不
知量也猶幸防患未萌每年擴充軍餉數至百萬身雖近
膩却早避之若燎概不絲毫涉手卷案確憑得免後累否
則身無完膚矣比來杜門謝客日惟與圖書金石相爲周
旋日用所需半仰給於親友此外傭書得值聊爲琴酒之
娛淮南子曰毀譽於己猶蚊蚋之一過何足抑抑乎所望

天心悔禍妖氛速靖俾得歌詠昇平盡此餘年此飲食禱
祝者也

又

比日常與叔清親家夜談每念輶車未得安報輒深馳想
一昨紀綱到蘇備述使節已抵江西省垣長途安順欣慰
無量黔省闡墨粗讀一過具見鑒衡精審轉眴春榜聯登
有桃李盈門之樂尤爲艷羨兄衰邁愈甚藥鑪茶竈常與
金石圖書雜陳左右人事放廢終月不一出門親友憐其
老病雖屢來不往亦不以禮節相繩尙得自安其拙今夏
得一曾孫取名松寶卽子山之外曾孫也頗長成可喜冀

署公事亦尙平順今夏南中亢旱幸頻年興修水利車戽有資尙可補救婁東於前兩年開濬屬境七浦楊林兩河皆賴應敏齋主持於上始能獲此利濟鄙人於江浙水利呼籲多年無人能應後經六英學士據以上聞張子青制軍奏發巨款敏齋力任其事遂得次第舉行至今尙未竣事實爲百年來水利興廢一大關鍵也南中近事以及親友情形叔清有家報詳達不復重贅

又

昨由相室處交到前月中旬手書展誦之餘恍同晤對欣審道履綏和動與吉會江西爲人文薈萃之邦自汪文端

督學之後中更兵燹未免風流歇絕今得老親家振拔而教育之士習文風可期蒸蒸日上不特爲文端嗣響已也

雲

偃息菰廬日益衰邁齒牙脫落鬚髮盡白鍵戶養疴二

三月難得出門一次在家不過東塗西抹終日摩挲書案而已焦山志早經脫稿近承仲復筱舫敏齋助以刻資始付手民期於明年五月間歲事比來手自讐校又補撰周鼎釋文一篇此鼎爲鎮山重器烜赫照世前賢釋文甚多而於受冊鑄鼎之人訖無定論鄙人所釋恐尙不免穿鑿強合特錄呈直筆削正去冬有拙著彝器圖釋一套計四本由信局寄呈不知曾否達到念念叔清親家之變聞之

泣然者累日今春金石居握別切訂秋間南旋仍來下榻
並將臥室鐫閉有無寓人於室之意雲亦日盼早來可以
樂數晨夕不意一別之後竟成永訣親友之誼悲感尙一
時難釋吾弟手足摧傷鴿原抱痛其悲感更可知已然逝
者已矣悲亦徒然尙望格外達觀爲

國自愛是所至祝承諭歸田之思怛怛於中詢商進止屬

爲一決雲意老弟正在服官政之年歸計似嫌稍驟且俟

學差任滿入都再作計較此時應從緩議陶齋署丹徒差
強人意臨行授以一字訣曰勤聞其到任後頗能持此以
行爲官果能勤則叢脞廢弛皆免矣然亦要始終不惑爲

佳完白山人弟子職現無搨存者有嚴鐵橋補書瑯邪臺
刻石其篆體結構謹嚴可與石如並駕特奉去全分又桂
來谷隸書對黃石齋對係仲復借刻並奉清賞褚書蕭公
墓志乃德清徐誠庵祕藏今由蔭甫和會歸於金石居並
寄一紙統希鑒納

又

月初交偉人姻兄帶呈一函附有拙著焦山志一部未知
何日塵覽一昨奉到本月初四日手翰欣喜展讀恍同晤
對去秋尊體違和初甚系念嗣晤令姪輩知己霍然稍釋
懷思茲聞按試各郡精神目力均勝於未病之前從此葆

嗇得宜定必日增強固雲交春以後孱軀尙無不適至精力之不振已成習慣杜門守拙固已安之有素矣采香朝夕敘晤子山大治園亭眉生已購定網師園大加修築四月內遷居仲復亦買宅蘇州疏池疊石廣栽花木蔭甫亦有曲園著有曲園記一篇附寄省覽蔭甫之言曰吳中林下諸公仿洛陽故事大治園林均以雄麗爲勝賅之以四字曰博大精微我二人止分取精微二字謬以精字屬敝居聽楓山館而以微字歸諸曲園合二字而言之亦止形其小耳執事秋間假旋還蘇當約諸老作平原十日之飲特以此書先爲墮引季玉住居限於地少園林之勝而膝

下有十六孫此非衆人所能及也陶齋非得缺不能補揀丹徒之累渠切望老親家提挈之也

又

月前奉到手翰讀悉種切敬審道履清勝並知容臺政務尙不甚煩惟兼綜度支不免稍費擘畫然較之樞垣籌筆不遑昕夕其勞逸固有霄淵之分矣承賜潞兒書已轉付

婁東任事十有二年此次卸肩託長者蔭庇得免隕越旁觀頗以事育無資宦囊羞澁爲慮鄙意若使充足不特明無以對百姓亦幽無以質鬼神與其豐而多疚莫如嗇而安心天下事固有在彼不在此者吾弟識窮今古更事又

多知必有韙斯言也端木氏一役譬諸九轉將成必有魔
擾風波平後相室書來齒及所事兄復書謂昔伊川先生
講學山中從遊者衆後嬰黨禍徧告門弟子曰諸君尊爾
所聞行爾所知不必及吾門也三教本來會通學業初無
異致以伊川先生之賢當日若無黨議未必遽能輟講可
知先幾之見原難概責諸人也繼自今隨居自樂閉戶專
精嶺上白雲足供怡悅何必持贈與人哉相室天分本高
頗不以鄙言爲謬也蓉舫有此波折作何進止中世士大
夫以官爲家罷則無所以歸論蓉舫景況正恐欲罷不能
未知吾弟得其近信否便中乞示一二以紓懸系

彭訥生觀察 慰高

前蒙示讀先尙書芝庭公入學試卷真同景星慶雲攜歸
敬誦數過益歎

國家當全盛之時無一不有與王氣象卽如此卷題旣冠
冕堂皇文亦宏深肅括持此以擷芹藻自然秀出班行聲
斐庠序他日文章勲業彪炳史策美哉始基之矣顧自二
百年來

朝廷設科取士專憑制藝士生於世舍此別無登進之階
遂令學生精力盡爲帖括銷磨竊數厯科鄉會歲試墨裁
考卷中的入彀者奚止累萬而場題舉不出學庸論孟之

中於是勦說雷同競相剽竊以獵取科名而文風遂因之
日下主試者欲矯其弊於是有虛縮搭截諸題割裂經文
詞尙纖巧雖鈔襲之風少戢而根本未植體要不明古法
蕩然文風遂因之愈下試舉卷中次題樂正子從於子敖
全章授諸今日應試童生扃門之後恐捏沙不能成團半
欲曳白可出文運凌夷至於今日非一朝一夕之故矣古
者教胄入學掄秀書升取士之典豈專在文藝哉觀世變
者能無深長思乎茲因載讀前文旣已書後志慕復畧陳
狂瞽以申跋中所未及而今昔盛衰之感吾親家必亦同
此情也謹先將試卷附便寄還統俟月初旋蘇再容詣叩

並鳴謝忱

1 264

1955年11月

1955年11月

1955

潘順之侍讀 遵祔

啟者自十年分以來三首縣粥廠停止程藻安兄力任此事每至寒冬施粥經費總形竭蹶前年由雲幫同募化得七百千去年得六百千前年之七百千除與駿叔各助一百五十千外盡是當道所出去年當道中不便與言所募之六百千頗費匠心此諸公所悉知者滿望得一好善之人慨捐五千金發典生息爲一勞永逸計以了此心願否則年年自己解囊事尙小而向人募化終覺取厭適有金香圃之二夫人徐氏來商議家事因力勸其行善旣可爲死者懺悔又可爲生者積德並許以捐款至萬金以上可

以專奏又屬愷堂友琴葦塘輩與左泉養齋從旁懇懇言
定捐足錢二萬串繳呈藩庫發典生息具呈請奏並不邀
敘嗣嘉興人聞之謂捐蘇州 及本籍鄉黨不平因與
筱舫斟酌以一萬兩捐蘇另備二三千串捐本籍由舫老
轉達倪載軒諸君已各允協有此波折金宅之捐欲由紳
士具呈已與商定茲得覆書並有奉致一函連同奉覽教
閒處業已面商定議如尊意以爲然其牒稿由 雲 請舫老
代擬再送改定至此中如何濟用之處悉候諸公裁定可
也

又

奉手書謹悉承惠大作佳筴畫仿衡山所謂入其室而躋其蔽者詩有奇趣必如此始與題稱三絕之譽斷推髯公歡喜祇領感與忭會做臧有高鍊嶺指畫鍾馗冊十二葉中有脫帽露頂不擺進士架子者亦有易紗帽而戴笠者特送法鑒請題數行將大作錄後並乞選定一幅當仿其大意作小幀奉報藉博掀髯一笑也

又

前假娑羅花冊子中間佳句不勝搜采謹已全行鈔出擬替花寫照另製一冊圖列於前詩錄於後每至花時輒對花高吟一過以自怡悅此山居之雅韻亦暮年之樂事也

內 卷 八 月 一
鷗閣城中唯我二人共之而良老諸君都無此花此樂不
與焉常熟女史歸懋儀和章最多警句亦不少中有塵世
得來原覺少靈山雖種亦無多二語與吾兩家所有恰合
奉去素紙請兄書成楹帖如需拙書亦望摘取一聯見示
卽當書以爲報各加跋語互爲標榜以傲良庵香巖諸老
不亦趣乎又冊中題句之吳某與冊面書簽之吳某是一
是二留此糴團以俟五百年後攷訂家聚訟如何一笑冊
子繳上不宣

徐頌閣少司馬郝

聞江西風俗民間好食牛犬而食犬者尤衆犬不易制制必狂噬制犬之法以粗竹筒約長丈許通其中貫以長縋縋之末手持之縋之端繫小鐵鉤蒙以猪肉等類以爲餌如釣魚然伺犬食餌卽將長縋從竹筒中儘力一抽筒抵犬口鈎不能脫雖欲狂噬不能近身任其牽之而走付屠宰割慘酷之狀有目不忍睹者聞之極爲惻然夫犬能守戶牛能耕田有功於人與猪羊不同諺云牢字从牛獄字从犬不食牛犬牢獄必免此亦喚醒愚人之說也執事持節江省按臨各屬與大吏及府縣必時相接晤凡地方利

害皆所宜言此雖細事亦關陰德務祈會商大吏剴諭郡縣一律禁革福德無量便中乞惠復不宣

又

音問久疎懷想殊切比者春融景淑遙維勛位兼隆聲聞並懋弟守拙養疴馴成老廢終年跼伏無非在故紙堆中消磨歲月崦嵫已迫學業全蕪老大自傷無足爲至愛述者近刻漢建安弩機考一冊不足成書因有先輩手蹟且欲執事知鄙人七十之年未忘結習或可一笑存之茲有江蘇候補微員裕森號書樵年甫及冠人旣溫文畫尤工妙曾得子青先生指授今隨其尊人常月川都督入都驗

看持其畫冊欲就正於當代鉅公效蘇頲濱未冠之年願見韓魏公故事渠非頲濱比而執事今之魏公也因給寸牋爲介並無干求之事幸賜一見剴教之月川曾與共事交契多年素性耿介書樵官雖微末亦是可造之材畫冊如謂可教儘請存留不盡

又

裕書巢回南奉到手書深荷存注書巢述在都猥承推愛曲賜甄陶俾微員末藝得見賞於諸巨公歡欣鼓舞之情若有不勝其榮幸者亦足徵大君子愛才若渴之盛意卽日身秉

國鈞進退人材已於此畧見一斑矣此君年纔及冠將來多讀詩書飽觀名迹積久功深其所造正未可量也所需羊穎丁友梅自開修梅閣之後景況艱難生意枯寂因之藝亦日退蘇城著名者向推楊春華勒少仲中丞最爲心賞幾等諸程奕徐偃之列其人已故春華之子繼其父業雖不能如吳說克紹家法而在闔閭城中總算庸中佼佼矣特檢自用羊毫大小二十枝屬路兒先行寄上中間絕細者與筆頭較長者乃潞兒之物鄙人不用此一種也如能應手請隨時示知當爲續寄甚便也近日有無新得佳跡極願聞之吳中時有所見價極昂貴大抵香嚴仲復所

得爲多王黃鶴號叔明乃所見有寫叔銘者倪雲林號幻
霞乃所見有寫幼霞者無從深攷孰是孰非不識方家有
所取徵否風便示我數行以當晤對

内學車ノ月

三

三

張子青大司馬之萬

自違尊範依戀之忱無時或釋雲客秋抱病纏綿兩月有

餘頗形沈重後託福庇至冬月中始得轉危爲安辱蒙愛

注勲拳損書垂問至再至三私衷感激匪言可盡曾命兒

子承潞

肅具稟函代躬申謝計邀鑒察雲體氣本弱刻下

眠食雖已照常而精神終未復舊又值去冬奇冷正如右

軍帖中所云積雪凝寒爲五十年中所無蓋南方雪深至

二尺有餘冰凍歷兩旬之久實所僅見也病後遇此益形

瑟縮所幸胃納頗健往後春暖或可比舊稍振知荷存注

謹手肅布慰筱舫回禾頻有信來鄉居尙爲安適去冬亦

嬰重症當病勢甚劇之日正彈章北發之時人皆謂有此
蹉跌病遂轉機此簡當作延壽符視之人生窮通得失早
有定數亦惟自安義命而已明公關愛筱舫故附陳其概
此間諸親友中惟子山旭人最爲老健季玉眉生亦均安
好獨仲復抱鵠原之痛意興較減雲因醫生至切叮噓謂
筆墨最耗心血必得整輟庶精力可望康復比於研削頗
疎卽往來書問亦常倩人捉刀或遲不作答茲之瑣瑣瀆
陳墨凍指僵劣不成字惟恃明公摯誼見此惡劄或轉喜
其大病之後尙能搦管作書愛忘其醜不以草率見責也
皇恐皇恐春寒伏惟起居珍重不盡馳切

又

前月杪奉到鈞函仰蒙垂注勤拳愛勗交至臨風三復感
與抃俱客冬積雪既深本年春水又足運河必可通暢舟
行定無濡滯唯此後卿雲愈遠侍教未期倍增惘惘耳雲
新正以來出門僅止三次朋儕招邀間或踐約魏三野服
隨意讌談無形迹之拘故病軀勉可支撐惟每遇聚會輒
以清暉睽隔合席寡歡范忠宣詩座上多佳客無公衆不
怡偶一諷誦未嘗不倦懷道範意往神馳伏承來諭教以
少輟筆墨護養心神此真摯愛骨肉之言謹當永書諸紳
斲副箴誨潘季玉親家有奉懇一事詳於另牋諸惟鑒察

又

月之十六日曾具寸牋附有書籍等件交常月川帶呈甫發接奉孟二兄攜到鈞諭並畫兩軸莊誦之餘莫名感幸敬審福躬安泰眠食攸宜謝太傅爲蒼生而起從此卿雲在霄爲霖爲雨薄海咸霑正不獨林下部民以手加額已也平山畫名本重與小仙三松同派南方專尙惲王遂視北宗爲異境幾不復寓自古來儒釋兩途俱有門戶今之論書畫者亦存此見大約風會所趨雖有一二領袖壇坫者欲起爲砥柱亦難挽旣倒之狂瀾然風氣俗尙會有轉移如今人作書喜學北碑亦莫之爲而爲也偶發狂瞽藉

博一笑方邴鶴畫全學麓臺其人出處容查明奉報刻間
孟兄專人來言明晨卽欲歸去怱怱無以將意案頭有甫
倩吳香圃所刻圖章筆力頗爲健勁內思言敬事四字係
仿敝臧漢銅印印石雞血昌化尙是舊坑又千石公侯壽
貴一方當年阮文達公八十生辰門下士張叔未解元年
亦七十四歲特攜此甄渡江祝嘏文達大喜屬邗上精於
篆刻者鐫眉壽圖圖中設有長案案上置齊侯罍與此公
侯壽貴甄師弟相對白髮飄蕭詩文詠歌連篇累牘至今
觀其墨本猶想見高年豪興令人豔羨雲倩香圃依甄文
篆法仿刻二印並以一方奉鑒雲忝附同庚雖蒲柳之資

未敢與松柏並論然七十稱爲古稀私心自喜故今年刻
印頗多此三印甫經刻就適在案頭乘孟二兄之便託爲
攜呈統希哂納

又

前得陳季平書云同蘇世嫂有夢蘭之徵分媿約在三月
底邊明公俟抱孫之後始行入都汔逾兩月而中外望東
山之起不知因何致遲實深系念雲今夏已來孱體勉可
支持所藉以消遣者禽魚花木之外間與諸老作真率會
平賞書畫此外訓應概不預也所望節麾重莅雲雖老廢
亦當鼓舞奮興作前驅負弩以償積愆明公或亦欣然許

之也茲者晚荷未褪蚤桂將芬恭值明公七十攬揆之辰
南北睽違未獲登堂晉祝奉觴稱壽遙跂德門彌殷神往
謹率 兒子承路 檢呈卷冊數種敬代祝嘏中間石溪西堂

畫跡明公會云少觀故特寄呈又世好張薦甫大令爲戴
文節得意門生需次江蘇不善迎合年未中壽賁志而沒
清秘閣中凡南中畫家蒐羅無遺薦甫畫留存絕少親友
中亦無收藏謹以爲獻明公觀其筆意如何使天假之年
卓然可以成家尤難得書法亦佳且有學問

又

客臘從婁東旋蘇奉到手諭浣薇雜誦猥以馬齒賤辰隆

儀寵錫當筵羅列滿室輝煌玉質金章盡是珍奇瑰麗名
聯雋句無非文字吉羊九頓虔登百朋志感流光如駛比
已歲律更新遙維福躬康泰潭祉蕃膺道德文章與時並
懋指日東山復起零雨蒼生凡託帡幪同深頌祝雲跼伏
菰廬尙能自安其拙惟素體孱弱每至冬令惡冷畏風益
形瑟縮去冬到家以後僅於嘉平十九日爲慶東坡生日
應星臺廉訪招出門一次星翁因雲不赴公庭宴會移尊
耦園是日主賓十人可謂極一時之盛仲復夫人傳示長
律一篇同人各有和章屬雲繪坡公小象錄和詩於空方
一贈星臺一留耦園以後遇公生日取以懸挂雲另繪一

幅擬邀同人各書和作寄呈鑒賞知明公眷念舊雨覽之
亦可藉得各人近狀也茲先將仲復伉儷原唱並拙作呈
閱聊以博笑一俟輪局開行再將畫象續寄雲辱明公過
愛畧去雲泥蘿袞之分引爲文藝交契之末誼託忘形不
敢自外凡修牋牘必出親裁音敬稍疏實由於此計明公
亦必曲爲原恕也菊兄舊恙聞可漸瘳同蘇世兄金石書
畫定益精進南中諸老意興均尙如昔三兒於立春後二
日到家開篆在卽日內卽欲回署去冬曾有稟函未知遞
達否寒家眷屬均託庇物順知荷垂厯用特瑣瑣布陳

又

敬肅者去年春間專肅謝牋託季平觀察轉寄稔知明公
愛注殷拳用將近狀縷述約六百餘言未識何日得塵鈞
覽流光如駛不覺又屆一年矣遙維福德兼崇身名俱泰
怡情翰墨樂志林泉處則爲鄉黨儀型出則爲蒼生霖雨
古大臣一身進退實關世運翹跋東山仰頌者固不第雲
一人已也雲自去夏七月初在耦園作消暑之會下階傾
跌雖無內傷而精神終不振作半載有餘未出大門一步
頽唐之狀可想而知聞明公居家遇鄉社戲會尙能挈小
世兄輩曳履往觀不獨見精力之勝亦徵腰腳之健艷羨
之餘慰與抃會此間同社諸老念雲病體每遇眞率燕會

輒移尊敞齋聊解枯寂八月間悟九河帥就醫到蘇下榻
兩鬢軒初到頗有病容旬日以後不但面龐加腴抑且精
神煥發林下諸老皆是知交悟老又爲真率舊侶同人挈
榼提壺分番迭至縱談風月上下古今酒酣耳熱未嘗不
北望卿雲皆有座無車公之感悟老宦情本淡在蘇流連
匝月頗有依依難捨之情引疾一疏原有深意並非無病
之呻乃摺差到京之次日卽有豫中京兆一章中間不少
微詞因業已言歸遂置高閣雖美璞良金無損磨鍊然總
不如泯然無迹之爲愈也故京中親友書來謂其先幾之
見不讓萼菜秋風惟到家後事多拂逆尤不得意者前年

甫得一孫忽又夭殤胸懷鬱鬱引動舊疾數月已來未離
牀褥殊可憂也此外諸老景況詳於致菊兄書中敬祈鑒
閱不復重贅南中書畫近益少見稍可入目價便不貲去
年得程松門山水小卷觀其筆意雅有卷軸之氣松門爲
清湘高足又爲漁洋詩弟子麓臺極推重其畫竹垞老人
謂松門工詩爲畫所掩則當日名重可知乃流傳甚少未
知清祕閣中有其畫否謹以寄呈又食物三種藉以侑函
統乞賜納常月川參將明公之舊部也其子裕森以微員
需次上蘇年甫及冠貌旣英發人尤老成酷喜作畫得明
公法派前年進京驗看曾爲寓書頌閣侍郎並以畫冊爲

介頌閣亦謂其得明公指授故筆無俗韻頻年以來益能
勤學寫成山水十二幀稍爲小冊託代轉呈又稟一件想
明公知其苦窘必爲援手無俟瑣瀆專肅布臆語意冗長
因恃明公摯誼凡有牋牘從不敢假手於人音敬之疎實
由於此亮明公曲爲原恕也

又

秋間朱道南歸帶到手諭備悉種切並蒙惠賜佳茗四瓶
謹已領訖敬謝敬謝辰下伏維勳崇啟沃德協都俞位業
愈隆身名俱泰引詹卿喬定愜頌忱雲蒲柳之質望秋先
零本年自夏秋以來病不脫體竟無旬日之安幸近日

兒常侍左右一切勉可支持昨日許星叔舍親榜後請修墓之假道出吳門因邀同社諸老作杯酒之叙闔座爭問起居星叔備述明公精神意興色色俱佳公退之餘間及翰墨丐求者屢常滿戶日不暇給得之者珍若球圖誇爲異寶渠曾以扇頭乞畫恰值明公解衣盤礴之時信筆一揮當日卽就星叔謂人求之數月而不得者彼則以旦夕間獲之兼且乘輿拈毫濡染益增精采同人聞之莫不艷羨亦見松柏之質歲寒彌健喜甚慰甚同社諸老近狀如恒惟子山爲七月間駿叔抱病不起大爲悲傷幸能達觀一二月後仍常到園中遊玩尙不至過於凝滯惟書畫之

興大衰矣仲復季玉均健訥生因孫子泰士秋榜高捷老
懷大開眉生甫逾艾服之年老態與雲相等來諭早徧示
同人皆託代爲申謝請安道戀三兒需次省垣衛中丞相
待尙優兩司俱有淵原尙可相處惟人多事簡亦只有循
分從公守身俟命知荷師門愛注謹特附陳近刻印考漫
存一部趙書石刻一本敬奉鑒定同蘇世兄在都否菊兄
腿疾漸瘳否均念甚念甚

一内身車ノ凡

一
名一

二三

張菊垞觀察

之京

去冬陳季平弟來晤詢悉舊恙漸瘳已能持杖而行不必
需人扶掖並知眠食精神亦多增勝澆花種竹饒有家庭
之樂聞之喜慰弟衰病侵尋已成習慣去年七月初二赴
仲復處消暑之會時正酷熱許星翁攜有西洋自來扇置
之席上引動機括清風徐來令人心曠神怡如處清涼世
界迨至斜日西沈酒闌人散弟與季玉先行將欲登輿廻
頭說笑足履階沿蹈空橫跌左邊頭面磕在砂石版上額
額眉際鼻梁均遭破傷當時諸老驚駭無厝弟則神魂飛
越惟痛不可忍而心尙清楚旋卽肩輿歸家各親友遣醫

饋藥至三鼓仲復伉儷尙有人來探問其慌急情狀可想而不知所至奇者頭面傷有四處左臂與右膝亦各有傷痕獨腰身竟一無所損僉謂神明默佑固當凜感而禱帶繫有古玉數件卻是三代兩漢原舊神品爲生平所至愛者竟得賴以避禍古人玉不去身良有以也豈但庇蔭嘉穀已哉吾兄夙有同耆謹特奉告承惠春夏蘭十盆由季玉分來謹已領到感謝無已此皆名種可貴乃袁意江貿易欠順失於照顧遂令十盆宿草竟無一花現在加意培養但望明春有花當合季玉仲復處各種作一名蘭大會繪圖徵詩永志嘉貺此間諸老訥生子山與弟同庚而精神

甚旺順老年齒最長步履亦好季玉素稱健者今仍如舊
仲復亦有興會耦園日涉成趣頗有城市山林之致香巖
常有病痛去歲亦大半年不能出門今已霍然矣唯筱舫
七月間在禾患濕瘟症其弟筱珊奉差在外家人信庸醫
之言誤服人參向來發病必經筱珊醫治此次聞信趕回
業已無及痛兄情切遂亦病倒未及半月相繼云亡嗣子
年輕身後遺資不足萬金半年已來喪葬各費已用去十
停之三將來如何支撐言之於邑往年吾兄與其手書筱
舫謂獨厚於彼常形色喜今成永訣想兄聞之定增愴感
也茲乘沈少笙姻兄津差之便託其帶呈重募金闈佳麗

畫卷一件又玉壺外史剪出春風第一枝屏幅一幀又食物四種中間花荷包豆二三月下種至秋間結實各樣豆子多在春夏之間獨此在於深秋寒家栽植兩年無不開花結子味又甘美異常請廣布珂鄉傳此佳種如何燕菜乃悟九閩中帶來借花獻佛並非出資所購豆脯洋點皆是異方風味謹佐頤養茈茈表意藉以伴畝勿以鄙夷叱之幸甚幸甚手肅布臆用當晤對不敢以一字寒暄習套相溷詞雖淺率兄或鑒其語意之誠亦不忍拉雜摧燒之耶一笑

張同蘇司馬

嘉蔭

昨奉手書並承示唐碑二種謹已校讀再過其懷仁聖教序爲墨林希有之珍敝臧本在南中頗尠倫比與尊本較似尙遜一籌恭壽老人定爲北宋精拓洵是真鑒其李括州麓山寺碑紙墨雖緻而捶拓已在碑字磨刷之後故石質平淨字口光潔無泐蝕碎剝之痕試取碑中裂文攷之如法界圖於剡中之於字隨品類而得根之根字咸以形勝之以字等處皆缺此爲明證若明以前拓本皆不缺也此本若全恐黃仙鶴等字已漫漶莫辨矣

國朝攷審碑帖以王羲林翁覃溪爲最精近日張未未繼

之而專門者則沈韵初程蘭川自二君去世頗尠解人閣下篤耆古碑淵源家學將繼翁王而起辱荷垂詢麓山兩碑同異之處屬爲攷定具見審鑒心細實深佩服用敢獻其狂瞽尙望是正爲幸

又

昨奉還書並承惠延陵季子墓碑一通敬謝敬謝此碑歐陽公云前世相傳以爲孔子所書而攷孔子生平未嘗至吳按之史記歷聘諸侯南不踰楚不得親詔季子之墓又其字特大非古簡牘所容特以其名傳之久不可遽廢耳今距歐陽公所題又閱八百餘年雖唐時已一再重摹而

江南古碣極少此碑實舊刻可貴是否爲孔子所書不必
深論也碑有張從申題記至改修季子廟碑乃別是一石
非碑陰也張孝思號則之卽培風閣主人弟處亦有其題
跋笄江上極爲推重乃勝國人也弟記憶不起具見閣下
閱古心細實深心佩遲日當令裱匠顧芸峯往搨張書分
貽同志

再張孝思題字惡劣文理亦不甚通且云唐搨並無翻刻
所謂唐拓者豈另有唐拓舊本此卽從唐拓重摹耶抑唐
拓卽唐石耶頗爲費解近人孫淵如錢竹汀皆有箸錄並
無考證欲乞足下函致劉樸卿兄取縣志一查並將九里

鎮距城路程開示

該鎮曾否遭賊蹂躪在縣城何方

此碑弟屢訪各任丹

陽舊令均無知者想必鄉僻離城不近耳

又弟

所謂另是一碑係據前人箸錄而言並非目驗來諭

碑陽碑陰之說是否拓碑人所說並望轉請樸卿兄確切

一查是為至懇

又

九里廟志謹已讀竟擴所未聞獲益匪淺敬謝敬謝原書

二冊繳上乞答納轉交志中有古碑四內殷仲堪一碑係

晉永嘉五年立至萬曆十四年重建左碑亭專樹此碑似

尙未燬望詳詢該道長倘有蹤跡可尋則此碑乃六朝遺

迹尤爲可貴顧雲峯處甫雇工往拓當飛信前去屬其並拓數十分儘趕得及也此外梁王僧恕等碑必已毀佚無可追尋矣蕭定碑志中失錄前試大理司直張從申書一行後又失錄歲己未八月以下數十字碑書蘭陵蕭定字梅臣記志書潤州刺史蕭定記當時或沿舊志不取證於碑文前人箸書每每粗舛類如此不足深論也

兩罍軒尺牘卷八

歸安吳 雲愉庭箸

潘鄭盒大司寇

祖蔭

秋間奉手翰謹悉續又從恒軒處寄到大箸攀古樓彝器
款識齊罍鐘圖釋各一冊伏讀再過仰見鑒別精嚴攷證
詳確自序一篇闡前人未發之蘊尤爲推勘無遺此必傳
之詣也敬服敬服承詢張氏清儀閣用白芨拓詔之法叔
未丈在日凡刻石拓墨之事悉係吳衣谷裕張受之辛二
人其拓古彝器亦不盡用白芨間或濃搨則取極薄白芨
汁用棕筴畧刷器上使之牢粘不脫然後捶打勻足由淡

1218/05

入濃紙墨又極精究自與尋常拓本不同倘遇天氣潮潤
 只要紙墨佳工夫細不用白芨亦工妙也剔字之法叔未
 丈云凡古器篆文為青綠淹淤須漬醯旬日之久或至兼
 旬然後洗刷始顯用油斷不如用醯用鍼又不如用皂角
 刺不損銅質倘漬醯深透青綠鬆活則篆文以洗刷出之
 尤為至妙此二事舊嘗聞諸叔未丈者請試驗之所需邾
 公鐘詔拓謹奉上外又一鐘乃五年前周縵雲兄購自金
 陵蔡筱石家甬已脫落詔詞與孫淵如所臧之楚良臣余
 義鐘同而形製特大篆體亦異想同時所舛古鐘同詔而
 異器者甚多也曾以拓本寄質簠齋簠齋以為佳并臧有

舊拓本似此鐘在當日亦好事者所爭重也縵兄以其爲不全之器不甚愛惜現歸弟處特拓寄鑒定泉范拓四種附呈清賞另備一分乞轉交鮑子年兄前由恒軒寄示觀古閣叢稿泉說二冊讀之竊深嚮往海內同志甚少南中幾於歇絕得執事爲之提倡吾道不孤亦斯文之幸也

又

新正十三日奉祀竈日手翰並承惠吉金墨拓二十四種謹已領悉承諭續得邵鐘四枚合之舊有四枚得編鐘十六枚之半恰成一堵此非常之喜雖萬戶侯不易也聞之不覺拊舞便中乞將八鐘各拓一分見寄拓紙稍寬各題

數語於上俾褻小屏幅四幀懸之齋壁晨夕相對勝古人
卧宿碑下者多矣都中如有會搨全形之友則更妙也然
鄙人以先覩爲快只求詔拓其全形請俟異日可耳楚鐘
拓本遵卽寄上二分乞鑒收柳門未知何日到京恒軒何
以杳無音信弟處亦未得其隻字也簠齋亦有一月不通
書此老收藏之富實絕今古而猶孜孜不倦真可謂好古
成癖矣渠欲將自臧器之佳者及同志中臧器之佳者據
拓本彙刻再合古今拓本摹文重刊加以注釋 本朝刻
者汰其僞不恕宋元刻者汰從寬云云弟答以此舉甚善
鄙人亦有志未逮久矣乙丑年曾輯欵識四冊因遺漏過

多欲待重訪遂致輟業稿本尚在也前朝彝器款識諸書
大半舛偽失真辭尚功石刻世尠傳本此外惟王復齋尙
有古致餘則皆係鈔寫描摹於先秦文字全不相類不如
就所臧拓本七八百種之中擇字多且精者刻之

積古齋
筠清館

所刻較勝前人其
真本簠齋處皆備

字少而有關經術攷證者亦刻之前詔

後釋彙成一書畧仿辭阮二書例而遴選必嚴去取必慎
尋常習見之詞概從刪汰此一代必傳之作也質諸左右
如以為然尙乞於通書時懇愿以堅其志此事固非簠齋
莫屬劖劖之事我二人亦可相助為理共成盛舉如何

又

前月二十日由輪船局帶呈一函附有邾公鐘拓本二分
不識何日始達念念一昨奉新正十一日所發手翰並新
得金器拓本三紙其雙魚富貴洗欸識篆文甚精盃詔爲
青綠掩淤漬醯兩旬已有四字可辨聞之喜甚必再漬多
時以堅硬棕帚刷之其字自顯古器詔由親手洗刷出之
者必更得意寶賚也恒軒於臘月廿八日學院署中遞來
一信據稱古器一無所得陝中僞刻最多近日吳中亦有
仿船者其人類多認識然止能仿漢代刻欸若先秦鑄欸
一望而知其僞故若輩不爲也鮑子年兄寄惠拓本二十
紙領到中多精品乞爲代謝弟於古泉一門向未專力篋

中所蓄刀幣及漢唐以來約六七百種因無甚新奇可喜之品故久不啟視今夏或清暇無事當拓一分寄奉鑒賞

宋中金硯雲酷者古泉箸有古泉攷上自刀布下終吳耿分正用品偽品不知年代品外國品為四卷大意在接續

洪志故宋金元明較備其泉數年前由弟和會售與許緣仲親家泉攷金氏子孫以有先人手澤諳懇代為收臧勿交他人是以照錄一分與緣仲而此書留在弟處今屬小

壻朱平華鏡清帶呈望轉致子年兄一閱未知其中或有

古泉匯正續二書所未備否閱後望交與柳門轉交平華帶

南可耳即鐘拓本所求全分未識何日惠寄竊以先睹為

快也

又

前接二月初五日手翰並承惠賜邵鐘拓紙八葉領悉敬
謝敬謝是月初有奉寄之函並附金硯雲古泉攷手稿四
卷交小壻朱平華孝廉帶呈未知何日澈覽弟衰態日增
已成老廢終日在故紙堆中研尋生活而讀書善忘掩卷
卽懵不省記崦嵫景迫豪無成就甚有愧於同志如何如
何去年與簠齋論古印渠云凡有劔士印皆出偽舳弟答
以昔人謂出於偽舳者以劔士兩字從來未有攷證耳然
生平見此印甚夥詳審制作篆文其精者必非後人所能

僞且價值甚廉僞亦無謂惟向亦以劔士二字無攷爲疑
徧查歷代官志及各印譜亦從無證據後閱通鑑建甯元
年宦者王甫使劔士收陳蕃執送北寺獄然後知劔士爲
當日宮門宿衛之官此漢書本紀列傳所不載偶於溫讀
通鑑得之曾以此覆壽老而壽老來書謂有詳說在與子
年觀察及與執事書中他日通書可以索閱云云不知壽
老如何置論公暇揮翰便望示及不急急也

又

前奉四月杪手書謹悉種切承寄拓本六葉兩匝篆文一
隽秀一奇古可謂古金精品羨甚羨甚孟鼎中變之疑聞

之悵然嗣晤季玉親家云得近報此鼎已從關中起行將可到京不勝抃舞孟鼎爲海內著名之器其大者初聞已畀置文廟今始知出於訛傳也小字者亦知在宣城李氏曾託人往索拓本至今未得聞李伯孟已作古人不知其家能終守否簠齋爲當代傳人惟其天性好勝所作務要出人頭地刻意求工轉致因噎廢食卽如彙刻先秦文字一端若照辭阮二書之例選擇器之字多而精確者得好手影摹刻之再得我二人相助爲理此書一出亦足繼往開來決爲必傳之作乃必欲依許氏說文部目創例成書條件旣繁詮證匪易窮年累月不知何日得成來諭謂其

刻古金文一事竟不能成想亦指此也尊體偶有違和近日想已霍然頭暈一症大抵

國政勞心肝陽上擾只須靜攝數日合目調息便可勿藥而愈弟終年抱病稍知癥結謹以爲獻惟爲時珍護不宣

又

奉前月十六日手翰承寄新得吳方尊蓋拓本卽積古齋所藏之吳彝當日阮文達公據搨本櫺入故不知爲何器遂以吳彝名之今得尊處新收之器證之足爲攷古之助洵墨林快事也尙求以棉連紙多拓數分見寄爲懇茲寄上堊止取別鼎拓本一惠敦蓋一齊侯匜一皆漏未拓奉

者適案頭有此數種先行寄呈餘容續奉

又

兩奉手書並金文拓本五葉發函申紙古色古香溢於几案歡忻無量並知

南苑貼落至七百餘件之多書撰屬於一手在他人必露窘相矣而執事從容揮灑游刃有餘苟非胸儲五車才周八面曷克臻此想當奮袖低昂得意疾書之際迴顧堂廉或亦有連呼奇絕者耶真令人嚮往不已弟病不離身已成習慣無足爲左右告者承示簠齋欲刻古金文此甚盛事至渠收臧千種尊處八百種合之敝臧六七百種已共

有二千四五百種不可謂非吉金中之大成也然以三家所有者一爲校對則重出者必居其半再汰其字少而無關攷證者大約所存亦不過精本七八百種而已此其數比辭阮二書增十之五六而又精選精刻實足繼往開來爲一代必傳之作倘篋齋將伯一呼我二人必相助爲理不敢辭也執事亮亦謂然所需秦量拓本寄奉六分又龜魚符拓本四分並奉鑒賞不宣

又

前月初奉手教欣悉孟鼎指日可到大喜大喜昨日恒軒寄到孟鼎拓本二紙云卽左相所贈此鼎久在袁筱塢閣

學寓中納於文廟之說或妬忌者故與此謠也金石洵有
前緣亦由執事者好之篤遂使神物不蹕而至真令人健
羨無已將來用絜薄棉料紙精拓數分見惠新得之方尊
卽積古齋所稱吳彝亦求用棉紙拓寄數分是所至感鮑
子年兄來書並拓本均已領到其論鑒別真贋謂未見其
器不能遽定可謂卓識簠齋辨論古印一看打本便說某
真某偽弟以爲觀彝器拓本詳審篆法其真偽可得十之
七八若先秦兩漢以來古鈇印以能手精撫可期一絲不
走謂一見印可識其真偽鄙人實未敢信也昔朱筱漚之
姪號伯蘭者倩人撫漢印一百餘紐以印本求售翁叔均

精於治印者也會以番餅兩枚購得一部後筱漚力索此印伯蘭不得已遂以實告並出所撫之石與閱筱漚方信至今笑中以為談柄因子年兄所見適與鄙人相同偶憶前事拉雜書之以博軒渠瓦文七葉附呈鑒賞中間有簠齋所未備者恒軒云關中有方元仲觀察名鼎錄持贈瓦當拓本百餘種未知較簠齋所藏如何瓦文多秦漢字文比甄文較有古致可喜惜近日精緻者亦不易得也

又

客臘奉十一月廿八日手書並古器拓本十紙李竹朋兄書籍信件均已一一領到雲交冬後常患咳嗽入春愈甚

裁苔久稽實深歉戀近日天氣和暖精神稍振嗽亦漸已
每繹來翰竊見蒐羅日富考訂益精惜道遠不得合并一
堂互爲討論所諭鑒別彝器不能僅據拓本別其真偽惟
大出大入者則一見便知旨哉言乎非洞見此中癥結必
不能有此語佩服佩服至教家童拓卽鐘而爲損碎爵有
陽識者亦碎其一聞之不勝惋惜古器中有入土久銅質
鬆脆大約必用極薄綿連紙以熟細絹裹棉成小槌畧帶
微濕輕輕按之待稍乾以不暈墨爲度再用絹包蘸濃墨
撲之其精者非撲至四五層則墨氣不足故必以彝器四
五件同時並拓則紙之燥溼皆得趁手不至停待過費工

夫此昔年聞於叔未丈者謹述之以備採擇孟鼎計期應
可入都此器質厚雖有登登之聲亦不損傷雲甚望以精
拓見寄也恆軒想常通音問都中金石同志子年竹朋二
兄外想不乏人執事主持壇坫箸作日增令人羨慕無已
竹朋兄處昨有覆信交與蔡父臣帶致不識何日始達倘
晤及乞道拳拳不宣

又

月之十八日奉到由柳門處寄來兩次所發手翰並吉金
拓本謹已領悉謝謝一昨又從竹報中附到本月十二日
續諭相距未十日卽達可謂快極欣審德位兼崇身名俱

泰此日摩挲金石卽爲異時謬勳勒績之徵甚頌甚頌孟
鼎久鎮關中烜赫照世忌之者謂已納於文廟鼎之輕重
未可問也必無入都之理今而竟歸清秘喜可知已此等
瑋寶非有金石奇緣者不能遇也承惠全形拓本已命工
裝裱懸諸壁間觀者莫不驚心動魄歎羨不已所需拓本
今就案頭現有者先行檢奉錄於另紙餘俟續寄

又

前月下旬兩奉手翰謹已領悉承惠寄兩齣拓本文字均
佳其諸女一齣想卽來書所謂器極精者惜道遠不得一
摩挲也未未丈臧有諸女方爵篆文與此相同惟多一司

字一子耳未丈箸述僅梓詩集此外金石攷證必有稿
本十餘年留心訪覓訖未得見雲處止臧清儀閣金石拓
本十冊皆其自臧之器內金器二冊自三代鼎彝以至泉
刀古鏡半有題識後附甄文瓦當及唐宋以來殘碑斷碣
甚至象牙竹木雕刻精工者亦皆撫拓當日藉此爲消遣
自娛之計非傳世之本也顧蔡二君皆少年喜事一時高
興廣收古玩顧君所收金器爲多蔡則專收書畫近則情
隨事遷意興已替矣簠齋謂好古而存傳古之心斯爲真
好此非可與尋常人言之也顧處金器卻有數件佳者然
亦非烜赫著名之器不能望尊臧項背也吳壺號壺拓本

遵卽檢奉外又附拓本三件統乞鑒定近刻魏文靖手劄
已蕲事特先精拓一分奉寄信局攜帶不便未及裝池此
與朱子繫辭注稿可作延津之配也籃齋昨有專信索取
朱子注稿墨拓渠自去年已來精神大旺半年之內一索
得女夏在去再索得男春在今書來謂自二十八歲以後所未
有之事卻真可喜續布不宣

又

前者兩奉手簡正抱采薪之憂未及肅答刻下疾病雖愈
精神未復臥室中亦須扶杖而行蒲柳早衰一經風露便
不能支良可自歎屬書槎客詞句力疾涂雅聊副誣諛其

千載一時小額關合雅雋令人生豔羨之心南中好事者
講求陽羨砂器不惜重值而所得時少山陳鳴遠欸者類
多燕石近日并曼生壺亦享重價其實爲曼生製壺者卽
楊彭年道光年間常至上海寓瞿子冶家弟曾相識其家
兒女媳婦皆能製壺詡爲祕傳弟因子冶薦曾定製五十
具亂後毀佚無一存者矣米帖近時所刻惟徐紫珊英光
堂二卷出胡衣谷手較爲精美特寄一分以供清賞

又

前月初間兩奉手翰一昨又奉本月初五日續示並鼎啟
各器拓本共八紙一一領悉欣謝欣謝弟自七月中旬小

有感冒並不甚重乃二豎作祟驅之不去南中醫生絕少
賤性又不喜服藥直至本月初間始獲漸愈今已眠食如
常惟精神不能振作耳承寄各拓本具見新得之富令人
豔羨從來啟謔多在腹底此啟雖止一白字形而在盞內
實爲僅見難得之至又一紙上作泉形中有穿勻列七小
○無字有花紋未注何器幸詳示之長笏臣方伯臧器有
絕奇者他日借拓乞惠一分以擴眼界前蒙屬書匾額病
中搦管方愧班門弄斧貽笑大方乃辱獎許溢分非所敢
承皇恐皇恐往年簠齋來書謂海內金石之交止有我輩
數人不可不勉蓋指執事與竹朋子年清卿諸君也伏念

執事年力正富位望正隆將來詔鐘勒鼎自有振鐸今古
者在非衆人所敢冀望也而乃愛及康觚凡鄙人前後奉
致之書悉蒙隨時留積已付潢池聞之益增慚悚弟竊有
奉啟者頻年來承賜手札無論片紙隻字必謹收存惟書
尾每每不署年月將來裝裱易致舛錯此後務乞隨署月
日俾作陳孟公尺牘珍藏永爲家寶夫文字之交雖潦草
數行必自有真性情寓乎其中不僅關舊學商量奇聞互
證始爲重耳附去東海廟碑殘字墨拓希鑒定

又

客歲杪奉臘月朔日手翰敬審侍庭曼福德位兼崇著作

益增身名俱泰弟偃息菰廬日惟鑽研故紙消遣懷抱今年開春以後天氣奇冷滴水成冰瑟縮擁爐不敢窺戶外一步直至元宵後始稍出訓應固由老懶亦因精力不濟也承示搜輯黃蕘圃題宋槧書跋已得四巨冊此老平生心血所聚都在百宋一廛之中此次劫運甚酷故家收藏書籍盡入紅羊獨經復翁祕臧者當日護如頭目不惜工本裝潢務極精緻錦綾什襲人人知其爲貴重之品爭相臧匿卽如弟處收得數種無纖毫損闕天壤間絕無僅有之祕冊得能保全在世使後人有所徵考皆復翁愛護之功也執事闡揚樸學擬爲授梓凡在士林莫不聞聲感頌

不獨復翁含笑於地下已也所詢胡心耘臧書辛酉壬戌之間在滬時已多散佚留贖七八十種盡爲候補縣孫令購去後又售與許緣仲親家抵償欠項千數百金中有影宋鈔本十數種不盡出復翁所臧求有復翁手跋者甚少事隔十年不復省記然苟有希世祕本足以驚心動魄者弟與緣仲親情友誼非比泛常渠雖風雅於此道亦非篤耆固不難力索得之也今緣仲已歸道山嗣君專務舉業蘇杭相距四百里黃鑪之感亦不忍重問信矣茲將敝臧復翁心賞數種皆有長跋者照錄奉上內如中興館閣錄與吳郡圖經續記新定續志此三書關係東南文獻復翁

倍加珍祕編年通載雖僅四冊然此書自來收藏家未窺全豹內閣藏書目錄與絳雲樓書目所載均止二冊此四冊固可與鳳毛麟角同觀矣惜南北睽隔相離過遠不能各出心愛之物互爲平賞遙望南公鼎齋能無馳仰外附呈焦山志一部伏求鑒定

又

兩旬以來疊奉手劄四通附來彝器各拓本發函申紙但覺綠字朱文古香四溢遙想八齋齋中定有虹彩祥雲常常擁護眞令人豔羨無已中間畧尙公姑尙及新得之鬲字文爲至精鬲銘彝字爲作器者之名無文義可釋許書

褻字艸雨衣从衣象形段氏謂雨衣有不艸者自俗从艸
作蓑而衰蓑遂爲古今字義亦因之有異按瓦有上下从
衣之形中卩似是絲之省文釋爲衰字衰地名又人名見
晉語及左氏傳今以作器者之名無可審訂欲求依據姑
定衰字依阮氏釋王子申盤之例彼定爲楚
子西之器此亦可定爲晉趙衰之器仍乞是正畀
卣詔篆致佳與阮氏所臧寰盤當是一人之器銘有卩字
筠清館引龔定庵說云或釋作人字重文又以从人从二
二人爲从定爲从字竊謂从人从二明是仁字仁與人古
籍每每通用指不勝數因文義未能貫穿遂舍卻毫無疑
義之字另作一字以實其說從來說經家每有此病似於

闕文闕疑之訓終未安也米日爵 雲似見過米日筠清館
釋為七月尙有意義張叔未曾有釋文从積古齋釋作者
字為諸字省文此器是否得自李墨緣竊願聞之清卿久
不得其音信比得子年兄書亦云清卿新得甚夥不知其
何故祕而不宣關中瑋寶久推孟鼎今已歸清祕其餘皆
屬自鄙以下矣簠齋有同鄉韓偉功服賈於蘇年年冬間
歸去至三月中必來簠齋信件每由韓兄代遞故二三月
無信尙不在意今奉來諭謂都中諸同志不得其音書已
有三月之久聞之頗以為異日來常差人至韓兄寓處探
聞不知何故至今未到海內金石之交落落止此數人聞

竹朋抱病在家不但手足不仁近已舌本蹇澁不能言語
簠齋精神強固筆墨又勤三月之久未得隻字此不能無
疑慮者無怪執事之懸懸也未未翁詩集知執事需閱甚
亟特交濟之令弟帶呈兵亂版燬遍覓不得惟此一部爲
碩果之存請留觀至秋間再行寄還當交杏蓀擺印百部
分貽同好

又

月之初二日託令弟濟之中翰帶呈寸牋附有叔未丈詩
集輪船快速計必卽達嗣於五月初九連奉前月下旬發
來手劄三通次第展讀一一領悉新得尹叔敦洵是至寶

其妙處不在詔字之多而在篆文之美八齋中半年以
來所得古器甚富難得皆是精品物必聚於所好然亦惟
有緣者能遇之耳清卿昨有信到並寄來先後所收彝器
目錄分列已刻未刻有八十餘種之多此外古鏡船象隋
唐碑碣蒐羅亦復不少不意其用力如此之猛而金石之
緣又如此之深入竭畢生心力所未能至者渠於數年間
得之吳中弄臧金石之富八齋齋外斷推恆軒矣昔年劉
燕翁臧器多獲於關中今清卿蒐括於兵燹之後從此伯
樂一顧冀北羣空幸而八齋齋具大神通能令孟鼎不脛
而至所謂獨得其龍也羨羨惠書楹帖尙未奉到柳門信

都由蔣莊轉寄想不日亦可到也秋水先生爲弟之鄉先輩年少時常與往還蒙摘冬青館詩句見贈實爲感幸孰拓及湯氏墓志寄上三分望分贈貴及門廉生石查二兄清卿有釋湯志一篇特錄上統祈答收

又

月之中下兩旬三奉手書敬悉種切伏審勳德並崇榮聞休暢兩部政務殷繁整綱飭紀固已倍極盡勞而南齋有大著作又非出公手不可若以他人處此必有兼顧不遑之勢獨執事從容擘畫仍於公退餘暇蒐羅古器考訂奇文每得詔心之品雖謫劣如雲亦必在遠不遺郵書傳示

俾得擴其聞見共此欣賞感幸佩服何可言喻中師父啟
與守敬二器字多且精至爲難得平安館金石甚富所集
古印尤多聞楚粵兩處均有散佚其留在京寓者乃其中
下之鬪虎坊橋鬱攸之厄大約爲六丁收去者亦復不少
煙雲過眼無足爲怪惟東卿師當日竟無箸錄并印譜亦
無留遺遂使一生心血所銖積寸累而得之者一經散失
渺無稽考荷屋中丞所感不及平安館之富而筠清金石
錄一書頗爲藝苑所珍中間三代法物亦藉是而傳金石
之壽不如竹簡於此益信子年書來謂簠齋收藏豪富乃
諄勸他人刻書而自己轉無著作且編纂之書亦所未見

子年深以爲異實則簠齋心眼過高不肯稍稍牽就前年
來信欲薈萃先秦兩漢以至六朝官私古印成印舉一書
以已之所臧再合他人所有彙爲一書洵屬大觀雲雖心
以爲然卻知其未必能成蓋簠齋作事每每精益求精務
欲人人歎爲空前絕後無毫髮之憾而後已任此役者勢
必因難生畏望而卻走今閱三年鄙言果不幸而中曩時
又商集先秦古器款式彙刻成書爲積古齋之續雲允與
執事相助爲理後卽奉書左右果蒙欣然相從復又專函
轉告一再慫恿現又束之高閣不復置議矣世固有輕率
授梓災黎禍棗誠屬可鄙然過於求精遂至心高手硬因

噎廢食亦所不取也執事以爲如何先後所贈臧器拓本
現已裝成兩冊俟有便人赴都帶呈省覽有未備者卽請
增入可也朱婿鏡清倖獲館選知又出大賢之門一子一
婿均辱埏埴實爲榮幸鏡婿現留都門萬望遇事愷教是
所至託兩牕無俚手此布凡用當促膝之談聞都中亢旱
近日諒得甘霖尙望調護起居節宣善衛

又

吳碩卿太守攜到手教桂馨堂集拙書二巨冊謹已領悉
謝劣無似託公文字交末方慚形穢而公愛忘其醜謂
前後所上之書從無寒暄習套欣賞奇文辨析疑義言

雖不文可抵晤對抑或金石之交止此落落數人而又散處四方非文字無以達款曲故雖遇此惡札亦不忍拉雜摧燒而又付之裝池俾得廁於鄴架芸籤之末其爲榮幸何可言喻由文章而推及政事指日得公調和鼎鼎司用人之枋天下尙有棄材耶謹承命題志數語藉便繳上外又寄呈八禧齋臧器拓本二冊伏望檢閱或有未備懇卽補贈並懇轉屬貴及門石查廉生二兄各分一冊逐器釋文并注器之出處此次張少渠大令解餉入都俟其出京必交帶還是所至禱餘言另述以輪局遞信較快也

又

日前寄解餉委員張少渠大令帶去寸牋並附八喜齋臧
器拓本二冊又繳還拙書二冊張君由陸路入都不識何
日始達典籤一昨兩奉手翰謹悉種切伏審勳德兼崇譽
聞休暢清恙想蚤霍然眠食何似諸維珍重南中今年夏
涼如秋單衣無一日脫體日來秋暑稍盛亦尙不過酷雨
暘極稱應時此後但得調順無愆收成可望大有威酋到
滬多時並無動靜赫德梅輝里先後至甯與幼帥相見不
過縱橫辨詰而已結局總得在總署與津沽耳火輪車路
乘坐者以爲安穩快速極口稱揚此千古未有之奇境天
方啟之人力焉得而遏之特時會有後先遠或在於數十

百年之後近在轉瞬之間未易逆覩也所需拙畫畧用李檀園楊龍友筆意稍加設色渲染寄奉法家鑒賞卽請指謬此間講書畫之友頗不乏人獨至金石攷證之學落落少可與言執事讀破萬卷勳位正隆餘事所及足以領袖羣賢主盟壇坵而猶孜孜不倦虛懷采納求之古今名臣中當與歐陽公阮文達抗席爭輝鄙人老矣得依末光附垂不朽實爲榮幸

前函泐就正欲緘寄復奉六月十三五兩日所發手劄三通孟公尺牘得之爲喜當卽黏連臧弄將彙裝成冊永爲家珍寄來拙書二冊對之生愧不敢有違台諭已加墨繳

呈矣八禧齋中臧器拓本二冊前欲求貴及門石查廉生
題釋今知廉生場前正欲用功務望俟至場後再與言之
切勿因鄙人所求過事促迫至懇至懇承詢夏氏所臧之
大蒐鼎瞿氏所臧之周散亂後不知下落顧姓收買吉金
並非真好現倩人往拓全分而其人又因訟事赴天津將
來必欲搨取奉寄所臧亦止有三四十種精者不及半耳
比之八禧齋中猶勝辭之於齊楚不可同日語也蔡則專
買字畫近以三千餘金得曾筌巢家臧宋元以來卷冊立
軸十餘件聞多俊品丁松生專收舊版書籍並不講求金
石此三君都非熟習然其嗜好如此則知之甚稔夏瞿兩

家所臧二器必不在此三人處日內當爲函詢老友吳康甫二尹或知蹤跡再當奉報存齋辱執事以文字知愛遇事關垂渠甚感戴此次所遭曲直是非想筠仙侍郎定必縷述宦途嶮巇直可浩歎袁氏臧匪拓本領到銘中幾字或釋咏或釋昶愚意。象日形說文昶日長也篆文从日从永似以釋昶爲安質之法家以爲如何

又

疊奉前月十八廿一日兩次惠書知所寄拙畫已塵法鑒辱荷推許過當殊增顏汗南中數月以來爲邪教惑人妖異四起傳布甚遠想都中亦備聞其詳此等事見之正史

及說部中甚多亦不盡關休咎惟小民無知鑼聲澈夜舉國若狂農費工作市停交易甚至借盤詰爲名攘歿仇報大爲行旅之害今年各處皆有偏災獨江浙二省雨暘較順不可謂非如天之福也而乃人心思動自貽伊戚真可浩歎日來蘇常漸已平息嘉湖城鄉各鎮紛擾愈甚至可怪者閩傳八月十二日爲九龍山舉事之期各處皆有奸細埋伏遂至人心慌亂遷徙至滬者甚眾真乃咄咄怪事也九龍山之謠所傳已非一日倘得澈底根查有無伏莽不難立見似亦消釋羣疑以安民心之一道也寄去古布拓本二分按古泉匯小布止有一品以有一商字列之商

代今此二布篆文明顯可識特拓奉法鑒另寄二分乞轉
交石查兄一考爲懇子年兄頻有書來愛孫時常生病自
已亦常有不適含飴之樂甘苦參半云云並述竹朋兄作
古錄示輓詩讀之不勝愴感竹老著作已及身刊播福壽
俱已無憾惟海內金石之交落落本無多人今又弱一个
傷逝自念能無於邑簠齋有三月不得隻字幼子之殤心
緒已大不佳兼以東省大荒濰縣籌辦賑饑聞簠齋捐金
甚巨又爲眾望所屬不能不出而任事身心兼悴可想而
知此皆濰縣韓偉功所述也

又

一車車戶册
三
疊奉前月廿九日暨本月初三兩次所發手書得悉右臂
微有不適未識近已霍然否尙望節宣善衛爲

國葆躬禱甚禱甚承示張別駕到京吉金冊子已交貴及
門胡王二兄題識欣幸無旣前蒙諭及凡八囍齋臧器皆
有收臧圖記無則係他人之物此書到時冊子已經裱就
致有躐錯今得王胡二兄題注弟當再將尊翰附裝於後

並加一跋語叙明流傳後世攷古者不難一望而知轉覺
趣味之雋永也一笑簠齋八月中下旬俱有書來云人皆
以爲不知如何享受而不知身心焦勞有人所不能堪者
其情緒可想見矣造物付人絕少全美人腹中有數卷書

負世清名則處境恒多抑塞豐於此者嗇於彼古今人遭際殆不甚遠善養生者卽境自遣再作退一步想無往而非坦途矣柔齋豪情逸興亦復損減亮竹報中備詳不瑣及也平華留京托師門之庇得以長承訓誨渠於經史亦頗涉獵工夫雖淺而敏速卻有微長倘師門有筆墨誣委儘可隨時傳喚好在師生之誼疵類處可直筆教削藉此指導亦得增益所未至尤爲感幸恒軒聞十月內可以動身多年不見此次到家有數月之留可與縱觀收臧上下議論亦一大快事也

又

昨肅寸牋交鞍間艸堂轉寄知尙未發刻從濟之令弟送
到台諭並吉金欸識冊子多本謹卽繙讀廉生兄有鑒古
之識故筆墨雅馴斷制精確石查兄冊尾題跋文亦峭絜
所釋空首幣文器卽爲鄭氏二字子年兄所釋亦同尤有意義欣
佩之至此非案頭現存拓本二三種所能報容擇敝臧吉
金器中較爲精美者多拓數種奉寄望先爲道謝外有致
子年兄一書懇卽飭送爲荷

又

比來正以輪船凍阻郵書不便爲慮乃一朵郇雲從空飛
下歡喜展讀知係前月廿二日所發相距止有旬日可謂

至快子年兄書已收到渠云清祕閣中又新得古泉類多
精品聞之嚮往篋齋頻有書至現在賑務已經過去古典
仍濃弟處拓器皆屬盛觀者經理其人僅十數歲時由汪
嵐坡教以捶搗之方適吳門無解此道者渠遂獨擅其利
敦閒主人見其勤謹留爲照料書房乃三四年以來因販
鬻古董得利遂不屑經營此事屢喚不至故胡王二兄處
金器拓本尙未報命容另覓人拓寄以踐前諾特不能如
此君之速就耳篋齋欲重拓濃墨秦詔版六十分意謂卽
日可就昨書來頗以未卽應爲訝不知兵燹後講書畫者
隨聲附影之輩甚多收買銅器亦不惜重值真僞並納而

攷證之學絕無人講故拓手亦不易逢也閣下主持壇坫及門多務樸學洵足遠繼歐陽近亦當與翁阮頡頏企服曷已後周布泉范背有篆文頗饒古致亦見當時制度特奉鑒賞

又

去冬十一月杪曾寄寸牋坳致貴及門王胡二兄金器拓本各一分未知於何日澈覽嗣於歲底奉到手書二通並泉幣拓本三十三帑新正八日復奉續示並古泉拓本十八紙又新得李方赤先生臧器拓本一一領悉敬謝敬謝伏審德門豫順福祿蕃膺勛業文章與時並林

玉牒總裁

本朝非道高望重之賢罕充其任想見

兩宮眷注之隆亦由執事平時竭忠盡禮有以結

廟堂之知也

第

蘿袞分懸金石契密迖聽聲聞能無額手

南中新正以來天氣清明風日清美去冬雨雪應時頗有
豐亨之兆差足埶述賤體畏寒新正半月僅止出門一次
茲因偉如姻兄入

覲之便托帶上彝器圖釋二部乞分致貴及門石查廉生
二兄以踐夙諾

又

疊奉前月抄本月初手札二通均來古器拓本共二十六
紙仰蒙垂念老朽不遺在遠吉金樂石絡繹見貽每讀來
書輒覺滿紙古香溢於几案歡欣感謝匪言可喻承示右
臂稍有未順或因風濕所致抑或作擘窠過多亦有此患
稍稍靜攝卽占勿藥刻下亮已霍然尙祈節勞善衛加意
珍重恒軒時相過從縱談甚樂秦涼三載搜羅吉金旣富
且精地不愛寶關中時有新出古器亦惟有緣者遇之耳
拓本想必隨時寄鑒故不復及昨見兕觥一器其製如爵
上有蓋作兕形極精篆文數字亦佳此器恒軒借到現擬
仿製以公同好可爲兕觥之證一俟竣工必當首先馳寄

也茲先奉去古鏡詔拓一百二十種伏乞鑒納廉生宏通博雅洵是雋才海內樸學之士盡在公門曷勝豔羨有復書一通敬求飭送

又

月初奉前月廿四日手書昨廿一日又奉廿五日續示並刀幣拓本五十餘帑領悉敬謝兩書止隔一日而達到遲至半月以後局遞每有如此不足責也恒軒到京想已暢晤南中近狀定必備悉比日正患蝗孽幸自十七日得雨至廿四日始止農田各處霑足飛蝗亦銷歸烏有此大慶也謹以報聞近得張從申書延陵季子廟碑特寄鑒賞此

碑第

訪問歷任丹陽令竟無知者茲因張同蘇公子見贈

一分根詢來歷始知廟在丹陽九里鎮該鎮去延陵鎮九

里故名與句容交界距縣城尙有三十餘里地頗迂僻此

廟自漢至明屢圮屢建廟貌崇宏正殿象祀季子相傳墓

在其下古碑不少今不知存否現專人前往將廟中所有

碑碣全行拓至再當續寄此碑在獻殿甬道右有亭覆之

住持道士與地方紳士護愛甚力尋常不准人捶拓故字

文完好尙如新發於鏹從來箸錄家皆以十字碑與張從

申季子廟碑分而爲二錢竹汀孫淵如亦沿其說實則重

摹孔書十字鐫在碑之陽張書改修廟記在碑之陰事非

目諛往往舛錯如此恒軒處因無副本尙未寄與如渠來
晤乞先示之此寒宗祖典不可不知也簠齋來書因災鴻
事焦灼萬分捐資勞力功德卻不淺也

又

昨奉六月初六日手書知前函並張司直碑已塵台鑿焦
山瘞鶴銘自陳滄洲移置山寺之後建亭覆護石亦堅緻
故字較百年前尙無甚損遵諭拓寄又有摩崖數行竝後
人臨本兩種一併附贈統乞鑒收恒軒到京後想極忙碌
簠齋爲賑濟災黎勞倦之極然捐貲出力實事求是亦真
難得可敬也

又

旬日來連接前月十七日暨廿九三十兩日所發手劄展誦之餘如親警欵承惠示各拓本中間陽識一卣最爲精美鈐有珍藏小印知爲八薺齋新得先秦彝器中陽識極少此卣字雖不多卻甚難得可寶也鐘搨似非真龍法鑒何如此間市肆亦有一編鐘求售詔與澈臧邾公捰鐘同拓本增閱似亦非開門見山之品也古玉冊拓本二分敬呈攷賞此冊制琢精良玉質粹美冊文與史記封爵之誓正合其陰隸字二行亦有兩京筆意文曰定冊帷幕有安社稷之勳按漢宣帝本始元年春詔有司論定冊安宗廟

功大將軍光益封萬七千戶車騎將軍安世以下益封者
十人封侯者五人建武十三年功臣增邑受封者三百六
十五人兩漢當年勛臣膺帶厲之盟者正不知凡幾此二
冊文義與史漢所載悉合他日尙欲求哲匠題平也簠齋
三月閒連得其來書古興甚濃殘輒碎篲搜掘至二千六
百餘種之多登登之聲昕夕不輟承其念四十年老友以
全分見寄草草繙閱已湏竟日之長現擬分爲數類以一
字二字三字者各爲一類四字以上者爲一類陽識爲一
類其模糊莫辯似字非字不忍汰去者統歸一類其中精
者約有一半洵古文字中一巨觀也渠因執事以泉拓屬

題欲圖報命轉致踈於書問海內同志甚少拳拳之意常
溢於語言文字間也恒軒聞到京一轉卽赴津沽此次晉
省辦賑勞苦倍常活人不少造福實多黃魯直謂交游間
得一國士若恒軒者當之洵無愧色

又

前月廿四日奉到手劄二通附有吉金拓本十四紙領悉
敬謝敬謝頃又奉續示展誦之餘欣悉都中甘霖疊霑晉
豫各省亦均普霑插種無愆人心大定從此雨暘時若中
外騰歡太平之樂不特林下蒼生額手稱慶已也惠示各
墨拓中有古劍其篆體似較世傳吳季子之子劍爲勝吳

季子之劍當年臧在嚴子通家其劍匣有竹垞老人長歌一篇鏤刻頗精子通故後此劍不知仍在嚴氏否前承寄來邾公華鐘拓本此間亦有一器求售兩鐘詔同而字在兩鼓者稍異與積古齋所載紀氏器篆文悉合惟忌怒樂三字阮本極明白無損此已剝蝕卻又非因擦碰所致鐘甚舊而詔文不無致疑特將拓本寄上乞法家審定示知昨濟之令弟出眎尊剖所需焦山志彝器圖釋遵寄各二部又張未未桂馨堂詩集一部一并寄奉統祈譽收近京出土古幣尊處收羅甚多必有重出望擇其青綠燦然者見寄數品數千年之物自有一種古色古香兼以生朱活

翠置之案頭足以被俗也簞齋述執事臧古泉幣甚富未知已編錄成書否子年西逝都中談古者尙有幾人海內金石同志本如天上晨星落落可數今子年又棄世矣言之慨然恒軒經李相留辦賑務各事能常通信否

又

前月託濟之中翰代寄寸牋埒有彝器圖釋二部焦山志二部桂馨堂詩集一部又向杜小舫轉索平定粵匪紀畧古謠諺等書未識何日始達深以爲念一昨卽亭來函附到手翰敬悉種切當此帑藏支絀之際贍軍濟賑無一不仰給於司農執事重筦度支綜籌出納固已倍煩擘畫而

朝廷遇有大著作又非公莫屬文章政事一時交集其勞
勤當可想見尙望節宣善衛爲

國葆躬是所至祝承詢顧湘舟偕韓履卿丈撰江南金石
志有無存稿查此書當日艸稿甫定尙待續輯實未成書
庚申之變藝海樓書籍無隻字獲存履文之子又不能克
家當日曾與恒軒論及此書竟無可蹤跡執事現爲履丈
刻題跋數十篇雖非全豹亦可藉見一斑甚盛舉也工竣
後務望從速惠寄此間尙可從各親友搜羅弟處臧漢東
海廟碑殘字有履丈長跋此跋有關掌故特錄上又題禊
序一跋又題鐵硯數行先錄備采何義門集版已遭刼印

本亦祇存一部他日擬爲重刊或專刻題跋未丈桂馨堂集原版現已修補完好前日寄去一部尙可續寄也頌鼎拓木一紙李香巖以重值得之者均奉法鑒

又

九月初間奉到惠書知所寄各書籍並拙作楹帖均未達鑒兩月已來因心緒鬱悶又患齒疾致疎音敬亦未奉手畢牋訊之稀頗爲近數年中所罕有懷想之忱無日不縈繞左右也辰下伏維道德文章與時並茂吉金樂石有無新得之品竊願聞之南中浮慕風雅者多前所云兩鐘其一周公華已爲吳江沈姓者以五百緡購去一邾公攄編

鐘價廉已以書畫博易留存倘法家鑒賞儘可移贈俟明

春

潞兒

入都帶奉師門散氏盤詔當一并呈上也恒軒抱

喪明之痛又殤愛女無怪其心灰然年力甚壯造物或別
有權衡只有委心任之而已

弟

八月間喪一

孫女

年十八

歲紫陽綱目已讀完詩筆爲香巖柔齋所賞贊爲閨閣中
僅見字南屏之子尙未出閣二三日微疾去世真令人痛
心不能已也賤體自八月初至今常常不適意興殊蕭索
昨日高嫗送來彝器拓本十數種云係松江鄉下金姓者
倩拓拓竟攜之而去中間贗鼎居多特檢四種奉上內宀
彝較精與積古齋所藏相似虢簋亦爲可觀一敦似是陝

刻亞形亦平平弟最服尊論古器銘有至精極壞大開
大合者不必看器可決其真偽若此種銘文必得一見原
器方可定其是非也籃齋有月餘無信恒軒常晤否

又

前者兒子承潞南歸奉到賜書並蒙惠頒滂喜齋叢書三
函謹已領悉敬謝敬謝伏審德勳昭著如日方中朝野具
詹聲聞益懋兒子備述在都時荷師門飲食教誨眷愛殊
恒並述南齋領袖凡有大著作非公莫辦兼以部務殷繁
巨案疊出盤根錯節措置綦難稍一失當百喙齊起而公
精心卓識酌理準情不參成見一以大中至正爲歸眾論

推服中外翕然此外兩館鴻裁三庫重任一身兼顧他人處此不知若何叢脞而公從容擘畫猶得以政事餘暇不廢箸述方諸古人雖以五官並用之劉穆之尙當遜席遑論時賢大刻叢書業已卒讀凡有一材一藝之士稿項蓬廬窮老而湮沒無稱者悉得采錄授梓復以皇甫椽筆序其簡端使之附青雲而傳後世不獨發潛闡幽見愛才之切此中陰德亦匪淺鮮無怪海內孤寒篤學無遇者奔走恐後咸欲皈依龍門以爲榮幸也弟終歲杜門不離故紙深愧崦嵫已迫學業無成惟有遙祝公家福德綿延恩慶稠疊至於執樞秉軸繩武繼聲乃意中指顧間事不

足爲公頌也久欲肅函報謝因知國政正冗未敢以文字
瑣屑率溷清聽匪同嵇嬾想邀亮咎

又

月朔奉前月廿三日手諭並蒙惠寄金石墨拓卅五葉謹
已領悉謝謝方今海內金石家弄臧之富濰縣外惟八
齋洵稱雙峰並峙恒軒真力彌滿攷鑒俱精足爲繼聲弟
年老氣衰跼伏菰廬古器物絕少邁遇幸親友中得有佳
品必持以見眎因此常得寓目聊慰饞吻徐鐘初到吳門
香巖仲復皆以爲贗顧駿叔就質鄙人告以周末文字有
此一派似非僞船駿卡以五百洋購之恒軒甚以爲佳籃

齋謂真而不精現在駿未聞恒軒贊美益加寶護幾同頭
日鐘角已脫佚銅鏞指剔卽落有篆文處捶撲稍重文卽
受傷損缺人因以贗鼎目之所需拓本謹奉二分尙是初
到時所拓近則秘不眎人矣不識正法眼臧以爲如何外
古鈇印五紐係敝篋所藏篋齋屬王鹵泉摹刻中間左譽
桃枝四字文可識而義無攷餘四鈇爲上古奇文未易辯
釋特奉省閱伏求攷示另附一分如恒軒未行乞賜轉交
承惠各造象殘石拓本中有定七已朔四字筆意勁挺爲
唐初歐褚二家所自出定上半字似是武字武定七年爲
東魏孝靜十六年其時去唐初不遠風會所趨固應如是

此必當時名手所書非出工匠也尙乞再寄十紙加一二收臧鑒賞等印因欲分貽同好也此殘石未知是造象抑是殘碑並乞示悉

又

前月杪奉望日手翰並蒙惠寄古金拓墨十六葉一一領悉感謝無已十布拓本重出者五其中僅少尪布一種次布已殘缺尪布是否原缺抑係漏未彙入念念方尊知是俊品惜相睽道遠不能各出所臧互資平賞海內收臧吉金旣富且精者簠齋外斷推執事恒軒繼之此後或有聞風興起而天地精華之秘發洩將盡徒以魚目相混而已

近日僞作者愈出愈奇滬上已專有此一種人廣收無字
舊器合數人之力閉戶覃精僞鑄成文比之宣和仿古實
能遠勝蓋器本原舊文又工緻目前已不易識數十百年
後恐巨眼者亦不能辨矣現在同好有沈仲復李香巖與
子山喬梓皆好之而又有力者見愜心之品便不惜重值
購之偶有遺珠或沈羈鄉里未登市肆鄙人亦間有拾得
者爲數較鉅卽便縮手不敢與角也近得一師田父尙卻
甚快心此器從嘉定而至婁東爲三兒購獲之詔文極精
器尤奇古謹將拓本奉鑒另縮一圖繪於另紙統乞攷示
平華處拓本因係師門命寄格外鄭重託的便帶來轉致

西昌車戶牘
卷八
遲滯故至今未到也

又

月之初六日肅奉寸牋附有鐘卣各拓本交輪局帶呈計必卽達嗣於十五六兩日奉到手諭二通廿二日又從竹報中交來續示三函一一領悉委致簠齋一函當卽轉交韓偉功兄確寄韓兄爲簠齋同鄉友冬去春來在蘇貿易來往信札皆渠經手從無遺悞也承諭於無意中得陽羨砂器數種又得時少山一壺詔欵絕佳聞之鄉往時壺在兵亂以笄已極難遇今日更同星鳳矣八禧齋中本有舊臧精品益以新得想見清簠疏簾鑪香茗椀公退之餘藉

爲遊息可勝艷羨垂詢北嵐趙氏與陳漢侯未悉其人楊
彭年業此數世後起凋落恒產已成絕響瞿子冶之後尙
有一二在庠者然亦衰薄之至附奉月壺題畫詩一冊子
冶蹤迹畧見於此執事愛才若渴人有偏長薄技唯恐表
揚之未盡遠媿韓歐近則與阮文達並駕無怪海內之士
皆願委身國士定價龍門也

再正在封函又接本月十六日手書知初六一槧已達籤
閣古金拓五帛領到鐔于前人皆係諸周鄙人非之曾引
貨泉文爲證匪敢逞臆也今執事題曰古鐔于具徵鑒古
卓識佩甚佩甚然諦審此鐔陽識弓矢形奇古上作卍中

三下与絕似泉刀背文上穿乃刀柄倒形以此證之恐非
先秦以後物也法眼以爲如何陽羨砂器精此技者勝國
以來落落可數大約近人吳兔牀陽羨名匄錄張文魚陽
羨匄說最爲詳備文魚陶說附見於名匄錄中未見專刻
此書計鄴架早有故不復寄昨訪諸陽羨舊令知縣志所
載甚畧卻得一異聞可資捧腹同治間有毘陵太守履任
勤求民隱有宜荆某董事摭拾地方利弊十數條呈請出
示興革中有一條謂陽羨砂器每每雕刻書畫詔詞大非
敬惜字紙之道云云某太守依樣胡盧轉行下縣縣又胡
盧示禁從此陽羨茗壺不复有字數年來遵奉不敢違蓋

畏官法受累也此人亦幸而不生於三代之上使生於三代則湯盤孔鼎皆在應毀之列矣兵戈以後每生怪物此亦一種也公何法以處之所需古鉅印本附奉四分乞以一分贈廉生太史

又

仲秋接奉手示時家庭多故意緒少甯屢欲拈豪輒復中輟因之裁報有稽方深歉悚迺晤季玉親家述及執事關念甚懃垂問至切情肫語摯竹報綦詳聆音興感匪言可宣惟有永詔心版不敢套詞鳴謝比日一陽初轉霜氣漸深伏願啟沃之餘順時攝衛弟於八月間就養婁東眴將

兩月差喜屬境平安公私尚順仍得以圖書金石解悶消
憂辱體亦託庇物適足紓存注前屬搜訪陽羨匊器箸錄
知已梓各種鄴架俱備茲鈔清儀閣所藏時少山方壺題
詠彙集一冊並拓壺底款字兼摹全形寄塵清賞伏祈鑒
入餘俟旋蘇後再行續報

又

月之初旬連奉十月廿三廿七兩次手諭並各種彝器拓
本謹已領悉遵卽分致同好屬爲道謝弟杜門守拙垂及
廿年歲月不居學殖日落修名未立老大徒傷方以不足
副執事文字之知是懼乃以犬馬賤辰寵加獎飾捧函循

誦感愧交縈伏念執事以振今鑠古之才膺旋乾轉坤之
任安危所繫中外具瞻值此時局孔艱盤錯迭出論議紛
起張弛綦難惟執事洞明彼己見徹始終識蚤運於幾先
慮必周乎事後堅持一是力破羣疑從古運會遞嬗屈申
倚伏犁庭掃穴會有其時正當嘗膽卧薪伺隙觀變橫磨
雖利似不必急試其鋒狂瞽率陳亦不出執事紆籌默運
中也伏惟加咎不宣

又

前奉正月廿二廿八兩次手書並金器拓本三紙太和造
象石刻一紙均謹領悉謝謝流光如駛改歲以來倏又暮

春之初矣遙維助德兼崇身名俱泰調元贊化中外蒙庥
幸甚幸甚雲杜門不出日益衰慵昔朱晦翁七十後始以
野服見客雲則早效魏三束帶久置高閣閒與林下諸老
仿洛陽故事作真率之會月舉一二次此外酬應概行謝
絕蒲柳易凋竟成老廢言之祇堪自愧承詢南中有無新
出金石近來絕少俊品好事者多偶出中輟卽不惜重值
購去然此中亦各有金石之緣去年師田一器簠齋與公
均歎爲希世之珍此器初出已入市賈之手流轉於蘇滬
二處無人顧問幸爲寒齋所得當日若有力者見賞鄙人
安能與爭此猶小品也孟鼎久鎮關中爲宇宙大寶非左

相之力不能得亦非公之力不可致可見數千年法物合
歸何人固有一定也現在敝鄉新出古磚頗多類皆孫吳
六朝遺物年代尙有在太和之前者如合鑒賞當覓數件
寄贈聊備清秘閣中一種而已博多出於古冢似亦不宜
多積雲素來不甚措意者爲此簠齋今年未有信至恒軒
小試其鋒已遭側目安得不令人扼腕俄事竟得轉圜眞
普天之慶方今

聖明在上眾正盈朝鑑及前車擇能而使遂令彌天荆棘
悉化康莊從古得人則治如劫侯者庶無愧專對之才克
副行人之選矣眞西山有言幸安之謀不足持乘此勵自

同車車人月
三
強之志恢立武之經三城之築會有其時草莽幸民正當
擊壤而歌式觀景運也祝年現赴滬局近來閱歷漸增作
事極爲謹飭憲眷旣優同寅亦協此外近事想竹報備詳
故不瑣述

又

前者連奉三四兩月所發手諭附有金石各墨本捧函展
誦仰蒙垂注勤拳優加存問感幸无量承惠示古匄拓多
種中閒填器字最明顯而陽識一種尤爲精絕簠齋積至
四十餘種欲求如此者亦未易見洵古匄文字中至爲精
美可寶者此填已有攷否鄙見當是命司樂作太室填七

字釋文書於另紙仍乞釐定古博出土每多殘損茲擇其
完善而字文較爲精整者敬奉四種先將拓本附呈甄交
令弟濟之中翰暫存遇便再寄師田父器簠老定名傳卣
恒軒亦有釋文寄來此器兩耳高聳形制甚奇爲從來彝
器圖中所未見擬照摹全形專刻單本簠齋恒軒釋文附
錄於後執事前書歎爲希世之珍擬將尊札一併刻入此
卽借重玄晏先生之意也老至耄及學益荒蕪所藉以自
遣者止此結習未忘耳一昨又荷頒到葉氏百三十家詩
選新刻二部其一寄付路兒祇領謹拜師門之賜其一粗
已繙讀中間舊識甚多類皆槁項菰蘆侘傺里巷縱使潛

修力學仰屋著書而遭際匪附青雲姓氏烏能傳後葉氏
雖有此書無力開雕仍不過爲蠹魚所飽今得執事爲之
剞劂遂使孤寒之士一生心血所積齋志而沒者得於張
爲主客圖中畧見文采昔人謂收人遺稿授之梓人其福
德比之哺養棄孩掩埋骸骼尤爲無量無邊他日韓范功
名文富壽考一身兼集敬預爲執事操券頌之自春徂夏
孱軀勉可支持惟當此暑溼司令每每筋骨酸痛牽及手
腕故握管頗艱家無元瑜孔璋之徒親知牋訊必出手削
因之滯於裁報惟執事摯愛定能原之也

又

六月間接奉手諭並填拓五種展誦之餘深紉存注久欲
肅函報謝因七月初二日在耦園沈氏作真率之會藉以
消暑評書讀畫頗得清涼之趣迨至斜日西沈始各趁涼
歸去鄙人與季玉先行將欲升輿下階傾跌頭面磕傷至
四處之多幸托遠庇得免內損然已危險之至旬日後創
痕始平又患腹疾蒲柳之姿連遭揉搓遂至十分困頓今
雖小瘉而精神終不健旺亦老境使然委心任之而已簠
齋恒軒均有書來極羨尊臧土墳之精簠齋謂王廉生得
其一執事獲其三稱道不置可見鄙人前書所云簠齋雖
臧古匄至五千種之多視此亦當遜席似非虛諛愚見墳

本土器中不堅之物難得遇此流傳亟應摹其形制專刻一圖前人所稱八孔五孔與雁卵雞卵諸說有此圖說足爲經史攷據之證豈非墨林一大快事哉尊意以爲如何又

昨奉八月廿六日手諭並匠幣匄三種拓本謹已領悉敬謝敬謝伏審勲德並崇古歡益楸秋審甫竣又奉 恩旨辦減等有數千起之多想見仁心所運倍極盡勞而祥刑種德慈惠澤民感召天和休徵普慶遙望卿霄可勝額手雲自前月初勒悟九中丞就醫來蘇下榻寒齋數日之後病體漸愈老友相逢樂數晨夕林下諸老時來談讌順兒

久不赴席亦破格而來可謂極一時之盛盡盍簪之樂矣
悟老志在京職宦情雖淡精力甚充買山無資尙難家食
明春病痊得就京職此爲如願以償凡事自有一定非人
力所能轉移也孱軀時有不適旋亦向瘳久成習慣不復
措意附呈敝拓八葉此得自石門蔡氏者敝臧古鉢前已
摹刻數鈕近因簠齋敦促將所臧十鈕悉數摹刻竣事並
呈攷定趙惠甫喜蒐羅金石拓本因將尊臧太室填轉贈
一分告以填質脆薄不能多拓此鄭孔諸儒所欲見而不
可得者渠得之甚喜箸有長跋其辭頗辨錄奉鑒正餘維
爲道爲時節勞善護臨穎馳切不盡

又

十月二十日奉到手劄正抱采薪之憂以致閱時五旬報章缺然歎悚無已弟自七月初旬以後訖今半載尙未出大門一步衰荼之態可想而知近因左足患濕瘡潰痛舉動需人扶持終日憑几枯坐令人悶損前蒙寄示古尊拓屬爲攷釋其文此器篆文奇古中間函似二字尤妙至不可思議謹就管見所及詮釋另紙仍求釐定

又

前月杪奉是月二十日手書頃又奉到廿四日續示一一領悉敬審道履安勝侍庭曼福惟日內釐定減等刑政過

煩盡勞彌甚伏望節宣善衛爲國葆躬是所至禱漢光和
銅斛拓本欣謝欣謝來論謂字多而未能精雲以爲此器
久霾於污泥之中文字致遭剝蝕然一種樸茂之氣自不
可掩且字數多至二百尤爲漢器中所僅見當日芝齡先
生得此器寶愛甚至此雲聞之許珊林丈者著錄於筠清
館金石款識敝鄉徐君青中丞與陳頌南侍御攷證俱極
博辨可爲一代斗斛制度之證古器物莫徵於世者每得
金石流傳據爲準則此豈徒供耳目玩好已哉此斛與太
室壝可爲八喜齋中金石雙璧惟器之形式是以微橢抑
爲正圓器質薄君青中丞謂或因頑損其圓致成微橢可

謂精識雲素性畏冷近日南中已穿重裘屣軀愈形瑟縮
附呈莽新十布拓本全分伏乞鑒定

兩罍軒尺牘卷九

歸安吳 雲愉庭箸

陳簠齋太史 介祺

憶乙巳年都門聚別忽忽二十又七年矣道路間隔世事
遷變不但良晤無由卽一紙之書亦無從寄達前年有章
君牧三從山左來蘇購求古銅器詢訪左右近狀云執事
家居不常出門收臧並未罹劫偶到省城遇愜心之品亦
仍收買聞之稍慰 弟入官後雖一行作吏而簿書之暇日
仍與翰墨爲緣癸丑庚申兩遭兵燹舊臧散失過半而亂
後搜羅新得頗亦不少積古齋中齊侯罍之外如師酉敦

祿康鐘馭尊虎卣等器載於款識者約二十種盡在寒齋
嘉興張氏清儀閣中漢印四百紐沈匏翁古鏡百餘面亦
均爲弟所有自念學殖淺薄舊時師友盡已凋謝雖朋儕
中如馮林一俞蔭甫輩皆卓然負宏通淵雅之才而爲學
同途所好各異欲求可與商訂金石文字者同志絕少默
溯平生膺服心儀不置者四海雖遙獨執事有同道之契
耳方以關河修阻執訊難通北望齊雲莫解勞結忽於本
月十二日奉到三月十三日手翰亟取展讀勤拳之誼溢
於言表歡喜之情真出望外敬審林泉多福頤養攸宜名
山著述日新富有幸甚幸甚弟 跽伏菰廬鬚髮全白去年

以來精力益復頽茶伏案稍久便覺心火上沖頭岑岑痛
指臂又時時作酸作字逾五百便欲輟筆行年六十二歲
老邁至此真堪愧歎承詢拙著庚申之變已梓者固片版
無存所有叢殘稿本及臧書五萬餘卷亦全陷賊中金石
書畫約存十之四五合之新得尙足自娛十年以來專注
者惟兩鬪軒吉金圖釋一書其中頗有所發明或希冀可
以傳後目錄排比已定向欲改竄遲日先寄教正然後授
梓此外已刻者六七種皆不成片段不足以塵大雅毘陵
被陷虢盤汜不知下落或傳在劉省三軍門處曾經晤詢
唯唯否否或秘不肯宣也舊有虢盤攷一冊曾錄大箸特

寄省覽兩罍詔在腹內極不易拓曹氏一罍世間拓本尤少弟因友人紛紛求索曾刻有模本爲塞責計今特爲執事精拓一分先奉鑒賞其餘各器詔容後拓出續寄罍文間有漫漶難識者乃器之剝蝕也圖釋中止錄陳頌南侍御攷釋二篇大箸望卽寄下卽當刻入尊臧各器拓本務卽速惠弟寓蘇州省城金太史場宅居不廣卻小有花木之勝終日偃仰其中絕不預戶外事亦聊以自守其拙也海內知交零落惟我二人健在又復臭味無差耆好如一惜相距過遠奇文疑義不能面相質證此後惟有憑管城君代宣欵曲以當晤對

兒子承澍

現任太倉

長孫家楨今

年已完姻近況尙托庇平順執事庭階蘭玉想已森然大
箸已梓未梓共有若干種尊齒今年似甫及六十來書亦
有衰老云云不識氣體何如並望一一詳示以慰馳念
又附去漢永始銅鼎拓本此器尙未纂錄乞於著述之暇
撰攷釋一通俟寄到卽當編入虢盤攷恐函封過厚郵寄
不便是以抽出容後再奉

又

五月十六日接初二日手答相距二千里越十三日卽到
可謂至快歡喜展讀如挹笑言卽審道履康和古歡益楸
承示齊侯鬯詔釋一篇並字釋喪連下讀定爲通篇綱領

引論語春秋爲證筆法謹嚴直使奸雄心事三千年後昭然若揭甚快甚快謹當附刻於冊聽後之人參考寄到漢永始鼎拓本按詔文作於三年爲數第二百八十敝器則作於二年數第一當爲創造之始一年之間流傳可攷者其數已如此之多亦畧見當時制度焉詔首第一字似是乘字或釋爲廉字乘與廉皆地名也十成數十涑者言其鍊冶之精也執事必有攷釋望卽錄寄至尊臧器有三細字兩酉一鼎諦審兩酉字筆畫軟弱似是後人以錐畫之與器無涉一鼎字勁挺有力或當時作器者用以爲記未可知也法鑒以爲如何廿八將李忠後人墓門題字渴思

一見乞便中惠寄索觀書畫目錄弟所藏卷冊立軸自北宋以逮國朝約三百種其中愜心之品不過三四十種而已目錄無副本遲日當繕一分奉寄惟秦漢六朝以來碑碣造象收藏不下三千種久欲彙編目錄因循汔未能就尊臧前賢字畫及古拓碑碣望將心賞者示知一二以廣見聞貞兄處已將來翰送閱渠欲得韓勅禮器後碑一觀未知尊臧碑目中有此一種否翁覃溪云金陵鄭汝器曾手拓其本以遺朱竹垞見曝書亭集何至數十年間便湮晦不見其石屬桂未谷徧訪亦竟不得云云究不知東省有此石否抑所謂鄭汝器手拓之本或係數百年前舊拓

而原石已佚竹垞翁誤紀之耶不然何前碑屹然無恙而後碑竟無蹤迹如有所聞並望示弟所輯吉金圖釋皆一家之器本欲仿嘯堂錄例將古印附刻於後嗣因卷帙稍多攷例較詳意欲另編成集正在遲疑未決適得手教遂決意另編矣其中官印頗有志書所未見者此書已成秋間當先刷印寄上外吉金拓本四種有阮書所未錄者又一冊器係敝親家潘季玉所藏皆懷米山房故物統望督收季玉甚念左右屬先道意遲日再通牋啟弟自前月二十間忽患采薪眠食大減至月之初二日精神得以漸復而胃納尙滯裁覆稽延職此之故承詢各事疏答另紙

伏維爲道善衛不宣

又

十月十六日奉布數行交韓偉功轉寄不識何日始達典
籤邗上專足信件直於前月杪由畢紀差人送到先將來
函二通展讀並亟取箱籠檢閱內附手翰十紙反覆紬繹
恍在寶彝齋中促膝晤對上下議論欣慰無已來書用竹
紙寫恐出入披玩墨渝紙敝已命工褙托可期經久尊臧
目錄一冊印集十二本讀之咋舌收臧之精且富固一時
無兩卽裝釘紙墨之妙亦令人愛不釋手後附燕庭方伯
所臧唐龜符及巡魚交魚各符竊幸皆在弟處吾兄聞之

必喜也承惠竹垞冬心各楹對拓本謝謝本月初八日又接偉功兄交來續示並與鮑子年觀察書稿又附與邗上張錫五兄書均悉邗信當卽寄去蘇揚寄信甚便弟常多疾病精力萬萬不逮吾兄拙箸彝器圖釋雖已刻竣而詔篆正須修削南中自兵燹以後手民之劣以及紙張刷印無一可以入目兼之各省書局輿圖局皆選良工稍有本領者皆爲羅致而去迥非亂前可比兄眼界過高尙不肯降心相從必欲如從前之精益求精轉恐有因噎廢食之患大約刻金器首重篆文此外皆可從畧也承詢各事疏對別紙天寒暑短未及詳盡容隨時續覆惟望吾兄加意

頤養爲道自珍有可節勞之處亦不必過費心血總以恬
適爲宜我輩雖不敢以古人自期然後之視今亦由今之
視昔正不容妄自菲薄也海內知交零落三十年中老友
屈指正無多人相見未期臨書但有惆悵冬心對旣兄見
賞謹以爲贈

又

去冬交偉功帶奉信件數月來常欲續布數行以申契濶
因臂疾時作艱於握管又以良友遠睽每遇通書雖盡十
數紙尙未能罄所欲言坐是轉稽音候幸勿爲過本月廿
五日偉功來蘇攜到二月廿四日手書並古泉匯二套富

貴吉羊圖齊刀范建武范綏和雁足鐙太康匱漁陽郡甌
漢李夫人墓門字魏金沙泉三字各墨拓內惟寶六化土
范拓本未見想必漏入餘俱收領謝謝竹朋兄古泉匯一
書搜集之富實古今所未有自顧氏以來此書洵爲大觀
兄謂其鐫刻未善誠是然已成必傳之作矣剗劂一事固
不可草率然必精益求精轉至因噎廢食前書勸兄降心
相從將應刻之書早早付梓實有所爲而言也竹兄所著
續集刻竣務望代索見寄古泉匯去冬已由家清卿太史
寄到一部今得重出一到卽爲友人攫去矣書畫鑑影不
必觀其書卽此書名四字已足令人心動第不知如何立

說弟於此中致力三十餘年畧知甘苦收臧名迹自北宋
以來頗多精品亟欲一聞鑑影體例也望兄先示其旨如
何十鐘山房印舉尤願先覩爲快前人流傳印譜收集旣
隘攷鑒未精無一愜心者弟臧漢魏六朝官私印千紐中
間官印頗有海內罕見之品嘗取官印及私印姓名之有
攷者著兩疊軒古印攷臧十卷雖刊刻已成十之七八因
欲校改且有續增故尙未蒞事今先將草印稿三冊奉寄
備採卽乞指譌並將官印另印一分附奉鑑賞倘有可類
入印舉者望兄指出註明卽將空白印格發下由此間印
就寄上彙入裝釘最妥道遠難借寄也南中古物不獨金

器爲有力者收括殆盡卽碑帖書畫磁玉等類稍可入目者價便奇貴未翁所臧琥未鐘後歸蔣生沐辛酉年曾留弟處三月諧價未就去冬己爲敝姻家沈仲復以重值購去兄欲於南中物色古器其可得乎吳侃叔商周文字拾遺久訪未得徐籀莊從古堂款識學問燬於火無從蹤跡筱漚兄殉節後嗣君穀甫亦相繼棄世現遺一孫今年已十七歲矣尙能讀書賴其母賢能主持家務舊時田產俱已興復當亂離轉徙之時收臧散失過半幸珠寶衣飾等類未失此時之得能過活亦正賴此也子貞兄今年正月間大病甚危弟新正謝絕訓應直於元宵後三日出門首

先到彼在卧榻相見執手嗚咽涕泗滿頤謂呃逆不止眠
不安枕食不得味與其病而生不如速之死想兄聞之定
亦同喚奈何也李夫人靈門題字已交去承屬轉索書件
未知何日始能報命也哲嗣二世講暨文孫別號望示知
擬作書畫扇頭爲贈仲飴兄令姪與

兒子承潞

有乙丑同

榜之誼子苾先生之後得附世末聞之甚喜從前翁未均
示我毛公鼎拓本云此鼎在尊處今查寄示收臧目錄無
此器究竟世間有此鼎否竊願悉其輓跡祈示知茲先遵
寄庚巽白拓本十分秦度殘字拓本二十分又所需雙鈎
化度寺殘字有現存十六冊益以雙鈎温虞恭公碑四冊

其二十分乞檢收拙著彝器圖釋儘月內必可刷印再當
馳求是正賤紙羊頰當一并奉寄無誤

又

八月中奉七月廿九日手翰並周秦金石墨拓三十二紙
傳古小啟四本一一領到拙著彝器圖釋知己塵鑒蒙許
爲久而愈傳之作慚悚慚悚承示中有可以酌汰數種益
徵老友直諒絕不作周旋牽就語必如此方爲文字至交
感幸無已內中庚鼎商盤二器道光末年得於揚州某商
家諸文爲銅鏽所蝕曾經刻入二百蘭亭齋金石記此次
重刻卽從金石記中影摹本未愜意執事致疑洵是真鑒

當卽汰去此書雖已刷印數部版未剗淨原待參訂增減
非定本也冊冊父乙鼎當年與齊鬻師敦同得鼎腹底鑄
有阮某實用四字制作精妙朱綠燦然篆文亦極古楸雖
積古齋中亦容有未精之品然此器實無疑義大約古器
中一二字者易於仿造每每器真而字譌收藏家以所見
類多贗作未免生厭但觀拓本未見真器概以僞刻目之
良有以也尊論一二字者不妨少刻幾件所見誠是惟一
家所藏與集錄諸家所有者稍有不同溺於所愛徃徃不
忍割舍拙箸中實不免亦有此病也然做篋尙有商周解
爵戈矛泉范之屬二十餘種以其字文相類無甚意義故

未錄入銅鼓本可不錄因攷據家多言銅鼓鑄自諸葛或
言出自馬伏波其實伏波之前已先有之矣錄之亦聊以
備一說也岑妃敦前年章牧三到蘇廣收古器欲得字文
較多者託敝同鄉姚少垣再三來說以重值購去此器現
今在李君處以弟觀之實非陝刻兄如進省可向李君索
觀真贋立判不必言其原委也鑒別古器但觀拓本十可
得其七八然有一二必與原器參觀並審方無冤屈遺濫
此中竅奧應惟兄知之固未可一二爲世人言也承惠秦
金各拓已彙裝小冊惟檢敝篋舊藏元年殘詔版拓本與
此次所寄者校殘缺形制相同而舊本第三行襲字第六

行功盛字第七八末左使字多模糊莫辨今則極爲清楚
豈將銅線剔淨故文字明顯如此抑別有一器耶舊本有
陳粟園小印必出尊臧也秦量今得見全形直欲喜心翻
倒惟所拓全形止有周圍圈口與一柄耳其廣狹深淺及
邊底之存否均未及知意當日侈張功德制詔之刻於器
物者非一易代之後必遭毀廢是以後世無傳焉詔中有
度量二字故從歐說以度量名之亦明知度是度量是量
耳向於秦金殘詔未見全器久蓄疑團亟欲一廣見聞尙
求詳示南中舊時同志均已凋謝近日好事者但能出重
貨搜羅而欲講求古文奇字者實少其人有世好沈均初

中翰壯年力學酷者漢魏已來碑碣鑒別精審攷據詳核
今春已謝世矣爲之慨惜者累日子貞兄之病竟至不起
想兄聞之定亦抱慟貞兄書名蓋世詩文經學以及金石
題跋莫不工妙在

國朝當推第一流人物自去年以來多病手顛艱於握管

弟 屢出執事來書與閱每每閱不終篇卽欲欠申而起代

索楹聯總答以待我腕力稍強再寫卽 弟 嘗索其作數行

書亦如此說且作運腕欲書之勢輒自歎其心手不能相
應蓋爲知音者落筆不肯率爾操觚尤不肯令羣從子弟
捉刀訓應也自其沒後遺跡人爭購臧聲價益重韓子云

用功深者收名也遠學者精神命脈所注發爲文章傳不
 傳身後必有定評也曹氏器中鬪中字本有疑義鬪字書
 序作仲虺史記殷本紀作中鬪陳頌南侍御亦引及之惟
 謂鬪爲齊侯名不應於其臣稱桓子之謚而於其君稱名
 故不從虺從鬪子貞兄則以从虺爲是鬪爲非然春秋論
 語在此鬪阮文達句也貞兄爲弟作小齋匾後有短跋襲
 用其詞則云論語春秋在此鬪吾師諷考集羣才則又未
 嘗不從鬪字也許珊林丈云詩終風虺虺其雷傳震雷之
 聲虺虺然易象傳山下有雷小過繫辭斷木爲杵掘地爲
 臼取諸小過史記索隱齊景公名杵曰虺其字也器爲景

公受天之命命陳桓子嗣文子爲工正桓子用作文子之
廟器得曹氏此器證之景公名杵臼字中虺尤無疑義其
說亦本書序與史記殷本紀也總之詔在腹內篆文極不
易識言人人殊鄙人之宗陳說亦躊躇而未能滿志者也

又

前書寫就尙未緘寄又得八月廿四日手翰展誦之餘恍
如晤對慰幸無量貞兄東洲草堂集伊家無現存者俟韓
偉功行時當以弟處所有一部先行寄上無誤印泥弟所
用者均向蘇城雲藍閣松茂室購買以自製總不得法轉
不如此二家所製也每兩有二千四百文者一千六百文

者有八百文者印於另紙註明價目欲購來書可耳辨識古官印但觀釘本比之彝器尤難遽定真譌古有專掌治印之官秦書篆體五曰摹印然建武間篆法已舛譌滋甚馬伏波所稱伏字犬外嚮成臯令臯字白下羊丞印四下羊可證也至一時出於倉卒封拜者更無論矣承示可疑各印內有實實無可疑者不特金塗燦然而篆文亦的真原舊不復置論外其兼平北司馬印平原徒丞印弟因走未翁所臧瞿木夫輯入集古官印攷證又盛稱之故亦入錄潁川西湖之長後人印誤羸官印中兄一見卽指出具徵目光如炬無微不燭尤爲心服西鄉侯印篆文填金故

難辨識此鄉字非都字也楨翰寧部司馬尊釋引傳平板
鞞正義釋詰楨翰榦也當是軍中掌築壁壘之官殊為精
確已采入印攷弟按一切經音義及釋文榦通作幹又作
翰前書地里志上郡有楨林莽曰楨榦榦通翰是楨翰卽
楨榦也顧氏集古印譜有常山漆園司馬印常山亦地名
也似卽同義此亦一說也司馬印流傳甚多漢假司馬此
為僅見或疑不應假司馬上加一漢字然弟讀通鑑建武
二十一年賜莎車王賢西域都護印綬及車騎黃金錦繡
敦煌太守裴遵上言戎狄不可假以大權因詔收還都護
印綬更賜賢漢大將軍印綬此又與漢假司馬同義可援

以爲證也劍士印臧積頗多所見更難僕數觀其制作篆
文其精者必非後人所能僞且價亦甚廉僞亦無謂向以
劍士二字索解不得爲疑徧查歷代官志及各印譜亦從
無攷釋後讀通鑑建寧元年宦者王甫使劍士收蓄執送
北寺獄此陳蕃本傳及本紀所不載而於讀通鑑得之劍
士當卽宮門宿衛之官也謹以質諸左右尙望釐正爲幸

又

前月初三日託韓偉功兄帶上紈扇書牋各件未知何日
始達嗣奉十月十八十一月初三先後所發手函並書畫
鑑影一部祇領謝謝南中自前月十二日以後奇冷滴水

成冰河道凍阻不通行旅至七日之久爲近十數年所未
有至今餘寒尙厲弟入冬後鍵關不出偃息之所因玻璃
不能避寒悉用漂白洋布畫著色花木爲幔或卷或垂收
放隨意甚爲和暖且又亮爽親友見之紛紛仿行咸稱盡
善聞兄亦甚畏寒故詳告以備采用承示許印翁釋夔字
謂𠄎卽𠄎旣字从𠄎象人舉手從手旣聲乃概字省自定
爲抚字所釋甚確日工子苾學使釋爲日王引日乙日庚
日辛爲證亦有依據已悉如來翰錄入拙箸惟末日字似
班未解其義雖已並錄尙望明示未末丈臧一器定爲商
班尊阮氏載入積古齋中有三點阮氏失摹其釋班字爲

从玉說文以爲分瑞玉也此从竝者謂古文作辨辨爲古
竝字繁文而从珏之字又其後起此器辛酉冬閒有金蘭
生者得自滬上廢銅鋪中後售與李眉生廉訪鴻裔弟博
易得之其時江蘇故家收藏爲賊匪兵勇所擄者轉輾售
賣皆以滬上爲尾間是否卽顧湘舟所藏無可攷也尊臧
堇山臥踰鼎與阮氏器詔同而器異將來能以全形拓本
見寄否甚盼甚盼李竹朋兄所惠書畫鑑影已讀一過書
中間有評斷并敘述畫中景狀莫不曲盡其妙欽佩之至
第一卷所載永師千文墨跡在做親家顧子山處前有闕
字實從龍師火帝起應改正又董跋亦有數譌字應改子

山嗣君駿未茂才亦酷嗜收臧此卷已勒石惟郭蘭石跋
尙未刻完今先將已刻者搨寄望轉交竹兄其李春湖侍
郎一跋不刻正與竹翁之不錄同意也弟於書畫一門究
心三十年家臧自北宋以至

國初卷冊立軸真且精者約四五十種頗堪自信平日未
論及者因書畫與吉金不同吉金有詔文可證書畫非親
見莫定真贋子山收臧至富尤喜四王惲吳類皆以重值
得之惜道遠不得吾兄與竹翁同爲平賞也弟所臧畫件
子青制軍大半過眼他日相遇可詢其畧青翁念執事甚
勤並云與竹翁舊交至熟謂書畫棋琴金石篆刻竹翁無

不工妙聞之令人嚮慕所需梨刀范拓本茲先寄上十分
大泉五十范前已奉寄二十分不復再寄外日王壺拓本
二分五銖貨泉大泉五十契刀四范拓本各一分贈仲飴
兄又一分致竹翁統祈管收轉交

又

正以久不得芳訊爲念適奉二月朔日手函浣薇展誦欣
悉去冬托韓譚二君轉遞各信件均已達覽抃慰無量承
惠寄琅邪臺秦拓二紙其一雖已漫漶不能辨識尙有筆
畫隱隱可尋已付裝池懸諸壁間詳細審繹或有數字可
識亦未可定所契當在臭味酸醜之外也秦漢瓦拓二紙

亦領到弟於古甄瓦向不搜羅所臧無多且乏精品敝鄉親友中頗有專門於此者不知亂後尙存否容訪之再報鮑子年觀察處曾以敝鄉金硯雲古泉攷手稿六冊寄鄭盒轉交稿中泉文皆硯雲手拓其書意在接續洪志故宋元明錢較備不知有一二爲古泉匯中所未有否二世講何病刻下定已全愈深爲記念竹朋翁小有風疾正與鄙人相同此由老年血分不足之故弟二月初爲風溼所苦不良於行者半月今雖小愈精神總不能振作崦嵫景迫一無成就無以副良朋期許每一念之輒形愧汗臥荆鼎止存殘銅一片何以知爲方鼎乞示知緣弟所臧阮氏積

古齋之取淵蓋乃圓鼎非方鼎故亟欲一聞其詳也永師
千字文與宋拓本不同者當日所書前人皆言有八百本
之多世必不止一本容有不同處耳字山所得者卽李寄
雲舊臧竹翁載入書畫鑑影故將石刻寄閱鄙人於此卷
止斷爲宋元人所書子貞兄所見亦同而信臣中丞大不
爲然謂卷中草書或尙有知其妙者若楷書之妙當世必
無人能識傾倒心醉幾欲五體投地所謂各有一是非也
子青制軍處已將尊函交閱函中論畫數行以爲六法三
昧屬道拳拳手此布復統容續陳不一

又

前月偉功兄來奉到手翰並承惠寄金石文字各拓本敬
領謝謝秦漢瓦文一百九十四種當付裝池稍成四冊洵
爲大觀歡欣寶愛非言可喻月之八日又奉三月廿八日
續示藉諭道履康勝著纂如意爲慰弟自交三月以後病
不離身齒病有二十餘年不發前月下旬忽然大作竟至
顛地呼天手足無厝現已逾月尙時作疼咀嚼極爲不便
飯食非極爛者不能下咽爲之悶損終日靜坐內室看書
亦擇淺近者隨便瀏覽不能稍用心思聞尊體亦小有不
適或亦操心過度所致著作誠不朽之事文人結習斷不
能除然大耗心血季玉常常規勸弟感良友箴言雖不能

盡從因而輟筆者有之謹以轉勸老兄筆墨一門可已則
已可節則節加意調護勿過勞心是所至屬平生文字知
交頗不乏人然得失寸心知欲求實在心折者四海雖遙
屈計不過三數人耳自蟻兄去世同譜老友吳中止有馮
林一兄而已今又於四月十二日召赴修文矣此外惟老
兄一人而又遠在千里以外祇憑書問往還相見不知何
日言之殊惘惘也前書擬刻先秦文字鄙意總不如仿薛
阮二書之例就現有拓本增補其未備而精刻之此亦一
代必傳之作若必刻意求工轉恐因噎廢食吾兄於金石
之學在今日實爲海內靈光收臧之富尤爲夔絕今古先

秦文字之傳斷惟執事是望翹盼棉料紙特先將紙樣寄上如合式可以照購價遵來諭與偉功算取可也先後所惠手劄均已粘裱成冊容屬敝友錄出再寄承詢各件病中未能條對統俟續陳外黃忠端公楹帖墨拓一聯乃仲復舍親借刻者附寄鑒賞鰈硯廬仲復齋名也

又

月之望日曾肅寸牋寄輪船局遞至惠豐典當舖藜堂兄轉交未知何日得達爲念一昨由偉兄處送到浴佛日手書知前患已瘳眠食增勝弟兩月以來病不離身痔疾雖小作卻無大苦而苦在大便燥結非七八日不解解則

非大半日不得了遇此一日百事俱廢而身子亦因之狼
狽不堪種種暮年衰象也棉紙前曾寄去紙樣如合式當
續購此紙在吳中已推上駟若再要細絜揉之無聲者不
可得也承示新得秦百二十斤鐵權斯相書詔則刻於銅
版鎔鑄合一此平生所未聞者拓本字雖漫漶其明白可
識者則皆遒勁秀逸自是斯相手跡無疑吾兄古福洵爲
不淺也能刻一全形加以註釋俾好古者獲此創見尤爲
藝林快事也翁叔均並無官印續攷不過叔均在日見有
古印便乞印本所收亦止唐宋元明官印數十方而已
所知如此胡氏泥封目錄不知其詳尙乞明示以便轉索

所需秦金九字詔版容拓就另寄

又

前接五月十三日所發手書辱承垂念拳懇臨風三復感
不去懷秦鐵權拓本二紙領到細審制作實爲創見當日
必以鐵質之粗細字難刻特稍凹其地而以銅鎔之仍磨
平鐫刻可見秦時制詔凡刻於器用者其鄭重多如此迥
非後世出於工匠手比也物必聚於所好吾兄愛相斯篆
迹搜羅秦金不遺餘力今又得此瑋寶金石信有奇緣真
令人健羨不已瞿木夫古官印攷證昨得伯寅書知其嗣
君瞿經孳樹鎬已在西安授梓去年經孳曾回里門或覓

得原稿真快事也因兄念之甚切故特馳告攷證頗爲詳
覈然半從顧譜影摹所釋亦本諸顧譜及山左金石志等
書居多以兄之眼力他日見之未必歎爲傑作也載籍極
博傳世者大抵多醜疵互見欲求毫無遺憾豈易得哉胡
氏緝泥封目錄容詳訪再復當今刻印能者絕少白文尙
有漢文可仿朱文則古篆不可識宋元宗派專尙工秀學
之頗不易見長做鄉丁黃奚蔣及曼生諸君尙不失古意
而近日治印者畏難取巧其朱文全學鄧石如一派惡俗
難耐倘尊臧泥封與子苾先生處所收合刻行世俾學者
奉爲楷模則嘉惠藝苑洵非淺鮮四月望日之書係托惠

豐典轉交乃已及一月未達或遭浮沈現向信局根查幸
弟先後奉致之函卽隨意拉雜不屬草者亦必於緘封時
交子弟或家人輩錄出然後發行蓋我二人相距既遠年
又均在六十以外凡有書劄往來非勘析文字卽琢磨道
義從無寒暄貢諛之語縱使筆墨潦草此中亦自有真性
情在故不忍棄而不錄也前書大約已失特命家人照錄
奉寄弟交五月後孱軀稍好然稍一勞動卽有不適長夏
無事焚香執卷之外聊以書畫爲消遣而已亦不敢以著
述之事耗心血也手此布肌千萬爲道保護不宣

又

前月初九日專肅數行附有古瓦當文七種計十四葉又
彝器圖釋二部託偉兄轉寄未知何日達覽一昨奉前月
十九日所發手翰欣悉道履康勝動與吉會弟交秋後屨
體又常有不適已成習慣委心任之而已吾兄篤耆古學
精力又足以副之此殆天欲成全吾兄爲一代傳人必非
尋常儕輩所能跂望也所示叔未丈舊藏古鉅文此鉢在
弟處其餘之印因未得印文無從檢寄特將弟之得於清
儀閣者另印二分寄上倘欲入印舉須借原印望示知當
交偉兄帶上卽由偉兄帶還統候進止

又

前月十九日惠書偉功兄親自攜來其時正赴家鄉省墓
順便就醫故未把晤昨歸又奉廿二日續示兩函開緘維
誦知先後所寄各件均邀鑒納承寄三代古鉢文五十紐
又子振兄摹本二十六紐瓦文題字七紙孟爵拓本一紙
均已一一照領謝謝子振所摹各鉢雅有古趣兩壘軒三
字尤妙軒字南中自家讓之故後絕少解人從前翁叔均
喜用鐘鼎文字章法頗合惜太稚弱無古致不逮子振遠
甚弟有青田印石與此大小相似當託偉兄帶上奉煩如
樣刻之印文一紙後信附還不遺失也博易古物昔蘇米
諸公常爲之蓋一轉移間各愜所愛亦翰墨快事惟弟臧

古印不及兄四之一此數鉢當日得自清儀閣頗自珍惜
不輕示人因兄編印舉弟處臧印以道遠不能寄止此數
印攜帶較便而又有偉兄之穩實可靠故擬託其帶上明
春偉兄南來即可攜還將來兄處多印出數十百分與已
臧無異也經經之性與友朋交雖極不要緊之期會亦從
未敢失諾況與我壽卿老友三十年文字至誼安有渝約
之理偉兄到古鉢亦到請毋懸慮也日函鞞神瓦當爲轉
索數分奉寄何處出土亦當詢之所需秦量拓本遵奉二
十分又兩齊疊精拓各一分又唐龜魚符四種並呈清玩
古私印印本一時未能報命明春擬將古官私印印出二

三十部必當首先寄呈鑒定賤名古印中常見從前筱瀝
兄曾贈一紐往年何伯瑜亦有一紐均非精品承示之朱
文印亦未愜心此等辟邪紐失子存母印弟有十數紐其
中劉勝姓名者屢見按劉勝漢時已不止一人此印又似
非兩京物兄有攷證否弟自交秋後常常生病不出戶庭
四旬餘矣近日咳嗽尙未已而大便又極燥結七八日一
更衣艱苦異常承示蒼朮丸不敢輕服職此之故每讀兄
來書深佩好古之情老而彌篤筆下亦洋洋灑灑滿紙精
神尤難得首尾無一率筆與弟較真有松柏蒲柳之別且
羨且愧孟鼎聞左相特製一車從關中送來此可爲伯寅

慶也尊臧古鉢五十紐洵爲奇麗之觀惟內有一二印如
罽毼上器似非三代文字兄以爲如何

前人論印輒曰秦漢今兄以三代古鉢另編成集固由卓
識然非收臧之富如兄者則亦不能成也

宋史紀事本末七十二卷建炎三年金粘沒喝欲殺洪皓
旁校曰此真忠臣也目止劍士且爲皓請得流遞冷山可
見劍士一官在唐宋尙沿其制

又

前奉九月廿三日手翰展誦之餘如承謦欬所論璽印篆
法刀法於古人精神命脈所寄可謂洞見癥結曾出來牋

與張子青尙書及潘季玉李眉生杜小舫諸君觀之無不
擊節稱善咸謂名下果無虛也佩甚佩甚弟月初赴婁署
小住半月中間又病四日幸無大害歸來適天氣驟寒瑟
縮窩居孱弱之軀頗不能耐欲以書畫消遣又苦手指僵
澁令人悶損茲乘偉功兄吉旋之便託渠帶上桂未谷說
文解字義證三十二冊此兄去年所要者久無以報茲將
舊存一部先行寄上祈查收齊疊拓本四十紙雖用棉聯
紙而搨工未精不足以備投贈倘得如子振兄其人重模
一通必有可觀家讓之兄手撫相斯二十九字特檢寄二
紙鑒其優劣如何青田印石一方篆文一紙敬乞子振兄

鐫刻古印六紐又蛇紐一印共七紐託偉兄面致望兄屬
世講輩多印出數百紙明春仍交偉兄帶下是荷又蛇紐
一印似是漢魏六朝之物篆文尙易辨苦於無攷鼎字或
釋禱或釋神畧毒石禱惡木神則訓爲木之自斃皆非美
名而制作奇古釋其字義又似是官印特寄求攷示至感
古鈇鉢印卽鈇無疑筮釋都亦有意義都之古文如是也
此外二篆皆作卍形甚奇殊不易釋如有所見知必示我
也南中自兵亂後各項皆劣所需牋紙樣屬將弟所用者
各寄數葉茲特檢呈大小百葉其交魚符長壽鈎紙因見
兄來書所用絜白可愛特倩鋪肆照印初次尙好第二次

便不如前矣非刻刻棒喝不能振其聾聵也如是如是竹
朋兄所著續泉匯如已刷印乞轉索一部茲先以拙著彝
器圖釋四冊奉寄望致竹翁鑒正所寄各件開於另紙統
希查照點收

又

尊論辟邪紐子母朱文印以臧有張遷李翁爲漢時著名
之人此印似非漢以後物云云惟弟生平所見此一種印
形式旣大制作篆文俱少古楸之氣兩漢去周秦未遠流
傳各印間有朱文具存古致與此一種印迥不相類古今
人同姓名者甚多卽如劉勝一人見於漢書者有三不能

不以漢實之然攷其形式制作朱文不特未必是漢恐出六朝以後亦未可定故鄙人於此一種印另歸一類向不深取未知尊臧張李二印形制如何弟臧有辟邪紐數印或塗金或銀質紐制精妙篆體白文古整形式大小不及此一種朱文印之半似一望而知爲兩京遺物也惜道遠不能各出所臧互爲印證聊借管城用當晤對不一

又

去冬韓偉功兄旋里託帶上一函附有古印書籍等件不知何日達覽殊切記念流光如駛倏又節近清明遙想道履安和瀛潭集福弟冬春以來常患咳嗽近日天氣和暖

精神稍振嗽亦漸已但得入夏後不增他疾如天之福矣
聞兄每屆隆冬嚴寒便深居內室不出戶庭豈效東坡先
生冬至前後蟄伏四十日爲養生妙訣耶竊願聞之偉兄
何日來南自其行後我二人尺書罕達落月河梁相思綦
切想彼此定有同情茲姑以此書交應敏齋廉訪用官封
發遞託東省大吏衙門轉致如得速達則闢一郵書之境
亦殊便當大約封裏稍厚者須防爲驛站乾沒不可附入
也竹朋兄去冬書來以全集見惠始知昔曾在蘇州顧湘
舟齋中讌集數次事閱三十年迴首前塵竟似隔世昨日
有覆件徑遞都門矣

又

前月廿五日寄奉數行交輪局轉遞未識能否速達發信
甫三日偉兄已到晤談別況備悉兄去冬體履甚健惟值
國有大事地方官造門就教諸增勞動比屆暮春想眠食
起居定益健適承惠寄洋法照冊石印刻版銅印及古玉
各件均已領到古印七紐俟夏間妥便寄下謹如來命子
振兄摹刻木版可謂精絕石印三字饒有古致代購石價
容匯繳王鹵泉兄治印全仿漢法洵爲近時能手比諸翁
未均有過之無不及也薄具潤敬後便匯寄古玉二件容
當留意報命承示用洋法縮照彝器及書畫各圖此事南

中已數見不鮮倘因古碑碣字大而欲縮小刻之則此法甚妙工省而又能一絲不走比之賈師憲門客刻玉枕蘭亭有難易之別矣惟不能耐久久則西洋藥水之力漸化將成沒字之碑兄如作遊戲筆墨借爲消遣則可倘欲藉以垂遠則不可附去縮照麻姑仙壇記數葉乃何子登太史所贈者太史精於此道初頗著魔聞近亦意興漸衰矣此數紙閱時不過三四年字文已大不如前再閱四五年必更模糊也孟鼎居然爲伯寅所得獲此瑋寶洵稱奇緣弟近日身子尙無不適惟精力不振伏案稍久便思輟筆故作答稍遲知在垂念特先泐數行達意不盡之言統容

續布承賜名印未能滿志留之無用竟如尊指繳上老年
至好肺腑相傾博易投贈凡可割愛者不妨推陳出新各
適其願其不忍舍者亦當直告免得蟾蜍硯去淚滴老顛
也

又

前日從滬上歸來奉讀手翰並蒙惠寄南北朝殘石拓本
十二種又三種各繫題識不但殘石妙蹟得未曾有尤難
得吾老友手書親題當卽命工裝池稍成橫幅懸諸齋壁
如見故人歡欣寶愛匪言可盡敬謝敬謝弟之赴滬欲就
西醫修補動搖未落及蟲蛀牙齒因舍親龐君治之有效

故特仿行不意徒勞往返全無益處大約老年牙跟已鬆
不比少年修補難期有效也蒲柳之質望秋先零渾身是
病無從醫起幸此次到滬往返旬日勉可支持已爲大慶
也老兄去秋得女今春得男數月之內適符一索再索之
占非精神十分康健充足曷克臻此洵福壽之徵不特天
上麒麟降生公家爲可喜賀已也弟膝前現有五孫兩重
孫終歲杜門筆墨之外日與孫曾調笑取樂此亦晚年愉
快之境不敢不知足也宋文公易繫辭本義殘稿六十行
拓奉法鑒此後輪船局帶信殊爲快便酒資例給之外多
寫另加二三百文則必首先投送決無遺失若函封過厚

則千文亦不爲多也前函有老友手題各拓本在內雖再多數千文亦欣然不吝幸勿爲慮

又

月之中旬接四月廿八日手書並六朝石拓四種碑陰殘拓一種石拓字法旣精美人物畫工尤妙到極處世傳武梁祠畫石及各造象從無見此秀麗之筆比之前此所惠十二種更覺可寶亟付裝池懸諸座右覺一種古色古香益溢几案令人玩味無窮歡欣感謝何可言喻承諭朱文公繫辭注稿石刻住筆處似力稍弱秀韻多而嚴正意畧少疑鈎刻或未盡善具見法眼弟於初藏工時亦曾與奏

刀之錢君言之渠云由於捶搗未精另易綿聯紙精拓一經裝裱頓覺筆力增勁與原本竟無差異茲特另拓五分奉寄望以二分轉贈鹵臬子振務屬付裱精神自能煥發也又金器拓本二紙其篆文有未識者乞爲攷示一決眞贋另具白金八兩以二金償子振石價餘六金分致鹵臬子振聊爲尊酒之資不足當潤筆也

弟

交夏以來總算健

適賤軀本來孱弱廿餘年浮沈宦海遭遇多故憂能傷人此日僂然獨存已屬倖事且人之秉賦厚薄各有不同做親家顧子山新從甯紹歸來不特精力健舉鬚亦無一莖白者渠長

弟

半歲衰旺之不同如此偉功述兄往年交冬

畏寒常在內室獨去歲體履康疆神明增勝不復深居謝
客聞之實深抃慰李竹朋兄四月間來書云末疾未愈右
臂不能握管信由令郎偉卿二世兄代筆海內同志本無
多人三十年舊雨尤不可得相見未期只有憑管城君通
意代面而已餘續布不宣

又

六月廿八日奉是月十三日手書並六朝石刻精拓十種
越四日又從偉功兄交到十七日續示一一領悉前後所
惠石墨多種隨到隨付裝池懸諸齋壁挹其古趣足爲運
筆之助非良朋見愛之深安能在遠不遺有加無已欣感

欣感弟向不畏暑今夏南中奇熱爲數十年來所未有數月已來不出戶外一步賤體尙無不適精神之不振已成錮疾調攝得宜漸少病痛而已欲求如兄之老健非所敢望也所需做臧各金器拓本秋涼必照來單拓以報命決無遲誤尊臧魏正光曹望悳造象欲乞再惠二分子貞兄所書聯句類摘前賢五七言長律中偶語丙辰乙丑下榻做齋或取涪翁詩集或取復初齋集隨繙隨寫自云生平所書楹聯從無重出之句蓋古人詩集中偶語取之不盡也其集稊帖坐位帖弟曾代爲付梓僅有一冊遲日可以寄上順之兄有說文蠡箋二冊係榕臯先生所著屬呈左

右容一并另寄輪船局包封過厚不能攜帶也尊論治印之法確是名言鹵泉兄擬爲弟刻龔尊千金後世善寶毋以與人十二字聞之喜極止須刪節用此十二字孝王句不必用也已備大小二石連同前書三冊交存偉兄處遇有便人帶上茲奉去近刻魏文靖文向帖墨拓又蘇州上方山寺塔盤詔分書巨字拓本各一分均乞鑒定

又

前月初五日肅覆寸牋附有近刻魏文靖文向帖上方山寺石盤詔墨拓二分交福興潤輪船局徑遞不知何日達到深以爲念弟自前月中旬感受風寒初患瘧疾繼復咳

嗽大作至痰中帶紅雖卽漸愈而嗽仍不止胃納減少氣
體因之大困在臥室中亦須持杖而行日來雖覺稍健精
神終未復元故此一月中未修尺素茲奉去順之兄屬寄
說文蠡箋二本拙刻楹聯集帖一本外又附上印石六方
均交存偉功兄俟有便寄上否則由渠冬間帶呈也印石
乞轉求鹵泉兄刻或分一二石交子振兄刻亦可大抵治
印之法仿漢則必求章法整密饒有書味爲佳若仿先秦
文字則又必古致厯落如鼎鐘彝器款識一經兄指定未
有不臻妥善薄潤另奉也所需金器各種拓本一俟病體
爽健卽當監拓寄上不遲誤也

又

前奉九月廿七日手書欣審道履康勝弟自七月中旬偶
患采薪並不甚重乃二豎作祟驅之不去南中無好醫生
平生又不信服藥遷延至本月初間始獲漸瘳現已眠食
如常惟精力不能振作耳知蒙愛注謹以奉聞印石重寄
大小二方其鬪尊千金一方請轉致鹵泉兄刻邊款敘明
此十二字兄所刻贈以志友誼金器共拓奉二百廿七分
計紙三百七十二葉連同各書籍及寫對筆詳開另紙望
照帳點收南中雖不乏好事之人然浮慕風雅者居多迥
非亂前可比尋常捶拓器物止有兩人一李錦鴻較爲擅

長已作古茲之齊巵六分煞費工夫始成中間紙破字滅
拉雜摧燒者居大半至於捶拓方法鄙人於此中亦頗講
求叔未丈當日所有拓本皆出張受之胡衣谷之手此二
君弟俱熟識衣谷館在弟處多年大約拓詔欲求精緻非
工夫到家不可此外考究紙墨而已無他道也此次奉寄
兩巵墨拓卽令張受之輩動手亦未必再能精於此矣前
所寄印石或有裂紋不易奏刀者儘可將原石擲還其乙
亥改號愉庭用此章法
六字較易一方務乞鹵泉兄刻之附奉白金
八兩懇酌贈鹵泉子振二兄聊爲歲暮尊酒之資不足云
報也楹聯中清在亦亦字與掖同論字體本象人左右兩

掖形若必依說文改爲篆體作𠄎則眞篆相雜不類故不
遵改東洲草堂詩集當日貞兄分贈各友無多南中無覩
處特將弟所臧者奉寄何廉昉集蘇詩聯對二冊一并附
贈廉昉已故此書無處可索矣唐鼎拓如有副本望惠一
分無則亦可作罷世間希有之珍弄感者不能不祕卽以
敝臧兩疊亦可謂烜赫於時爲世大寶且銘在腹內拓極
艱難兼之器有微損尋常親友來求每每以無應招怪然
二三同志如竹朋鄭盦子年諸君見索則固未嘗拒也至
我篋兄所需則一再應命亦欣然不靳也執事常云天地
間寶器其詔識皆古人精神命脉所寄守之者能精拓傳

世則器傳人亦與之俱傳弟深服此言蓋吾人之傳與不傳雖不係此而所論實爲通達至確也順之季玉均屬筆道念順兄交到說文蠡箋兩部西圃詩集二冊統登另紙承許製聯見贈欣感欣感敝居東墅小有花木泉石之勝倘蒙譔言書寄懸諸亭館此間來往親友觀之亦畧見我二人卅餘年金石文字之誼也海內能擘窠書者頗少其人亦欲藉此以覘吾老友腕力奉爲模楷也附去宣紙如不能應手請易之可耳茲乘偉功兄旋里之便手此布肌用代促膝之談

又

前月二十日因偉功兄遲久不至特肅數行託勒少仲廉
訪用排單附驛遞達甫發而偉兄至矣交到手劄十八葉
古鏡拓百七十三種臧古目錄一冊周距末拓瓦字拓鹵
泉刻印並擲還古印七紐一一照數收領感幸無旣敬審
道履冲和闔潭納福孫世兄高擷芹香此鵬程初旒也轉
詢秋闈聯捷大小阮同步木天韋平世業克繼家聲允堪
預賀而弟尤有以手加額者吾兄年逾六旬兩年之間連
賦弄璋不但添丁可喜亦足見精神充滿福壽是臻此子
年鄭盦書來所以嘖嘖稱道不置也清卿年力富強好古
旣專用志又銳此次視學秦涼正當兵燹之後金石之散

置於人間者未必有人過問而清卿輶車所至校試之餘
四出蒐羅三年之中所得如此之富此固金石緣深造物
特以所處之境玉汝於成也關中金石自燕庭先生搜括
之後閱三十年而清卿繼之從此冀北羣空矣至蘇氏弟
兄所作或不免有麁混問近有張姓弟僅見拓本未覩原
者亦善作偽器未敢遽下斷語也尊臧古鏡至一百七十餘種閱之令
人咋舌弟臧古鏡一百四十餘種自以爲豪故有古鏡錄
之刻今成遼東豕矣現已輟業昨日寓書清卿因渠臧鏡
亦有七十餘種將來合三家所有選其文字之至精者刻
之亦可以補金石書中專刻所未備此事當屬清卿成之

鄙人學淺見寡精力又不濟不能卒業也鹵泉鐵筆精絕而乙亥改號一印尤爲盡善盡美現屬友人縮摹二小印僅得其形似而已此外各印並皆佳妙望先爲道謝承示譔贈聯句欣感之至務乞書就寄下契闊過久相見未期手翰遙頒俾懸座右聊當晤對慰此懷思此昔人鑄金繪象之意不僅在筆畫之工拙也弟近狀如恆前月廿三日到婁東小住半月署中均託庇平安足紓垂注蘇寓花木不能久離主人故初十左右卽欲歸去先此布復敬鳴謝忱

又

月之廿四日奉到八月廿四日所發手翰並楹帖爵拓欸
識冊子一一收明賚書人促取回信甚急當卽肅復數行
交給帶轉不審何日達覽一昨又奉八月十二日來函附
有範拓百六十紙但覺古色古香溢於几案謹卽分裝四
冊並將手校目錄裝於每冊之前爵拓另裝一冊先後惠
寄瓦當文古竟拓均已裝池共成十冊連各欸識拓共十
六冊將來尚擬託韓兄帶呈求題數語永爲家寶昨復鄭
盦書論海內收臧之富如吾簠齋兄者不特當世無匹直
欲空絕前後至難得者心思縝密精神又足以副之卽觀
所寄範拓百六十紙手定目錄何等詳細洵福壽之徵也

可喜可慶竹朋兄故後聞嗣君枚卿比部推秋審處能手此鄭奩書中所述後起有人可無遺憾子年頻有書至云舌本木強而箸書之興尚好清卿年內可以到家渠雖在壯年得意之秋而功名之心頗淡大約在家有三四月之留可以縱觀新得上下議論亦一大快事也所需印稿鏡拓等件容緩圖報命因兵亂以後吳中講此道者甚屬寥寥稍有薄技便赴滬上該處最號繁盛覓利較易也貴省今年亢旱知兄捐貲濟賑並籌辦施粥撫恤各事備極辛勞幸後得甘霖間有補種收成刻下想人心安定兄亦可釋此仔肩仍事箸述矣尚望勤加頤養爲道自珍是所至

禱

又

月之初八日接九月廿八日手翰附來六朝石刻漢甄瓦
鈇拓紙七番此書相距旬日卽至可謂快極一昨又奉本
月十七日續示附有秦詔圖刻十六紙瓦鈇一紙展誦之
餘足徵關念舊雨不遺在遠臨風三復感幸交至秦金文
字世不多見阮文達臧器之富而積古齋中止有陳秋堂
拓本欲求一器而不可得今尊臧至十數器且多精品洵
可謂集斯文之大觀矣謹已另裝一冊不以他文羈入常
置案頭晨夕披對亦翰墨中一快事也敬謝敬謝所需敝

臧秦詔十二字重墨拓本因拓工赴嘉興未回久待不至致未報命清卿年內計程可以到家晤時必以兄眷念雅意詳告兼出尊書示之渠企仰左右屢有書至必殷殷述及佩服甚摯將來或繞道奉訪未可定也後周布泉范背文篆書兩行頗有古致附奉一紙以視尊臧所謂泰山一塵也二百范齋與二百竟齋印早已刻就以未愜意故不寄閱今觀鹵泉所作果不逮遠甚姑奉省覽金器各拓古印稿本必有以報不敢失諾

又

客歲底奉嘉平五日手書並匄篆各拓謹悉一一獻歲以

來遙維慶集德門楹膺多福吉貞之契金石同堅幸甚幸甚
甚旬鉅文字奇古似是三代之物巨公侯三字則與兩京
碑額相類當是漢刻地不愛寶日出無盡惟有緣者遇之
執事收藏雄富夔絕古今而猶博訪廣搜孜孜不倦遂使
墨林瑋寶不涇而至固由古福亦有前緣所惜睽隔過遠
不獲一拭老眼摩挲共賞也清卿歲底到家新得甚富且
多精品渠大約四五月間北上執事拳拳之意已爲轉達
彼時或迂道奉訪飽觀清祕亦未可定弟交春後咳嗽大
作至今未已孱體素來畏寒瑟縮擁爐不敢窺戶外一步
修牘有稽職是之故所需秦詔殘字奉去拓本五十葉乞

嘗收印稿三四月間必可以成成則卽日奉寄稔知兄之
盼望早至一如弟之望粟拓也鄭盦想常通書子年舌本
不良亦屬老態前寄清卿書同日收到渠現赴松江探望
親戚所獲各器其精美者知必寄鑿故不瑣及

又

月之初四日奉到七月十六日手翰展誦之餘稍紓勞結
敬審道履綏和闔潭納福承惠齊刀甄范三紙已付潢池
張諸壁間挹其古香如對良友量拓四紙當與古匊文字
合裝入冊先後所惠古匊止有三百餘種今示得有八百
種聞之神往不敢請全分望擇其篆文明顯者賜寄俾得

擴所未見爲幸弟於四月二十日奉寄一函託偉功兄轉遞附有郵筒六百此件似未徹覽嗣因偉兄來書云欲暫返東省往還不過兩月故奉到五月八日書迄未作答然於都中知好通書及南方親友敘會固未嘗不拳拳於左右輒道念吾簠兄不能置也茲有舍親沈仲復方伯欲求法書小額楹聯備有宣紙託爲轉懇附呈號鐘頌敦全形拓本二分統希鑒入傳古盛事甚盼覆音海內金石同志莫不推崇執事如衆山之有華嶽不可尚已牛耳之執吾簠齋亦無容讓也南中親友欲得窺尊臧全豹同於饑渴來書以加印注字爲難此本最費心力之事能得將金器

印注一分其一分即可照錄此後並可依樣傳寫無須再煩手腕矣印或見寄一二紐或由此間從印本倩人仿刻均尚易辦也清卿到京甚快鄭會古興尚濃惟子年兄舌蹇不能說話止能筆談今年接其三次來信而晚景頗不適意幸箸書尚有興會或所患可以望瘡亦未定也江南丹陽縣屬有張從申書改修延陵季子廟碑訪之數十年近始得之碑在丹陽縣境之九里鎮該鎮距古延陵鎮九里故名離縣城三十餘里地極紆僻歷任丹陽令皆未知之季子廟建自東漢極其崇宏有晉殷仲堪梁王僧恕碑記惜已佚而唐人殷仲容重書孔子題墓十字碑則巋然

獨存張氏此碑書於十字碑之陰孫淵如錢竹汀皆本省博雅通人既不將碑之地名詳註又誤將碑分列爲二而不知實止一碑也該鎮鄉民以碑有神護關係地方灾祥從不許人捶拓故得字文完好如新發於硯此次倩人往拓固已大費周章也附寄二分又古玉冊拓本兩分均乞
答納玉冊尚求攷示

又

久不通書想念之忱彼此當有同情也新春以來遙想福躬安泰箸作日新世講輩文章舉業益臻精進如頌爲慰弟自去秋九月初抱恙當病勢危劇之際諸醫束手幾無

生路纏綿至兩月有餘始得託庇漸瘡刻下眠食早經如
常唯精神總未復舊客冬積雪凝寒眞爲五十年中所無
賤體本弱病後值此奇冷擁爐偎熱寒縮如蝟不能一親
硯削韓兄回里僅以印稿十本託其帶呈未附尺素想韓
兄定必面陳亮邀原鑒比來春寒尙甚不出戶庭已有半
載矣親朋過我概未一答馴成廢物眞可自歎尊體知必
康健清卿自晉省來書云兄搜得古匄器先後有二千種
之多並有完器數種此眞發千古未有之奇渠欲作古匄
釋文四卷已屬其早日繕清寄來擬爲授梓此間李眉生
廉訪鴻裔欲得尊臧金石各拓本前曾專函奉求未知近

日已拓齊否中間或有參差亦無妨礙惟金器爲正宗不可少耳弟因醫生至切叮嚀謂筆墨最耗心血必得暫輟度體氣可望康復念平生別無嗜好舍筆墨無可消遣但能不效前人苦思力索嘔心挖肝則亦無損天和奚事輟爲質諸左右定以爲然

又

月之初九日韓兄至蘇奉到手劄三通一爲二月十七日書一十八日書一廿三日書附來古匊拓本三總包計二千三百卅三種又瓦量十字拓正副二紙又古鉢拓二古印一葆調拓一浣手展誦但覺古色古香迸溢几案以千

古未有之奇文擴千古未開之眼界喜心翻倒感幸非常
正欲肅牋報謝越七日又奉三月初六日續示附來新獲
古匄三百餘種合之前拓通計二千六百餘紙中有文字
奇古妙至不可思議不可稱量者陽識各種尤有古趣愛
玩不能釋手現擬酌分四類用清儀閣石鼓亭裝款識拓
本之法如訂書籍式下用襯紙挖嵌取平最便觀閱工費亦較省以篆文明顯一二字
者爲一類字文較多者爲一類陽識者爲一類其模糊莫
識筆畫難分似字非字不忍汰去者合歸一類如此分別
存留使閱者便於瀏覽亦易於攷訂否則件數過多披閱
一過已非盡竟日之長不能終卷轉恐因多致厭負此奇

珍清卿所謂以式分不知如何分法竊願聞之渠正月十七日自晉省來書所辦鳳陽二屬賑務餓殍滿路屍骸橫陳傷心慘目有耳不忍聞者關外之行設竟不能免則必先送家眷回南四五月間云可把晤家有老母此行非其所願且俟歸家再與商行止自以不去爲是恪靖相待甚優婉言辭之必邀體貼好在大功告成此去亦不過爲善後事宜耳鄭盦二月間頻有信至以都中亢旱望澤甚殷米薪翔貴饑寒倒斃者不少心殊焦灼古興亦因之而減南中自前月下旬至本月旣望勃戾彌空簷漏如瀉田稍低窪者盡已淹沒幸五六日來天氣朗晴底水漸退就此

開霽年收尚有可望以江南農事重在秋成也如天之福
但祈雨師早稅西北之駕普天同慶矣所需唐龜符茲先
寄去三分櫺拓容續寄以無現存者印稿謹當再贈去冬
所寄者因欲趁偉兄之便草草裝訂病中並未一看現在
次序稍有移易去冬僅先成二部一寄兄一自留吳門本
爲風雅薈萃之所亂後迥非昔比不但好手難覘卽降格
以求亦不易得每承兄見寄者捶拓之工緻印章之精整
紙張之潔淨莫不各臻其妙更難得者先後所惠書問洋
洋數千言從無奪字亦無譌筆此不獨壽徵兼關福澤也
昔孫退谷八十餘歲猶爲尚書作集解論者謂其隱然以

伏生自喻今吾籩兄年亦六十餘矣久以傳古是任所臧
先秦彝器富甲海內茲復於荒郊瓦礫之中淘掘殘磚碎
甃遂使數千年前古文奇字爲祖龍所未劫許氏所未錄
歐陽趙辭所未得見者一時並大顯於世天之未喪斯文
特畀公以康強聰吉之年以擴此繼往開來之學此又非
退谷所能同日語也弟年衰學落讀書掩卷輒忘柳子厚
云每讀古人一傳數紙以後再三伸卷復觀姓氏旋又廢
失弟學不逮古人毫末而善忘則過之如之何其有成也
言之徒增愧歎而已

又

前月廿一日手削專函託偉功兄轉遞是日奉到尊諭蒙
詢善治嬰孩寒嗽驚風等方舍間及親戚家嬰孩小有病
痛必先用搜驚法其法以手推運此間有專門倚此爲活
者大抵穩婆薙髮匠一流人耳此外治之法一無流弊又
有婦嬰至寶保生彙編二書中間古方甚多亦有屢試必
效者諸證皆載無方不有家置一編獲益匪少特奉寄各
一部用備采擇近時醫生庸者多服藥萬不可不慎弟去
年秋冬大病若信服若輩方藥早從緩叟景老諸公在奎
宿宮中聽使喚矣順之兄令孫鶴庭孝廉志案由河南歸
來到家僅半月以傷寒誤投藥劑於前月廿九日去世順

之兄七十之年值此逆事其嗣莘芝在河南以道員需次
止此一子前科新貴山谷老人序謝師復遺稿云方行萬
里出門而車軸折可爲賁涕數語可移作鶴庭誅詞幸遺
有二子此則親知中可引爲解勸者也清卿已到保定回
南之說尚未能定因賑務未了渠本與天津道同辦轉運
不必定赴晉省去冬小有感冒爲庸醫所誤柴胡每劑用
至二三錢
元氣大傷至今尚未康復益見醫藥之不可不慎也

又

疊奉六月十三廿三兩次手翰欣悉種切承惠匄拓八幀
甄拓二幀謹已領訖匄拓精絕目所罕覩得未曾有令人

愛不能釋立付裝池稍作條幅張挂座右感幸無已辰下
 敬維道體綏和全堂納福南中夏熱爲近數年所無弟每
 至長夏以書課爲消暑計比來孱體尚屬頑健雖揮汗如
 雨而書課未嘗輟也此間金石同志歇絕幾二十年矣近
 有親知沈仲復秉成李眉生鴻齋均由廉訪引退現居林
 下頗能閉戶讀書酷嗜金石字畫收臧不少遇有著名之
 品不惜重值購之頌鼎眉生所得號鐘則在仲復處歐陽
 公云好之而有力則無不至者是也弟自以數十年心力
 所積弄臧雖不逮吾簞兄之富却亦可據以自豪故斂手
 已久亦力不能爭也間遇巧宗小品偶得一二亦頗欣欣

自樂聊以解嘲而已眉生先繳傳貲八十金因兄書來云
各拓未齊爲數至一千多種恐非旦夕可藏故收到金拓
二百餘種特先寄前數並非不欲窺全豹也現請將金器
各拓先行補寄其餘各種儘可從容續至一俟寄到則傳
貲隨時匯交韓兄可耳前函示有拓圖之友將古匊器完
者廿餘不完者卅餘補圖作小幅共五十紙工資每分若
千金云云此寒士生涯應請先寄三分以二分交沈李二
兄其一分則弟所求也五十幅中乞檢取一幅惠題數字
署一雙欸得者尤喜仲復行四前四川臬司眉生行五前
江蘇臬司仲復則爲執事同館後輩二君皆立品有學甚

慕吾篋兄者也弟之一分只須完好者廿幅其不完者擇
 詔字較精再得十幅共減爲卅幅而拓資照送沈李二兄
 處亦可減爲四十幅寒士多一分則費一分之工力也弟
 之一分務求擇十幅或八幅詮題數語俾知器名及出處
 也至懇至懇屬書所撰楹聯句甚雅切可作座右之箴謹
 當書就另寄不敢遲誤將來并欲求賜書一聯見贈勿訝
 其拋甄引玉也秦權乃仲復所得特拓一分奉上此虞山
 趙家之物法鑒以爲如何暑熱正盛伏惟箸述之餘順時
 保衛

又

月之初十日肅寄寸牋託韓兄轉遞計必卽達頃又奉到
本月初三日手書欣悉近體增勝攷訂金石之餘間及前
人書畫屬覓梅道人竹石小軸南中重元四家遺跡收臧
家不惜重值多方購取以不得爲俗其中眞贋雜出生平
所見眞迹頗亦不少愜心者亦止十數件而已執事主盟
壇坵風雅所宗尋常之品不必置論卽鄙人以爲致精而
彼一是非此一是非總以目見爲準謹當力爲搜羅倘一
時不得亦必向親友力索一二件以副誣諉俟韓兄北旋
時託其帶呈法鑒合則付價或易全拓否則仍將原件攜
還至妥辦法也寄園石拓乃張萃山所刻卽玉斧之尊甫

也亂後石已殘缺不全現惟玉斧有全本四十幀畫三十
八題跋二尚係亂前萃山手拓至精極妙中間憚畫十四
幀殿以華秋岳二幀餘則元明人遺迹風枝露葉宛然如
生可謂神伎玉斧致爲珍祕執事欲得請以移贈撰聯書
就奉正深佩語意簡質可作箴詔凡真能讀書好古者皆
可縣之座右因用鐘鼎文字重書一聯博笑前書有拋甌
引玉之訂想亦不忍却我耶印稿因玉斧又病歸尚須稍
遲再寄

又

前信肅就未發適奉七月晦日及本月初四日手札二通

古印拓三紙又法書楹帖一幅一一領悉欣謝欣謝法書
古趣橫溢卷軸之氣盎然得之甚喜惟無厭之求尚欲乞
重惠行書一聯加以題款以志四十年金石至誼想不我
靳也至爲盼切所示古印不知兄從何處得來竟至層出
不窮此間絕不易見清卿所得玉印篆文勁整正開小篆
先路清卿審爲六國文字不爲無見厥字鄙人釋爲瘞人
名魏有公叔瘞可證說文从土从畱省作聖古文作𠄎今
篆从𠄎正與聖𠄎省合乞兄釐訂教之前次所云傳古之
助因兄書來有年來拓費爲日用一大事云云故擬小小
補苴蓋爲此等事者多係寒士意在稍予潤色或得歡顏

並非以阿堵相溷也此間字畫價值雖昂尚可物色近人
小品篋中亦頗不乏如有所需望卽指示當圖奉報若由
弟檢寄或不合尊意徒增此投報形迹昔子貞兄喜收字
畫或以趙董及暉王諸迹見贈一笑置之若以黃石齋倪
鴻寶傅青主諸迹相貽如獲異寶蓋人各有偏者也粟拓
先睹爲快報瓊不敢食言至刊印之喻非敢測賢者也

一笑

又

疊奉四月杪五月初所發手翰並龜魚符精拓又新獲古
匊拓一百二十七紙一一領悉感謝無旣惟續寄寸牋附
有白銀八十兩託韓兄轉遞未蒙示及不識何日始達深

以爲念韓兄云今年東省雨暘應時大有康樂之象我輩
高卧林泉全在年豐歲熟始得筆墨怡情心無罣礙南中
眼下光景尚佳惟江甯及淮揚等處蝗蝻萌動挖掘收買
已有二三十萬觔但得梅雨連番始可殲此遺孽也清卿
督辦河間賑務暨挖井事宜約八月間可期竣事事竣李
相當有事奏留塞外之行定可邀免但恐因此改外轉嫌
過速執事關愛清卿至深不識以爲如何眉生方伯望補
寄金拓能以秦金先寄否仲復亦望惠書匾額甚勤皆託
切致也頌鼎拓本一紙乃人以重值得者特寄尊鑒不識
許可否甸拓續獲者中有奇妙之品數字筆畫細挺絕似

三代古幣卽照此傳形仿刻一印極有古趣此惟君家獨擅他人不能有也雋字亦佳然似兩漢人書且不能作印以末筆太長也寄來龜魚符已取一分粘於紈扇卽用尊書中語題數字頗爲別緻弟曾將舊龜魚符秦詔殘字粘於紈素親友一見愛不釋手都爲豪奪冬間韓兄北旋當以一柄奉寄兄見之亦必欣喜也

又

韓兄言旋曾肅寸牋附有古銅印存十二冊元人畫一軸未知何日澈覽爲念前月廿七日畢芬來奉到手書謹悉一一金石各拓及劄拓均已領到補交傳古之資八十兩

已代收另入買物細帳計算惟所開傳古目錄一千五百餘種檢點止一千三百餘種特將原帳寄核無須補贈眉老好古甚篤欲求尊臧小品拓本如龜魚虎符鈿印泥封善業泥象等等惠寄若干種以副所請爲感屬購物件無一不交內眷們遴選過目無如兵燹以後百物皆非昔比有未能如式者非辦理不善苦於無可揀選耳五色帶卻可定製然要半月之久畢芬留住七八日每日著本地家人同至市中好在家家認識多取到廝次送上房挑用也

弟抱恙至三月有餘尚未出至外齋終日聞經懺之聲營齋營奠不得清淨令人悶極姚君符兄三十金又誦鹵泉

四金又另備六金統入另帳以省冗敘鹵泉所需金器拓
本必有以報印稿恐須遲遲因玉斧自六月患病歸去至
今未到貧病交困石畫弟早助以醫藥之資業經過割前
冊幸勿寄還所致玉斧信件容爲轉交先代致謝此次畢
芬來滿謂粟拓必至愈我頭風詎又失望爲之一歎兒自
云若再不往迹同臧氏之以防弟不敢以此測大賢然四
十年金石老友忍令其望眼之穿恐兄一爲念及當有不
忍出此者耶至弟投報之物因金石古印兩門尊臧之富
振古鑠今泰山一塵未免自媿思欲以書畫小品爲獻又
不知兄之所好若如前年所需之冬心楹帖等類則做臧

四 畢車 月 月
三 月 月
三
頗不乏絕緻之品可以移贈也天已嚴寒病後力疾肅復
惟爲道保重不盡

又

不通音問三月有餘計韓兄日內當可來南盼念芳訊翹
勤彌切一昨韓兄友人某君專人送到台諭並甸器三件
畫軸石刻印石銀兩各等件一一領悉執事網羅散佚仔
肩斯文海內學者奉爲山斗咸謂靈光巋然爲吾道之慶
瓦量二件於先秦古器之外別有古致歡欣寶愛立即與
瓦登一器命工製座作案頭陳設香華供養日挹清芬不
啻與我簞兄坐對也弟年來每至秋冬之交輒嬰痰嗽之

症去冬因心緒拂鬱遂爲二豎所祟纏綿反覆直至今年
立春以後始得漸次向瘳現在眠食一切照常足紓愛注
三兒承潞 已於月之初九入都引

見乘輪往返不過兩月有餘知荷關念謹以附陳此次所
惠匊拓三百餘種中間有傳形半兩爲前番所無又有橢
形壽字可摹一起首印者能得鹵泉爲我一刻感荷無已
其印石無論長方俱可每見方石刻圓印皆用刀琢削而
成此可仿製也前後寄賜匊拓計已三千二百種一一編
次成書中間畧爲分類已詳前信清卿觀察河北一年以
後必可及於箸述蓋衙署關防公事外別無他鶩轉可專

心爲學年力正壯其所造未可量也奉上古泉拓文十四

種承潞喜收古泉所臧七八百種此數種得自海昌親友

家聞係孫古愚舊物中有數品爲古今泉志中所未見羅氏路史謂爲上古之幣竹朋兄古泉匯則列入周代應求攷定又三家彝拓本卽積古齋所載之器舊在吳中某家亂後流轉至滬爲粵賈購去客冬復出適承潞至滬訪得之無人捶拓此紙乃稚孫輩散學後所爲他日當另拓奉鑒也

又

前由韓兄處交到手書並古匊量器三種又近得匊拓等

件當卽專函肅謝託節署加封驛遞不知何日始達典籤甚以爲念賤體交夏後精神雖未能振作而眠食已一切照常足紓愛念前寄古泉拓本手工至拙大非眞面茲特另拓一分奉上伏求鑒定敦拓亦奉寄一分字釋音廣韻集韻皆音億玉篇快也爲意之古文並乞攷示此器爲方大令濬益所臧罷官出售爲兒子承潞購得之制作極精滿身水銀裏其黑如漆光可鑒人字雖無多亦敝帚之一也承惠古瓦量已配座置之几案滿插榴葵諸花感念嘉貺如對良朋恐前書遲達再肅寸牋鳴謝

又

不奉手書幾及半載屢次專人至韓偉兄處詢問近狀據稱接到家信述知兄赴山中經營葬事指揮料理必出躬親約須九十月間始得告蒞並知體履康彊起居健適聞之稍釋馳系茲於月之初三日接到九月十五日來諭亟取展讀附有古匄拓三百廿四種又十布六泉二十六紙得未曾有歡喜無量敬謝敬謝屬代致鄭盒各件卽交伊家書中附寄必可卽達承示春秋間家庭小有拂逆中年以後之人每有此種傷感六如四相一作如是觀便覺胸次灑然稍一凝滯便損天和此弟頻年親歷之境想兄亦早見及也十布見於前人著錄者贗品居多卽近日翁氏

金石記摹載中帝九百丁止介疑亦是僞當日清儀閣合
自臧及各處搜訪始得拓成十布全分其難如此未丈云
自小布以上各相長一分相重一銖文各爲其布名直各
加一百至大布長一寸四分重一兩而直千錢矣此布貨
十品也每欲得十布一證其說親知中汜未遇有收臧十
全者敬求取尊臧十布攷示其詳禱切禱切本日韓兄專
人來云一二日內卽欲歸去狀殊匆促茲託帶呈古官印
考錄兩冊尚是甲子年舊稿寫樣之人已早物故不及將
續得者編入因紐數無多去年趁彙錄官私各印之便姑
印十部謹以一部求正古泉一門向不留意近因竹朋子

年兩兄篤嗜鄭盦清卿復又同好遂亦稍稍討論欲求如
尊臧之十布六泉在南中雖出重值亦無從購覓也呈上
拓本五冊 兒子承潞得自同郡德清徐氏者泉既不多拓
又未繳兄試取一閱中有可以存錄者否園幣多種頗爲
罕見審其青綠篆文似非偽造他日當以數枚寄請目驗
定之劍俠傳刊本係故人任渭長所繪筆力古勁其人已
歸道山附贈一部用供雅玩

又

自去冬韓兄言旋久不得芳訊懷想之忱縈於夢寐月之
十八日欣值韓兄南來獲奉手翰雒誦迴環恍同晤對承

惠各種拓本一一領到敬謝敬謝中間古泥封五百餘紙
得未曾有尤爲感幸立即用紙挖嵌編次成籍便於繙閱
蒙諭粘貼之法雖可耐久而貼處高起不能平帖故仍用
挖嵌也漢魏六朝傳世之印類多白文治印者每刻朱文
輒學宋元並非不欲師古實以古印中朱文罕覩也泥封
爲古印之范可與漢魏白文相輔而行然非吾篋齋兄積
四十年心力冥訪旁搜斷不能萃此大觀倘得廣爲傳布
實足爲印學津梁不第供一時玩賞而已泥封攷畧尊處
如有副本乞借鈔錄未均棄世兩嗣君相繼云亡殘篇斷
簡盡化煙雲言之可慨張玉斧相從十餘年於金石篆刻

頗肯究心人亦甚有氣骨近年來病不離身至今春二月中遽赴修文家貧如洗上遺七旬老母續絃未滿三年一子方在襁褓有孤寡之累無期功之親經紀附身皆賴戚友蕭條苦况聞者酸心現擬集千狐之腋希綿一綫之延幸同人解囊已畧有成數撫育有資或不至流入餓殍然亦要看張氏家運也執事誘掖後進寄渠書件已不及領其子尚無知識謹將拓本售得十二金代封素紙簽書生芻一束連同手劄寄去俾志高誼且使孤雛長大知乃父在日曾受當代大賢所知生通音書沒寄賻贈死者有知必當銜感亮兄不以爲謬也謝信寄到再當附達古匄積

至四千餘種聞高屋三間業已儲滿抱殘守缺洵爲斯文
之宗不得以物聚所好論也古鈇承爲摹刻拓墨見寄欣
幸無已因檢取原印印於上方反正相生朱墨互映分貽
同好莫不叫絕昨已寄清卿數紙渠於前月十九在大名
舟次來書謂吉林根本重地從無以漢人參贊今者遭逢
異數膺此重肩不敢不殫竭血誠以身許國並謂中國虛
實彼族纖屑皆知當此防餉短絀自強之道在實際不在
虛聲卽此數語已操知彼知己之算知在惦念故附陳之
鹵泉兄惠寄節墨刀一仿古匄文壽字小印一領到懇代
道謝青田石舊坑本少近益難覓弟愛蓄田黃青田兩種

篋中尚賸十餘方未刻以閒章佳句甚少也至名號齋閣收臧各印已刻者百有餘方石質精粗互見讀來函有印石難求之語因檢舊臧六面方各種青田石四枚奉贈中間白色青田一對頗自矜愛石有暈紋爲青田之證另有老青田一方本來成對曾以一寄鹵泉鑄刻兒以爲佳故一并奉上伏希哂納南中兵亂以後百物翔貴骨董尤甚卽如印石一門所出者盡是新坑石質粗糙不堪腐目無論田黃青田近并壽山石之佳者亦漸少矣寄上漢建安弩機攷一冊鄙說市字亦未敢自信敬乞釐定示改爲懇外李申耆先生養一齋文集甫經刷印又馮林一顯志堂

文集說文解字均譜俞蔭甫羣經平議

蔭甫著作甚富先寄此種

陸存

齋三續疑年錄此南中親知舊友近刻特奉鑒閱此外經史子集重刻頗多如有所需望示悉卷帙若多當俟韓兄吉旋託帶可也又金石屑四本爲世好鮑少筠刻少筠爲淮北鹽官住居海州隘於聞見往年持此書就正業已刊刻竣事所費不貲不復置喙茲特寄呈聊佐長夏玩賞論其弄臧廁諸高齋直等遼東豕耳

又

前奉七月二十日手書賤逾甘葉情足千秋雜誦迴環恍同晤對並承惠寄各種金石拓本一一領到古匄文字愈

出愈奇本年七月間所收與王念庭甘字一器尤爲古文中希世之珍此外泉鈇泥封各拓類多綠字朱文精采炫目摩挲賞玩足以移情久欲專函申意祇爲家庭多故不欲以佛之事上塵清聽亦恐累吾良友遠道懷思代爲肩縶因之報章久缺亮荷原鑒辰下一陽初轉秋去冬來遙念箸述之餘起居安吉弟於八月間就養婁東小住署齋暇將兩月差幸秋收豐熟屬境牧平公私無恙對膝下孫曾撫案頭金石藉此自悅聊以解憂知兄垂念必深謹布區區用紓存注師田亩得蒙鑒賞益增寶重謝釋傳作器者之名甚確遵卽改爲傳亩十鼎是甲子二字子與召

伯虎敦^鼎筆畫雖小異而字形極相似古篆籀筆畫每有增損無足疑也鬲阮釋商象星形按說文賁行賈也从貝商省聲玉篇作賁參以籀文鬲字釋商似合惟詞意難通或釋作二字上从籀作商下爲貝如何抑從尊意作賞其義亦順𠄎早二字所釋尚有未安還求攷定承示新得漢鏡拓本弟於前年亦獲一面較尊臧鏡多四字制作之工兩鏡可稱雙絕謹奉拓本二紙捶拓非易幸此雋品此二紙其一同是玉斧手摹也重刻天一閣北宋石鼓文再呈一分以踐前諾署中無可檢寄有蘇元妙觀亂後新訪得石畫數種頗有古意觀基創始在晉咸甯中此畫不知作

於何年志書失載特寄二紙列諸高齋直同遼東之豕閱後一笑置之可也茲聞韓偉功兄卽欲北旋草草布肌未罄之言切託韓兄面述

又

客冬交韓兄帶呈寸牋流光如駛倏又殘春懷想之忱無時或釋一昨紀綱畢芬來賚到手諭亟取展讀語重情長溢於帑墨承惠寄金石各拓一百一十四紙一一領到匊文九十四種中間如師周京數種其文法又爲四千餘種中所創見地不愛寶古匊固層出不窮而老兄亦篤耆靡已遂使物聚所好愈積愈多亟宜類輯成書以詔來學闡

千古未有之奇亦不朽盛業也所示圖泉文曰其屯赤金
敝臧亦有二種銅亦近赤文極細勁篆法小異其古文也
此省也尤見古義特將舊臧圖泉十八種全行拓呈
中間有未識之字乞爲攷示傳也拓現存止有二紙昨倩
友人拓數紙因天氣潮濕陰雨墨暈失神斷不能登大雅
之堂姑附數紙容再補寄此也形制奇古弟擬如拙刻虢
盤之例摹繪全形專刻一冊後系攷證謹將尊釋首列請
重錄一通見寄以便授梓又增奉各金石拓十種登於另
紙統望鑒收所來樣筆一支當屬楊春華之子如式趕製
五支交來紀帶上楊子雖不得爲善工尚能如吳說之不

失家法在南方已推庸中佼佼惟事成於促迫恐未必能
得心應手特檢篋中自用者得大小羊穎八支羊紫穎三
支共十支李君實云書家得一好筆如壯士獲一寶刀得
一良墨如統軍者受千鍾之餉此筆雖非寶刀或差勝於
鉛請姑試之又十萬杵墨二挺係與勒少仲選煙合製模
範參用李廷珪金涂龍法頗費匠心閱年餘始成墨數觔
坡公云茶欲其新墨欲其陳此墨待至三百年後得遇好
事或不惜以黃金十笏相易未可知也一笑墨不能驟使
之陳茶則時值穀雨剛正出山蘇浙品茶以杭之龍井山
爲第一亂後茶樹遭踐所產無多盡爲土富某君隔年付

值購送官禮茶戶既得善價又可歲底濟貧故皆樂爲之
用大抵市肆所售皆近龍井山數十里所產買王得羊而
已然價已極貴矣弟處有舊僕家在龍井山麓每年必分
得數觔特寄贈二瓶試以在山泉水烹之其色香味當有
異於尋常者弟素性嗜茶常笑蔡君謨暮年多病愛而不
能飲則烹而玩之乃自六十歲後飲已漸減近五六年來
日僅飲三四小杯尚欲用武夷山茶間之南中山水清嘉
每飲龍井山茶必先觀其色次挹其香玩賞移時再辨其
味雖所欲無多亦間居之韻事也仰蘇樓花露亦南中著
名之品以一滴入茶香滿齒頰玫瑰平肝薔薇清肺不獨

適口亦於高年頤養爲宜并可遇便續寄也田子正兄鏤錯金銀可稱絕伎必當廣爲揄揚來件收存卽作到處說項之用附去足紋銀十兩乞轉交田兄除去償值外望寄文房中如筆筒筆架墨牀書鎮書尺印規各一件不敷之價示知補繳古鉢近有吳蒼石可任此役當屬摹刻再寄不敢忘也清卿到防以後因感受

殊遇頗有國而忘家之志去冬隻身行冰天雪地之中數百里直入金匪頭目韓邊外老巢與同卧起感化來歸此多年勞師費餉所未獲者一旦挈之而出民間歡聲雷動朝廷亦知其忠勇可倚乃名重招忌動受齟齬曾經陳情

乞退未蒙

俞允舟中敵國日履危機頗亦時深惴惴也知在塵念用特附陳

又

前月韓兄到蘇奉六月十九日手翰並漢器屏拓八幅各種金石匄瓦拓本又青田印石嵌銀木合等件一一遵示領收感謝無已弟杜門守拙除與二三親友真率會之外不復窺戶外一步前七月初二日姻家沈仲復循舊作會時正天氣酷熱藉以遣暑鑪香茗椀讀書平書幽賞清談頗饒佳趣昔人所謂縱有紅塵赤日不到松下林邊彷彿

有此妙境迨至斜日西沈始各趁涼歸去鄙人先行升輿
時但顧迴頭說笑忘却下有台階遂至失足傾跌頭面磕
在砂石版上左顴左額眉際鼻梁均遭磕破衆皆大駭鄙
人雖極疼痛而神志尚清歸家後合目靜憇知無內傷少
頃醫來所說亦同旬日後創痕漸平逾月始得脫痂七十
以外之年遭此蹉跌若非遠託蔭庇兼得天神默佑恐將
與吾四十年金石老友遽成永訣矣思之心悸刻下眠食
一切均已照常精力之不振乃老境使然耳清卿戀慕左
右甚至前將尊翰摘出數語寄去今接其六七兩月來信
一并錄呈文字道義之交形骸雖隔心性自孚固有如是

其摯者鄭盦所獲太室墳早有拓本寄來其陽識者尤爲
精妙土質脆薄竟得流傳於二三十年之後爲漢唐已來
鄭孔諸儒所未得見者一旦大顯於世亟宜肖繪圖式授
諸梓人以公藝苑業已移書諳勸之矣古鈿摹本奏刀者
以木刻爲難適有親戚送來福建印石數十方始得刻就
卽託韓兄寄上急索解人不得以視兄處先後所寄之件
捶拓之工緞紙印之雅潔無一不精妙絕倫海內龍門惟
兄是皈繼之者吾家清卿其度幾乎泉幣拓本十紙內有
數品罕見附呈鑒定田子正兄釦器之精眞欲空前絕後
承寄筆筒置之案頭無人不擊節嘆賞所來珠翎二合謹

當留存惜老醜不配用耳弟自六十歲卽以野服見客去
年七十歲除元旦四五日外冠帶束諸高閣久之已成習
慣人亦憐其老病往而不來亦不以禮節相繩自慙亦自
笑也

又

數月不通書問懷想形於夢轂比屆冬令氣候嚴寒遙維
福履綏和全堂集慶珠蘭玉樹益譽增榮如頌爲慰弟自
七月初二日在沈舍親園中傾跌之後迄今已及半載尚
未出大門一步體中雖無內損而蒲柳之資難禁風露稍
有感觸病卽隨興交冬後左足又患濕瘡舉步須人扶持

近日痛楚少已而濃水未盡汔未收功終日瑟縮擁鑪憑
几靜坐除却觀書竟無一事可爲每念兄康強純固縝密
無間常取先後惠書細繹洋洋數百千言始終無一字奪
譌固由壽徵亦關福澤昔蘇子瞻稱文潞公綜理庶事雖
精練少年有不如貫穿古今有專門名家所不逮敬以此
言移贈於兄洵可謂千秋濟美奕世同符矣茲因韓兄專
人知照廿三日卽欲北旋無物件函案頭有親友近刻數
種藉以呈上惟兄不讀三代兩漢以後之書恐不足以供
瀏覽也外竹垞老人分書屏幅一幀詞義吉祥奉爲老兄
期頤之券統希哂納

又

四月十八日接三月廿三日手書並金石名拓三十六紙
一一領悉敬謝敬謝伏審道躬清豫瀛潭納福欣慰无量
第 衰態日增終歲杜門亦惟在故紙堆中消磨時日乃崦
嵒已迫汔無所成言之愧汗現將庚申以後拙稿稍稍清
理字跡潦草叢殘散漫校閱殊費周章適舊友朱稼甫別
駕來蘇需次因留處賓榻屬爲編輯數月以來稼甫爲之
分類排比稍有眉目中間尺牘一門亂後各當道類多舊
雨知_弟足跡不履公庭每遇地方利弊謬謂識涂之馬訪
及芻蕘凡有所陳頗承采納見之施行似可垂遠此外與

同志知交或攷論金石遺文或評騭前賢名蹟亦頗有不
拾牙慧獨抒己見檢閱親友來書不少佳札吾兄與清卿
尤爲洋洋灑灑不特情誼肫然而詮釋古文辨正字義引
經據史足以裨益來學擬各另列一卷並刻於後俾後人
知先世切磋問學其淵源有如此者此書與金石書畫跋
尾今冬可以繕稿再當請正弟年來精力益憊雖終日不
離書案而用心稍過便覺泛泛欲嘔故每有所作輒復中
輟不能卒業曩承尊諭屬將兩齕攷釋彙刻專書弟久蓄
此意因多病未果其實此事尙不甚難當日文達公獲此
器已在積古齋成書之後門下多有釋文然其時世間止

知有阮氏一器也後文達見蘇州曹器詔文謂奇物有耦
大加欣賞屬陳頌南侍御並釋其文何秋濤取以授梓名
齋侯器通釋分上下二卷上釋阮器下即釋曹器也此書
出於是耆古之士知齊侯器有二器矣弟就所見諸家釋
文論之陳釋至爲浩博已刻於金石記再刻於彝器圖釋
由是兩器之名遂並顯於世顧各家所釋止有阮器都不
及曹氏今刻專書則所有釋文皆應錄入勿漏弟處臧稿
大箸外祇有朱椒堂倉侍與叔未翁二篇子貞兄曾云子
苾閣學與許印林龔定庵皆有釋文弟未之見兄與吳許
至戚至交應有稿本務望錄示至懇至懇清卿遠在吉林

第 熟聞其練軍設防措施精當事事以古人是期 弟 因未
悉北地情形未有補助吾兄答其書詞於屯墾事宜有所
指陳正可匡其不逮清卿傾倒左右不第在金石攷訂之
學得書必異常欣感方今烽烟雖靖邊塞未甯亟望英才
繼起幹濟時艱就鄙人所知當今清卿外有曾襲候劼剛
副憲文章經濟與清卿洵稱一時瑜亮求之古人當是富
鄭公虞雍公一流人物天佑斯民篤生賢雋爲
國家斟元調運砥柱橫流我輩老居林下大亂之後獲享
太平從容以箸述自娛已屬厚幸他日擎天巨掌出自同
志之士文字之交尤足爲吾黨吐氣亮兄亦同此額慶也

近日南中古器所見盡是贗鼎欲求如兄新得之大泉錯
範新莽連帥虎符胡可遇哉比以久不奉書知兄念我必
至因詳述近狀以當促膝之談遂不覺言之冗長也鄭奩
云清卿得一器有二百餘字弟未之見確否

又

前奉六月初十日手翰亟取展讀語重情長無殊骨肉敬
審道履綏和瀛嫵納福慰如臆頌承惠金石各拓通計十
九葉楮墨精工印章整潔自是當今獨步更難得蠅頭細
字逐葉詮注尤令人愛玩不忍去手清卿所得之器諦審
器與蓋墨本詔文既多寡不同筆畫又舛譌疊出器爲師

藝止詔中屢見乃第一行忽增師蘇十餘字第三行南字
作南亦太不成字此外經兄一一抉出謂蓋字真器字可
疑處甚多或出譌刻洵是正法眼臧心服心服至洋照之
法無論放大縮小原可一絲不走然用以刻版則可若留
臧則西洋照法皆用藥水數年之後漸澹漸滅久之便成
沒字碑矣兩欄擬刻專書久蓄此願實因精力不濟現將
庚申至今叢殘草稿清理排次中間散佚者甚多南方交
遊中金石書畫著名者類經鄙人題評彙鈔成帙一時未
易集事故兩欄專刻未暇顧及吾兄目光如電敏速絕倫
倘幕中有解人能任此事經兄指點即可成書只要心細

耐煩似刻期可就寄南劄劄其繕寫脩資必當從豐致餽屬在摯愛敬布願忱匪敢固請耳清卿所得龍節兄歎爲獨出冠時擬集吾三家所藏虎符鈎符龜魚符合裝成冊立爲珍賞聞之神王現出敝藏鈎符各種約二十件拓就奉寄並以一分寄清卿也近得古銅印二紐其篆文制度實出一時一蛇紐一魚紐前年曾寄一蛇紐印乞爲鑒定茲復將三印印本一并奉寄如有證佐懇卽詳示拙輯古印考一書未經卒業張玉斧遽赴修文繼其事者無人遂將已鈹之版束之高閣去冬從敝友林海如之議就已成之九卷先行刷印此本敝帚自享無取其全亟欲就正特

先草釘一部呈上版未收拾乾淨印工愈形其劣他日再當續寄一部請先就此部直筆指謬外又寄上同鄉陸存齋觀察所箸千巵亭博錄二本藉以見近日古博出土之多陸君已未孝廉年壯學贍在敝鄉後起中罕有倫比且好古而有力故收減宋元書籍頗富也師田占拓本奉去五分此器已有損處雖已修補完好究不敢多插又三家彝音敦方爵拓本各一分統希鑒定近日南中作譌者鉤心鬥角愈出愈奇秦詔尤可亂真故流傳有緒確可徵信之器好事者不惜千金重值以必得爲快此真好古而有識者與其價廉而獲贗鼎不如價重而得真龍也手肅布

臆不盡之衷匪言能罄惟祝箸述之餘加意調護秋闈伊
邇揭曉倘得兩家子弟添一重譜誼則千里外白頭老友
當必一齊拍手同笑呵呵也

內印文三魚紐一虺紐二攷經傳維虺維蛇每每無甚
區別且蛇爲地名又爲姓爲人名又上應玄武之宿虛
危之星虺亦爲姓爲名古時取以爲紐必有意義究應
名爲虺紐抑爲蛇紐望攷定示知

簠兄再鑒近日譌刻秦詔甚多因檢尊臧鐵權全形拓本
稍作橫幅寄請題明出處與購獲歲月懸諸齋壁以眎同
好俾知廬山真面如此仍乞早日付還爲盼前詢許少珊

兄現在就養蜀中久不通音問矣附復不具

又

九月中旬由韓兄交到八月杪手書發函申紙語重情長
附來金石各種墨拓莫不精妙絕倫邊題皆蠅頭細字無
一懈筆具徵目力之佳腕力之健良由神明完足氣志充
盈故得整暇如此歡欣領謝慰幸無已秦權已稍成橫幅
造象八葉原宜裝冊因有尊書題注又以屏幅可懸座右
時挹清芬足抵晤對此卽古人鑄金圖象之意也他日能
再惠一分當與舊臧善業各船象彙裝入冊永作珍祕尤
爲感禱方今老成凋謝講求樸學攷證古義者未易其人

獨老兄旁搜遠紹翼教扶輪卓然爲海內靈光多士宗仰
迴思都門訂交之時年俱壯盛流光如駛忽忽已皆七十
成翁矣弟本蒲柳早衰又多疾病馴成老廢兄則松柏之

姿凌冬愈健此秉賦厚薄之不同未能倖致也承示前後

所寄書札多有未存稿者弟則與君家孟公尺牘同珍並

無一通遺失現在兒姪輩將庚申後與親友往來書問繕

清授梓俾後人重世講之誼者藉此知淵源所自而已覆
甌飽蠹不計也原擬將親友來書擇其有關問答者酌附
數通於後因檢閱尊翰竟美不勝收無一不可傳後他如
馮勒俞吳諸君或論時政或講古學文章經濟多能實事

求是有裨來學遂思改刻同人尺牘異時必將惠書先行
鈔寄決無遺誤古銅印虺紐取義引秦本紀始皇推終始
五行之傳以爲周得火德方今水德之始更名河曰德水
虺則釋魚自是魚龍之族秦帝璽以龍爲紐官印以虺爲
紐自是水德之義定爲秦制援證精確足補史乘拜倒拜
倒中司馬印之魚紐尤可爲水德之證助此數印若不自
兄發之斷無有知其爲秦制者緣今人不知有先秦之鉅
但以古文難釋者皆屬諸嬴氏其實秦書有摹印之體漢
承秦制不應遽分逕庭然非兄篤耆古鉅攷證由來謂三
代之印尙有流傳人間者人亦莫之信也當今主盟壇坫

洵非兄莫屬無可讓也茲因韓兄吉旋附呈鈎符拓二十
紙趙書石刻一冊又補寄印攷漫存一部統乞鑒正前寄
之印攷甫經刷樣遽行馳呈中間譌奪甚多目錄舛誤尤
爲可笑可憎望兄代爲改正留作贈人可耳

兩巽軒尺牘卷十

歸安吳 雲愉庭著

家清卿奉常 大徵

八月上旬接手書並秦鼎拓本嗣沈問梅來又接續示並定磁畫碟套紅烟壺青田印石各件一一照字收明套紅烟壺精絕南中照此者竟無覓處青田石亦有俊品舊磁畫碟尤不易得建窰盃子亦佳此皆老阮台割愛見寄感謝胡可勝言前日朱笙甫太史過此曾屬其帶上濟紅小印盒一件均窰小盃一隻拙畫紈扇一柄舊磁印盒近日極少若康熙濟紅色澤鮮明者南中視同球璧此件係案

同書車月片
分一
頭之物移贈雅玩均審小盃向種金錢菖蒲置之案頭配
以小靈壁石饒有清趣惜道遠菖蒲不能並寄也拙畫比
昔日有進否法家鑒之賤體今夏尙健杜門伏案手稿約
積四寸有餘此十年來所未有兩欄軒吉金圖釋已經卒
業其款識篆文間有未合者現屬玉斧細心收拾冬間必
可刷印茲將序文寄閱俟剗劂全竣當先將印本就正非
閱全書不能悉其底蘊也所需拓本先寄去十六種一樣
兩分其一分贈鄭盦少農望爲轉致戮瞿二器自來經學
家皆無確證我輩幼讀經書卽知其名今竟於古器見之
更爲難得二器均減篋衍此非真有金石奇緣者恐難猝

遇也另附一分送王廉生農部承許作小印見贈喜甚擬請作論語春秋在此疊七字秦鼎拓本其篆文極細者不必看器而知其爲真龍也釗从金从斤釋斫爲安說文斫劑斷也从斤金宜引切全爲金之省文方寶甌金作全可證齊侯壘詔中有斫字陳頌南謂斫爲饗器又謂簫爲烹煑因而取以名烹煑之器猶斫爲劑斷因而取以名劑斷之器其言甚爲辨博从陳說則此鼎亦當定爲饗器釗釋爲斫自無疑義敝臧有簋蓋詔曰斫叔作旅簋子子孫孫永寶用斫字未詳或釋爲則字則古文作劓亦作劓作劓篆形近似疑是則字愚按篆从二口从貝似是員字員與

圓同通鄖鄖地名又姓也鄖未與虢未邢未同義古篆文
惟變所適其筆畫每有移易不足異也然不免涉於牽合
尙望釐定示知卽當附錄入攷不宣

又

月之望日接前月廿一日交彭壽臣帶來手書並惠寄長
安獲古編一冊又鄭盦司農臧器拓本一冊均已領悉獲
古編去年均初贈我一冊爲友人攫去今承見寄甚妙鄭
盦臧器觀其拓本類多精品他人極畢生心力亦未必遽
能得此此中固自有金石緣也晤時望爲道謝戴文節古
泉叢話刷印後望寄我三分因欲以一分轉贈張子青制

軍青翁生平服膺文節也拙著彝器圖釋剗厥已竣因詔
篆尙欲照拓本逐筆修整偏偏張玉斧又患吐血近雖全
愈而擱筆又一月有餘大約須得冬底始能刷印卽字尊
釋爲卽以上白爲合下呂爲邑極有意義鄙人所釋爲卽
自覺牽合太甚已削去俟此書印就後先行馳正老阮台
試閱一過其中必有豕亥之譌卽爲指出海內同志零落
壽卿始以我爲海外東坡矣今春方知健在頻有書來商
訂金石文字此近日魯靈光也渠收藏金器拓本有八百
餘種古興甚豪年紀小僕二歲觀其議論古今精力正好
令人羨慕之至鄭盦書中謂翁未均有手輯吉金拓本一

千餘種並無其事未均所藏不過三百餘種不及壽卿之半亂後散失殆盡今次孺已歸道山卽有敗鱗殘甲亦無從問津矣承寄辟雍明堂竟拓本不必看器而知其的是廬山真面色如黑漆光彩熊熊此尤漢竟中至精之品不知都中如此竟者尙易得否價目若干倘遇有年號者望留意物色極願得之敝臧古竟一百三十餘面有年號者絕少也中有百面爲沈匏廬丈舊臧精品居半乃匏翁一生心血所積茲擇其精者彙刻三卷惟古竟花紋字迹極爲細勁現雖摹刻非精心修整不可此必俟彝器圖釋與古印攷次第完竣後始及此書恐刷印須在明年夏間也

套料烟壺近有張菊槎見贈一枚其有兩枚可以不必再購廉生農部所需拓本特寄上十四種望轉交

又

昨奉六月二日手書欣悉起居納福著述如意指日榮膺簡命持節衡文尤願在東南數省可藉圖良晤實所翹盼五月下旬託王永義轉寄彝器圖釋四冊古鏡拓本二冊未知何日達到鄭盦處並寄一部諒必同到渠得齊鋪一器文至百七十有餘之多拓本並未寄來急欲一觀也鄭盦曾寄來河南侯獲雙鉤本讀香濤太史題跋定爲侯獲刻石一正翟氏吳氏稱名之誤甚善甚善惟中有辨明次

元二字謂次非姓氏東漢禁雙名此二條未敢附和荆有
次非者得寶劍于遂見呂氏春秋荀子勸學篇楊注所引
同其人不得謂非姓氏至東漢禁雙名王弼州早辨之且
引鄧廣德等九人爲證就僕所聞奚止九人香翁博雅或
偶未深攷耳來函有吉羊小印甚精乞爲僕照刻一方吉
羊二字宜橫列羊形馬畧縮小五之一敝臧有玉羊二枚
一紅一白將來當分贈一枚爲報如何

又

本月十二日奉寄一函適得

簡放陝甘學政之信匆匆附致數行申賀計此書月底可

以澈覽旋於二十日接七月廿三八月初十日先後所發
兩函展誦之餘一一領悉秦涼山川雄厚自古帝王所都
兵燹之後正宜振興文教風俗之醕漓視乎士習學政有
三年久任與主考不同老阮台素有澄清大志正可及時
展布德行道藝政事文章參觀並訪舉一人而衆人勸黜
一人而衆人儆維持風化培養人材此中關係治術甚大
詞章之學止能潤身而已尚非探本之務也幕友聞已延
定四人觀人觀友知必學行兼優之士小豁現在湖州郡
志局館況尙好篆香歸去鄉試昨已飛信前往力爲勸駕
篆香近日未能靜坐用功觀其儀表似是功名中人物與

乃翁大不相同此行似甚合宜惟重闈在堂不知能否遠行且待覆到再達關中金石固多贗品然沈霾於荒邱廢堡者亦時有呈露金器無文字者僅與廢銅同價鄙意倘得式樣奇古朱綠燦然者亦大可收羅作爲案頭陳設饒有古致瓦當關中最多若得全瓦皆具者尤妙敝臧有秦長生無極全瓦頗爲罕見拓奉鑒賞古竟及邠公鐘齊侯匱各拓均容續寄海內同志甚少壽卿收臧之富負絕今古鄭奩作事精專力猛所得邵鐘齊罇均屬古今瑋寶將來授梓之後必可傳遠壽卿轉因收臧過多不知何日始能成書昔人謂鐘鼎之壽不如竹簡此言頗有至理聞老

阮台榮發之期諷吉出月中下旬眷屬偕行途次望格外
珍重誼卿柳門廿七日前往婁東三兒專舟來迓也培卿
今年身子較健可喜此後通書較難必得有一捷徑爲妙

又

春間曾奉手書久欲作數行奉報始因腿疾繼又牙疼牙
疼本係舊恙有二十餘年不發三月底忽然大作痛至呼
籲無厝越兩旬始得漸已至今尙有餘患飯食非極爛者
不得下咽令人悶損幸交五月以後精神稍稍振作晤誼
卿詢悉持節衡文教養兼懋慰如所頌僕衰病侵尋已成
老廢惟平生筆墨之外別無嗜好長夏無事焚香執卷以

讀書爲樂間取商周彝器置之几席摩挲賞玩與古爲歡
子青尙書好畫香嚴筱舫仲復駿未喜收藏凡有名跡莫
不折衷於鄙人大約一月之內必見宋元以來名書畫一
二種尋常之品則所見尤多千金市駿骨此中固有不經
而至者也惟年來朋舊凋零平生師友兼資者一媛叟一
校邠未及一年先後殂謝媛兄宏通博雅世無儔比其最
擅勝者詩與書耳詩已授梓字亦必傳此外未刻者古文
百數十篇題跋亦有可傳之作而隨時散棄存稿無多不
知伯源世講回籍後能料理及之否校邠去年來書謂古
文七百餘篇絕少愜心之作則其稿本固已及身整輯此

外小學算學均有述箸家道又好非伯源比想申之玷之
在家守制正可料理此事也四海之遙學者甚衆求如何
馮兩兄之根柢樸茂無書不覽一時實乏其人韓子云用
功深者收名也遠身後論定二公已爲一代傳人矣當今
金石之學定推壽卿收臧之富負絕今古尙猶孜孜不倦
廣爲搜羅僕月必接其一二書商及撫刻三代文字僕諳
屬其就收臧之彝器拓本八九百種選擇其字多而精確
者仿薛阮二書之例倩好手精刻卽爲阮書之續其字少
無關攷證者汰之亦足繼往開來決爲必傳之作乃其必
欲依許氏說文部首創例成書窮年累月正不知何時始

得告蕲鄭盦謂其刻意求工轉致因噎廢食有以哉然僕
平生心折之友何馮二兄去世如壽卿者亦真是直諒畏
友不可多得也鄭盦自去年以汜於今無月不通書昨日
又寄到新得拓本十紙渠用力猛銳自香濤與吾恆軒先
後出京賞奇析疑頓少同心想不免有索居之感關中有
孟鼎二器乃海內烜赫著名之品壽卿先有信到謂左相
移贈鄭盦正欲函問而鄭盦信亦到遂知確有其事後聞
沈仲恬說此鼎已置諸孔廟恐不能動尙有小者一器爲
徽人李伯孟弄臧伯孟已故其家寶守甚秘已屬其求拓
本不知可得否關中之鼎如真在孔廟務望老阮台倩人

精拓二三分見寄擇其一紙題數行於上好裝池張挂也

僕

臧有拓本紙墨粗劣字之大小與散盤相似止此一紙

不知其爲大字本否也聞小字者更精尊臧有否關中古
器作僞者甚多由來久矣不從近日始也然地不愛寶新
出土者亦常常有之特價已不貲甚不易得也有瞿經耕
者乃木夫先生之子聞爲木翁刻集古官印攷證甚善甚
善前鄭盦書來述及并屬畧助刻資僕因現在鐫刻拙著
又加刷印各費正多用之際故不能豐助擬助白金二十
兩望老阮台代爲墊給其銀俟信到當卽匯付家用可耳
至托至托潞兒今年三月間又得一子畧中公私平順馥

綬孫 去今兩年連舉二子僕筆墨之外頗有家庭之樂此可遠慰吾恆軒垂念者南中近事親友景況有誼卿家書縷詳不復瑣贅

又

久不通書每晤誼卿詳詢近狀備悉按試各郡衡文校士之外見地方利弊莫不周諮博訪發滯振幽事事以古名臣自期文章潤身政事及物可謂兼之矣幸甚幸甚孱體去秋常病交冬以後稍健春來亦勉可支持終歲杜門人事久廢日惟於故紙堆中消遣懷抱頗有近刻惜道遠不能寄正焦山志早已蕪事周鼎攷釋一篇特屬鶴笙弟用

極薄東洋紙錄出寄請斧削山志現已刷印將來擬將焦山金石另刻專書尊意如何前月二十二日吳縣所屬之橫山浜忽陷露古墓鄉人紛紛往掘得太元五年九年各甌閩動一時順老駿耒輩俱乘轎往觀於是隨聲附和之徒出資爭購甚有以番銀數餅得一殘缺者後經官府封閉聞墓道深邃棺和未見也惜不得埋幽之文不知爲何人之墓按太元有三一孫吳一前涼一東晉孫吳太元止一年前涼在西北此太元定爲東晉孝武無疑兩晉古甌道光間吳興山中出土至多蘇則罕聞同時又有鄉人掘得甌墓志一塊凡古甌初出土質地極鬆脆久之自堅鄉

愚無知因洗刷淤泥用力過重致將字文刷壞細審爲湯
府君之墓又有咸通六年吳縣等字可辨者尙有十之七



八咸通乃唐懿宗年號

志中唐字甚明白

距太元甚遠雖同在一

地卻又是一古墓也寄去拓本四紙乞攷定古甄字文多
在側邊此有書於正面者頗爲創見此等殘碑斷碣秦涼
至多周漢吉金有無新得竊願聞之鄭盦古興甚濃春來
已連接其三信子年竹朋亦時通書壽卿老而彌健去年
得一子一女來書云相隔廿八年之久忽叶一索再索之
占甚以爲喜誼卿北行吳中近事想培卿時有家報不復
冗及

又

月之初六日由臬署交到手諭發函申紙如獲面談承惠金石各拓一一領到欣知試事將竣可以專心著述幸甚幸甚詳讀尊臧古器目錄分別已刻未刻通計八十種之多而又汰僞存真選擇精審想見金石緣深古福匪淺將來大刻一出必能爭傳藝苑紙貴長安可以預決竊願先覩爲快也周鼎形製篆文與敝臧之器正合肅彝肅字鄙見似車字說文專作車古文作又作今此字筆畫雖有移變而篆文相似仍乞法家訂定六月間有便人南歸務將新得各器拓本寄我全分善業泥船象如有覓處尤

欲得之亂前沈文忠公贈我一象雖小有殘損而字尙完好兵亂佚去至今惜之當日文忠督學秦涼關中金石類有出土尙易蒐羅虢盤之歸徐傳兼僅以廢銅償之自燕庭方伯莅陝之後不惜重貲四出搜訪人爭寶重價亦騰貴東卿先生所得之遂啟謀鼎原舊款識本止兩行其餘篆文聞爲蘇氏弟兄僞刻此說翁叔均常言之蓋聞諸燕翁壽卿諸君也此鼎東卿師送置金山山寺爲賊所燬鼎爲寺僧埋藏得免於劫僕守鎮江廉得踪跡時因山寺未建僧衆四散無可弄臧暫置焦山方丈後以金山初修竣工僧亦歸來鼎遂還於原處現在金山大加修葺殿閣巍

我煥然一新此鼎居然與無專鼎並峙深惜僖父漁利以
字多可得價添此蛇足使三千年重器魚目相混言之真
堪痛恨僕以師門故物不便深言故此鼎雖在焦山多年

志中不箸一字良有以也來諭存而不論之說恰與鄙意

相合佩服佩服尊處新得古竟漢魏六朝以來共有七十

餘種令人艷羨不已壽老寄來臧竟拓本一百六十餘種

合三家所有已在三百以外

前云沈仲復廉訪有古竟百
面謂琉璃廠某肆言之確鑿

非也實是沈西雍
觀察非仲復也

倘能選擇其字文之至精者刻之亦可

以補金石專書所未備西清古鑑多內府奇珍不敢比擬
此外如宣和博古圖及世傳各種金石書附刻古竟皆不

過數十種僕自以所臧一百三十餘種頗足自豪於是

古竟錄之刻工將及半後知壽老臧竟之富因遂輟業今

吾恆軒又有七十餘種之多其中如元興竟有年號者尤

爲希有之珍地不愛寶日出無窮此蓋作者精神命脈所

寄造物亦不忍終闕歷久必洩亦理數之常也僕老矣體

又多病伏案稍久便覺心火上升時有不適今夏將古印

考一書補錄續得各印務欲刻期蕝事中間頗有出瞿氏

集古官印攷證之外者至古竟之刻惟望吾恆軒成之剖

劂之費僕當力任吳中談書畫者如子山香嚴筱舫仲復

及張子青先生頗不乏人獨金石攷證之學落落寡儔大

抵三四同志多在數千里外壽老月必通書亦常提及恆
軒鄭盦近三四兩月連得其手劄五六通去冬得金器不
少內有精品數種想搗本定已寄閱竹朋係三十年前舊
雨得其來信始憶及之現在卧病在家子年今春其接其
三信海內金石之交止此數人而吾恆軒年力最富學識
至優文章政事遠可追歐陽文忠近則直繼阮文達蘄爲
一代大儒非老朽所能望肩背也僕於月之廿五日到婁
東小住旬日卽欲歸去署中公私平順眷屬俱安鶴笙下
榻帳房之西間人頗倜儻亦尙靜穆手此布復用當晤對

又

四月廿八日在婁東署中寄去復函仍由臬署排單轉遞
未知何日澈覽辰下遙維寢興協吉著撰攸宜三載以來
教養兼施甄拔必多佳士竊願聞之僕在署耽閣半月因
家中不能久離旋卽回蘇署中公私尙屬平順承潞前年
蒙大府會保以道員在任候補今春又蒙沈幼帥明保上
司知遇不可謂不深思所以仰副訂惟有盡此心力不驚
虛名實事求是大約官盡一分心民卽有一分益此中消
息固有潛移默運於不自知者今歲年成就目前觀之可
謂雨暘應時大有豐稔之象惟北地亢旱亟盼甘霖而閩
省水厄真是非常奇災淹斃人民不計其數想該處大吏

必有文報亮已悉其底細也誼卿回家後常晤功名遲速
自有一定不可強也朱頻華婿鏡清上兩屆均堂備未售

今科出朱研生房頭場未薦因二場擊賞經文遂補薦獲
雋得與館選研生乙丑同年又係親戚與誼卿論及此事
極鳴得意蓋重閱頭場文字實是遺珠若二場畧過則屈
抑到底矣可見風簷寸晷中衡文者不能不慎之又慎然
此中得失亦大半繫之於天也新得周鼎第一字只爲作
器者之名無文義可繹尊釋启字謂启合二字意相對合
字从口从厶象三合之形启字从口从廾象合之半如器
之有蓋合則口在下启則口在上所釋殊有意義非專驚

博辨者比應卽定爲君字於通篇文義斯合辭氏歛識南

宮鼎中有君字篆形頗相似辭氏釋爲括字並無依據徒

以古人有此名遂以括字實之不足取證也

師卽帥字君乃帥衆見者

當時抱器歸周必有隨從三人

君乃帥衆見王王爲錫貝云云

字中多釋見如阮氏戊寅父丁鼎可證此字有形特

文有繁省稍不同耳齟釋憲甚是

承潞

謂或竟釋客字亦

是一說帝考罕見商時尙質帝王以十干爲名莫不加一

帝字如帝乙帝辛之類此器以帝考二字定爲微子之器

詞義甚合惜道遠不及瞻觀摩挲耳先後惠寄拓本無多

思欲得一全分裝潢成冊壽卿鄭盦所寄者已付裝池矣

附去玉冊拓本此吉祥文字與尊臧玉造象均爲不可多得之品也又新出湯墓志二分玻璃東洋紙十葉統望檢收玉冊拓本所用印章其十二字者壽老屬伊友王鹵泉刻贈也

又

昨所商輯三代欵識愚意就現在各家所有彝器並收臧欵識拓本擇其篆文精美者仿積古齋例鈎摹鋟版卽爲積古之續計算新出各器與舊時著名之品及器逸而拓本存者大約至少可得八百種其一二字而無關攷證者汰之比積古所錄已加倍之多積古齋止四百餘器亦可謂集一時

古文之大觀也鄙人蓄願未償今得老阮台同有此意實
爲至幸特將昔年與讓之諸君商輯殘稿奉閱此稿無甚
攷釋不能有所裨助姑作嚶引而已請卽從速屬草先將
拓本選擇標明目錄次第鈎撫釋文有攷者錄之疑者闕
之不必穿鑿總以傳古文爲主將來剗刷之貲鄙人獨任
此書成後署曰某某同輯敝鄉嚴鐵橋箸述目錄與淵如
觀察同輯者不止一二種此其例也書之成否自有一定
往年壽卿欲作此書鄙人再三敦促許以相助爲理而狃
於體例未果今僕精力日衰心思益拙伏案過久體便不
適此願終難望償故前日一聞老阮台竟有同志喜幸真

難言喻至云樞取鐘鼎文字編韻成書俾學者易於緝查
取證此雖盛舉似可從緩緣明錫山朱氏有金石韻府
國初林朱臣又有廣金石韻府卽此體例惟彝器之書至
乾嘉以後始大盛林氏所輯不免轉輾傳摹有失廬山眞
面然當時經周櫟園諸老商訂鐫刻旣工篆文亦緻特將
原書附覽竊謂前人旣已先有成書似不必急急踵行且
恐分心不能專力於一書也尊意以爲然否

又

新莽虎符繳上又東洋紙一束比舊時所用者不逮而比
油紙則勝現在滬上如此紙者已賣罄將來只有託駐東

洋人購買當易易耳續積古齋欸識鄙意深盼速成務必將目錄編定酌分若干種歸鄙人相助爲理鈎樞脫稿卽可付刻約二年可期蕝事傳三代文字以裨來學此不朽之盛業也幸勿視爲緩圖至禱至禱趙粹翁邀修府志聞甚諳切足下重違其意不得已應之然鎮江遭亂以後兵制忠義兩門采訪記載已極煩重又兼設關通商華洋交涉事係創例頭緒尤爲紛冗南北相距三千里恐有鞭長莫及之慮前日知無齋來書欲足下襄辦續畿輔通志尊論謂修志必得本地人爲之見聞較確毅然以必辭爲斷僕述諸同人莫不欽服今鎮江雖屬本省而路隔太遠其

事之人不能面承指授窒礙殊多愚意粹翁之意不可卻
或爲酌議體例俟成書之日將全稿寄至都中重加校訂
亦足以訓其意

潞見

現修太倉州志本專待足下來綜其

成後知卽欲進京因與分纂諸君商議書成之日寄京請
爲釐定譔序弁首同局諸君咸以爲然似鎮江事亦相同
也幸詳酌之常鎮道沈彥徵兄求題話山草堂帖望於舟
次一揮濰縣韓偉功求書楹聯一併送去想啟程之前必
欲清理筆墨趁便書之如何名鼎諸隨意書數字可耳

又

晤五叔及培卿悉賢昆季在京近狀稍慰馳念運齋高雋

本在意中而昆玉聯驪同蜚翰苑此吳中佳話近數十年
所僅見也屬在宗末交托忘年歡喜之忱能無額慶南方
蝗孽情形想家報自詳不復瑣述雲交夏以後杜門習靜
不窺戶外一步比來書課較密雜臨古帖積有尺餘兒輩
取付裝池謂可貽後他日相逢尙當出以就正也張司直
延陵季子廟碑訪之數十年未得踪跡顧亭林金石文字
記止載重出孔子題墓十字碑而不及張氏廟記潛研堂
平津館但云碑在丹陽而不詳註其地名故詢之歷任丹
陽令皆屬茫然前月張同蘇公子忽以拓本見贈亟叩所
從來始知碑在離丹陽城三十里之九里鎮季子廟中當

卽雇工往拓歸述該鎮與句容交界地頗幽僻距古延陵
鎮九里故名九里鎮廟創建在東漢晉殷仲堪梁王僧恕
皆有碑記自唐以來屢廢屢興有九里廟志可攷廟貌崇
宏幾有元妙觀氣象髮逆雖至尙不十分蹂躪碑在獻殿
前甬道之右有亭覆護碑之陽面刻殷仲容重摹孔書十
字碑之陰刻張司直改修季子廟記孫淵如錢竹汀分爲
二碑誤也顧亭林止載十字碑而不及張氏廟記漏也相
傳季子墓在正殿之下廟有百井內沸井四至今尙在所
謂沸井者因泉有湧沸聲故名該鎮之人愛護此碑不許
人掘拓此次丹陽令先差家丁前去未能應手後派幹役

兩學車月片
前往始能如願大約此碑字文完好如新發於礪由於該
鎮人愛護之力也千年古刻歷劫不磨實爲難得此吾家
祖典獲之尤幸謹以全碑兩幀奉寄另有一幀望轉交潛
泉手收鄭盦書來謂老阮台遷居甚忙不知喬遷何處便
中示知

又

前月接到正月廿四日澤州所發手書發函雜誦備悉鳳
陽所屬荒災道殣相望餓殍滿野疾苦顛連之狀比之鄭
監門流民圖十倍慘目真有不忍卒讀者吾恆軒籌賑籌
款煞費苦心去歲底體履小有違和仍復力疾從事起死

人而肉白骨存活不可以計數天道好還報施不爽不特他日勲位可與富鄭公比烈而行道有福尤必使身名俱泰到處逢麻昔湘東王製三等筆凡記忠孝兩全者用金筆德行清操者用銀筆文藻華麗者則以湘管書之論恆軒平日文章金石合用湘管而今日在數千里外厠身餓丐之中艱苦倍嘗不遺餘力直當以金銀二筆並書之而不勝書也香嚴慷慨解囊力任巨欸交託得人功歸實用尤均可敬韓子云殃慶各以其類至將來得子增壽可操左券矣去年九月初間賤體抱恙幾至不起纏綿兩月有餘始得轉機交春以後眠食早經如常惟精神尙未復舊

杜門習靜終日在故紙堆中消磨歲月遇勞精斂神之件
輒暫閣不辦恐構思耗心血也香嚴得古吉金多種頗有
佳品仲復以去冬乃弟之變鴿原抱痛意與稍減子山季
玉旭人精力彌滿豪興如常少仲護撫名途可稱順利承
示夏初回南可以圖晤聞之老懷頓開眉宇喜溢自念年
衰學落曩時金石之交零落已盡得與我恆軒考論舊學
商酌新知雖一席之談直抵十年之讀豈特如蘇子瞻所
云一日如兩日哉誼卿爲健帥十分倚重現在署理三江
必欲相邀同去此固義不容辭者誼卿以本籍而居賓師
之位地方情形自較他人熟悉幕府借籌利弊興革得以

見之行事此中裨益良多造福亦非淺也南中雨水過多旬日以來勃戾彌空陰霾殊甚若不卽日開霽恐成水厄南方望晴北邊待澤蒼蒼者蓋一轉移以拯民困乎簠齋連來三信千數百言無一懈筆大箸古甸說文四卷亦已述及極深佩服卽亭天分旣優學識俱臻絕頂近復精究六書篤耆金石幸同心之有侶喜吾道之不孤僕老矣尙思執鞭弭以隨諸君之後惜力薊氣餒不能振奮爲可愧耳手削代面不覺言之冗長諸惟爲時爲道節勞善衛臨書馳切不盡

又

春間曾具報章託卽亭轉遞不識何日達覽深以爲念聞督辦河間各屬工賑事宜錯節盤根倍極勞勤幸畿輔各省普渥甘霖十分霑足插種可望子黎得有生機惟死亡已多流離未集農具籽種諸多未備卽使天心悔禍雨暘無愆措手已大不易恆軒負海內重望爲鉅公交推當此無米爲炊之際力籌起死回生之策定必勞心擘畫大費周章尙望節宣善衛勿過焦急爲國爲時加意調護是所至禱賤體交夏後尙稱順適

馥綬孫與堂姪承濂

今年從

篆香讀書倅已同入邑庠

承濂

幼失怙恃教養十餘年至

今相依得擷芹香較爲可喜六英學士述龔閣學之言近

日世家子弟官多秀才少雖戲言亦見世風之所趨而斯
文之不振也南中目前雨水調勻惟上江兩縣及丹徒所
屬蝗蝻萌動江以北尤盛挖掘收買已有三十萬斤此事
先盡人力再看天意所關係者甚大也簠齋頻有書來念
吾恆軒甚切近日頗傳合肥相國欲薦恆軒以監司之任
未知確否論眼前人才欲求學識兼全體用俱備又肯實
心任事不辭勞瘁四海雖廣如吾恆軒者實未易覲倘由
監司而早膺疆寄興利除弊爲地方生民艱福比之文學
侍從更有實濟歐陽公云文章止能潤身政事足以及物
卽此謂也至於學士頭銜之晉不足爲恆軒賀也河間工

賑事宜何日可以竣事昨偶閱周草窗癸辛雜志載北方
開井一條言北方鑿井動輒十餘丈之深尙未及泉爲之
者至難或泉不佳則所費不貲矣後有一術者云凡開井
必用數大盆貯水置數處俟水氣明朗於盆內觀所照者
星光何處最大而明則地中必有甘泉試之屢驗錄寄備
采叟東諸事安謐僕終日杜門書課尙不間斷一月之中
作真率會一二次每集總以恆軒遠隔爲憾也暑氣正盛
萬望格外保重臨書依切不盡

又

七月廿四日接六月三十日甯津賑局發來手書展誦之

餘得悉近體安勝爲慰吾恆軒以文學侍從之臣任此艱
鉅良由慈羊愷惻蘊蓄於中見人飢溺但思拯拯之方一
切成敗利鈍概不暇顧遑論勞逸此種胸襟求之古人是
范文正富鄭公一流人物鄭盦目空一世平隲人才絕少
當意日前書來云恆軒作事縝密無閒所造未可限量此
國家之福不第吾黨之光其傾倒可謂至矣簠齋亦頻有
書至輒拳拳於左右并有念念在心而不能一日釋然者
惟愉老與清卿而已僕崦嵫已迫紅不多時何足與恆軒
並論然古人同術同方氣求聲應雖隔世猶愛慕不能已
況生在並時而又交契之深也來諭若仲秋事竣入都乞

假南旋可以圖晤聞之喜躍特恐際此時艱處處願借寇
 公一時未必能抽身耳思之輒增嚮往承示新得古玉印
 的是俊品篆法勁整已開小篆之門審為六國時物甚是
 甚是𠄎字鄙見从疒中𠄎乃坐字省文釋為痊人名魏有
 公叔痊正六國時人也𠄎似是𠄎字若據阮氏釋王子申
 璠為楚子西之例則此印直可定為公叔痊之印矣蓋痊
 之名於史罕見且古人每有一人而單名雙名互見者如
 吳人專諸國策作專諸左傳作專設諸如此類者甚多然
 則公叔痊安知非即公叔𠄎痊乎

說文𠄎从土从畱省作
 𠄎古文𠄎𠄎𠄎𠄎𠄎𠄎

是外字為𠄎𠄎省文
 釋為痊字似可無疑惟攷史記秦本紀獻公二十三年與

魏晉戰於少梁虜其相公孫痤

魏本紀亦作公孫痤

二十四年獻公

卒子孝公立又攷商君傳鞅好刑名之學事魏相公叔痤聞孝公修穆公之業下令求賢遂西入秦說孝公變法修刑事在孝公三年去獻公之世甚近又同是魏臣似公孫痤與公叔痤疑是一人此讀史者所當知也應請攷示秋風多厲伏望爲國爲時加意自愛臨書依切不盡

又

屢晤運齋并得卽亭書獲悉行旌出都之期惟履新以後未得續音殊增勞結聞豫省春來雨水無愆豐年有兆然凶荒後民困究未全甦專賴撫綏休養今得福星照臨起

溝壑而登衽席禁害興利次第施行新猷甫發定已頌聲
洋溢口碑載道矣幸甚禱甚賤體已託庇安健 三兒 蒙中
丞保奏以道員引

見已於初九日自家起程乘輪北上到京後自有信專達
間卽下榻卽亭齋中也運齋爲健帥倚重接署督篆又堅
邀同行此亦誼無可辭也 三兒 購得古泉六七百種近又

從親友家訪覓多種特寄拓本十四紙中間有數種爲古
今泉志所未見竹朋古泉匯列入周代羅氏路史謂爲上
古之幣乞爲攷定又三家彝本在禾中故家亂前笙魚知
其踪迹曾許重值未諧辛酉年流轉至蘇嵐坡已爲鄙人

作合乃爲龔孝拱替粵賈陳朗亭加價買去後陳某作古
器遂歸與孝拱去冬孝拱棄世三兒至滬訪得之篆文秀
逸青綠亦佳自是雋品又一敦乃方芷汀故物並各拓一
紙奉鑒或釋爲龍按篆形當是菑字廣韻依力切玉篇
快也爲意字古文統望訂正節署關防向嚴除公事外別
無旁驚計數月以後一切應辦事宜部署漸清卽可以暇
晷從事箸述聞之欣慰無量往後惠書只須用馬封遞由
撫署轉交旣快且穩向寄江蓉舫信皆托少翁加封從無
浮沈也

又

下學車片
卷一
月之十三日接六月廿九祥河行館手書展誦之餘如獲
晤對敬審駐節工次河勢順平惟聞南岸里坳險工疊出
幸北岸物料預儲藉得挹注轉險爲夷厥功甚偉此皆吾
恆軒實事求是之明效無怪河帥之傾倒也行館軒爽几
案清絜早晚赴工督辦廂埽之外得以暇晷從事翰墨鈎
摹彝器文字一半月間可得一二百種秋冬事簡明春可
期成書寄南付刻此蓄志三十年未得遂願之事今可覩
厥成功聞之老懷頓開直欲距躍三百謹當預覓良工購
版以俟鄙意此書卷帙不少非旦夕可蕲將來鈎出若干
種應卽寄下以次授梓不必待成書之後始鋟版也鄙人

年老多病，簞齋牽於家務，斗米尺帛，俱欲親自理料。耆古雖篤，不能專心著述。海內一代作家，斷推恆軒實至名歸。欲退讓而不可得者，然此乃歐陽公所謂文章止能潤身也。若論政事，則又心精力果，縝密無間，入粗入細，才周八面。方諸往哲，足以媲美。韓公近絜時賢，亦可齊驅。阮相僕關人，頗多默觀。十年以來，吾恆軒經術吏事，寸心佩悅，遂不覺若自口出，萬不至以兩世至交，誼同骨肉，貢諛獻媚語，不由中此，亦恆軒所深知而決其必不至是者所願遇。事節勞爲國善，衛敷歷展布益擴，遠謨是則鄙人所欲，食必禱者也。南中初慮亢旱，後得甘霖，尚可補拯。往後得能

雨暘應時收成可望中稔潞兒於前月廿五日赴寧謁見

制府大約月底初可以回任渠自去冬以來精神頗能振
作體貌亦漸豐腴在京與郎亭盤桓兩月訓應忙碌古器
物一無所得惟清儀閣所藏之建安弩機求之二十年今
竟得之詔中有市字吳侃未釋爲市謂市就也周官典瑞
注就市也又徧也造弩機有郭工有牙師無弗備具然後
弩成故曰市古者兵器不鬻釋市爲非云云山左金石志
釋爲吏引顏師古注前漢百官公卿表訓爲理師師同見
成陽靈臺碑謂建安廿二年當塗之勢已成所統千五百
師應屬丞相府未必天子之六師也積古齋云市字或以

爲第字或以爲制之半文兩漢金石記於市字闕疑未論
前輩所釋似俱未協侃未作而亦殊穿鑿義亦欠順愚譏
有建安弩機攷現擬授梓錄奉攷定印譜已就十二冊如
有便人到蘇卽可交託帶上順頌政祺萬萬珍重

又

前月奉到手翰並承寄到篆書晚香草堂齋額謹已領悉
小篆筆力適上洵爲當今獨步濠叟以側筆取勢遜此古
勁已擇其兩分中篆體較小者鈎刻後附小跋敘明題此
四字之由另錄奉鑒南中雨暘應時現正收穫天氣朗晴
尤爲難得婁東棉七稻三今年未備究爲夏旱所傷收成

致歉冬漕不能不力求減免 三見 前月杪到省本可在家
多住三四日因代理嘉定縣劉泐生忽於初二日自戕於
署報稱是日清晨衆家人因本官未起排闥而入駭見倒
在牀前滿頸是血業已氣絕身畔遺有剪刀一具現由本
州委員覆視詳查並經紀其身後各事泐生人極至誠老
實筆下亦好不意有此變事可爲浩歎恆軒亦與交好聞
之定亦駭詫運齋初二日赴偉如中丞之招約住一月歸
途再到柳門處惟小樵翁之病有日增無日減今日培卿
來晤云柳門眷屬只好留住在在家但得樵翁之恙轉機明
春再行赴任已有信致柳門云云可稱卓見孱體今秋託

福咳痰舊症發而不甚在家尙可支持惟往來訓應禮節概行廢棄馴成天地間一贅物亦無可如何耳吾恆軒勵精圖治以監司大員清理州縣詞訟下車數月審結至二千餘案之多解去糾結斷絕葛藤使無辜拖累之人魂夢得安身家克保此中陰德非淺聞之直欲喜心翻倒不獨佩服才識精力之過人已也篋齋爲經營遷葬有五月不得其音書直至本月初二始接來劄附來續得匄拓其已積成四千餘種矣書中云與左右亦久不通問謂尊臧秦權全銅非鐵有銅版二後有大字者乃爲異品云云可見天下奇物層出不窮惟有緣者遇之耳去年得古鏡一面

同書車ノノ
制作精絕拓寄雅賞
照鏡室中漢竟頗多求如此竟之范
鑄工細通體色澤所謂水銀裏其光可鑑實未多觀質之
法家以爲如何序值冬令萬望爲政保重

又

客歲仲冬曾接手翰始因天寒指僵繼因右臂作痛遂稽
裁答流光如駛忽又歲律更新遙維道隨日林福與時增
著述攸宜身名俱泰禱甚幸甚僕韶華虛度不覺屆古稀
之年蒲柳早衰病不離體終歲杜門無非在故紙堆中消
磨時日而崦嵫已迫學術無成老大之悲烏能自己伏念
吾恆軒年力方強功名正盛文章經濟寰宇交推從此益

擴遠謨霖雨天下此七十老人所飲食必祝者也建安弩
機攷一冊寄正市字似較前說稍長然未敢自信還乞攷
定示我至盼至盼鐘拓附呈此器簠齋謂周末文字非古
象之精者所見固不能齊也 三兒 重尋舊壘公私尙屬平
順人生功名遲蚤境遇窮通求之不來推之不去循理而
行委心任運可已吾恆軒道德淵深事理通達與鄙言或
有印合否卽亭遭此大故譬如江海之中風颿正利忽遭
波折此亦人世常有之事旁觀者覩得分明而當之者總
痛莫能釋耳一切想運齋必有專達不復瑣贅

又

月之初九日接大名府舟次手書欣悉種切當卽專人詢問知瀛眷平安抵家諸臻順適聞新姬已兆蘭徵天上石麟不日誕降洵堪預賀辰下計必由津晉都入覲

天顏晝日三接千載一時想吾恆軒當日身在膠庠每每顧念時艱已早負攬轡澄清之志今者遭逢

盛世膺茲重任正宜宏展素抱爲邊防建萬里長城之業卽爲

國家立千秋不拔之基吉林爲根本重地金匪新附不下數萬趨向甫定易於轉移撫馭得法不特安其反側且可收爲勁旅來書云非恩信相孚不足以固結其心而作其

氣可謂片言扼要獨得驪珠至謂防餉短絀不宜過於張
大中國之虛實彼族纖悉皆知自強之道不在虛張聲勢
而貴實力操防旨哉言乎可謂洞見癥結曲中事機卽此
數語已操知彼知己之勝昔韓魏公患西夏之強議刺義
勇謂諒祚方桀驚驟間益兵二十萬必然震懼斂戢兇鋒
蓋欲以虛聲啗喝耳司馬公力疏其非魏公弗聽厥後王
安石枋國變易初制卒貽陝西之患可見事當創始之際
全在虛心延訪慎始圖終以魏公之賢尙有千慮之失今
觀吾恆軒所論貴寔際不貴虛聲數語不特爲一時自強
之要亦實爲千古不刊之論他日豐功偉業書於竹帛者

下學車尸片
卷一
直將邁越前賢誰謂古今人不相及哉僕老矣猶當拭目
觀化飲食祝之也惟海內金石文字之交止此數人此後
相距既遠隱顯殊途

王事正煩想亦無暇置論尙望不遺在遠隨時惠我數行
以紓饑渴郵信無便可由鍾六英弟轉交必無遺失都中
親知雖多而四十年老友終始如一日者惟六英一二人
耳承寄晉劉韜碑陰因有椽筆題識亟付裝池近於聽楓
山館添築數楹懸挂新齋真率會中諸老見恆軒手書莫
不歎賞謂不啻晤對也往年張子青先生臨別留贈山水
一幅屬於讌會時張挂以當促坐此王宣徽欲預洛社之

意蓋先生亦真率會中舊侶也吾恆軒軍政之暇能寫數
筆見寄消此座無車公之憾其喜幸豈止僕一人已哉仲
復以外症未愈呈請展假譚序翁已爲轉奏運齋留館之
後未必卽能假旋渠握別時曾云此去恰與恆軒相會真
是意外之慶想見軾轍聯牀倍常歡喜南中近事定已縷
述無遺矣諸惟節宣善衛臨書依切不盡

又

夏秋間從六英太僕處先後寄到手劄二通備審安抵吉
林動定如意久欲作數行申臆祇爲家庭多故懷抱不開
每至握管輒復中輟因之裁答有稽幸勿爲過比者一陽

初轉秋去冬來遙想威德並施身名俱泰選材練士經畫
攸宜所願同舟有腹心之助遇事無齟齬之形俾得出胸
中無數甲兵爲邊塞樹屹然不拔之基偉業豐功遠駕韓
范此七十老人於五千里外所飲食必祝者也惟時交冬
令北地苦寒雖貴體精力彌滿素稱健者尙望稍節勞勩
加意自護尤深切禱雲於八月間偕老妻同至婁東署齋
小住已將兩月差幸秋穫尙豐民情安謐公私無恙仍得
以翰墨自娛藉抒鬱抱知在愛注用以附陳前示新得龍
節拓本恰與漢虎符作配古時符節本爲徵調左驗此特
爲吾恆軒秉鉞之兆不僅以獲古爲可慶也雲於夏間得

師田父卣兩耳高聳形制奇古詔文精極積古齋據舊臧
拓本編錄歸入敦類曾縮摹其形並以拓本寄鄭盦歎爲
希世之珍惟謂此器是尊非卣又寄質簠齋謂兩耳似有
提梁式是卣與鄙意合并謂近年所見彝器文字求其確
可徵信者此爲第一首行十鼎古字象形釋爲甲子引召伯
虎鼓鬯字爲證甚確第三行攔釋爲傳謂作器者之名夬
阮釋析簠齋謂非析木形疑爲夬字第四行卽釋里未定
第五行齋阮釋商簠齋釋爲賞第六行卽齋釋甲未安
謹將拓本奉寄乞於軍政之暇攷示及之蘇城元妙觀新
出古石畫大有武梁祠筆意特拓兩紙附閱尙有吳道子

畫象已倩人往搨遲日再寄觀基初建於六朝應有此等
古跡右軍帖中所稱漢時講堂畫三皇五帝備極精妙古
今同致也

又

前月下旬接三月十九日手書展誦之餘深慰馳念敬審
朝眷崇隆倚任優重不特練軍籌餉多煩擘畫舉地方一
切利弊斟酌損益必使措置悉洽因革攸宜始能仰副
殊遇吾恆軒素志恢奇抱負宏遠及時展布斷無因循怠
緩之虞惟事會艱難動多棘手求治毋急徐圖轉機以恆
軒之經濟文章而年力又正強壯他日勳侔韓范世之所

謂出將入相者僕雖老或尙及見之惟邊塞風土異宜諸望節宣善衛護此柱石之躬此則老朽所望風切祝者也承示入春以來杜門五十日攷訂籀文多有創解所誤說文古籀補一書約千餘字重文數百字舊釋不可信者概從闕畧附於卷末則別爲一篇此書若出不獨篆籀之學藉爲依攷而於許君之書亦實有匡益洵不朽之盛業也剗劘之事僕當任之昔年與恆軒及讓之兄商輯先秦古器款識擬爲阮氏積古之續所約已逾十年迄未能踐總之此事過欲求精必致因噎廢食鄙意一經脫稿請卽寄來附去東洋紙三十頁以備繕寫卽以原字上版籀篆非

盡人能寫也簠齋兄念及恆軒甚摯茲將其春間來書摘錄另紙亦見文字之交形骸雖隔心性自孚有如此者師田百簠齋釋文與恆軒所釋大致相同惟第三行𠄎字簠齋釋爲𠄎字謂𠄎𠄎入合也鄙見似是北字筠清館周望敦宰朋父右望入門立中廷𠄎鄉𠄎釋北與此𠄎字合彼云入門立中庭北鄉此云小臣傳北古文簡質北卽北鄉也釋其文義亦合質之恆軒以爲然否𠄎字簠齋疑爲里字亦自知未確尊釋於此字闕疑是極佩甚齋釋賞字無疑此器銘文精美兩耳高聳形制尤奇擬摹其全形專刻一冊尊釋與簠齋所釋均刻於後亦古器圖中僅見之品

也鄭盦見獵心喜蒐羅古匊殘字亦有數百種昨日寄到
有墳器七字精絕恐簠齋四千餘種之中亦未易多覲僕
爲攷釋其文乃命司樂作太室墳七字如尊處尙未寄至
可卽函索其陽識者尤妙也簠齋寄來圓化拓本摹於另
紙此則不及鄙臧之精且多矣此老收臧實絕今古行將
以此傲之孱軀交春以來勉強支持終年杜門不離伏案
聽楓山館日涉成趣真率之會常集於此偉如柳門間亦
把臂入林煑茗清談評書讀畫尙是山居韻事惟恆軒遠
隔未免座無車公令人不樂婁東公私均尙平順蘇寓亦
叨安吉此外近事運齋自有竹報詳述故不瑣瑣附去圓

化拓本十三紙中有共字或作𠄎作𠄎作𠄎又有省作𠄎
作𠄎作𠄎按說文共作𠄎古文作𠄎今以各字互證則𠄎
之定爲共字似可無疑伏求攷示爲懇

又

久不得手書屢次晤詢培卿備聞近狀並於邸報中見所
上奏議凡練軍籌餉設官置防以及墾荒屯田訓農立學
發奸摘伏化莠安良種種善政莫不愼終於始次第弛張
尤難事雖著效功不自居推肝膽以待人俾猜虞之悉化
用能民情悅服僚屬傾心求之古大臣中唯韓魏公有此
局度氣魄他日吾恒軒出入將相卓然爲社稷名臣必能

與魏公後先輝映非僅以盤根錯節與虞升卿輩度絜短
長也所以不常寓書於左右者因壽老來書謂恒軒身膺
重寄吾輩林下閒人不必以筆墨之事相溷致分其爲政
之心僕 躉其言今春壽老復有書至謂恒軒有專弁到濰
詢得民間愛戴刻石頌功屏棄僭從往來於冰天雪地之
中勞苦有人所不能堪者不意江南書生乃能如此屯墾
之事曾有所陳不知畧有補助否傾倒之忱不啻口出壽
老不輕許人亦由吾恒軒實至名歸有以致之也僕 春間
得鄭盦書云恒軒得一古器銘文有二百字尚未見拓本
後因壽老書偶及之壽老寄到拓本二紙云卽尊處所貽

器蓋任無蓋字真器字刀痕太生文首加一龠字此外尚有可疑數字恐出譌造僕諦審拓工未緻紙墨亦劣一有

賣經義齋金石印一有謝邨所臧印此二紙必友人投贈

還望精拓數分見寄壽老處並無副本尙欲寄還也雲老

矣終歲杜門聊借金石書畫爲自遣之計間作真率小會

承諸親友垂憐衰病每每移尊聽楓山館頗極文讌之歡

鞞園卽亭奉諱居家亦常把臂入林共談風月想卽亭到

京後必有書述也潞兒交卸婁東到省曾赴白門一行兩

院頗另眼相待至遭際窮通功名遲速自有一定循分守

身委心任運一聽造物之位置可已想恒軒定亦爲然古

印攷尚未卒業今從林海如之意姑就已成者先爲刷印
因急欲就正先釘一部奉寄仍託六英弟轉遞免致留閣
至祈鑒納卽付還音南中近事想培卿竹報常通無庸瑣
述聞運齋考差卷甚佳學差喜音當在指顧間矣引領望
之

同身月

身一

言

李香嚴廉訪

鴻齋

今歲新正普天率土遏音樂絕酬應一切繁文縟節屏除
殆盡我二人別無耆好杜門謝客與古爲徒覺一種冷淡
況趣別有在臭味酸醜之外者非道中人未易領會也今
年元旦試筆口占二十八字用孫雪居元韻題自畫秋色
小幀又題宋拓黃庭經深慰帖頰井雙壁連錄前賢舊題
約千言旣竣自審年來書學畧有所得憶幼在家塾卽喜
臨池初從趙董入手弱冠楷書學靈飛經行草學顛米至
壯覺所學都無是處遂棄舊業專學蘭亭往來蘇滬遇有
善本固不惜典衣質賣卽近世復刻本亦搜羅不遺積至

二百餘種先後所臨或展爲擘窠或縮如累黍雖不能如趙魏公之日臨一本而所臨實亦不少然慮書格爲古人所束思欲由平正而追險勁於是學魯公論坐帖旁及書譜自敘聖母各帖自是以後閱十年與南中所謂書家者結納往還每每尙論鍾張高談羲獻自矜翰劄不甘讓人人亦謬相推許書名寢盛索書者又常屨滿戶外遂乃予智自雄初不知已成爲井底蛙也庚戌年奉檄赴淮僦寓揚州晤同宗讓之兄一見如舊識其年子貞兄由南入都亦便道來訪三人同處上下議論講求執使轉用之方博究篆分真行之秘漸窺奧頤始悔乖違其時鞅掌奔馳未

能專學悠悠忽忽又逾十年迨至罷職家居始能一心翰
墨取家藏鐘鼎碑版上自先秦兩漢下逮魏晉六朝挹其
菁華助吾藻采專工博涉無間晨昏自壬戌迄今又歷十
三寒暑矣雖徃牧垂緞粗識指歸而變化神明未臻絕詣
嗟乎歲月不居崦嵫已迫大懼垂老光陰無能成就惡劄
留在人間徒飽蠹蝕或供摧燒空負此數十年之心力抑
可悲矣執事年力正盛聞道又早劬學工書久爲藝苑推
重近益專精篤耆將來必成一代書家可操左券間嘗論
本朝書家前推汪姜後推張劉退谷從河南入手故風神
獨絕而魄力未具湛園小楷學晉帖功候頗足饒有古致

行草書似非所長張文敏書格宏整有大家風範惜爲繩
墨拘束又限於年壽未入化境劉文清如紫袍玉帶之士
雍容揖讓於廟堂之上而風度自勝洵足領袖羣英然生
平見文清書毋慮數十百種而合作十無一二或中有贗
蹟屢雜耶此四賢爲

本朝書家正宗傅青主鄧石如或精行草或善篆隸皆能
業久功深自張一幟此外王筠林翁覃溪山舟夢樓未谷
冬心輩或恪守古法或自立機杼亦各風流自賞輝映書
臺包慎伯何子貞起則又雄視楚淮各踞一席子貞氣骨
足媿四賢遑論餘子其他道咸間精於書律者代不乏人

未能悉數孫虔禮云偏工易就衆善難求欲其志定神閑
心手雙妙言忘意得矜躁胥平所謂不激不厲而風規自
遠者晉唐以後絕詣空懸下走雖老竊不自揆思與執事
共勉詩云雖不能至然心嚮往之執事其亦同此意乎新
正杜門拉雜代面狂瞽之言亦非賞音之前不發也餘惟
爲道葆重不宣

又

昨奉還答見尊書已有得心應手之妙想五指齊力必已
申屈如意矣慰甚慰甚比連得壽卿三信洋洋數千言無
一懈筆中有一函爲答閣下所需全分拓本特送閱以慰

懸望此老重信必可如期而至也許靖甫赴戍需費以家
臧第一寶器董武鐘求價正月間岷堂曾說及詢價欲二
千金告以物雖著名值恐過貴大江遠隔昇運不易須得
減價或可作合否則徒費說話周折而已其意託介於懷
新閣過雲樓也岷堂云靖甫若非萬不得已必不肯抱此
器以求售無已以一千金立腳多一金則受一金之惠千
金之內勿議也茲將信及拓本奉覽當日珊林先生得此
器奉爲異寶在蘇時曾邀韓履丈楊芸老翁未均與鄙人
酌酒評賞審其篆文尙在西周之前而銘在兩樂之中亦
與他鐘有異如合鑿賞望卽示知惟價恐不能減少也句

餘日陰霾鬱寒令人悶損涪老云蹙眉終日爲百草憂春
雨耳我輩所憂尙有在彼不在此者奈何奈何

又

暑氣正盛伏想順時保養動止攸宜爲頌前承以名鼎拓
本屬題謹題就奉正近日攷訂家詮釋古文每每逞肌穿
鑿引文就義不論筆畫之相去近遠生吞活剝硬作某字
以實其說其弊昉於漢儒之說經而末流遂至於此閣下
釋第二行夷字上一字謂左半猶有闕筆在隱約間或釋
下或釋敬皆當存疑洵稱具識佩服佩服鄙人細審未剔
本比字不特左半尙有闕筆卽右半一直作卅亦連而不
同

同書于尺賣

關雎已剔本則作也右筆已斷故諸家皆釋爲卜字當時
秋帆尙書開府關中主持風雅海內名流咸歸幕下此鼎
獲於西安詔字爲土花所掩亟欲攷釋其文鏤剔銅綠不
免能事受迫工未盡善觀於篆文字口鑿痕顯露則與廬
山真面不無有損雲蒐臧彝器拓本垂四十餘年雖遭亂
散佚而篋中所存尙復不少惟召鼎未剔本今日始見亦
翰墨中一大快事特作長跋以副誣諉藉資商確曩者僂
老爲菽閒草堂題竟甯雁足鐙曾爲鑿易筆畫以就其義
菽閒爲損傷愛物至今猶以爲恨茲之卜字筆畫之連斷
得無類是拙作本應書於原幅因見有漬跡可憎故錄於

另紙只須以此紙付裝池家挖嵌重裱其幅式之廣狹短長皆可授意爲之也豹在筭中日飼以肉惟擲之於地者則不食蓋自護其文彩恐或受污致穢也閣下得勿哂其矜惜太甚不免有同於豹耶附及之以博一噱

又

昨奉還答所論兩家詔心之品必須互爲傳觀方爲有味正與鄙意相合昔米襄陽好古成癖嘗謂驟得一名跡喜心翻倒寢饋與俱久之漸亦淡漠恆數月不復取觀故寶晉齋珍異之品每每與人博易推陳易新以快心目此正與人互爲傳觀一鼻孔出氣也惟定章不得逾三日之限

即繳爲期太促緣我輩非專事賞鑒遇有佳跡必須辨析

豪芒推勘盡致甚或臨仿大意

必嚴禁印撫此
禁必應從嚴

宜展至半

月爲限定章之後務各遵守毋違茲將開皇十八年本稊帖呈鑒生平未見過第二本頗自珍秘當年沈文忠極賞重之文忠篤耆金石收臧稊帖亦幾及百種於此門雅稱當家茲於二十年後重遇蘇隣竊喜吾道之不孤也

又

前者草草復謝數行因天寒指僵未盡欲白越日拜說文校議之贈感何無已此書嚴氏子姓欲重刊屢議未果今姚氏刻於蜀中兩家之盛衰判然矣敝鄉頗多樸學之士

道咸以來首推鐵老鄙人幼時曾與相見此老名士氣極重其子名六孤性亦近癖雅有父風天不永其年家臧碑版古籍盡散失無存此最可惜也吳秋伊治印實爲名手難得其錯落配搭極合古鐘鼎欵識尊名裔字說文所有若仿漢印應從說文今仿古篆應用古文此舍乃古裔字也於此見其落筆之有根柢此外柱下史諸字亦俱有意義非率爾操觚者比以視近日吳下諸君皆瞠乎後矣閣下昔不經意今極嘉賞蓋由金石之學深也賤體雖免於病而懷抱抑塞勉藉伏案爲排遣此強制之法俟過年後必得想解悶之方計閣下亦大致相似也今日稍暖手此

代面嚴寒諸惟加意調護不宜

沈仲復廉訪 秉成

委書各件先將橫額及長聯書就奉正尙有堂匾並仲恬弟索書各件稍遲數日再繳前者以巨紙六幅屬書羅氏鶴林玉露所載山居篇久未報命茲特書於便面并與林海如合作一圖奉贈清賞此篇寫山林恬適之趣讀之悠然意遠出入懷袖隨時觀玩足以祛塵慮而怡心性或亦有當尊意也希哂納筱舫昨日歸家南浦一閱附正前日張玉斧回江陰屬其詢問吳冠英不識能否離家如得到蘇數月爲尊園繪圖可稱韻事怡園圖冊較拙政園圖大分優劣也楓橋晚眺亦不可無圖鄙人當先以寫意爲之

如何

又

頃奉手翰具悉一一承示新得舊拓曹娥碑爲構李徐玉卿女史臧本叔未丈跋云玉卿爲徐貞木處士之妹屬查徐氏出處按貞木字士白號白榆嘉興人工書及篆刻著有懷古堂集想見一門風雅令人嚮往遲日乞連尊臧瘞鶴銘見眎一讀以資眼福秦權必有精拓亦乞惠二分擬以一分寄壽老也盛暑涼暖不時諸望加意調護

又

盛暑不識起居何似伏維萬福賤軀尙無不適科頭跣足

解衣盤薄以書課爲遣暑之計雖揮汗如雨而筆墨固未嘗少輟想執事北窗高卧當亦同此趣也稍涼再作真率之會鬱岡齋帖係初拓精本應重装以兩卷爲一冊共成五冊配一外匣以類帖最易遺失故以臧匱爲宜屬題數語書於另紙中間極論王右軍書千文之謬語雖過激卻有所見非敢妄發也執事博通群籍近益究心金石之學請加詳審或有所教幸卽示我俾獲琢磨之益是所感禱

又

秋暑之酷爲近年所未有不審眠食如何前患熱癩想已全好諸望珍重承屬題晉唐小楷六冊其第一冊十三種

皆是詔心絕品中有數種做賊及親友中所見俱不能及
深佩鑒別之精又喜各帖之妙遂爲逐種題記後綴總跋
伏乞是正鄙意此十三種匯成一冊另裝楠木外匣其五
本雖多舊拓然不過出於二三百年間類帖之中並非至
精之品將來另覓數種照十三種式裝成一本以補成六
本仍裝一匣如何南海吳荷屋中丞有帖鏡一書稿成尙
未授梓中丞已歸道山此書翁叔均見過弟欲一見不可
得後聞爲故友程蘭川別駕購得蘭川爲北捕通判殉江
寧之亂收臧全失此書果在伊處必已付之劫火矣一歎

又

大火逢金秋暑奇酷幸得甘霖渥沛人既受澤物亦迴生
真可喜慶也尊體所患外症定必以次霍然禱甚念甚弟

往年凡遇長夏轉覺體氣較健小有著述大抵成於春夏

者居多今年畏熱殊甚竟至百事俱廢前為尊臧晉唐小

楷逐本作跋實以此册所集無一非宋拓致佳物聚所好

收臧家偶得一二種已慶難遇此册計十三種可謂富矣

另五册中如裴耀卿書及丙舍帖亦俱精本尙有秘閣數

種皆鈐有兩壘軒小印均不易得此外雖屬習見然皆二

三百年紙墨未可輕棄也弟現擬將五十歲後所作金石

書畫跋尾繕成清本庚申前所作詩古文詞無隻字獲存緣手稿涂抹過多

非靜心細閱雖自己亦看不清楚他日倩人鈔寫必致模糊一片匆隣訂秋間來蘇此事即可託其相助爲理親朋中名迹凡有題跋卽可以次入錄約計成書十二卷匆隣年力正壯切磋之功似亦彼此交益也平生於友道頗不敢儕於薄俗汪嵐坡共事三十年現在林海如卽嵐坡之婿也惟居家之道與衙署異衙署等於傳舍官旣不作久遠計幕亦遷徙無常賓主皆以一暫字橫亘於中若居家則必互爲體諒事事關懷方能持久吾兄內行肫摯鄉黨中弟所心服者故以此家常瑣碎之言爲促膝談心之助
新雨之後几案清涼拉縑布几千萬加意保重不具

又

護院代奏之摺不知何日北發聞月摺尙未發何以尙欲
補稟深以爲念弟新築因樹亭書一聯云樹靜風停便是
清涼世界花香鳥語居然城市山林人當樹靜風停方能
外物不撓翛然自適此境固未易言也前承贊賞拙作和
均詩人到無名境始寬所謂會心不遠也昔人有言噉名
不如逃名逃名不如無名語雖見道談何容易司馬公高
卧獨樂園中屢徵不赴嘗賦述懷詩云早避喧煩真得策
未逢危辱卽收功論者謂温公當熙寧間眷禮正隆尙欲
避煩畏辱揣其詩意必不復出乃晚節迫於朝命應召入

相卒之相業未終以身殉國不能如范蜀公之以長嘯名
堂賞花飲酒長樂餘齡溫蜀爲異姓兄弟進退猶未能一
致可知人生出處蒼蒼者早爲安排非人力所能主也隨
遇而安委心任運春秋佳日不廢遊讌之歡筆墨精良且
尋圖書之樂一聽造物位置不必預設成心質諸左右或
以爲然三春已過花事將闌惟階前芍藥架上荼蘼尙能
爭妍鬥馥初八九日間擬續真率之會未知何日可以出
門乞預示知以便訂期約同社諸老也

又

深秋天氣風日晴和想林泉清養枕莊攸宜籬菊綻金霜

螯融玉高吟對酒逸興遄飛羨慕羨慕弟就養婁東已逾
匝月靜參四相不設三心聊以翰墨自娛不爲塵緣所縛
眠食無恙堪以附陳前承屬題散榮名鼎虢盤孟鼎全形
拓本四幅知爲閣下珍愛之品特先題就奉正名鼎一幅
兩邊稍留空紙備閣下自記數行也尙有畫卷三件容緩
圖報命再前辱垂問彝器詔中有癸子二字時因束裝匆
匆未及卽答按古文欵識如癸子丁子乙子等字屢見於
上古文字先輩謂合兩言言之癸子者癸亥甲子也丁乙
可以類推偶憶前事謹特附復統乞釐定不具

又

前奉手書並彝器拓本屬爲攷釋其文按此敦詔十七字
第二字糴从彡有聿形釋爲犍字犍郡名古者因國爲
氏或爲名第五字𠔁釋寔說文安也从宀在皿上人之飲
食器所以安人也依篆从宀从心从皿省女字作寔兩字
皆人名無義可釋詔若曰白犍父作寔寶敦其萬年子子
孫孫永寶用謹就篆文詮釋用副誣諉仍乞大雅釐訂禱
甚禱甚

兩壘軒尺牘卷十二

歸安吳 雲愉庭箸

李質堂軍門

朝斌

別來又屆暮春矣遙維位業兼崇軍民並協戎政之餘勤
加嗇衛敬頌敬頌弟交春以後孱軀尙無不適惟蒲柳早
衰精神總不能振作終日杜門人事久廢日惟於故紙堆
中消遣懷抱香嚴季玉及青帥諸公常來敘晤小舫新從
白門歸來每有讌集未嘗不神往於九峰三泖之間輒興
座無車公之感聞制軍四月中旬可到不識屆時騶從來
省否念念茲有切懇者弟家住湖州烏程縣所屬太湖濱

錢漢先君墳墓卽在錢漢迤東約半里路之邱家堡髮逆之亂鄉鎮住宅盡遭焚燬獨墳墓松楸幸得保守無恙前年失去墳上柏樹數枝遍查未獲去年復又失去柏樹三枝當請分防巡檢密訪暗中派人偵緝據稱係砲船水手所爲盜取作槩柄及木棍傢伙等用是否確實未敢遽信然不設法嚴查以儆將來則勢必盜斫不已五十年栽成之古木出兵劫復入盜劫言之能無沈痛因思統帶砲船太湖營遊擊梁靜颿兄人極正派聲名甚好或則遠隔太湖一時耳目所未及事所恆有敢懇執事函致靜颿兄轉飭砲船總哨陳增林哨官孔星塘哨官梁高發嚴束各水

勇毋向先瑩作踐並求靜颿兄給一簡明告示

告示只須說此係吳

官墳墓無論軍民及水勇人等毋許作踐如敢不遵定當拏究

交給

舍姪承冷號朴堂

實

貼墓道已往之事無須查究只求此後得能保全無恙實已感且不朽執事骨肉之愛休戚相關用敢專布區區九頓瀝懇尙望卽賜函托前事並無確證萬萬不必深究以後務求轉飭各砲船代爲就近照拂尤爲心感

方蘭宅太守 德驥

辱手書所以慰誨之者至深且厚感感僕廿載風塵一官
匏繫疊膺頃劇兼事戎旃竊不自揆頗願有所建白一吐
白面書生之豕乃昌黎之生日正躔於南斗樂羊之謗書
遂屢及中山卒之影中含沙網遭文致自喜塞翁失馬且
作天外冥鴻賴鮑叔之相知免袁安之僵臥室人雖非易
安却能拔釵佐酒兒子雖非邁過亦頗識字知文金石圖
史足吾所好名山覆瓿一聽後人此鄙人末路之結局敢
以附告知已秋風多厲珍重不宣

又

韻石來奉手書伏蒙以太夫人行狀見示屬爲釐定敬誦
一過不禁感觸於心涕淚交下老弟純孝此文字字從性
分中流出愈質樸愈沈痛讀之鐵石人亦當腸斷況如雲
者憂患餘生同抱鮮民之戚耶文已毫髮無憾無可參酌
間有一二字句可商處謹遵諭一一註註仍望是正惟查
會典事例載命婦受子孫封者加太字若已故或曾祖祖
父父在不加世俗行狀墓志多有太字古人文集中亦屢
見歐陽公瀧岡阡表三代皆稱封某國太夫人往年許太
夫人喪蕉林昆季鐫刻行狀亦曾以此見詢當援前說爲
答去夏先母大故墓碑銘旌皆書封太夫人校邠諸老以

爲然今伯母行狀似亦以加太字爲安再篇首旣引朱太
宜人節孝爲發端則中間宜將節孝事實畧醒一筆更爲
周匝於章法亦合統望裁定不宣

又

辱賜書謹悉蒙詢世俗撰狀類稱行述而前賢文集則稱
狀今撰次太夫人行狀應否從俗屬爲釐訂查昔人纂金
石體例援據但有行狀罕見行述梁氏玉繩曰行狀亦碑
版文字之一而高僧尤多以行述刻碑或直謂之墓狀黃
氏梨洲謂行狀行述名異實同前賢文集大都皆稱行狀
間亦有稱行述者全氏鮪埼亭集標目有先太孺人行述

其言曰古婦人之有行狀始於六朝江淹任昉宋儒譏之以爲非其非之良是也然誠有聖善如吾太孺人而又出不肖之自敘則固不同於一切假諛墓之文以欺人者云云全氏宏通博雅一代宗工其集亦炳若日星今吾弟爲太夫人撰狀正與全氏之自敘同例似亦以稱行述爲安至

欽旌節孝上加

皇清二字必不可少辱承垂問謹就所見爲報仍望是正不宣

彭南屏太守 翰孫

客冬奉手書久稽裁答爲歉嗣又接三月十三日續示欣
審榮莅循州動與吉會新猷丕煥政協人和慰甚幸甚 弟
交春以來孱軀尙無不適惟精神不能振作性又疏懶終
月杜門日維與孫曾輩調笑取樂王逸少所謂一味之甘
剖而分之以娛目前亦晚年自得之趣也婁東去歲木棉
大歉催科竭蹶辦公經費亦坐是支絀幸地方民情均屬
安謐二月間幼帥舉劾摺內 潞兒 倖厠明保之列有不敢
指保升階惟就各該員才品政事畧舉大概俾姓名得達
天聽云云姑無論將來升階有無實際而知己之感不能

不慎益加慎勉益加勉以期無負知遇閣下誼關休戚用特附陳通書時幸有以策勵之也循州在唐宋則以蠻荒視之勝國以來風俗漸改至本

朝日益繁盛惟民氣獷悍撫馭匪易然盤根錯節所以別利器大府之借重吾南屏親家正在此也附去拙作午瑞小景一幀聊贈疥壁將來有便人旋蘇如嬌鳳墨蘭凡關花鳥爲江浙所罕有者乞代覓數種此等物事價目不貴却最能怡情悅性墨蘭奇香或產閩中記憶不清矣

趙粹甫太守 佑宸

一昨奉到還章讀之惶恐無地伏念雲識荆在三十年以前遭時多故執訊久絕迴首軟紅舊事如塵如夢恍同隔世嗣幸節麾南來方冀良覲有期可紆積愆偏值孱軀多病杜門謝客遂致高車惠顧屢失倒屣私衷眷慕耿結至今前乘張別駕之便謹通尺素附呈拙箸藉布區區不復加以莊備亦恃託交有素也不意執事賜答竟忘卅餘年舊雨棄譜誼而加以謙稱抑何不爲受之者地也使弟前書草率冒昧之罪何以自解耶恭將全函拜璧倘承不我遐棄許列交契之末今後惠書只須草書數行刪去形迹

黜華存實方不見外切懇切懇弟十載杜門鬚髮全白瘦

同病鶴狀似枯松他日賁臨已預戒闈人必當掃徑以迓
惟衣冠久束高閣魏三野服愧對尊嚴此則尙求原恕也
所需重撫李北海岳麓寺碑張司直元靖先生碑各奉上
拓本一分此少仲筱舫借刻搨存尙多續有所需再當寄
上

楊見山太守 峴

養疴杜門久以未見丰采爲念一昨奉到手翰並示哲兄
性甫司馬遺集及大箸遲鴻軒存稿兩窻披覽謹已讀竟
哲兄詩文皆雋雅可誦今文說一篇議論尤爲警闢古人
傳世文字正不在多也算作擬古各篇詞旨淵懿寄托遙
深有漢魏人遺韻庸說一篇如蘇長公初讀莊子發爲文
章便有彈丸脫手之妙讀之叫絕不意鄉黨中有此俊才
平日並居咫尺竊歎知之未盡得毋等於井底蛙耶慚愧
慚愧弟精力日衰每念老至耄及學益荒蕪景迫崦嵫毫
無成就殊滋內疚耳拙著彝器圖釋一部又焦山志一部

附奉鑒定志中周鼎攷一篇間有發前人未及者乞正是

附奉鑒定志中周鼎攷一篇間有發前人未及者乞正是

吳晉王太守 唐林

前者奉手翰並近刻陳所安先生遺集一冊早經領悉兩
月已來屢欲作數行鳴謝祇因孱體多病時交暑溼司令
肩背常作酸楚牽及指腕握管頗艱家無元瑜孔璋之徒
凡有賤啟必出手裁且以至好通問亦不欲倩人捉刀寒
暄塞責因之契闊多年音訊闕然猥辱損書又未卽報懷
歉負疚非言可喻 雲菰廬跼伏衰病侵尋終歲杜門馴成
老廢方以學殖荒蕪愧對良友乃荷獎飾過情推崇逾分
在執事抑然自下不擇細流其何以爲受之者地耶皇恐
皇恐亂後各省書局刊刻典籍實大有造於士林而吾浙

一局尤推首屈此固大府嘉惠來學之盛意亦由諸君子襄助之力聞

皇朝三通一書不日可以蒞事定當首先備價購置全部頗思早覩爲快也惠定宇所著後漢書補注十九卷錢大昭三國志辨疑三卷此三書曾否鈔版乞示知承詢近著並新得無以報命姑附漢建安弩機考一冊古園化及幣布各拓共十頁又古鈔印拓五頁似爲海內收藏家所希有者幸鑒收攷定管敬伯曾否通書知其蹤迹否甚繫念不能置也

趙惠甫刺史 烈文

奉手書欣審枕肱攸宜順時諧暢蒙示官印各條內越青

邑君本是蠻夷君長之印釋載敝著官印攷立義行事

北魏

官氏志立義將軍居第三品實係官印此印見沈氏欣賞編而拙著攷

釋較詳劔士流傳甚多從未見之著錄卽拙著官印攷中

援引亦無確證後讀通鑑綱目建寧元年分注宦者王甫

使劔士收蕃蕃拔劔叱甫而漢書陳蕃傳中轉不載是劔

士當與宮門宿衛之士同類如騎士衛士劔戟士見之史

者可數也綱鑑一書讀數過矣而劔士兩字甫於去年得

之可見平日讀書之不能經意也台從卜居究定否念念

屬書條幅塗就奉正

又

前辱枉臨藉得暢談稍解勞結別去奉手教謹悉因來使不能待未及卽時裁答至今耿耿所需拙箸各種謹奉去焦山志一部彝器圖釋一部雙鈎漢唐各碑另開清單望查照納入卽乞鑒定承示金石之學羽翼經史謂鄙人從事於此久宜將王氏萃編一書校正其舛譌有裨於來學者匪淺云云弟曹學不足當此然平生喜蓄古碑昔年得晚唐吳承泌墓志係宋元精拓愛其書法秀韻因未悉書人閩湘事跡欲作長跋俟考緝查萃編不特碑文顛倒脫

訛至數百字之多卽後系考證亦復舛錯如中和乃僖宗
年號誤爲昭宗所引昭宗本紀是年十一月蔡賊秦宗權
圍許州十二月詔河東李克用赴援亦係僖宗時事不知
當日何以失檢如此蘭泉司寇博聞精鑒大約此書卷帙
繁多出幕下士手不復細審故舛譌甚多不勝枚舉

弟

思作萃編糾誤以鞅掌靡甯卒卒未果

亡九兒承溥

自幼

喜讀金石攷訂之書年未及冠所作篆隸殆有夙慧曾取

家臧碑拓擇字文清晰者與萃編對勘又約仁和魏稼生

爲助

稼生現在閩省候補搜羅碑文作萃編補錄未成

數月之間摘其誤處數十

百條旋以秋試暫輟不意出場後一病不起

弟

悲痛致疾

不親硯削者逾年兒輩檢其詩文遺稿無論片紙隻字皮
藏不令寓目蓋恐見之增痛也茲因尊諭所及振觸前事
遂覩縷上陳亦以執事有同心之契也

又

昨奉手翰並荷以家園新筍相餉嘉蔬遠錫助我加餐祇
領之餘感抃交會當此風和氣淑草木自馨虞山風景之
佳足供雅人遊眺惜弟衰病侵尋跼伏內室不能離家未
獲曳杖奉訪相與徜徉於山明水秀間縱談風月討論古
今每懷及此輒殷神往附去彝敦二拓本近日贗鼎雜出
稍稍有名者值便不貲千金猶非上駟價也此二器兒子

承潞

去年所得尙是巧遇拓奉鑒賞拙作紈扇一握聊供
拂暑不足當一笑也統希管納殷君聞年力正壯得與濠
叟及閣下周旋苟能虛衷受益其詣何患不精孔北海云
今之後生喜謗前輩一藝未成已經自滿大抵今人坐此
病者多殷君或能自拔於佼佼中乎草此復謝不盡

又

昨奉前月二十八日手書並大箸齊巵長歌一篇伏誦至
再具見考證奇文辨析疑義字字的當擲之洵有金石之
聲佩甚佩甚此器篆文奇古阮文達得之最晚不及編入
積古齋款識而箸錄於擘經續集文達一再題詠及門知

名之士多有詮釋而以陳頌南之篇爲最著何秋濤專刻
行世器字文達釋爲罍頌南从之於是器之爲罍其名益
著而何子貞兄與許珊林丈皆釋爲虺與鄙意恰合按書
序仲虺史記殷本記作中罍中卽仲省罍卽古今字詩終
風虺虺其雷傳震雷之聲虺虺然易象山下有雷小過繫
詞斷木爲杵掘地爲臼取諸小過史記索隱齊景公名杵
曰古人字由名生仲罍卽景公字也曹氏器罍上有中字
尤足爲證珊丈謂此器蓋齊景公受天子命命陳桓子嗣
爲工正用作文子之廟器也因詔中有鉞字兩公皆釋爲
鉞老友陳壽卿太史亦釋作鉞均與尊見相同鄙人亦久

从此說特以兩鬪之名昭著寰區文達又爲一代大儒故刻本仍沿其名卽如貞兄雖辨其爲釧而作詩有論語春秋在此鬪吾師諏考集羣才之句亦仍其名也兩窓肅復謹達佩沈管敬伯現在何處有消息便中示知才叔近通書問否

又

昨奉手翰附到濠叟書件一一領悉濠叟筆力古勁篆分眞行莫不精妙所謂博涉多優也乃復謬推鄙人抑然自下昔昌黎之重皇甫歐公之讓子瞻古人學益至而心益虛在濠叟洵無慙往哲惜不佞匪其倫比耳愧甚愧甚晤

時乞致肌並謝所需古鏡拓就篋中拓存者先行檢奉中
間兩京之物居多其練形神冶一鏡制作精良文辭華艷
張君房麗情集載前蜀秦州節度使王承休妻嚴氏有殊
色後主王衍幸之造鏡以賜證以詔詞卽此是也其雙魚
一鏡活潑潑地雖有寫生妙手亦恐未易臻此絕詣此外
篆分相間各有古趣計贈十六葉合裝成冊明窗展玩亦
足怡情屬在同好竊附素心知必得之則喜同此愛護也

又

一昨奉手書並大箸太室墳攷援證精確仰見鑒古有識
讀書得間心佩之至此器出土有四王廉生庶常得其一

鄭奩尙書得其三形如雁卵雞卵有孔六土質脆薄乃得流傳於二三十年之後爲漢唐以來鄭孔諸儒所未得見者一旦遇之豈非墨林一大快事哉已寓書鄭奩勸其肖繪圖形亟授梓人以裨來學便中擬將尊作錄副寄去同爲欣賞前承寄還古鈇印本字多難識間有明顯可辨者而文義又難貫串與其穿附不如闕疑濰縣老友陳壽卿太史今之劉原父也其臧古印之富夔絕今古但決爲三代所遺而文字亦置闕疑之列弟舊臧共有十紐今將印本一并檢呈或與濠叟共攷釋之如何

周易車尸册

卷一

上

汪柳門侍讀

鳴鑿

前奉手翰並承惠寄石鼓文精拓敬謝敬謝從前李芝齡
尙書編校太學金石遺文許珊林丈亦預其事有印文曰
奉 敕編校國子監金石所成之書外間不易得見未識
尊處有無印本石鼓文爲天下古今第一瓊寶弟臧有南
宋精拓弟八鼓斂字尙存爲陸謹庭舊物秋間星軺南來
或得把臂當出以共賞也

欽頒十器外間拓本罕有如其可拓幸以數分見寄爲懇
恆軒新得古金至富關中自劉燕翁後恆軒繼之所謂伯
樂一顧冀北羣空矣

又

前月奉手書以至好賤啓往來必欲親裁雅不喜倩人捉
刀以寒暄相溷每每報章久缺職此之由一昨又從何性
泉世兄處交到續示承屬硯孫世講館事一節日內潞兒

卽欲晉省謁送健帥必當力爲推轂再擬託少仲一言以
期必諧雲間太守大約不日亦可到省也弟養痾杜門新

正以來出門止有三次朋儕招邀稍遠則專舟來迓魏三
野服尙無形迹之拘然已勉強支撐矣去冬南中雨雪過
多底水甚大開春常常陰雨半月以來勃戾彌空簷溜如
慄恐成水厄輒喚奈何刻下南中盼晴北邊望雨蒼蒼者

苟一轉移則普天蒙福矣所需散氏盤拓本弟在邠上覓

得三種一孫淵如臧者自留一爲秋谷要去一贈恆軒去
年鄭盦書來謂在恆軒處見有贈本屬向笙魚購求笙魚
初索五十金後聞都中來訪則不但高其價目且效石欵
子之寶摺疊扇雖重值亦不售矣鄭盦處尙未有報惟吾
卽亭旣究心於十五篇九千數百字今復精研籀史詳攷
奇文博取先秦欵識鑿而飫之將卓然爲一代傳人昔賢
所謂交游中得一國士者舍卽亭其誰當之敢不仰副所
需必圖報命茲先寄上師酉敦二器其拓本四葉庚巽卣
拓本二葉封敦拓本二葉臥尊一魯伯俞簋一王子申盞

一此就案頭所有篆文精而較多者先奉鑒賞外頌敦二
一爲季玉臧一爲仲復臧季玉所臧者其蓋向在兩壘軒
後贈季玉索作延津之合兩器字多特一并寄奉統希檢
入兩櫺詔在腹內極不易拓未有現成稍遲當連同散盤
詔由潞兒面致不爽約也

又

前奉七月廿七日德安行館所發手翰展誦之餘欣審福
滿星輶動與吉會江右人文薈萃冠絕東南非得如執事
之績學濟以藻鑑之精終恐有遺珠之憾今者秋闈榜發
衆口騰歡彼都桃李已慶盡入公門矣乃復

寵命繼頒榮膺督學歐陽公云文章止能潤身政事可以
及物主考與學院雖同操斯文之枋然主考專於內簾取
士縱使燭照無遺真才迭出總不如學院任有三年之久
觀風問俗使節所至不獨拔幽振滯爲朝廷儲有用之材
抑且革薄從忠爲地方造無疆之福文章政事宏此遠謨
將與往哲後先濟美非時賢所能度絜短長也屬在世好
實有榮幸弟景廵崦嶷學慙荒落今秋舊疾尙不大發惟
年邁氣衰終歲杜門伏案之外一切往來禮節概從謝絕
間作真率之會同集者亦止林下五六人而已馴成老廢
無足爲知已述也恆軒頗有書來勵精圖治以監司大員

爲州縣清理詞訟半年來審結已有二千餘案解糾釋紛
陰德非淺仍能於公事之暇不廢翰墨其精神才力尤爲
負絕過人與吾郎亭洵稱一時瑜亮間嘗與真率會中諸
老論及當代人才欲求有猷有守體用具備者亦惟以郎
亭與恆軒是推此衆論所歸非一己阿好也拙著古官印
攷二冊尙是甲子年舊稿謹以一部附奉鑒定敝居聽楓
山館花木漸已成林簠齋恆軒鄭盦皆撰句爲贈獨少郎
亭佳跡殊爲缺與敬乞惠書楹對一聯條幅四幀江右產
紙定多宜筆之品故不復購寄且有無狀之求懇物色陳
年宣紙十數番見賜卽作爲齊紈佳讖之報何如一笑

家子恭明府 念椿

昨接月之初一日寄到手書附有猴頭茵葫蘆乾領謝遜志齋文集詩稿雖所作無多然中間如論分家一篇文言道俗情最足感發人心家書數則亦畧見讀書修身生平節概皆可傳之作詩中和晚香別墅九月紅梅三絕句讀之恍如隔世當日與二兄倡和篇什及往來書劄庚申之變盡付浩劫平生著述稿本及已梓各書版亦全陷蘇城現已刊刻各種皆庚申後所箸罷官以來村門伏案已歷十三寒暑矣讀書養靜於心稍有所得盡在此十三年中未始非天之玉汝於成也遲日擬爲遜志齋撰序一篇手

書寄上附於卷端倘楚北刊工少好手或當託書局一刻如其爲難則由蘇刻亦可以行書不比宋字之易刻也年譜第十六頁有浙省得而復失句似有譌字抑或詞意未醒按是年杭城旋復或改爲時浙省屢爲賊擾湖城戒嚴上句虛寫亦無不可照此改易只須挖補不必重刻也四弟精於鐵筆難得難得家藏漢魏六朝古印約千紐曾有印譜俱爲友人索取殆盡適案頭有唐辛生摹古印三冊特寄上又彝器圖釋一部朱文公易繫辭稿魏文靖文向帖重刻東海廟碑又重刻岳麓寺碑此勒少仲廉訪所刻張從申書元靜先生碑此杜筱舫弟刻共五分又上方山寺塔盤銘一分統

望檢收另以裱好者共四分分贈椒坡秋谷所卽轉交其未裱者卽付裝池以免散佚平華以明年四月間卽欲散館現已留京俟留館後請假南旋較爲從容次第也

下學車月用

一

一

吳冠英貳尹傳

春來想道履安勝刻接李春生兄來書上海道馮竹儒兄
欲請吾兄到滬月餘未知能否前去特將原信奉覽弟思
月餘之留不爲過久二百之餽不無小補屬在至愛用敢
爲介幸卽賜覆以便轉告再有懇者弟最喜鶴林玉露中
所載山靜似太古一篇寫山林恬適之趣令人神往特摘
錄其中語意分爲六段乞兄暇時依句繪圖上留空地弟
擬逐幅書之賜欸署於末幅欲令百年後好事者珍爲二
吳書畫合璧也一笑素牋六葉附呈鵠候還玉諸維心印
不具

彭苟庭中丞 祖賢

奉花朝日所發手書敬審道體綏和順時諧暢步履小有
不良按摩之法行久必效其次用桑寄生研末陳酒沖服
王道無近功久之亦必有驗特不可輕投疎風祛溼之品
致損本元近日良醫甚少每每極平淡單方轉有奇效老
友周縵雲侍御自去秋患脾洩之症歷四五月未愈正氣
漸傷百藥無效昨接來信云有人教以藕粉代點心米仁
代茶水服半月霍然而止現已精神如常矣 弟 深佩偉如
中丞每勸人不輕投藥良由精通醫理洞悉此中甘苦艱
難故有此論斷非目下時醫所能道也恆軒大約四五月

之交進京誼卿得雋則行期或稍羈遲亦未可定訥兄親家昨曾晤敘風采甚好領下留髯尤有飄飄欲仙之致現赴山中埽墓卽欲回來無多耽閣也三兒奉中丞委赴海塘驗工因值學台按臨恩恩卽旋從前明保人員超擢極速近以存記人多

簡放不易蒙諭云云具見關愛去年保奏以江蘇道員在任候補部中來文調取引

見明年擬進京一行開缺與否屆時再定未知長者以爲如何偉翁赴鄂想必取道吳門刻下當已出京渠三令郎高擷芹香此執事之快婿也尤堪額手纂修續畿輔通志

不知何日開局茲事體大倍勞宏才擘畫也

又

辱晤鈍舫親家敬問起居備稔勳德並崇身名俱泰稍紓
馳仰久欲作數行道朞因聞節署政煩蓋勞彌甚不欲以
林下閒文上溷清聽曩承遠惠素心蘭蕙敬領之後亦未
專函報謝皆由眷愛素深知不責其疏慢兩載已來音敬
久闕而倦念丰采正切遐思一昨又辱不遺在遠手書存
問發函諷誦語重情長並審近履安和眠食皆勝按摩之
功定無間斷用能精力日增康強逢吉欣聞淑況喜慰交
縈弟交春後體氣雖勉可支持而精神終不能振作鍵關

養拙恆數月不出一門伏案之外間與鈍翁及三四親友
作真率小集評詩讀畫尙不失林泉清趣惟以喬輝遠隔
坐無車公每一念及輒深神往亮鈍翁竹報中當亦詳及
之也附呈濰縣老友陳壽卿寄來古匊器全形拓本四幀
似比鐘鼎彝器別有古致又六朝石畫船象橫幅一幀敬
奉疥壁藉以伴函統希鑒納族姪念椿渥荷栽植詔感無
旣雙東署中公私均託庇平順堪以附告

潘譜琴太史

祖同

昨奉手書並示大著詩文謹已誦悉四韻詞意高古非雕繪月露風雲者所可比擬洵推絕構介君小傳尤妙到不可思議文格從韓蘇二家以上溯司馬氏惟浸淫於古者深故雖遊戲文章而雅潔勁峭自有古音古節循讀數過實不勝其傾倒心服此由中之言非敢貢諛也乃辱不鄙老朽損書勤問商質醕類此所謂以能問於不能也能無慙悚大稿想有副本謹已留存時出諷詠比之讀毛中山傳更覺新穎可喜佩甚快甚

王廉生農部 懿榮

前月杪奉到手書敬審道履沖和著述如意尊卷詳繹至再三藝有先正典型不可與揣摩時墨者並論經文注疏體裁而新義層出具徵根柢五策崇論宏議不特學術之邃亦足見經濟之宏訓詁攷證之精猶其餘事也欽佩實至恆軒歸家後時相過從縱談甚樂關中新得古器既多且精此中真有金石奇緣非能浪獲也近見兕觥一器其製如爵蓋作兕形目所未見可爲古器之證已擬如式仿製工葺可公同好也

本草綱目

卷十一

三

江蓉舫觀察入鏡

清和十九日接三月望日發來手翰展誦之餘如挹言笑

蒙賜

滯兒

一函謹已轉付伏審道履安勝並知正月間有

弄璋之慶天上石麟人間英物三多之祝原與福壽同徵

遙望德門彌殷額手

弟

體本孱弱去冬大病之後幸託樾

庇精神眠食已一切如常惟衰邁日增疎嬾愈甚杜門却

掃衣冠久束高閣昔朱子晚歲常野服見客

弟

於朱子德

業文章未能望見一二獨野服見客一節頗自詡善學朱

子附及之聊博捧腹去年旱魃爲虐晉省罹此奇災每閱

邸報不禁心惻後接清卿書備陳飢餓倒斃積屍橫陳種

種苦狀尤令人不忍卒讀賴沅浦中丞主持於上吾親家
左右輔成於無可措手之中籌肉骨迴生之策上能推廣
皇仁下則激勵僚屬賑恤兼施存活靡數此中船福良匪
淺鮮將來位業當與富鄭公比隆盤錯別利器不足爲親
家言也南中二三月之交大雨兼旬簷溜如瀉彌空勃戾
大有水災之象人心慌亂報災請勘紛紛而起幸望日以
後連得晴霽比來雨暘應時春收除低田被淹外尙有六
七分收成民情已定米價亦平雨田爲英茂文所誤始謂
海運津差操券可得轉將巡查差預辭不就詎揭曉失望
至今尙在賦閒少翁相待甚優數次晉見俱不以佐雜視

之現在護院亦竟無以位置宦途之升沈遲速非人力所能主婁東所屬四縣去冬至春數月之間嘉寶崇明俱以事故出缺均委留太佐雜代理去年雨田從晉省歸來尙竟赴婁東聽差則此數缺中必可得一縱或處膏不潤而暫握正印亦足解嘲此權操自己者尙不能必得遑論求人每與兒輩並雨田論及未嘗不嘆飲啄自有定也守身自勵循分從公以俟機緣遇合而已弟現有六孫兩曾孫長孫翊周今年幸入邑庠次孫小名官保十一歲讀書天資尙好三四兩孫暨曾孫松寶甫經入塾此外眷屬皆託賴平安足抒愛注瑣瑣上陳聊當親戚情話伏望節勞善

一
卷
五
月
月

卷
一
一

三

衛加意自珍是所至祝

陳季平觀察 時

別來二十餘年矣世運變遷人事厄輒恍夢入羅刹國中
雖已醒覺至今猶心悸也昨奉手翰展誦之餘敬維道履
綏和動與吉會前者得三兄噩耗爲之泣然者累日祇以
一江遙隔不獲盡寢門之哭謹備輓章聊當芻束正深歉
悚乃辱教言下逮情肫語摯而一種友愛之忱尤流溢於
字裏行間至三兄生前政績以及立身行世得以備載志
乘列入祀典雖云誠無不格實至名歸然非棣台苦心經
紀則古今負屈淹沒者胡可勝數安見有功必報一無遺
憾哉三兄一生愛好九原有知當亦含笑無已也

雲今年

亦六十有九歲矣。崦嵫景迫，衰病日增。兩年以來，每交初冬，嗽痰大作，去歲又值家庭多故，心緒怫鬱，二豎遂乘隙作祟，纏綿翻覆，直至今年交春後，始得漸次向瘳。現眠食雖已如常，而精神總不振作，衣冠酬應，謝絕多年來往禮節。久經廢棄，幸親舊憐其老病，不以形迹相繩，尙得杜門守拙，摩挲金石，讀書自怡。膝前有七孫，兩重孫，長孫已游庠，眷屬亦尙平順。潞兒於閏月下旬乘輪入都，月朔以道員驗放，因有明保在先，此次進京，又蒙中丞附保，例由軍機進單。惟因京察人衆，雖進單而簡放者絕少也。月內卽可到家，知承愛念，謹縷晰以陳，用當晤對。

沈彥徵觀察 敦蘭

遞中辱惠書欣審安抵節署動止清勝慰甚慰甚連日謹將先光祿公話山草堂遺集反覆詳讀竊見先生於學無所不窺而才與識又足以副之故發爲文章用能陳言務去獨抒真詮詩中詠史紀事諸篇警句如堅持白楮防民口廣散黃金買士心確有所指而又包羅羣有涵蓋古今使持此以贈張魏公亦可謂詩史矣不獨揭夫已氏之隱已也論書絕句五十首由漢魏至今二千餘年中豐碑巨碣書學源流推究授受闡發無遺與漁洋山人論詩諸作可以並駕菽苑文中如論熊孝感學統二篇謂此是講學

家之統非洙泗之統可謂一語破的至駁詰雖敗猶榮與
立雪近禪二端持論中正透闢堅確不磨皆必傳之作也
八法筌蹄一卷學者能與論書絕句細加參讀自有領悟
蓋先生於書學至深一篇之中所以反覆致意者實欲以
金鍼度人寶筏導路此誘掖後進之苦心非漫然發之也
六書糠粃三卷凡於形聲訓詁之學莫不剖析入微推勘
盡至而於審音切韻俗體譌書尤能援據古籍精心辨正
不獨爲玉篇廣韻之諍友亦可爲許君之功臣矣雲尤服
膺論語比一書謂講學家推崇程朱過當致肇門戶之禍
洵是至理名言與世之尊漢學而薄宋儒者迥不相侔至

論張浚爲人附黃潛善逐李忠定斥岳忠武殺曲壯愍富
川符離之敗遂使南宋天下從此一蹶而不能復振此眞
名教罪人乃講學家變亂黑白顛倒是非把持清議至於
如此可稱千古快論雲嘗謂從古負虛名而釀實禍無逾
張浚其人今讀先生之文辭無虛發語必透宗如雲謝劣
竊附同心敬服之忱不自知其首之至地矣此外操縵易
知一卷詞鈔二卷愧未專學不敢妄及謹疏蠡測用答誣
諛仍乞加察釐訂不宣

附錄車戶房

先

三

曾劼剛襲侯 紀澤

每於懷新閣敬問起居備聞偉畧竊謂

聖朝積累至深於今二百餘年值此時艱孔亟中外洵洵
天爲社稷必有命世英才起而爲

國家斟酌元運砥柱橫流元侯以中朝一人適膺重寄遠
歷詐虞之國奉

命危難之間力排羣疑獨衷一是大錯業已鑄成而轉圜
終收實效凡此迴瀾障海之宏猷實爲振古鑠今所罕見
他日宰相世系表中史臣秉筆必於范純仁韓忠彥之外
別志竒勳古之所謂豪傑之士非常之人今於元侯遇之

矣山居歲月實托併幪遠聽聲聞能無額祝雲崦嵫已迫
學業無成守拙杜門馴成老廢惟此叢殘編簡結習未除
每與遠近同志攷論古文奇字偶有新得或遇異聞欣悅
之情輒不自已曩閱某君乘槎筆記載泰西埃及國有古
王陵三座北陵最大洞中有古石棺洞口橫石刻字十行
如古鐘鼎文可辨者十之二三云云查埃距英法甚遠摹
搨必不易易唯念頻年使節往來似此地已成要道謹將
原記一則鈔呈乞元侯俯賜留意倘遇人便得將海外上
古遺文攜傳中國使好古之士擴此眼界亦墨林一大快
事也

彭雪琴宮保 玉磨

前者榮戟東臨猥承賜顧祇以末疾纏身艱於動履不獲
爲明公執鞭負弩一盡積年戀慕之忱迺辱垂念衰朽損
書存問私衷感幸匪言可喻比日節逾霜降六橋三竺之
間紅樹青山別有殘秋景色明公檐幃暫駐撫此十里明
湖差比剡溪一曲遙想軍政之餘感今懷古都入名篇範
水模山悉成畫本從古名勝之地得大賢睠顧卽一亭一
樹亦必因人而重遂成不朽之名粵考志乘厯厯可指溯
自狂寇肆虐東南陸沈蘇浙繁華盡化焦土明公應運崛起
投袂從戎虎踞龍驤身經百戰掣鯨障海力砥頽波合

羊杜之謀建渾濬之業樓船東下以次肅清此日風景不
殊河山無恙民安耕鑿土復弦歌再造之恩揆所由致何
莫非明公相輔而成而乃推功讓能持盈戒滿薄海爭傳
奏議域外亦慕清忠昔李衛公功高百辟名震四彝削平
吳越率兵南巡所過之處延見父老存恤窮黎宣布德威
遠近歡服跡其勛業先後同符晚年以足疾陳情太宗謂
自古身居富貴知足者鮮今允所請非直成公雅志亦欲
藉公爲一代楷模後儒讀史至此竊嘆君臣遇合之隆斯
爲極則然攷衛公當日功績雖高猜忌實甚讒構交作數
陷禍機安得如明公之不矜不伐一德一心

倚昇日益崇隆舉措愈形謹慎虛懷接物力疾任公口不言勞事無不集此求之古大臣中所罕覩違論當世哉

雲

崦嵫已迫學殖全蕪辱盼昧之優加欲趨承而未遂附驥心切登龍願違謹手肅寸函虔抒戀悃伏望明公退食之暇爲

國葆躬節宣善衛附呈趙書石刻一冊敬呈鑒定臨穎馳溯不盡

一
百
一
十
一

一
百
一
十
一

一
百
一
十
一

一
百
一
十
一

潘偉如中丞書

前以陶臯薌先生所箸紅豆樹館書畫記屬爲弁言謹已
譔就奉正讀是書始知公之詞藻工雅書法秀雋其來有
自昔董思翁嘗云余家曾祖母爲高房山尙書孫女故余
得煙霞之氣實從血脉中來今復於公見之矣可勝羨慕
惟拙筆恐貽佛頭着糞之譏是否可用尙乞釐定

又

前者辱以手書稷序見贈又倩令姪孫斗如姻兄繪蘭亭
圖稍成長卷允稱書畫合璧感幸無已惟此卷本爲自怡
之品今因節麾榮發遂作留別之贈昔賢有互易書畫以

慰相念之忱者於公復見之矣雲雖老朽無似敢不自呈其醜謹取摺疊便面書稷序一通並繪脩稷大意爲報尊書得河南妙腕奄有神龍穎上之長拙作畧宗率更竊取定武遺意未免有珠玉在前之愧外楹帖一聯因公愛此對句故特書贈並乞賜納

又

奉別以來曾接手翰二通一由滬發一係八月間由都門遞到展誦之餘一一領悉恭審

九重心簡三接

恩醲外領兼圻內襄密勿明良際遇如日方中引睇卿暉

彌殷禱頌雲老至耄及日益衰慵交秋咳痰舊疾時愈時發又加大便艱苦真是諸病百出終歲不出戶庭幸三兒常侍左右藉可支持一切同社諸老皆健飯如常仲復有長媳之喪此貞孝節婦過門已十七年矣隨園老人詩云未亡人去轉心安故仲復尙不至於悲傷現已爲之請旌矣訥生曾抱病旬日秋榜揭曉其孫頡林獲雋老懷大開恙亦霍然香巖甫逾艾服之年而老態與賤子相似子山因駿叔之變不無哀感幸能達觀仍在怡園遊賞尙無凝滯星臺瀟灑自樂前有長律六首奉寄想早塵覽此同社中第一福人也西圃柔齋亮時有竹報詳達來諭已徧示

同人均屬筆道念知關綺註謹縷晰附陳潞河之行何日
吉旋時交冬令北地多寒諸望加意調護爲

國葆躬是所至祝附呈近刻趙書一冊敬乞鑒定

周陶齋明府 作鏐

昨日海如述榮行已諏吉初十日不再遲改所需與季平書特繕就又與岷堂一書均附有零物開明另單菊甫處不另作書有新刻三續疑年錄望爲帶交川資四十金聊佐行裝幸晒納弩攷一冊紈扇一柄並奉鑒賞又十萬杵墨共四挺中有玉冊一挺最爲珍秘模範之精可稱獨絕鄙人細字兩行雖精於小楷之勒悟九中丞亦歎爲不及此墨因製范費力杵又加工歷兩年始成從未贈人要留至數十百年有蘇子瞻王晉卿其人懸黃金訪求然後行世今因蕢榭風雅善書工畫故以一挺爲贈蕢榭其與黃

魯直古錦囊中所藏之半挺承宴同珍慎勿輕出示人爲
好事豪奪之也一笑到淮後如何景狀卽來一書以慰記
系淮揚舊雨詢老人近況示以此書卽知其概惜乎子湘
墓木已拱矣

許星臺方伯 應錄

昨者辱承惠顧倉卒治具深以見慢爲罪而明公清言霏屑吹氣如蘭飲公瑾醕醪已足令人心醉文字相交切磋道義固不在酒食間也蒙攜存各種珍品旣適於用復適於口歡欣拜受愧乏瓊報而亦不敢拘於形迹以套儀相將轉致自外案頭有菖蒲壽石二種似邀明公盼睐敬以移贈益爲哥窑舊磁以養菖蒲或不至以養非其器見誚於東坡也靈壁小峯舊有座子只因遷徙失去此石橫看成形側可架筆雖不逮寶晉齋中有天劃神鏤之奇而倣帚之官頗自珍秘謹潔誠奉贈葵向甚虔實出至意非比

楊次公豪奪納袖逕去也一笑菖蒲壽石語取吉羊不敢
媵以他物敬爲明公禊社延床之券非所云報也統布晒
納

正在效米顛頓首奉書適奉手畢明公果有楊次公之疑
前書所云正符蠡測可謂貴相知心矣萬勿麾却致涉見
外爲幸所需拙箸各種容檢齊奉正

又

頃間正在午餐適奉手畢未及吐哺作答承示敝齋陳設
虎鎗一器與貴宗祠中所藏二器相類欲弟見讓以成鼎
足此義不容辭者昔東坡見鄉人墾地得一銅器審其形

製正是周錚詔爲異遇事載蘇氏志林當日之難覩寶重
如此自趙宋以來地不愛寶古器之沈埋於土中者日出
不窮卽錚于一器生平所見奚止二三十種特未有如此
之重至今秤六十觔逾合抱而大者現在甫經出蠟留玩
旬日一准奉贈決不食言卽以此書爲息壤可也抑有陳
者古人如蘇米諸公每每於書畫玩物互爲博易各適所
好然必彼此合意米家之硯山易海嶽庵地基一雅一俗
曾無所嫌此卽其例將來弟有所需自必直說求取萬勿
遽思瓊報方是心腹至交預懇預懇

高篙漁觀察 長紳

別久思深末由圖晤正殷翹跂忽奉朶雲展誦之餘欣知
台從已抵滬江舊地重游墜歡再續金迷紙醉意興正濃
三復來書以手加額 兄 自別後杜門守拙日惟與翰墨爲
緣魏三野服久成習慣人亦不之訝也今年七月初二日
在親戚沈仲復園中作真率會消暑席散下階失足傾跌
磕破頭面當時危險萬分諸老亦驚慌失措幸無內傷數
日後旋即平復體素孱弱小有感觸病即隨興故自七月
至今已閱半載尙未出大門一步衰茶之狀可想而知近
日左足又患溼瘡潰膿作痛舉步需人扶持終日憑几枯

坐除却觀書百事俱廢賴眠食無恙大約交春後可以望
瘡吾棣今年政七十耶知體氣常佳此大慶也承屬爲侑
觴之文兄雖譏劣多病念四十年同譜七子今惟吾二人
在古人有以言爲壽之義敢不搜索枯腸勉圖報命約計
初十左右必有以呈教也竇大哥究於何年作古其世講
有登拔萃科者是否在京敬邨麓溪後起如何麓溪之子
聞有登科
甲便中望一一詳示人生不能有順無逆吾弟現有五孫
二已食餼二亦游庠子舍雖凋孫枝正茂燕山五桂之榮
可爲預祝兄膝前有八孫兩曾孫長孫游庠次亦可以出
考餘皆在塾惟別後喪去七九兩子此最痛心之事九兒

未及冠已青其衿金石刻畫篆隸分行宿學者碩如何子
貞先生與家讓之茂才皆引爲小友以可畏目之場後被
黜一病而亡兄悲感過度氣體遂因之不振言之不忍盡
也三兒久任婁東胸已十有二載公事尙無隕越惟連遭
儉歲出入之間勉可敷衍而已知念附述

徐花農太史 琪

昨承惠顧得聆塵教清言霏屑吹氣如蘭令人欽挹靡已
吾老友曲園先生胸羅萬卷學究天人平日盛道左右不
啻口出有以也暮年獲交英才快幸何似刻間奉到手翰
並竹餅墨拓又紈扇遵當涂就報命千巖亭塲錄上下卷
分年紀器體例未能一致尊見甚是此所謂一家之言也
中間應加校正者尚多僕書辨明塲字亦因其所錄皆作
从石之磚也方今崇尚樸學文壇牛耳之執斷推吾曲園
老友而蘇門高弟首屈秦黃他日相繼而起者其惟吾花
農太史乎承惠名山福壽編已有者早寄婁東適副所需

謝謝外奉三賢帖三冊雙鈎本四冊希晉收鑒正餘俟
訂期暢晤

魏槃仲郡刺彥

前者辱賜書並承惠古微堂內外集全部謹已讀悉伏審
籌助林集饌箸攸宜欣慰无量令伯默深先生文章經濟
冠絕一時憶咸豐元二年間弟總辦淮南鹽務先生正任
淮北分轉爲北鹽南運一事謝默卿狃於成見頗有齟齬
弟與徐海年兄力爲排解當日往來書札留積成帙惜皆
公牘文字並無及於問學者迴首前塵恍如隔世而先生
已成不朽之人矣弟雖僂然獨存而老大自傷學無所就
言之徒增顏汗古微堂集粗已卒讀知其浸淫於兩京者
深用能淵懿樸茂氣息深醇叙事論斷一以賈董班馬爲

宗不徒以馳驟縱橫見長亭林以後經世之文此爲嗣響
洵一代必傳之詣也敬服敬服中間外集卷四書遼太祖
事引元好問夷堅志一條按夷堅志係洪容齋所箸見四
庫全書提要子部小說類他日續印或釐正之此涉筆偶
誤無關體要或仍而不改亦無不可昨託稼甫別駕攜奉
印攷漫存九卷伏乞鑒定前日軍門兄見顧正抱采薪匆
匆數語未盡積懷乞代道歉戀之忱不宣

徐篆香孝廉

鳳銜

前示湖陰詩鈔三冊屬爲弁文謹已卒讀三卷中類皆親知故舊師友淵源外此亦有瓜葛者居多誦其詩想見其人賴此湖陰詩鈔所錄使兵火之後寒士一生心血所寄得以畧存其梗概昔人比之掩埋齒骼謂其功更大非罔言也卷中錄自乾嘉乾嘉以前不復置論大爲有見惟第一卷首列吳振纓沈榮二家均係勝國時人詩止二首鄙意必應刪去緣不錄二人之詩則乾隆以前可置不論一錄此詩則順康三朝百年之久豈竟無可錄之詩未免適形其陋桑梓大爲減色矣望酌之鈔本三冊先繳上弁言

周易車尸履

卷十一

五

容報命

兩巽軒尺牘卷十二目錄

歸安吳 雲愉庭箸

庚辛拾遺 目次

薛覲堂中丞 四通

王雨山漕帥 一通

巴秀田將軍 二通

喬鶴儕中丞 一通

吳曉帆方伯 八通

張璧田軍門 二通

曾允堂軍門 五通

李藹堂協戎 十通

某協戎 三通

姜誠齋都閩 六通

楊憩棠觀察 一通

周韜甫主政 二通

永昌徐少蘧戊卿 一通

楊子芳太守 一通

蔣梅坡直牧 一通

雷儀甫直牧 一通

陳百倉大令 四通

張恕齋大令 一通

李某 一通

卷之二十一

兩巽軒尺牘卷十二

歸安吳 雲愉庭著

庚辛拾遺

辭覲唐中丞 煥

頃接會允堂軍門專弁來函前此奉叅之總哨三員欲乞
憲臺先行開復其意實以本係暫行革職故欲求請先爲
開復惟不善措詞致有參錯字樣殊不知既名總哨則所
轄之人犯事無論知與不知失察之咎總不能免何錯之
有此皆不善措詞之故諒憲臺汪洋之量必能包涵不與
計較也至此總哨三員可否先行開復抑俟結案時聲請

均出自憲臺恩施

雲

不敢代求再會軍門添造砲船五十

號其鎗砲篷纜篙錨俱由自備惟口糧無着欲懇憲臺籌

給

雲

深知此中爲難情形且船數益多約束益難憲臺覆

軍門書中數語可謂言婉多諷而軍門未之知也特將原

函呈請鈞核倘因其船已造就稍示通融畧予津貼以後

不准再擅添一船此憲臺格外之恩尤非

雲

所敢代籲也

巴將軍未悉此間民團實在情形恐以遲誤事機爲慮昨

藩司屬

雲

另加一信謹將信稿附呈督覽

又

頃奉鈞答命卽轉飭俞守添僱砲船十隻以備小沙嘴之

用並蒙洞悉賊匪窺伺狡謀示以姜營目前不可出隊遠
攻并已由憲臺劄飭姜參將挑選得力奮勇由吳淞口坐
海船護軍火糧米至金山接濟滕營仰見憲臺智燭機先
帷籌縝密雲遵卽飛函切囑姜參將趕緊遵辦再伏查金
山海塘西至乍浦不過五六十里乍浦海口較深輪船可
以近岸廿二年夷兵礮子直進城中刻下乍城民房盡燬
無復遮蔽此時旣不能駛近金山海塘或以輪船轟擊乍
城賊必回顧巢穴勢可解鬆兵法所謂攻其所必救也且
金山乍浦相距甚近輪船往來喘息可至頃已會商藩司
是否可行伏祈鈞裁示遵

又

頃奉鈞答恭悉。豈是適接周莊來稟，謹呈憲閱。又馮佐乾一信內，爲濟送火藥糧食一層，已蒙憲臺籌畫，由輪船航海運送。今日可抵該處。業經致覆，並將原函附呈。統祈鑒督。姜參將處已遵諭切囑，嚴備至吳在田所云一節。昨渠來見，亦曾說及。雲細察該把總與隴西近來不甚融洽。此中傳說或尙有未盡然之處。而此間總應防其叵測，必得加意備豫。故未敢遽允所請。鈞意以爲如何。

又

刻接寶山姜參將來函，據探寶山軍情尙爲安靜。惟探勇

稟報劉河地方近日外來之人甚多裝扮在兵勇百姓之間深屬可疑密行探訪究係何項人民抑是賊匪混冒俟偵探確實再行稟達憲轅除函覆囑其認真偵探加意嚴防外特將原函並另單呈上敬祈鑒核

王雨山漕督

接奉鈞咨謹稔前肅蕪函早登籤閣雲魚鹿從公慙無報稱此間軍餉籌措綦難青浦嘉定之賊東竄西擾出沒無定調防兵勇疲於奔命日前蘇城大股逆匪糾合崑太四州縣之賊分撲松江等處幸爲我軍扼住賊又從間道擾至泗涇真如大場一帶距滬僅二十餘里雖經擊退而蹂

躡已不堪言狀且撫轅武巡捕方連三帶勇輕進致爲賊
挫敗兵帶傷而歸適又馬自明麾下兵勇騷擾店鋪爲彝
兵所辱同日有此兩驚城外居民一時荒亂紛紛遷移旋
知賊退該酋亦出爲安輯人心始定照常安堵法酋頗肯
助防惟英酋尙在觀望滬上華洋錯雜而市肆繁盛則十
倍於前洋涇浜女閭三百徹宵皆絲竹之聲良可慨歎洞
庭東山聞於本月初一日失守太湖形勢又爲賊占江浙
失此險要以後籌議進攻更難措手雲以駑駘下劣猥蒙
大府見信委辦釐捐總局及營務各事宜蒿目時艱徒增
於邑聞淮徐一帶倚恃碩畫得以掃蕩妖氛大江以北尙

是樂土僧邸南下之說有無確耗便祈賜示爲禱祀堂本
係親戚世好遇事無不心印請毋蓋慮

巴秀田將軍

月之中旬交鞠列三協戎來弁帶奉手緘未知何日達覽
昨日兩奉鈞函並悉一切弟自去冬到滬歷碌居諸毫無
善策現奉憲劄委辦釐指總局事務當此餉需喫緊之時
情形拮据籌措彌艱兼之青嘉之賊依舊負嵎省垣恢復
之期毫無把握昨馬自明來滬晤談良久亦以時事爲憂
此間兵勇現有三萬分布松江寶山各處僅能堵禦辭帥
欲俟長龍水師齊備會合進攻實出慎重之意並非稍任

遷延也彝兵助順之說尙無就緒不知何時得有轉機言之但增於邑蒙囑一節當卽切致方伯方伯於尊事無不竭力關切據云苟可如命斷不任書吏從中播弄弟詳思此事當時鎮江收復之際少一附奏遂使有司衙門拘定從前原奏凱撤二字不能給發爲今之計若俟奏明亦屬緩不濟急再四與方伯熟商所有報捐二千金業由中丞入奏將來竟支京口副都統廉俸抵繳此款現在各處廉俸本不照發此係通融辦理之法如再不敷則作爲預支至於新紅馬乾一節當時旣少此附奏此時礙難辦理尙非書吏之弊也

又

前託金眉生廉訪由泰州轉寄一函計已塵鑒前日平乍
大股賊匪竄踞張堰圍困金山滕副將營盤逆氛猖獗其
嘉善青浦等處亦出賊窺伺洙涇牽制我師圖逞其進犯
浦東之計會軍門李參將已親督水陸各軍隨機堵剿中
丞飛調馮副將一軍往解滕營之圍並飭輪船裝載兵勇
軍火由海接濟但望滕圍卽解則張堰之賊亦易於剿退
矣聞皖省於朔日克復此真非常之慶聯珠合璧之徵從
茲發軔則天心來復賊不足平矣西北兩路近日信息何
如伏祈隨時賜示承詢密辦之事囑勿再事遷延坐失機

會比來蘇城時通消息聯絡漸多伺有間隙即可訂期舉
事聞陳逆有率黨援皖之說能得該逆遠離便可乘機而
動成敗利鈍全在天心悔禍也尊處已爲預備協助當將
來諭轉達中丞方伯同深欣感

喬鶴儕中丞松年

頃奉手諭蒙垂詢軍情浦東自川沙奉南同爲賊陷完善
之區蹂躪殆遍松江寶山雖尙固守而賊氛大熾勢甚岌
岌滬城風鶴之警幾無虛夕辭帥憂憤至廢寢食奈各軍
錮習太深挽回無術雲力請乞師皖南猶恐緩不濟急幸
西人有助順之意雲偕子山玉淦諸君與巴酋晤商定議

在洋涇浜設立會防局中外合力拒守當可保此彈丸以
待滌帥援軍之至耳熊李反正已成畫餅當忠逆竄浙時
能選得力兵將糾合內應攻其不備無論蘇事果否得手
杭圍必可立解而乃遲迴卻顧坐失事機可勝太息

吳曉帆方伯 照

余蓮村來信並長毛圖四紙附覽頗可與解散歌相輔而
行鎮海衛千總黃鳳喈從烏鎮來攜有浙江僞文將帥何
姓稟帖一件何姓與該千總向來熟識本年正月間遣人
賫書致該千總面稱嘉興陳炳文與忠逆有隙渠與陳姓
至好可以說合反正該千總在蘇州時雲曾給過差使人

本舊識彼時又偕楊徽猷同來是以代請尊處給發湖州偵探軍情劄子今於本月十七日從烏鎮動身回滬賊中情形言之頗悉特令晉見聽候面詢一切所有稟帖係鈐偽印應否轉呈中丞閱看留爲後日張本或先與劉松翁一談統乞鈞裁該千總在賊中知湖州十四日得一勝仗殺賊不少云

又

密啟者刻接金令函稟有綢客從盛澤來云渠日覩本鎮及蘆墟黎里各處賊匪均做夷人衣履意欲假扮夷兵四竄似與昨日所傳相同云云雲昨以傳聞之詞面請察辦

究未知施行與否今據金令所稟更爲確鑿逆謀如此狡
譎不但各營須防卽夷場亦屬可慮除請中丞分飭水陸
各營嚴防外各國夷官處似亦須照會俾一體嚴防較爲
周密

又

十五竟日未得手諭正切焦盼刻由松府交到鈞函謹悉
一切蘇事得永昌信已於昨日戌刻專函馳布限本日辰
刻到計已達覽已往之事無可置喙惟有浩歎木子之於
海甯早有成約此話猶在杭城未失以前茲徐老六來信
則謂忠逆有回蘇之說現託少卿前去探聽然則海甯之

說亦係託詞矣杭城陷後海甯豈能獨存何待內間耶總
之大局已萬分岌岌全恃蘇事轉圜察看光景已成騎虎
乃遲遲未發雲疊次去信諭以禍福如能即日舉行則松
滬之賊不擊可退此釜底抽薪之法也輪船兩隻務乞飭
令前來一泊荳腐浜一泊泖塔一俟永昌信到即可長驅
直進而於松郡仍有關係較爲穩妥華爾以洋鎗隊協守
松郡之說事至無可如何亦是一法然亦須曾允堂軍門
與李藹堂二君均以爲然始克有濟雲處距松城有五十
里路藹堂芸樵均不及晤無從諄致伊二人保守松城責
無旁貸還乞執事賜函與之熟商爲妥緣華爾雖勇祇此

數百新練之兵與久練之西兵不同旣任保守郡城又云如廣富林泗涇等處有警只須賈太守知會伊必分隊往助設逆賊間道來圖郡城伊卽回救如或有失惟伊是問等語所言原屬壯往動聽第恐視賊太易萬一行不掩言華爾之肉其足食乎此管窺之見所由乞執事與曾李諸公熟商而審處也難在要將本有之兵調出城去一層倘令華爾一軍作爲策應之師似爲最妙否則協守郡城亦極妥若以一人而兼任戰守兩事恐有顧此失彼之患兵勇得力者少惟望西人協助庶滬上或可以保水師提督曾否回來前議滬上兵勇直同兒戲錮習已深無可挽回

擬於洋涇浜設立會防公所此必不可少者承商條款亦皆是應辦之事中間畧參管見以期周密滬上安危繫於此舉望先與敏齋諸君籌商速辦雲俟此間稍可抽身卽當飛棹旋滬聽候驅策至禱至禱

又

十七日申酉刻兩次專函計呈鈞鑒頃張應顯從永昌歸來攜有楊子芳信特呈省督信內云云極爲明晰而少蘊處來書概從簡畧故其中細情未能詳悉又據張應顯云察看城內各舉動實已聯爲一氣惜動手稍遲致有中阻今各鄉賊卡賊館均已逃散忠逆豈無聞見徐氏亦已豫

備如有他變定以旗鼓相當其志甚厲可敬而其事甚爲
可慮忠逆到後定有一番舉動賊中頗傳夷酋至金陵暗
通線索此亦意中之事或賊中欲用離間亦不可知總之
無論夷人可靠與否我處只有極力敷衍看來卽欲來犯
賊必先與夷人說通與他處總有區別此至要關鍵也
雲
因子芳未能去見木子已另囑曉事之人前往偵探逆情
至云忠逆欲赴江北此說恐未能確再少遠託爲轉稟倘
木子爲僞令逼迫欲到上海決不爲賊出力其家屬萬不
可害此說頗爲有見用特密陳撫憲前均此稟知

又

頃楊徽猷來信備述李紹熙之姪李兆梅屬陳墓鄉董吳承郊來滬一切詳細情形均載楊董信內特將原信呈覽

雲奉委辦此事大受訾議雖家置一喙亦無可分辯今李紹熙亦因此送命則其心似亦可以其白矣現在陳墓董事到此並備有槍船兩隻應否請尊處轉商中丞先派一二穩幹之人偕同該鄉董到崑蘇一帶察看情形爲將來進攻地步無此本地熟人爲伴則賊中未易去也或再令張千總應顯同往更妥倘中丞以爲可行卽請飭傳楊徽猷與張應顯赴營聽候中丞面詢酌示可也

又

本屆辦捐出力各員銜名現在趕開清摺今日彙齊明日當與徐守躬送鈞核抑再有切懇者雲於去年正月間奉委赴局三月間秉承執事指授督同金閔二令與在事各員創辦貨捐一載以來雖犬馬微勞或有可錄但雲近日以來常多疾病精神不振漸已成廢此次彙保辦捐各員雲斷不敢仰邀甄敘言出至誠並無絲毫矯強應乞執事於詳文內聲敘某人堅稱不敢仰邀議敘故未列保本欲另具公牘恐與同寅或有窒礙特肅函瀝陳伏祈照察臨書惶悚不宣

又

頃奉手答謂請保清摺內雲名首列若不獎敘何以處同
事諸君囑勿過存成見云云此執事提挈之盛意也然雲
自伏處海門實立志不願再出因蒙中丞函劄並頒專弁
敦迫力疾赴召奉差以後又因執事與中丞謬加信託承
辦之事過多賤性率直不免以一身爲叢怨之府故自書
小額曰勿三齋所謂勿三者一不經手銀錢一不要保舉
一不拏印把子以此自警藉以見志此執事之所知也三
十年同譜至誼尙不見諒使雲何以厝此身乎務請仍照
前懇粘一紅簽注明鄙意士各有志不必盡同也

又

頃沈董來云啊繙譯又爲畫策所有迎師船價分四個月歸繳但每名需銀二十兩擬於明日再往面說每名極多十五兩其銀分六個月歸完如能答應可否定見望卽示知以十五兩一人核算計共需銀十三萬五千首期約須三萬有零以後此款卽可由防局與啊繙譯籌捐按付似此通融啊酋實爲出力可感又鄧聯升事今日又催沈董爲之周全照覆中詳敘屢次訊供再三刑嚇委係合夥在前林姓爲匪在後實無通逆憑據惟究有不合旣准領事行追賠款當罰繳數百金以示薄倣祈爲原諒等語當可了結又前曾託僱巡捕久經募定而公所總以無處租屋

爲詞意在延宕而啊繙譯已令巡捕頭在寶文洋行西首
看定新造屋三樓三底房東係開謙記棧之高姓每年討
價四百八十兩啊意辦公之所祇給半租不准抗違請卽
委員帶差前往曉諭卽日搬住不能再遲諸候酌行

張璧田軍門 玉良

兄自去秋移家江北祇以世故多艱賤軀病不任事擬賦
遂初藉圖將母乃蒙大府念舊情殷再三函促又於松江
克復案內奏請開復原官仰承憲意至優且渥自分駑駘
無以報稱遵卽渡江來滬勉力支撐現奉委辦釐捐總局
軍營事務日擊餉需支絀情形不得不悉心籌畫以濟軍

儲惟是賊勢鴟張青浦嘉定一帶依舊負嵎省城恢復尙
非指日可圖昨馬自明來滬晤談良久亦以時事爲憂此
間兵勇現有三萬分布松江寶山各處僅能堵禦辭帥欲
俟長龍水師齊備會合進攻能否有濟全在天心悔禍耳
彝兵助順一舉尙無把握日復一日兵單餉乏不知何時
得有轉機浙西門戶幸得福曜照臨倚爲屏翰凡我同鄉
無不矢誠感戴所望浙省一律肅清大兵乘勝進剿自浙
而吳漸圖掃蕩此兩省士民所共引領如有佳音尙希示
我以慰望歲之私暮雲春樹兩地依依未識何日得親帷
幄抵掌而談以伸積愫尙望吾弟於軍政之餘順時保重

至禱至禱

又

接奉二月望日賜牋知前寄寸函已塵虎幄承示師久財
匱餉饋不時軍中竭蹶情形實爲目前通病而浙省官民
當此萬窘之時恃以無恐者誠以軍門去年三月初提一
旅之師驅除劇賊克復杭城救災黎於水火是用家頌戶
祝上戴福星刻下民力告殫游氛未殄仍仗神威英畧轉
危爲安不特固浙省之藩籬抑且可聯絡江南爲恢復蘇
常之計所望捷音稠疊迅奏膚功耳兄 黽勉從公媿無報
稱二月初蘇城賊首率眾萬餘挾從逆彝匪三百餘人由

青浦竄撲松郡嘉定之賊同時分股四路犯滬幸爲松營所敗殲斃彝匪數十名彝酋一名賊乃遁去旋犯石門平湖亦爲官軍所敗昨聞海鹽被賊所陷頃得會允堂信知已克復新埭中埭兩鎮亦無賊踪矣金陵賊於二月初起圍攻鎮江逆氛甚惡十九日官軍出戰大勝獲其賊帥僞丞相一名乃解圍而去刻下滬城安靖照常彝商因漢口馬頭爲賊所阻有合兵剿殺之議此事果成大爲我利也抑再有密陳者吾弟爲江南重望宿將紀律極嚴軍心甚固惟部下兵勇眾多領隊官間有照應不到之處不免易起浮言尙希隨事隨時密爲留意以成大功兄辱荷知愛

逾於手足用敢貢其愚瞽伏祈鑒答

曾允堂軍門 秉忠

初七日布覆一函計已達覽頃奉初八日辰刻亥刻兩次
惠函詳示一切情形謹已初悉此次平乍賊匪大股突出
竄陷張堰金山圍撲滕營逆氛猖獗意在浦東而嘉善踞
匪又復同惡相濟窺伺洙涇松江以圖牽制賊眾我寡節
節須防以他人處此未免大為棘手棣臺智珠在握應變
出奇激勵士心機宜神速是以連日堵剿迭挫賊鋒殲擒
無算雖古來名將何以加茲此時攻剿張堰傾其巢穴絕
其下竄之路實爲至要而滕營一旅緊扼海塘若有蹉跌

賊可沿邊東下無復後顧之憂是此軍安危關係浦東全局急宜設法援救尊函所云洵爲確論至需用火藥米糧極急此間亦深知之中丞已飭備輪船兩隻趕速運濟今明先後可到並又派勇航海應援趕緊啟行矣馮佐乾已抵南橋渠在滬時兄與談棣臺謀勇渠亦心服今得麾下授以方畧會同各隊馳援滕營定當內外夾攻痛加掃盪衛城一復則張堰亦將聞風而遁遙望紅旂曷勝額祝另牋所示均悉際此軍政倥傯猶縈懷澱山湖一案足徵心思縝密佩甚佩甚至棣臺天性勇毅身爲大帥仍復親冒矢石爲士卒先此趙順平常開平之遺風惟以

朝廷柱石東南億萬姓託命之身尙祈爲時自珍以慰眾望是所禱切華庭青年英發貌似留侯竟能每戰先登立功甚偉真不媿將門深爲欣羨

又

接奉初十日亥刻捷書忻初一一逆賊盤踞張堰輒敢分股攻陷干巷四出焚掠直逼後岡洙涇真堪髮指麾下從容布置安慰民心飛傳水陸各軍嚴加防剿當將賊眾擊回干巷旋即分派馮佐乾李參戎等各軍分路進攻張堰四面合剿並親督師船由後岡攻張堰之西環礮轟擊斃賊多名生擒長毛奪獲槍船因天雨泥濘始行收隊而令

姪華庭游戎會同徐龔諸將收復干巷掃蕩賊穴其截擊明珠庵之師亦同時獲勝具見勝算全操士氣猛銳足以破賊之膽而絕其內犯之機干巷肅清洙涇可以無慮計張堰賊巢掃除亦必在頃刻間矣翹望之至聞滕營日前亦獲勝仗昨中丞飭大小輪船兩隻載軍火米石前去接濟今早又開天平輪船前往援剿滕營固守多日轉危爲安實由麾下力剿於西故賊不敢併力以東也慰甚慰甚續盼大捷諸維珍重

又

澱山湖夥劫絲船謀害客商一案頃上海縣將尊處飭發

革勇李得勝審訊案情錄摺通送前來謹將原摺寄呈台覽據該犯草供本有首犯陳盈係花旗隊舢板船上充當哨官並有花旗隊的副總哨官是五品藍翎名叫辛勝等語承審官因其牽涉水師諸多不便商之於兄概行刪去現在陳盈等全夥要犯都在松江洙涇一帶所劫絲包裝載蘆墟船四隻尙未分散銷變供係陳盈收管務懇棣臺飭委妥幹弁勇趕緊密行緝拏俾兇犯不致漏網則王法可伸幽明同感一俟賊犯並獲解送前來所有出力弁勇應給獎賞若干悉聽尊處酌給各商感泐威嚴決不吝惜必當惟命是從再此次李得勝之獲若非麾下著力斷不

能迅速拏到所有陳盈各犯無論是在水師亦已斥革將來與貴營總使絲毫無礙也

又

十三日爲澱山湖一案馳布寸函計已達到茲接是日辰刻惠書承詳示十一十二等日分路進剿張堰獲勝燬賊頭卡並各路截擊均有斬擒等情聞之曷勝忭慰張堰踞匪屢經磨下督率雄師逼壘攻剿已足振我軍威阻其出竄想掃穴擒渠大捷卽在目下矣企祝之至滕梁八營待援甚迫而輪船又因水淺遠隔二十餘里礮力不及無從入圍接濟益形危殆馮佐乾移師往援誠是急其所急迺

同署事片附
連日陰雨沾濡不識能否用兵中丞極深焦盼頃又飛調
奮勇坐海船往救以必達爲主能得囚大潮汎水陸夾攻
以解重圍庶不致礙大局賊匪狡謀百出亭林僅有李章
兩隊尙形單薄麾下保障東南運籌周密知必有以備之
矣青嘉劉河羅店等處偵報潛伏多賊專候張堰金山消
息逆謀叵測防不勝防必得迅解滕圍克復張堰庶足絕
其覬覦耳

又

接奉十六日惠書承示連日堵剿並派調將弁砲船攻打
廣成截賊後路此真無上妙策兄卽將尊函轉呈中丞方

伯均各忻然并以保舉一案加函稟陳已奉回書寄呈英
盼兄於麾下公事理應竭力關照此案保舉早經議及現
在正當激勵戎行之際必當隨時稟懇總期月內出奏以
副雅厪也正泐覆間接李藹堂來信駭悉滕梁兩營已於
十六四鼓潰圍而出賊從此無後顧之虞松郡東南處處
可竄亭林尤爲喫緊藹堂現帶小隊前赴該處料理而青
賊又復至鳳凰山一帶游奕松郡亦須嚴防馮佐乾紮營
堵截龍橋不知能攔禦賊氛綏輯潰散與否情形如此浦
東萬分可危浦東設再不保大局去矣棣臺智謀忠勇扞
衛南疆雖亭林柘林陸軍非由麾下調遣刻下緊急如此

棟臺必能籌畫全盤趕爲布置馮佐乾李藹堂均服棟臺
謀勇儘可商調扼紮但能剿退賊氛保全大局則
聖主褒嘉軍民戴德而勛業威名亦莫與倫比矣

李藹堂協戎

恒嵩

前接初八日惠函曾泐寸牋布復諒已登覽茲奉手緘具
稔布置周詳軍威益振所示北斡山一路向爲賊踪出沒
之地今得麾下兵勇移營進紮挖掘濠溝聲勢更爲聯絡
此時扼要以圖如屋建瓴並與鳳凰山各營互相呼應雖
經該逆大股衝突正如撼山不動益徵識力超越尋常曷
勝欽服惟我軍聲威愈壯該逆詭計愈多聲東擊西賊情

巨測諒閣下料賊如神必能預爲整備徐圖攻剿則踞青
之賊不難一鼓殲除倘有捷音卽祈飛示此間擴充釐捐
漸有就緒市面亦極安堵所望天心默亂得有轉機省城
早復一日則民困早蘇一分耳允堂軍門爲怡和洋行之
事頗受委曲幸有芸樵聽香幫同辦理或可消弭

又

早間布覆寸函計已遞達茲接昨晚手示以金山衛城爲
海塘通衢浦東門戶關係全局非細刻下大股賊匪圍撲
甚急滕協戎孤軍固守勢極阨危因與馮協戎會商抽派
勁旅先解金山之圍卽派得力員弁帶隊由柘林南沙一

路而進並由馮協戎飭派將領丁勇言合大隊盛張聲威
間道進援云云傾耳之餘曷勝喜躍金山一城祇恃滕營
擋拄昨聞被圍緊急中丞方伯以次同切焦憂正在留請
設法應援乃已承足下灼照幾先與佐乾協謀馳救奇兵
突進懾以先聲計鼓銳而前不但城圍可解且與滕軍兩
面夾攻正可殲除醜類英謀勝算深合戎機中丞因念滕
營火藥米糧需用極急已飭備輪船由海接濟屬先馳聞

又

昨申刻覆奉一留計已遞到茲接初八亥刻手緘以日前
青浦踞賊出攜民船並有由嘉善而來千餘賊進城恐其

別有奸計已照來示分飭各營嚴防矣此時張堰賊匪尙未剿退復又添賊顯係詭謀得足下加意防維定可無慮至張堰固須進攻而金山營盤關係浦東大局尤須急救今午已由輪船兩隻載軍火米石前去本日可到隨後再發勇船由海赴金吾兄已與曾軍門馮協戎諸軍會同進援能數面夾攻大爲懲創則張堰不攻自遁矣

又

初九日申刻復奉一函計可邀覽頃接初十日惠書并抄馮佐乾信一紙詳悉種切當將來函轉呈中丞并將章合所帶保勝勇調回松防一節稟商辦理茲奉復諭以該軍

現赴柘林堵剿當俟張堰得手卽將章令之勇調防涑涇云云特照錄奉覽惟軍務情形不能一定誠如來示所云早晚異宜中丞亦囑轉致麾下斟酌緩急辦理總期於張堰涑涇兩面兼顧俾逆賊不致橫竄而衛防無疏忽之虞吾兄智珠在握定能調度周密以維全局初十日亭林之役佐乾約同李游戎由後岡楊胥浦兩路進攻已經衝進頭卡該逆尙在死拒值此陰雨未識能一鼓剿退否惟後岡干巷等處亦有賊踪該逆聲東擊西情形叵測不識佐乾能否分頭堵剿不致使賊蔓延深爲盼念至所示桐石郵及北簞山一帶吃緊情形此時各路徵調正在分撥派

援尤恐青城踞匪乘間窺伺松防實不可不加意嚴密預
爲布置近日探報務望隨時飛示是所禱切

又

昨酉刻覆奉一函計已登覽晚間接會軍門初十亥刻來
信今早又接馮佐乾差弁賚函得悉初九初十兩日會兵
進攻張堰並剿復干巷情形茲又承詳示李游戎移知帶
隊由後岡進攻殺賊擐旂已獲勝仗因驟雨收隊等因謹
已聆悉賊匪突踞張堰圍困滕營輒又西出竄擾逆謀極
爲可惡茲先力攻張堰以掣賊勢已挫其銳氣昨聞滕營
亦獲勝仗加以火輪飛礮即可擊散游氛但期數面合攻

痛加懲創永絕其窺伺之心殊所盼禱也刻接九江輪船
來信八月初一日安慶省城西南隅地道轟發官兵乘之
而入長髮殲除淨盡大快人心曾帥於初二日乘礮船進
城矣前此十二日之信係桐城克復訛傳安慶此次的係
確音是日正逢五星聯珠日月合璧天示休徵從此泰運
亨通逆渠授首普天同慶也附以馳達鵠盼大捷不具

又

十一十二兩日疊寄寸函已先後塵覽否刻奉十三日兩
書謹悉一一佐乾昨日來信以進攻張堰未能得手卽遵
批移師進解滕營之圍雖是正辦然將梁金各營全行帶

去亭林祇留李游戎一軍未免太形單薄設或逆匪伺隙
冲突何以禦之中丞方伯亦因此同爲焦急茲吾兄已將
章令所部調回亭林協同堵剿具徵布置謹嚴防維鞏固
但願佐乾疾趨鼓銳迅解滕營之困則軍威大振賊膽可
褫張堰逆屯或不難剿退矣姚仁儀奮勇越濠仰攻頭面
受傷深堪嘉尙希囑其加意調養報捷時定請大憲優獎
也至方家窰賊蹤游奕姚參戎派隊往擊賊卽屯聚劉夏
地方伏匿不動逆情甚爲叵測麾下現已多派探丁分投
確偵以資準備賊應不敢肆其狡譎也

又

昨日奉覆一函已入覽否茲接十四日惠函承示章令稟
報十三日迎剿衛城出擾之賊設計埋伏奮勇衝鋒將賊
擊敗回巢斬馘甚多足以懾賊之膽並稔佐乾及梁金各
軍均抵柘林軍威甚壯章令已移師亭林協同李游戎安
營布置等因逖聽之餘深爲忭慰計卽日潮信甚大輪船
亦可傍岸兩面夾攻尤爲得手也

又

接誦十七日手書驚悉滕梁兩營已潰圍而出從此賊無
後慮東南處處可虞麾下已馳赴亭林控惚布置忠勇之
概足感人心此時但期保住亭林柘林等處俾賊不致接

踵而來則浦東大局尙可支持總惟麾下與會軍門之力是望青賊近塘橋游奕亦須嚴防中丞本擬以泗涇之德勇一千名前赴軍前聽候調遣其原紮之處另行填紮昨會面諭函商麾下今因泗涇亦在扼要一時尙難抽調弟復力爲代請以尊處防轄之處甚廣必得於無可抽調之中爲之設法奉諭俟滕梁二營潰圍兵勇見數後或將此項潰勇安頓防務稍鬆之地另行抽出若干名馳赴麾下聽調等因至所需鳥鎗二百枝已轉請方伯如數給發業已允許照辦無誤

又

早間得亭林警信未稔吾兄所在愁系萬分茲奉專勇手書始知麾下已回至松郡此時賊勢猖獗東南有累卵之危且恐賊匪窺伺松江賴有麾下駐紮專力鎮守以固上海南路再圖進取之機辰刻聞馮佐乾在南橋被圍此刻仍無信息不意軍情一變至此倘能退紮奉賢固守縣城亦是不幸中之幸耳然天雨如此光景實難逆料來信已轉呈中丞閱看奉諭添兵一節此時實無兵可撥只好就現有兵力暫爲妥籌嚴防且看青嘉兩處逆賊如何舉動彼此互爲援應等因現在事勢危迫所恃爲唇齒者惟寶山與松郡耳閣下智珠在握非諸人所可抗行松郡爲閣

下駐防之地定必專力顧此弟關至愛用特上陳尙希鑒
警軍事方殷諸維持重珍護以紓眾望不一

又

飛啟者刻知馮營退回南橋賊已跟踪而至聞信爲之駭
絕此時祇有力保奉賢以冀存浦東完善調兵救援已來
不及應如何應變出奇設法抵禦之處想閣下自必不遺
餘力所慮賊眾兵單深爲焦急本日軍情如何特發專探
走詢望卽飛示不一

某協戎

十五日飛布一畱計已遞到正在盼切萬分之際接專足

來信係十四日發直至十七送到前日中丞因滕營危急
吾棣赴援遲遲極爲焦憤兄再三婉稟始稍解釋今特飛
劄飭令麾下速速進兵許以重賞在憲意顧全大局何等
着重不意來書不及救援滕營一字祇在近處紮營八座
作相持之計讀之不勝駭絕現在浦東大局祇看滕營滕
營安危祇靠足下自中丞方伯以下至軍民人等無不側
耳以聽翹首以俟殊不料尊處信來竟出意計之外中丞
方伯之待閣下不啻有國士之恩兄與吾弟亦情若手足
所以優禮相加者原以吾弟英才卓犖將來可爲中興名
將今滕營如此危急救兵如救火豈可稍涉遷延東瞻西

顧爲今之計惟有激勵將士懸以重賞奮勇進兵迅解滕營之圍滕營解則賊可不攻自退此爲一定辦法若憑探報之詞畏賊之眾遲延不進則中丞震怒兄雖有百口亦不能爲吾弟分解也現在此間已派砲船三十餘號並由輪船拖帶裝載軍火糧食其選奮勇約二千名由海前進萬望麾下念滕梁二營數千人性命速速進兵萬勿再延是所至禱至事權歸一誠是行軍要着倘吾弟要進而諸將不從兄可力說今來書未及滕營隻字不便將原信代陳恐愈觸怒也

又

頃覆十四日一函因中丞盼解滕營之圍甚急而人言紛紛是以措詞不無過激茲接十五亥刻羽書讀悉爲之焦灼萬狀當卽將原信面呈中丞閱看同深憂憤奉諭賊勢如此鴟張滕營倘萬不能解圍得將滕梁二營兵勇接應出來亦是萬不得已中之一策勢至無可如何則麾下軍務當擇其尤爲喫緊之處相度形勢權其輕重扼要堵剿軍務時刻變幻憲意亦未能遙制也至軍火口糧等件已由方伯另覆不贅允堂軍門於松屬地勢情形最爲熟悉足下能就近稟商於軍事必有裨益卽中丞聞之亦定以爲然也

又

昨寄三信想先後呈覽矣前以中丞盼解滕營之圍甚急而兄謬承知愛情如骨肉念望尤殷措詞之間不無激切嗣悉連日陰雨軍行艱難吾棣冒雨出兵泥塗傾跌以致體履違和曷勝惦念茲接十七日寅刻手書得悉滕營已冲圍而出計已陸續到營不知散往何處人數有無大損如晤勝梁二君望爲致意安慰一切並希查明各營弁勇商同綏輯安插此不但維持大局亦盛德之事也惟是兩營旣失賊益鴟張勢必乘機四竄堵剿萬分爲難曾軍門李藹堂均在松日久熟悉地勢一應機宜就近與商扼要

設防督率弁勇著力堵賊各弁勇如能奮勇摧破賊鋒截賊內犯保全完善之地中丞定必立加重賞此時浦東大局危於累卵必須併力支撐有進無退總盼棣臺出奇制勝以副中丞知遇軍民願望無任禱切承囑轉商飭委孫刺史幫同帶勇一節已爲婉稟奉中丞諭覆可以照辦

姜誠齋參戎

德

昨聞逆匪竄撲月浦等處經閣下督率兵勇迎頭痛剿該逆望風而遁斬獲甚眾聞之不勝欣躍此間于初八日接周莊初五所發探報知蘇城逆首糾集匪黨欲由青浦窺伺寶山嗣於十四日又接周莊初八探云該逆由常州無

錫調賊數千現住蘇城葑門外欲竄寶山及石門等語且海鹽乍浦相繼不守今日又報乍浦收復未知確否賊勢鴟張四路分竄意在牽制我軍情甚叵測不可不嚴爲防範陸路兵勇經老弟整備周密自無可乘之隙其水路要隘倘有急應籌備之處務望詳示情形轉達憲聽以便加意嚴防此次賊志覬覦浦東較之往常冲撲尤爲可慮總祈格外小心是所至禱

又

昨奉一函計可達覽所有尊處保舉一案中丞已於前日出奏想閣下亦已奉到行知所開清摺一扣業已代呈並

爲轉陳將士奮勇情形中丞亦深嘉尙前日派撥之帶領官甚爲得力憲意尤爲欣喜具見老弟調度有方用才各當不勝欽服再刻得近探知蘇城賊目陳坤書現分水陸兩路有欲竄涿涇寶山之說今日中丞亦曾提及想老弟聲威所播久寒賊膽該逆未必輕爲窺伺惟此次賊黨人數眾多尙望加意嚴密多爲設法庶幾有備無患俾狡賊不得逞其詭計特此佈聞前來清摺祇有一扣已爲轉呈中丞尙望另繕一扣交存兄處是所切禱

又

接誦手書以探報劉河地方頗多外來之人形迹可疑已

派令妥探前往密偵具見隨事留神防禦謹慎現在金山
竄匪尙未剿退難保該逆不暗中聯絡施其詭謀必得加
意防範絕其覬覦庶爲周妥探確後仍望示悉爲要除將
來示及另單各層代稟憲聽外專此佈復不宣

又

頃奉手書所示海塘互調一節已將吾弟來函轉呈中丞
閱看卽爲酌辦矣頃聞劉河一帶逆船甚多深恐水陸並
進尙望嚴爲防範預備一切且多置偵探以防窺伺所有
軍務情形務祈隨時詳示只須草書數行不必紅單楷書
是所切禱

又

飛啟者頃奉中丞面諭賊勢猖獗亭林南橋各營業已站立不住昨調尊處奮勇五百名往紮南橋刻下無須前去仍歸麾下軍前以資調遣逆情詭譎寶山亦萬分喫緊務望加意布置嚴爲防守是所至禱專函奉達卽候回音此後軍務信劄往還祇須草草數語不必再用手版爲囑

又

敬覆者頃奉飛函以奉撫憲面諭姜營所調奮勇五百名無須前往南橋等因特馳信關照尊處未識已接到否茲展來書敬悉此五百名已無須調動仍歸麾下防次可也

亭林已潰南橋營盤被圍南路軍務甚壞浦東危險萬狀
焦悶已極草草布覆不一

楊憩棠觀察坊

別逾兩旬想素履清綬諸凡順序弟終日栗鹿仍無寸閒
日前平乍嘉善賊匪大股東竄佔踞張堰圍撲金山營盤
逆氛猖獗浦東頗爲震動現經曾軍門督率水師進剿中
丞亦飛調兵勇前往援應並得李藹堂馮佐乾會派將士
防堵南橋亭林一面馳救滕營布置周妥可望得手祇聞
賊數極多浦東路徑歧雜倘一時未能剿退殊覺可憂浙
省軍務得雪翁中丞書知近日稍鬆金蘭有佳音否甯郡

定安謐照常也前得金眉生書云鹽事小辦已部署楚楚
王秋恬刻下定已趕到所有南北資本其合前議成數伊
等亦公請穩實司事二人與王秋恬周星橋二君公同經
理銀錢此番所辦頗爲核實歸經愚見官場祇能出面辦
事不能涉手銀錢也台從何日來滬終七之後必祈命駕
不特方伯望眼將穿卽中丞亦無日不盼念也

周韜甫主政 騰虎

辱手書深荷勲注感感承示蕪湖太平均已克復狗逆就
擒揆帥大軍前鋒已指東壩此高屋建瓴之勢也聞之鬱
抱爲之一開揆帥邃謀深算超邁古今其嚴肅堅定如周

亞夫識拔將帥如郭汾陽理學文章如王文成集思廣益
如諸葛忠武四公皆一代偉人揆帥獨奄有眾長用能軍
聲所至丕建崇勳天下之士望之如泰山北斗欲見顏色
而不可得而閣下親被拂拭登諸薦剡顏淵雖篤學附驥
尾而行益顯其遭際爲何如耶弟患難之後積憂傷心風
波之間怖畏成疾近復右臂發一外症精神益不能支乞
假杜門已逾兩旬自揣蹇劣加以多病必不堪再任馳驅
所望閣下籌筆之餘爲時保重尤願閣下益加砥礪宏此
遠謨以副巨公薦拔昨見足下於稠眾之中呵斥某君責
其不能約束子弟盛氣相陵旁觀且爲難受而彼默默無

語怨毒之於人甚矣幸足下留意焉

又

一昨奉手書猥辱詳詢軍情謹將近日所辦各事畧陳大概惟執事察之自僞忠逆竄陷杭省以後乘逆焰方張之勢率其醜類馳回蘇州而永昌徐氏兄弟與李熊錢三人密約之舉遂不得行當忠逆竄圍杭州之時李熊均奉僞令往杭至十一月初四六兩日先後託故回蘇卽與徐氏兄弟密約舉事徐董於初九動身十三至滬力陳忠逆在杭陳逆赴江北卽陳坤書曾至東西梁山復折回蘇城黨竄撲鎮江現聞在丹陽此悍賊也類大半李熊心腹正可乘隙進攻必能得手惟欲先籌軍

餉十數萬以備臨期舉事爲各項經費大府持重決意覆
絕徐董留滬旬餘日再四懇求其時杭省接濟不通萬分
危迫有援伐魏救趙之策向大府懇懇因發軍火銀二萬
兩徐董卽匆匆購備於廿七日回去出吳淞口由常熟進
口此錢姓所踞之地風逆直於十二月初五始到當卽齊集民團
添募槍船逐日冠帶點名可謂大謬作事之粗疏如此毫無顧忌人數
過眾旣需時日而又不能慎密事機大露以致無錫崑山
蘇州一帶各賊卡賊館僞官逃匿一空時已得杭州被陷信謬謂忠逆必不
能卽返原約十二月十九日舉事旋得李熊信云忠逆卽欲
回蘇改於十六夜間傳單甫發傳單爲調各路民團而忠逆前隊已

於十六清晨趕到矣事遂中阻忠逆到蘇卽發僞諭到各

卡凡永昌徐氏船隻過往一概拏解

陳墓鄉董昨有密遠稟到來故知其詳

近民團無不驚駭謂大禍卽在頃刻矣乃越日忽又有僞

諭謂徐某之剃頭赴滬係爲采買軍火解往杭州

其時杭州未陷

以備攻打之用早經稟明辦理各卡館未悉根由見徐某

剃頭誤會有異志以致羣相疑懼現已查明無庸再究徐

氏船隻仍照常放行此絕大破綻居然瞞過此必熊李從

中播弄然忠逆豈竟形同木偶爲熊李玩弄股掌之上耶

此中實在底蘊未能盡悉惟聞熊李錢聯爲一氣合四人

所部實有三四萬人忠逆見其人眾亦未敢輕以下手此

說亦似近情總之此事一誤於遷延再誤於不密而原其致誤之由有非筆墨所能盡者當賊眾久頓杭城之時果能遴選一將統水陸萬人糾合內應乘虛襲之兵法攻其必救無論蘇事能否得手而杭圍之解似有操券之望乃遲疑不決坐誤事機此既往之事不必再說徐氏兄弟心頗可嘉惜才識不足以副之熊李錢非真有忠肝義膽徒以見賊中所作所為將來必致滅亡而後已因之欲脫身來歸並欲藉獻城之功以博取名利其居心實只如此李某與楊子芳云倘此間果像成事樣子則並非得當報漢有衆人亦即住下不作他圖矣此是實話古人風也今事不成而機已露雖能瞞過一時而後患終

屬可慮成敗關頭全繫天意耳至西人助順一節前日巴

酋到滬介見蘇紳旋約鄙人與敏齋同晤央渠相助巴云

中國有諺語成則為王敗則為寇

巴酋一口官話於中國情形無不周悉

觀此賊實是寇非王唯寇勢已大欲就掃滅斷非一年半

載即能了事我外國人與彼無隙今欲克復甯波保守上

海非用武不可一經用武即啟釁端中國人作事每每有

頭無尾將來開釁之後萬一撩在我外國人身上如何處

置今欲幫同剿賊必須預籌一綫到底之法請大府先行

入奏伊亦稟明駐京公使聽候示下辦理等語

用意本在甯波上海

而不能不統及金陵即巴酋所謂一綫到底也

蘇浙紳士公呈內所稱借兵克復

蘇常金陵之說蓋曲從巴酋之意也事勢至無可如何不
得不委曲遷就兄視滬城無西人其能屹然否耶言之可
歎所至憂者川沙奉南俱為賊陷浦東完善之地徧為逆

賊蹂躪松江寶山雖有曾軍門秉忠李參將恒嵩姜參將

德曾李守松江姜守寶山曾每戰必身先士卒故所駐守向有功惟馭下過寬所部每多犯法未能約束李

於安營設壘頗善布置而未能與士卒同甘苦姜樸訥不識字而敢戰有謀畧三君固鐵中錚錚矣此外亦尚有可
用之才在乎司而勢過盛亦大有岌岌之勢上海稅捐
命者識拔耳

兩緦餉無來源即能苟延亦將坐困大府焦心急慮寢食
不遑奈軍務錮習已深一時竟不能挽回至於鎮江湖州
兩郡雖尙固守逆賊闖關已久欲得甘心若無外援恐難

久持此數處爲克復蘇城根本設有不虞則東南全局愈不堪設想矣此江浙官紳士商所由飲食禱祝延頸以望滌帥大兵之早到也緣奉諄詢特撥冗拉雜奉陳筆凍手僵語不能盡臨穎皇恐皇恐

永昌徐少蘧戊卿兄弟

昨日專布一緘計塵英照李熊二君已回來否甚念甚念賢昆玉抱不世出之才行將建非常之業出生民於水火此不獨爲東南半壁計實爲天下全局計也惟事機已露遲則生變竊爲賢昆玉危之蓋辦此等大事貴密貴速今舉動已將旬日凡有從蘇州無錫一帶來者紛紛藉藉眾

口其傳比間賊中已半多知覺而賢昆玉號召槍船民團
 冠帶點名亦已眾目昭彰並聞蘇城附近各賊卡賊館均
 已聞風逃匿如此光景固已勢成騎虎欲罷不能弟固願
 事之早成而心服賢昆玉之忠肝義膽苟有所見不忍緘
 默所望賢昆玉統籌全局默察情偽詳加留意萬一忠逆
 到蘇事有中變應如何預為地步之處必須先事籌備保
 家保國盡在頃刻之間此弟肺腑之言實為賢昆玉身家
 計不僅為大局計也尚祈加察為幸昨得蘇信謂偽忠逆
 已由杭起程各偽官均於初五日即今之十六日赴平望
 迎接想係確音如能因其傾巢而出乘虛直搗亦一策也

李熊二君何以尙未回來一切還望隨時密示是所至盼
松滬防守尙嚴附此告慰嘉興陳炳文聞在杭砲斃未知
確否時事艱難諸望賢昆玉保愛慎重臨穎不勝依系之
至

楊子芳太守 徽猷

十五日馳寄一信計必達覽日來松滬防禦尙嚴上海洋
涇浜已設立會防公所西兵已議明協守當可無虞矣所
事有無消息李熊何以尙未回來少蘧昆玉任此大事忠
肝義膽令人心敬惟勢成騎虎遲則有變且忠逆聞已由
杭啟程卽日可到而熊李不歸能否從速舉行殊難預決

令人盼念之至尊處曾否有信望卽示知

蔣梅坡直牧

懋勳

前得秦郵所寄惠書具悉壹是緣天熱事叢遲遲作答嗣聞榮篆沐陽不禁心喜並聞轄境逼近捻氛又深爲之憂下車伊始正值艱虞抑何事會之不巧湊也旣而思之殆所謂錯節盤根乃別利器者非耶光景之窘不待言矣差幸吉星拱照疆宇乂安一時撫輯籌防必有一番施展但希自寬懷抱勉節辛劬以俟苦盡甘來升遷善地皇天不負上憲亦不負也

弟綜理各局釐捐已形粟鹿加以委辦招撫等事軍書旁午昕夕籌思時事櫻心精神頗形疲憊

以海隅蕞爾養兵三萬有餘又須接濟鎮餉軍需甚苦其
多而寶山上海松江金山奉賢處處賊蹤環伺防不勝防
兵勇又尙覺其少坐困非策是以半年來密通綫索增益
勁兵攻其腹心以爲克復蘇垣之計乃近日平乍大股賊
匪竄踞張堰圍困金山營盤志在浦東浦東危全局尙可
問乎現在會軍門督師堵剿中丞飛調精銳前往援應並
用輪船濟師但期卽刻剿退庶不爲所牽掣耳八月朔日
日月合璧五星聯珠爲千百年難得之瑞是日聞係
皇上登極而安慶省城確於是日黎明克復麻祥發軔當
可重覩承平也笠山人安頓釐局帳房聊且敷衍亦不免

忙碌禮庭仍在弟處知念縷縷布陳不盡

雷儀甫直牧

鳳翥

奉展七月廿八日惠書兩緘承示鎮城軍務及籌餉情形

備悉一一鎮營將士奮勇屢挫賊鋒此由

將軍督辦

拊循激勵

孚輯軍心故能眾志成城力摧強寇但冀餉源日裕士馬

健騰斯立功尤易耳

弟

滬上趨公祇形栗鹿日前平湖嘉

善賊匪大股東犯竄陷金山張堰圍攻滕協戎營盤勢甚

猖獗曾軍門親督各軍堵剿中丞亦調馮協戎帶勇會剿

并發輪船前往以解滕營之圍光景即可擊退惟中丞亟

思進取蘇垣而平乍嘉善青浦嘉定之賊三面環伺時刻

蠢動周遭三四百里水陸大小徑路糾紛牙錯處處可虞
以目前兵力設防尙形單薄因此深入之計不能不加意
慎重耳滬上安謐照常師竹庵之事遵當極意關照可也

金山陳百倉大令

紹本

接誦手書謹悉一一此次平乍賊匪竄陷張堰衛城嘉善
踞匪又復逼近洙涇逆謀狡詭股數眾多必仗尊處竭力
提防分頭堵禦賢勞可想昨接會軍門馮協戎來函知己
水陸會合堵剿並施並先救滕營以固大局中丞亦知滕
營危急用輪船先運火藥米石前往並卽調勇航海應援
計數面會攻定可得手洙涇陸路乏兵弟當轉請中丞擘

畫一而函致軍門迅爲添設防堵至金邑各鄉慘遭賊掠
剿退之後光景豈能如前畝捐一層目前斷難舉辦賊氛
稍平上臺自有章程弟亦必力爲關照不必過縈清慮也
仍希隨時飛示好音爲盼

又

前復一函計已入覽茲接惠書承示洙涇防務緊急及張
堰情形謹悉壹是此時賊氛四出處處戒嚴吾兄綏輯巡
防賢勞懋著甚慰甚念惟昨今曾軍門馮協戎李參戎先
後疊次信來曾軍門信云初九日由營至洙安慰百姓並
將由千巷出竄之賊擊回初十四路攻張堰小有斬獲千

巷已經肅清因雨收隊其所述極詳而來書則云尙未動手馮協戎於初九紮亭林初十卽與李游戎各軍進攻張堰舉旗馘耳松江李參戎信所述亦同已差弁來滬馳報而來書則云尙在葉榭殆傳聞異詞耶不勝系念之至洙涇金山等處均關全局中丞時刻厯懷弟將來書所云婉爲轉陳已荷飛致曾馮各營力剿賊氛以固門戶卽會軍門及馮李諸軍亦必督率將士實力堵剿不致貽患地方此後洙地光景及軍務賊情仍望隨時示悉至疊奉來函旣無官封信尾又不記時日不知何時所發務希惠寄時詳記日子時刻爲囑

又

初十日覆寄一函已遞到否茲接來書仍不註明時日不知何日所發細揣述示情形大約係十一二日間事已具悉矣午間接會軍門十三日信松江李協戎十四日信已知張堰亭林柘林近日軍務一切馮協戎昨由柘林進援滕營連日陰雨不知能否得手深爲焦急中丞頃又飛調寶山奮勇航海援應矣廣成張堰一帶賊匪叢聚固藉官軍堵剿亦賴鄉團攔截庶賊不致乘隙闖入聞後岡勇歷著戰功最爲卓卓尙望吾兄激勵而獎勉之一俟克奏捷音弟當轉請中丞優加獎賞也此後來緘務希註明日時

以便核對不致茫然是荷至承囑云云必當代爲切陳

又

二十日已刻接十七日手書承詳示軍務均係實在情形
曷勝悵悶刻下亭林南橋均失賊匪卽將東竄浦東萬分
貼危而楓涇賊聚益多逼近洙涇亦甚險極惟有足下會
同營局設法堵禦以固松城屏蔽是爲至要軍事墮壞至
此雖曰天數豈非人謀不臧吾兄乍莅新任適值艱難不
因錯節盤根何以別利器耶半月來殫竭忠誠支撐險要
固結人心上臺亦極知之足下之功定垂不朽前囑轉請
借給道餉四千一節已承方伯允行昨已專函奉覆矣軍

務情形仍望隨時飛示爲盼

張恕齋大令 興詩

頃奉八月二十日大移內開本月十六日有晶頂人手持名帖爲收復招降事宜過境缺資借助盤費查閱藩憲諭內印文模糊比較亦畧小又另有一諭查係會防處關防訊名錢慶昌安徽懷遠人本是旗丁與湖州高花農熟識因友人李際蕃在上海招降信知伊去辦事奉有藩憲及吳趙諭單現在賊首汪費魏均在溧陽地方伊都認識擬從焦山對渡來署想借盤費等因查此事在湖城未陷之先有同鄉同寅章月樵明府乃登偕同錢姓者來滬爲宜

與所屬之烏溪口有管帶炮船賊目與錢姓認識該賊目
志願投誠請給諭前往招降爲援解湖州賊圍之計其時
弟與趙吟蕉爲桑梓情急正在無法可想之時姑應其請
給諭令其趕辦至藩憲會否給諭一時記不清楚今湖城
已陷事隔半載該旗丁所辦之事毫無成效亦不稟覆乃
持諭到貴署借取盤川實屬不安本分難保無藉端招搖
情事且其中有無影射冒混亦不可知應請閣下就近將
該旗丁解赴常鎮道衙門訊明如果卽係前此章明府所
保之人應如何訊釋發落之處由常鎮道核奪是否有當
仍請裁示原諭仍繳還以便一并送道也

覆李某

雲山秋帆來兩接手書均已心悉閣下所犯過重非他人可比前此覲憲將閣下被陷苦情現在糾集同志血誠反正并辦內應各事代爲詳晰密奏昨已奉

旨一一允准并根公亦有轉機矣現在根公喜甚想閣下得此信必更喜不可支也從此去逆從順有出頭之日建功立業流芳百世脫水火而履康莊屬在素好亦爲眉飛色舞惟尙有心腹之言爲閣下告之前此令郎南官到滬此間留住而覲翁與曉翁即囑弟善爲看待當爲延請業師在撫恤局中教讀恐一人寂寞並令張順之子作伴每

日另給菓子茶點故南官甚爲快活不願他往繼而尊堂到滬卽囑張順迎至伊家供給豐備前此尊堂欲向閣下討金蠲頭覲翁卽囑曉翁代打一雙交用故尊堂亦甚快活不願他往此詢來往熟識人卽自知之非好看話也乃閣下屢次來信欲請送出雖係假話而並無另信聲明無怪動人之疑弟從旁力剖始爲釋然現在蘇城夥黨屢出竄擾雖經預先密報屢被我軍擊退而地方百姓大遭荼毒閣下旣在彼處自應設法勸阻免得生靈受害此日積一分陰騭將來自有一分報應倘袖手不爲設法則不免有造孽之處良可寒心至通商本錢弟處向不絲毫涉手

另有涉手之人可詢城北公自知也尊處兩次會用已有一萬數千兩業由城北公處會劃交付其經辦此中銀錢乃楊太守與二徐專司之耳此後總得小有效驗之處弟好向上司進言目前雖爲說項亦無益也見字望將彼中各處情形分別明示通商之舉固不能性急究應如何入手尊處現在如何安排吳保勝會否與約金二戈處既已扣定有無生法之處一一詳晰示知總得使上司看見來書實心爲國家辦事自然相信會滌帥一到蘇常不但尊處之功不顯卽我輩皆落人後矣乘其未到之先必須預爲布置得有小小效驗通商本錢當爲稟商自無不可照

辨地城北公近在咫尺一切尙望就近與商彼此呼吸相通均有裨益尊堂及令郎相見之日必得閣下建功之後否則豈特不能見而已哉閣下心地明白自能領會也尙有未盡之言囑雲山李三面述不宣

溯自咸豐庚申金陵大營潰散三吳兩浙相繼淪陷東南處處賊蹤祇留滬上一隅四面受敵兼瀕大海談兵家皆視爲絕地 平齋丈與中丞薛公方伯吳公支持危局共濟時艱兩載辛敏爲後來恢復根本如擴充釐捐則軍營飽騰所自資也密辦招撫暗設內間則蘇逆獻降所由致也募洋槍隊立會防局則中外合力彘兵効順之明驗也備火輪船遠迎楚師則又時局一大轉圜而爲中國製船之先幾也當夫艱難籌畫志切匡時日論者震其才猷甚或所求不遂從而訾議迨賊氛告殄業定中興凡向所經營創始之方卒一一見諸施行以助成偉烈然後知嚴光

鄧禹異其出處初不異其經濟也其時珥筆襄贊者爲今
太僕吳清卿丈家外舅戴禮庭先生仁嘗從先生游因得
備聞緒論竊觀 丈籌餉治軍與中丞方伯往來書札每
每公事旁午筆不停披凡有酬荅隨揮隨發都不留稿此
一卷爲哲姪樸堂主政從叢殘紙麓中掇拾而存實不過
什伯之一二耳仁爲幕中舊侶越二十年得預參校之役
重讀是錄猶恍在鞞鼓聲中倏忽完繕時焉光緒八年壬
午四月上浣姻世愚姪朱培仁謹跋